

মাসুদ রানা

সিক্রেট এজেন্ট

কাজী আনোয়ার হোসেন



সিক্রেট এজেন্ট

প্রথম প্রকাশ: ২০০২

এক

যান্ত্রিক গোলযোগ দেখা দেয়ায় প্লেন ঘুরিয়ে নিয়েছে পাইলট। এই মুহূর্তে হাথা ও আকিয়ারবের মাঝখানে রয়েছে ওরা। নিচে বিশাল বনভূমি ও দুর্গম পাহাড়। প্লেনে ওরা সব মিলিয়ে মাত্র তিনজন-পাইলট, কো-পাইলট ও একমাত্র প্যাসেঞ্জার ড. হুহিত হায়দার। রাতেই রেস্ট্রনে পৌছাতে হবে, তাই প্লেনটা চাটার করেছেন ড. হায়দার। চার সীটের ছোট্ট প্লেন, তাঁর পাশের সীটটা খালি।

প্লেনের একমাত্র এঞ্জিন খক খক করছে, নিয়মিত ছন্দে বিঘ্ন ঘটছে ঘন ঘন। অ্যালুমিনিয়ামের শরীর মাঝে-মধ্যে কেঁপে উঠছে থরথর করে। কাছাকাছি কোন এয়ারপোর্ট নেই, একমাত্র ভরসা সিতওয়ে বা আকিয়ারবের সামরিক ঘাঁটির এয়ারস্ট্রিপ। কিন্তু সেটা পঞ্চাশ মাইল দূরে এখনও, পৌছানো বোধহয় সম্ভব হবে না।

‘গোলমালটা ধরা পড়ল?’ চিৎকার করলেন ড. হায়দার, নাহলে পাইলট শুনতে পাবে না।

ইন্সট্রুমেন্ট প্যানেলে লাল ওয়ার্নিং লাইট জ্বলছে। ব্যস্ত হাতে লিভার টানছে আর বোভাম টিপছে পাইলট। ফ্যুয়েল গজের কাঁটা দ্রুত নিচে নামছে। এঞ্জিনের শব্দ শুনে মনে হলো আক্রোশে ফুসছে, পারলে ভেঙে টুকরো টুকরো করে ফেলে নিজেকেই।

‘ফ্যুয়েল লাইনে লিক,’ জবাব দিল কো-পাইলট, প্যাসেঞ্জারকে অন্ধকারে রাখতে রাজি নয় সে। ‘গরুটা পাচ্ছেন না? গ্যাস!’

ঝাঁঝাল ধোঁয়ায় ভরে উঠল কেবিন। এঞ্জিন বন্ধ হয়ে গেল, তারপর যেন অনিচ্ছাসত্ত্বেও আবার চালু হলো, আগের চেয়েও বেড়ে গেল শুকনো কাশি। স্পীড কমে গেছে। নিচে খসে পড়ছে ওরা।

কি ঘটতে যাচ্ছে বুঝতে পেরে পাশের খালি সীটের দিকে একবার তাকালেন ড. হায়দার। তাঁর তরুণ সহকারী রায়হানের থাকার কথা ছিল ওখানে। কিন্তু প্লেন টেক-অফ করার নির্দিষ্ট সময়ে এয়ারস্ট্রিপে আসেনি সে। একজন মেকানিককে জিজ্ঞেস করায় সে বলল, রায়হানকে বার্মিজ লুণ্ঠি পরা অবস্থায় একটা মদের দোকানে দেখেছে, টাল হয়ে আছে মদ খেয়ে।

কন্ট্রোলার সঙ্গে মরিয়া হয়ে যুদ্ধ শুরু করলেও প্লেনের অধোগতি থামাতে পারছে না পাইলট। এঞ্জিন বন্ধ করে ফ্ল্যাপ কাজে লাগাল সে, প্লেনের স্পীড যাতে লিক করা ফ্যুয়েলে আশ্রয় না ধরায়। ‘কোন কাজ হচ্ছে না। প্লেন নামাতে হবে।’

‘কোথায়?’ প্রায় আতর্জন করে উঠল কো-পাইলট।

নিচের গভীর জঙ্গল ও পাহাড়ে সাদা আলো ফেলেছে কানা ভাঙা চাঁদ, বড়

আকারের ফাঁকা বা সমতল জায়গা চোখে পড়ছে না কোথাও।

‘প্যারাসুট?’ প্যাসেঞ্জার ড. হায়দার জিজ্ঞেস করলেন।

পাইলটের মুখে গম্ভীর হাসি, মাথা নেড়ে বলল, ‘নেই। অবশ্য আর সময়ও নেই।’

জমিন দ্রুত উঠে আসছে। নীলচে ও ভৌতিক শিখা ছড়িয়ে পড়ল এঞ্জিন কাউলিং-এর ওপর।

‘আগুন ধরে গেছে!’ চৈচিয়ে উঠল কো-পাইলট।

পাইলট হঠাৎ হুমড়ি খেয়ে পড়ল জানালার ওপর। ‘আরে! থামো...থামো! কি যেন দেখতে পাচ্ছি...’

‘কি?’

‘ওই তো, সরাসরি সামনে--দেখে মনে হচ্ছে লেক!’

দীর্ঘ একটা উপত্যকার শেষ প্রান্তে ওটা। লেক না বলে, বিশাল পুকুর বলাই ভাল, চাঁদের আলো পড়ায় কালো আয়নার মত লাগছে। তবে বেশিক্ষণ ওটা দেখা গেল না। জ্বলন্ত এঞ্জিনের আগুন আর ধোঁয়ায় দৃশ্যটা ঢাকা পড়ে গেল।

‘প্লেনটা ওখানে ফেলার চেষ্টা করছি আমি,’ বলল পাইলট, ভাবলেশহীন কণ্ঠস্বর। ‘রেডিওতে আমাদের পজিশন জানাও।’

হাতের মাইক্রোফোন মুখের সামনে তুলে কো-পাইলট চিৎকার করে বলল, ‘মেডে! মেডে!’

পুরো মেসেজটা প্রচার করার সময় পাওয়া গেল না। উপত্যকার বিশ গজ ওপর দিয়ে ছুটে এসে লেকের মাঝখানে ঝাঁপিয়ে পড়ল প্লেন। পড়েই টুপ করে ডুবে গেল ওটা। একে তো গভীর রাত, তার ওপর এলাকায় কোন জনবসতি নেই, এত বড় একটা দুর্ঘটনার কথা জানতে পারল না কেউ।

দুই

দশ বছর পরের ঘটনা।

বার্মার নাম বদলে এখন মায়ানমার। রাজধানী ইয়ানগন থেকে কয়েকশো মাইল দূরে আকিয়াব। মায়ানমার-বাংলাদেশ সীমান্তের কাছাকাছি ছোট্ট একটা শহর পুতাপাই। পুতাপাই মিশনারি স্কুলের অধ্যক্ষ ও স্কুল সংলগ্ন চার্চের যাজক ফাদার বেঞ্জামিন উইন শেইন আশপাশের গ্রাম থেকে রোগী দেখে ফিরে আসছেন। ফাদার শেইন কেবল পিতা নন, একজন চিকিৎসকও বটেন। যে-সব রোগী তাঁর কাছে আসতে পারে না, তিনি নিজেই তাদেরকে দেখতে যান। আকাশে মেঘ নেই, চাঁদের আলোয় পথ চিনতে তাঁর কোন অসুবিধে হচ্ছে না।

বেশ রাত হয়েছে, চৌরাস্তায় কোন লোকজন নেই। নামেই শহর, আসলে বড়সড় একটা গ্রাম, খেয়েদেয়ে সন্দের পরই ঘুমিয়ে পড়ে মানুষ। ক্লাস্ত পা

দুটোকে টেনে টেনে চার্চের দিকে হাঁটছেন ফাদার শেইন। হাত-মুখ ধুয়ে এক বাটি গরম সুপ খাবেন তিনি, তারপর তিনিও বিছানায় গা এলিয়ে দেবেন।

অকস্মাৎ একটা বাড়ির কার্নিসে বিস্ফোরিত হলো কয়েক জোড়া ডানা, ফাদারকে চমকে দিয়ে পঁচানো সিঁড়ির মত আকৃতি তৈরি করে আরও ওপরে উঠে যাচ্ছে কিছু প্রাণী। বাদুড়, ভাবলেন ফাদার।

কিন্তু না, বাদুড় নয়। পাখি। প্রতি মুহূর্তে সংখ্যা বাড়ছে ওগুলো, মেঘের মত ঢেকে দিচ্ছে আকাশটাকে। পুতাপাই ছেড়ে পালাবার সময় আতংকে কর্কশ ডাক ছাড়ছে।

শহর জুড়ে ঘেউ ঘেউ শুরু করল কুকুরগুলো।

অন্ধকার জানালা হলদেটে আলোয় ভরে গেল শহরের লোকজন জেগে গেছে।

উঁচু টাওয়ারের মাথায় চার্চের পুরানো লোহার ঘণ্টাটা ঢং করে ভোঁতা একটা আওয়াজ করল। একটু পর আবার। চার্চ সংলগ্ন মিশনারি স্কুলের গেট খুলে গেল, স্কুলের প্রধান শিক্ষক হস্তদন্ত হয়ে বেরিয়ে এলেন বাইরে। ‘ফাদার শাইন! এত রাতে বেল বাজাচ্ছে কে?’

‘স্যার, মি. গুডফেলো, বেল আপনাআপনি বাজছে!’ হতভম্ব ফাদার বললেন। ঘণ্টা এখন থেমে থেমে নয়, বারবার একনাগাড়ে বাজছে।

‘ভূমিকম্প!’ হেডমাস্টার গুডফেলো চিৎকার করে উঠলেন। ছুটে এসে ফাদারের হাত ধরলেন তিনি, টেনে সরিয়ে আনলেন চার্চ ভবনের পাশ থেকে খোলা জায়গায়।

শহরের লোকজন ভীত সন্ত্রস্ত হয়ে বাড়ি থেকে ছিটকে বেরিয়ে এসে যে যেদিকে পারে ছুটছে।

চৌরাস্তা কাত হলো, ওঠা-নামা শুরু করল অশান্ত সাগরের মত। ঝন ঝন শব্দে ভেঙে পড়ছে জানালার কাঁচ। ছাদের টালি আর ভাঙা পাঁচিলের আবর্জনা জমে উঠল রাস্তায় রাস্তায়। চার্চের ঘণ্টা ঢং-ঢং করে বেজেই চলেছে।

তারপর এক সময় আলোড়ন ও কাঁপুনি ধীরে ধীরে কমে এল। আফটারশক হিসেবে দু’একটা ঝাঁকুনি লাগল বটে, তবে তাতে তেমন কোন ক্ষতি হলো না। আটকে রাখা নিঃশ্বাস ছেড়ে ফাদার বেঞ্জামিন শেইন বললেন, ‘সকল প্রশংসা ঈশ্বরের। তিনি আমাদের রক্ষা করেছেন।’

শহরের লোকজন ফিরে আসছে। এদিকে খ্রিস্টানদের সংখ্যা কম নয়, তারা ফাদারের সঙ্গে চার্চে গেল প্রার্থনায় যোগ দিতে। পুরোহিতের ডাকে বৌদ্ধরা চলে গেল প্যাগোডার দিকে। এলাকায় একটা মসজিদ থাকলেও, বেশ দূরে সেটা, সেদিক থেকে মোয়াজ্জিনের অম্পষ্ট গলা ভেসে এল-আযান দিচ্ছেন তিনি।

শ্বাপদসঙ্কুল বনভূমির কারণে আকিয়াবের দূর-দূরান্তে আসা যাওয়া করা অত্যন্ত কঠিন। পুরো ছত্রিশ ঘণ্টা পর ফাদার বেঞ্জামিন শেইন জানতে পারলেন ভূমিকম্পটা আসলে সামান্য একটু নাড়া দিয়ে গেছে পুতাপাই শহরটাকে। মূল ধাক্কাটা লেগেছে বিশ মাইল দক্ষিণের খোলা একটা উপত্যকায়।

খামারবাড়ির মালিকরা রাখাল পাঠিয়ে ফাদার শেইনকে খবর দিল। ভূমিকম্প নাকি বিস্ময়কর একটা ঘটনা ঘটিয়ে গেছে। ফাদার যেন একবার এসে দেখে যান।

তিন

রাজধানী ইয়ানগন। দৈনিক মায়ানমার-এর অফিস বিল্ডিং। রাত দেড়টা।

কাইয়ো মোয়ি রীতিমত বিমূঢ়। 'ভূমিকম্পে ছোট একটা লেকের সমস্ত পানি বেরিয়ে গেছে। তলায় পাওয়া গেছে বিধ্বস্ত একটা প্লেন। দশ বছর আগে নিখোঁজ হয়েছিল এই প্লেন। স্ট্রেঞ্জ!'

'ওটা সাধারণ কোন প্লেন নয়,' পত্রিকার ম্যানেজিং এডিটর হল্‌লা উইন বললেন। ভদ্রলোক এত রোগা, দেখে মনে হয় অসুস্থ। চোখ দুটো সব সময় ক্লান্ত থাকায় আসল বয়স পঞ্চাশের চেয়ে দশ বছর বেশি দেখায়।

পত্রিকার মালিক ও প্রকাশক কাইয়ো মোয়ি দেবতুল্য চরিত্রের অধিকারী। তাঁর গুণের কথা লোকের মুখে মুখে ফেরে। পরিশ্রম, অধ্যবসায়, নিষ্ঠা ও সততার সমষ্টিই যে সাফল্যের চাবিকাঠি, তিনি তা প্রমাণ করে দেখিয়েছেন। 'কি কারণে ওটা সাধারণ প্লেন নয়?' নির্লিপ্ত স্বরে জানতে চাইলেন ভদ্রলোক। সবাই জানে রহস্য ও নাটকীয়তার ভক্ত তিনি; এই মুহূর্তেও ভাল করে তাকালে কৌতুকের ঝিলিক দেখা যাবে তাঁর চোখে।

'প্লেনটা পৃথিবী বিখ্যাত একজন বাঙালী আর্কিওলজিস্ট ড. মুহিত হায়দারকে নিয়ে নিখোঁজ হয়েছিল।'

'তো?'

খিন পায়েনি, হল্‌লা উইনের অ্যাসিস্ট্যান্ট, বলল, 'আমরা খোঁজ নিতে গিয়ে আশ্চর্য সব কথা শুনতে পেয়েছি। মায়ানমার আর্কিওলজিকাল সোসাইটি ব্রিটিশ আর্কিওলজিকাল সোসাইটির মাধ্যমে ড. হায়দারকে অনুরোধ করেন আমাদের ফালাম অঞ্চলটা খুঁড়ে-টুড়ে পরীক্ষা করে দেখার জন্য। আমরা সবাই জানি, বহুকাল থেকে বলা হচ্ছে ফালাম অঞ্চলে প্রাচীন মং ও বৌদ্ধ সভ্যতার ধ্বংসাবশেষ লুকিয়ে আছে। গুজব হলো, ড. হায়দার নাকি মাটি খুঁড়ে ওই দুই সভ্যতার নমুনা খুঁজে পেয়েছিলেন। কিন্তু তা আবার মাটি চাপা দেয়া হয়েছে।'

'সেকি! কেন?'

'মাটি খুঁড়ে যে শহরটা পাওয়া যায় সেখানে নাকি কোটি কোটি ডলারের আর্টিফ্যাক্ট ছিল,' বলল খিন পায়েনি। 'কিন্তু সে-সব আমাদের সরকারের হাতে তুলে দিতে ব্যর্থ হন ড. হায়দার। বলা হয়, সমস্ত আর্টিফ্যাক্ট তিনি মেঝে দেয়ার প্ল্যান করেছিলেন। আবার এ-ও শোনা যায় যে রোহিঙ্গা গেরিলারা সব লুট করে নিয়ে গেছে। সে-সময় পাকিস্তানী ইন্টেলিজেন্স সার্ভিস আইএসআই রোহিঙ্গাদের

অস্ত্র ও ট্রেনিং দিয়ে সাহায্য করছিল। তবে এ-সবই বাতাসে ওড়া কথা। দশ বছর আগে ঠিক কি ঘটেছিল আজ আর তা নিশ্চিতভাবে জানার কোন উপায় নেই।

‘ইন্টারেস্টিং, তবে শুধু অ্যাকাডেমিক দৃষ্টিকোণ থেকে,’ বলে মুখের সামনে হাত এনে হাই তুললেন কাইয়ো মোয়ি। ‘কারণ পরে তো জানা গেছে প্লেনটা সনাক্ত করতে ভুল হয়েছিল। ওটা দশ বছর আগের সেই প্লেন নয়। তিন বছর আগের একটা সার্ভে প্লেন।’

‘আমরা তা মনে করি না,’ বললেন হল্লা উইন।

‘কিন্তু দু’দিন আগে আপনিই তো আমাকে এই কথা বলেছেন!’

কোল থেকে মোটা একটা ফোল্ডার তুলে ডেস্কের ওপর রাখলেন ম্যানেজিং এডিটর হল্লা উইন। ‘দু’দিন আগে এটা আমি পাইনি।’

নিজের রিভলভিং চেয়ার ছেড়ে উইনের পিছনে চলে এলেন মোয়ি, উইনের কাঁধের ওপর দিয়ে ফোল্ডারটা খুলতে দেখেছেন। ভেতর থেকে বেকুল টাইপ করা স্টেটমেন্ট, জেরোস্ক লগবুক এন্ট্রি, ফ্লাইট প্ল্যান, ম্যানিফেস্ট, বিধ্বস্ত প্লেনের ফটোগ্রাফ ইত্যাদি। ‘মাল-মশলা তো কম নয়,’ বললেন তিনি। ‘ওগুলোর অর্থ কি?’

‘ওগুলো প্রমাণ করে প্লেনটা ড. হায়দারেরই। আরও প্রমাণ করে, ব্যুরো অভ অ্যারোনটিক্স-এর ইন্সপেক্টর গাইয়ো সান ওটাকে জিয়োসার্ভে প্লেন বলে মিথ্যে সার্টিফিকেট দিয়েছেন।’

‘ভাল করে না জেনে কাউকে মিথ্যুক বলা ঠিক নয়,’ বললেন মোয়ি। ‘ভাঁর হয়তো ভুল হয়েছে।’

‘সেক্ষেত্রে তিনি আমাদের কোন ধরছেন না কেন?’ জানতে চাইল খিন পায়োনি। ‘সাক্ষাৎকার গ্রহণের প্রস্তাব দেয়া হয়েছিল, লোক মারফত প্রত্যাখ্যান করেছেন। সং একজন মানুষের আচরণ এরকম হতে পারে না।’

‘নিজের ভুল সহজে কেউ স্বীকার করতে চায় না,’ নরম সুরে বললেন প্রকাশক ভদ্রলোক। ‘বিশেষ করে ব্যুরোক্র্যাটরা।’

‘এরমধ্যে আরও জটিলতা আছে,’ বললেন হল্লা উইন। ‘কেউ একজন চাইছে এই ব্যাপারটা আমরা যেন ইনভেস্টিগেট না করি।’

‘হোয়াট!’ এতক্ষণে প্রকাশক মোয়ি যেন জেগে উঠলেন। সংবাদপত্রের স্বাধীনতার প্রশ্নে কোন অবস্থাতেই আপস করতে রাজি নন তিনি। ‘সব কথা খুলে বলুন আমাকে।’

‘হতার মাইয়াতকে আমি ফলো আপ অ্যাসাইনমেন্ট বুঝিয়ে দেয়ার পর নিজের পরিচয় না দিয়ে এক লোক আমাকে টেলিফোন করেছে, আমার অফিস কামরায়,’ বললেন উইন। ‘হুমকি দিয়ে বলল, সংশ্লিষ্ট সবার ভালর জন্যেই এ-ব্যাপারে আমরা যেন কোন খোজ-খবর না করি।’

‘ভাল লাগল! দারুণ উদ্বেজনা বোধ করছি!’ হাতের তালুতে ঘুসি মারলেন মোয়ি। ‘কেউ হুমকি দিলে মনে করতে হবে তার পিছনে উপযুক্ত কারণ আছে। স্টোরিটা জমবে!’

‘আমি জানতাম আপনি এ-কথা বলবেন।’

এগিয়ে এসে একটা জানালা খুললেন মোয়ি। ‘চুরুটের বিষাক্ত ধোঁয়ায় আমার অফিসটাকে আপনারা গ্যাস-চেম্বার বানিয়ে ফেলেছেন।’ খোলা জানালা দিয়ে আসা তাজা বাতাস বুক ভরে নিলেন। উঁকি দিয়ে বারোতলা নিচের রাস্তায় লোকজন বা যানবাহন কিছুই দেখতে পেলেন না। গ্রাউন্ড ফ্লোরে পত্রিকা ছাপার কাজ চলছে, তবে সেখানকার ব্যস্ততা ও শোরগোলের কোন প্রভাব এখানে পড়ছে না। ‘আমাদের হত্যার মাইয়াত গেল কোথায়? এটা তো তারই স্টোরি, তাই না?’

‘সে এখনও ইন্সপেক্টর গাইয়ো সানকে ধরার চেষ্টা করছে,’ পায়োনি বলল।

‘ধরার চেষ্টা মানে তার বাড়ির ওপর নজর রাখছে,’ বললেন উইন। ‘আমরা আসলে আপনার অনুমতির অপেক্ষায় আছি,’ মি. মোয়ি।’

‘গো অ্যাহেড!’

‘হেট!’

অফিসের বাইরে, করিডর থেকে ভোঁতা একটা চিৎকার ভেসে এল।

‘ও কিসের আওয়াজ?’ ভুরু কঁচকালেন মোয়ি।

তিনজনই ওঁরা কান পাতলেন। কিন্তু আওয়াজটা আর হলো না।

পায়োনি কাঁধ ঝাঁকাল। ‘দারোয়ানরা ছাড়া আর কারা হবে! ছোকরাগুলো ফাজিল টাইপের।’

ডেস্কের ডকুমেন্টগুলো নেড়েচেড়ে দেখছেন মোয়ি। ‘হত্যার মাইয়াত সত্যি খেটেছে।’

‘এ-সব কিন্তু মায়াত সংগ্রহ করেনি,’ বললেন উইন।

‘মানে? তাহলে এ-সব আপনি কোথেকে পেলেন?’

‘পিয়ন গোছের এক লোক দিয়ে গেছে। দিয়েই কেটে পড়েছে, কোন প্রশ্ন করার সুযোগ পাইনি।’

‘ব্যাপারটা আমার ভাল ঠেকছে না।’ গম্ভীর হলেন মোয়ি। ‘আমাদের প্রতিদ্বন্দ্বী আছে, কেউ ভুল তথ্য দিয়ে আমাদেরকে বোকা বানাবার প্ল্যান করেনি তো?’

‘সূত্র অজ্ঞাত হলেও, তথ্যগুলো ভুয়া নয়,’ বললেন উইন। ‘চেক করে দেখা হয়েছে।’

চিবুকে হাত বোলাচ্ছেন মোয়ি। ‘পরস্পরবিরোধী দুটো পক্ষ। এক পক্ষ চাইছে তদন্ত করে গোপন সব তথ্য যাচাই ও প্রকাশ করি আমরা। আরেক পক্ষ ছমকি দিয়ে বলছে সব গোপন থাকুক। ভাবছি, কি কারণে দুই পক্ষের কাছেই দশ বছর আগেকার একটা বিধ্বস্ত প্লেন এত গুরুত্বপূর্ণ হয়ে উঠল।’

‘ইনভেস্টিগেট করে সেটাই আমাদেরকে জানতে হবে,’ বললেন উইন।

‘কিন্তু তোমরা এরইমধ্যে অনেক বেশি জেনে ফেলেছ।’

তিনজনই ওরা অচেনা লোকটার দিকে ঘুরে দাঁড়ালেন।

লোকটা ছোটখাট, শরীরের তুলনায় মাথাটা প্রকাণ্ড। তার এক হাতে পিস্তল, অপর হাতে ব্রিফকেস।

পিছু নিয়ে তার একজন সঙ্গী ঢুকল চেম্বারে। দ্বিতীয় লোকটাকে কুৎসিতদর্শন একটা পাওয়ারহাউস বললেও চলে; ছয় ফুট ছয় ইঞ্চির কম নয়, গুটানো আঙ্গিনের নিচে লোমশ হাত দুটোর ফোলা পেশী অতি সাহসী মানুষের মনেও ভয় ধরিয়ে দেবে। সঙ্গে কোন অস্ত্র না থাকার কারণটাও পরিষ্কার-ওই হাতই তার অস্ত্র। চোখ দুটো এত ছোট, যেন সারাক্ষণ বুজে আছে।

ধাক্কাটা উইনই সবার আগে সামলে উঠলেন। ভয় নয়, রাগ হচ্ছে তাঁর। 'কারা তোমরা? এখানে কি চাও?'

'আয়-হায়, কি বলে!' ছোটখাট লোকটা হতাশ হবার ভঙ্গি করল। 'এ-ও বিশ্বাস করতে বেলো যে আমাদের তোমরা চিনতে পারছ না? কেন, তোমাদের পেপারে তো বেশ কয়েকবারই আমার কথা লেখা হয়েছে!'

'হ্যাঁ, বেশ কয়েকবারই,' তার সঙ্গীর গলা থেকে যেন গুড়গুড় করে মেঘ ডাকল।

'মি. উইন, কে এই লোক?' তিস্তকণ্ঠে জানতে চাইলেন মোয়ি।

'জানি না, মি. মোয়ি। জানি না, জানতে চাইও না। তবে এখনি ওকে চলে যেতে হবে, তা না হলে আমি পুলিশ ডাকব।'

'শান্ত হন, উইন,' বললেন মোয়ি। 'ওদের যদি কিছু বলার থাকে তো শুনুন...'

সবার চোখকে ফাঁকি দিয়ে একপাশে সরে যাচ্ছে পায়োনি।

'নাহ্! নাহ্!' খর্বকায় লোকটা সহাস্যে মাথা নাড়ছে, যেন কোন নাটকে পাগলের অভিনয় করছে সে। 'তুমি পুলিশ ডাকবে, এ আমি বিশ্বাস করি না। নাহ্!'

'দেখতে চাও?' বলে ডেস্কের ওপর রাখা টেলিফোনের দিকে হাত বাড়ালেন উইন।

খাটো লোকটা কোমরের কাছ থেকে একটাই গুলি করল। গুলির চেয়ে যেন বেশি শব্দ করল বিস্ফোরিত টেলিফোন সেটটা।

আতংকিত পায়োনির গলা থেকে দুর্বোধ্য একটা আওয়াজ বেরিয়ে এল, দেয়াল ঘেঁষে দাঁড়িয়ে থরথর করে কাঁপছে সে।

প্রকাশক মোয়ি মাথা উঁচু করে অটল দাঁড়িয়ে। তবে সামান্য একটু ফ্যাকাসে দেখাচ্ছে তাঁকে।

নিজের মুখে হাত বোলালেন উইন। ভাঙা টেলিফোনের টুকরো লেগে কয়েক জায়গার চামড়া কেটে গেছে। 'ঠিক আছে,' অসহায় একটা ভঙ্গি করে বললেন তিনি, 'তোমার ভাষা বুঝলাম। বেলো কি চাও তুমি।'

'এই, তুমি এত ঠাণ্ডা কেন?' হিজড়াদের মত অশ্লীল একটা ভঙ্গি করে বলল খাটো শয়তান।

'ঠাণ্ডা কেন?' একই প্রশ্ন পুনরাবৃত্তি করল তার সঙ্গী। 'ওস্তাদ, তুমি বললে শালাকে আমি গরম কাবাব বানিয়ে দিই। বানাই?'

'তোমরা কি টাকা চাও?' পকেটে হাত ভরতে গেলেন মোয়ি।

‘খবরদার!’ গর্জে উঠল লোকটা। ‘আমরা চোর-ডাকাত নই যে টাকা দিয়ে ভোলাতে পারবে।’

‘তাহলে কি তোমরা?’

‘আমি হিনান ফো।’ বিদ্রূপাত্মক ভঙ্গিতে প্রকাণ্ড মাথাটা নোয়াল লোকটা।

‘আর ও হলো আমার প্রিয় শিষ্য চো মাউং।’

সাড়ে ছ’ফুটের গলা থেকে আবার মেঘ ডাকার গুঁড়গুঁড় আওয়াজ বেরিয়ে এল—হাসছে সে।

‘হিনান ফো!’ পায়োনির আঁতকে ওঠার শব্দটা হাঁপানির মত শোনা।

‘বাহ! একজন অন্তত এই অধমকে চেনে!’

‘কে ও, পায়োনি?’ আবার জানতে চাইলেন মোয়ি।

জবাব দিলেন উইন। ‘গুণ্ডা! খুনী! রেপিস্ট! কিডন্যাপার! আরসনিস্ট!’ একটু কাঁপছেন তিনি। রাগে নয়, ভয়েই।

‘ইয়েস, আরসনিস্ট!’ হাসছে হিনান ফো। ‘আমি আগুনের কারবারী।’

‘কিন্তু এখানে কি চায় ও?’ পায়োনির বিকৃত কণ্ঠস্বর চেনা যাচ্ছে না।

‘এসেছিলাম তো সূত্র জানতে, তথ্যগুলো কোথেকে তোমরা পেলে। কিন্তু বাইরে দাঁড়িয়ে শুনলাম, তোমরা নিজেরাই জানো না।’

‘নিজেরাই জানো না,’ আবার মেঘ ডাকল।

ডেস্ক থেকে একটা ফটো তুলে পরীক্ষা করছে হিনান ফো। ‘সব দেখছি সাজিয়ে রেখেছ—ভাল, ভাল।’

‘এটাই তোমাদের বিষয়?’ জিজ্ঞেস করলেন মোয়ি। ‘পুরানো প্লেনটা?’

‘হ্যাঁ।’

‘তুমিই তাহলে ফোনে আমাকে হুমকি দিয়েছ?’ কোমরে হাত রাখতে গিয়েও নামিয়ে নিলেন উইন।

‘আমার নির্দেশ তোমার মেনে চলা উচিত ছিল,’ চোখ রাঙিয়ে বলল ফো।

‘তুমি চাও ওই প্লেনের খবর আমরা না ছাপি?’ জিজ্ঞেস করলেন মোয়ি। ‘ঠিক আছে, ছাপব না। সম্ভূষ্ট? আর কোন দাবি আছে?’

‘মি. মোয়ি!’ তীক্ষ্ণস্বরে প্রতিবাদ করলেন উইন। ‘কি বলছেন আপনি!’

তাঁর কথায় কান না দিয়ে প্রকাশক মোয়ি বললেন, ‘সমস্ত তথ্য এই ডেস্কেই আছে। সব তুমি নিয়ে যাও। এ বিষয়ে আমাদের পত্রিকায় একটা হরফও লেখা হবে না। কথা দিলাম।’

‘মি. মোয়ি! আপনার কি মাথা খারাপ হলো? একজন সন্ত্রাসীর কাছে আপনি এভাবে মাথা নত করবেন, এ আমি ভাবতেই পারছি না...’

‘শাট আপ!’ কড়া ধমক দিলেন মোয়ি। ‘এটা লেকচার দেয়ার সময় নয়। আমার প্রথম দায়িত্ব সবার প্রাণ বাঁচানো।’ ফোর দিকে তাকালেন তিনি। ‘আমরা একটা চুক্তিতে আসব, ঠিক আছে?’

‘ভেবে দেখতে হবে,’ জবাব দিল ফো। ‘তোমাদের কাছে এই ডকুমেন্টগুলোর আর কোন কপি নেই?’

‘না, নেই। মি. উইন, আর কোন কপি আছে কিনা জানেন?’
মাথা নাড়লেন উইন। ‘কার পাল্লায় পড়েছেন আপনার কোন ধারণা নেই, মি. মোয়ি।’

‘আমার কথার জবাব দিন! আর কেন কপি আছে?’

‘হ্যাঁ!’ উইন বললেন। ‘হ্যাঁ, আছে বৈকি! আরও দুটো করে কপি আছে! এবং আমার যদি কিছু ঘটে, সেগুলো উপযুক্ত কর্তৃপক্ষের কাছে পৌছে যাবে।’

‘আপনি নিজেই না বললেন, ও খুনি?’ রাগে লাল হয়ে উঠল মোয়ির মুখ।
‘তাহলে মিথ্যে কথা বলে ধোঁকা দিচ্ছেন কেন?’

‘কে বলল আমি ধোঁকা দিচ্ছি?’ উইন হঠাৎ শান্ত হয়ে গেছেন। ‘দুই সেট কপি সত্যি আছে। পায়েনিও জানে।’

‘আমার ধারণা তুমি জুয়া খেলছ,’ বলল ফো। ‘নিজের জীবনের ওপর বাজি রেখে যারা জুয়া খেলে আমি তাদেরকে পছন্দ করি—প্রতিদ্বন্দ্বী হিসেবে। মাউং, ওই শালার অ্যাসিস্ট্যান্টকে গান গাওয়াও।’

মাউং হাসতে হাসতে পায়েনির দিকে এগোল।

‘না! পায়ে পড়ি! না!’ এক কোণে আটকা পড়েছে পায়েনি। সবেগে হাত ঝাড়াচ্ছে সে, এভাবে যেন মাউংকে দূরে রাখতে পারবে। ‘উনি মিথ্যে কথা বলছেন! সত্যি কোন কপি নেই!’

‘কি করলে বুঝতে পারছ, পায়েনি?’ হতাশায় ভেঙে পড়লেন উইন। ‘তুমি আমাদেরকে খুন করলে।’

‘না! না!’ দু’হাতে মুখ ঢাকল পায়েনি।

‘বারবার খুন-খারাবির কথা উঠছে কেন? উইন, তুমি একটা হারামির হাড়। তোমার বস্ কি বলল গুনলে না? এটা স্রেফ একটা চুক্তি—ব্যবসায়িক চুক্তি।’

‘হ্যাঁ, ব্যাপারটা আমরা আপসে মিটিয়ে ফেলব,’ বললেন মোয়ি, চোখে মুখে ব্যগ্র একটা ভাব ফুটে উঠেছে। ‘সবাই জানে কাগজের লোক আর পুলিশকে তুমি মারো না। কি চাও বলো। কত টাকা? তোমার সব দাবি আমি মেনে নেব। তবে তার আগে ওদের দু’জনকে তুমি এখন থেকে চলে যেতে দাও। ভয় নেই, ওরা পুলিশকে খবর দেবে না। সোজা বাড়ি ফিরে গিয়ে পড়বে। তারপর তুমি আর আমি বসে...’

‘তুমি কথা তো বেশি বলছই, আবার আমাকে হাসাচ্ছও,’ তিরস্কার করল ফো। ‘মাউং, রশি।’

ট্রফকেস খুলে কয়েক প্রস্থ রশি বের করল মাউং। তার প্রকাণ্ড হাতে সরু সুতার মত লাগছে ওগুলো।

‘রশি কেন?’ মোয়ির গলায় সন্দেহ।

‘রশি তোমাদের ভালর জন্যে,’ বলল ফো। ‘আমরা পালাবার সময় তোমরা যদি বাধা দাও, গুলি না করে পারব না। যাতে গুলি করতে না হয়, তাই তোমাদেরকে বাঁধছি।’

অকস্মাৎ দরজার দিকে ছুটলেন উইন। ধাক্কা লেগে একটা চেয়ার উল্টে

পড়ল। ক্ষিপ্ৰগতিতে ছুটে এসে তাঁকে বাধা দিল মাউং। উইনের ঘাড়টা একহাতে ধরল সে, তারপর অনায়াস ভঙ্গিতে মেঝে থেকে শূন্যে তুলে ফেলল।

ফোর হাতের পিস্তল পায়েনি আর মোয়িকে কাভার দিচ্ছে। তবে এর কোন প্রয়োজন নেই, পায়েনি ও মোয়ি নিজেদের জায়গায় পাখুরে মূর্তি হয়ে জমে গেছেন।

উইনকে লম্বা করা হাতের শেষ প্রান্তে ধরে রেখেছে মাউং, উইনের অস্থির পা যাতে লাথি মারতে না পারে। ম্যানেজিং এডিটরের চোখ দুটো কোটর ছেড়ে বেরিয়ে আসতে চাইছে, সেই সঙ্গে মুখ থেকে জিভটাও। একশো পঁচাশি পাউন্ড উইনকে শূন্য ঝুলিয়ে রাখতে মাউং-এর কোন অসুবিধেই হচ্ছে না। সে জিজ্ঞেস করল, 'একে নিয়ে কি করব আমি?'

'সবই তোমাকে বলে দিতে হবে?' সঙ্গীকে মৃদু তিরস্কার করল ফো।

'সব আমাকে বলে দিতে হবে?' বিড়বিড় করল মাউং, তারপর দেয়ালের গায়ে উইনের মাথার পিছনটা ধাম করে ঠুকে দিল।

'না!' চোখ বুজে চেষ্টায়ে উঠল পায়েনি।

উইনের খুলি আঘাত করায় দেয়ালের প্লাস্টারে চিড় ধরল। সংঘর্ষের শব্দ উইনের ঘাড় ভাঙার আওয়াজটাকে চাপা দিতে পারেনি।

'না! না-না! এ সত্যি নয়! আমি দুঃস্থপ্ন দেখছি!' পায়েনি অনবরত প্রলাপ বকে যাচ্ছে।

'শ্-শ্-শ্!' তাকে চুপ করতে বলল ফো। 'তা না হলে মাউং তোমারও আওয়াজ কেড়ে নেবে।'

উইনের শরীরটা ছেড়ে দিল মাউং। দেয়ালে ঘষা খেয়ে মেঝেতে পড়ে গেল লাশ।

'তোমরা ও সুস্থ!' মোয়ি হাঁপাচ্ছেন। 'এখন বুঝতে পারছি তোমরা আমাদের খুন করতেই এগেছ।'

'শান্ত হও। হাসছে ফো। 'চিরকাল অন্য লোকের খবর ছেপে মজা লুটেছ। এখন দেখো নিজে খবর হতে কেমন লাগে। তাছাড়া, এটা একটা বিজ্ঞেন্স ডিল, তাই না? তোমাদের বাঁচাতে চাইছি, এতেই তো বোঝা যায় যে আমি খুন করতে চাই না। মাউং?'

'না, খুন করতে চাই না,' বলে রশি হাতে মোয়ি আর পায়েনির দিকে এগোল মাউং।

পায়েনিকে বাঁধল সে। পায়েনি ফোঁপাচ্ছে।

মোয়ি বললেন, 'ফো, এখনও আমরা একটা আপস মীমাংসায় আসতে পারি। ক্ষতি যা হবার হয়ে গেছে। আমাকে আর পায়েনিকে তুমি ছেড়ে দাও। বিনিময়ে যত টাকা চাও দেব।'

তার কথার জবাব না দিয়ে ফো বলল, 'মাউং, ওদের মুখে কাপড় গুঁজে দাও।'

'মুখে কাপড় গুঁজে দেব,' বলল মাউং। 'কেন?'

‘কারণ আমার কান অত্যন্ত স্পর্শকাতর,’ বলল ফো। ‘ওদের কথা বড় বিরক্ত করছে।’

‘আমাকে না হোক, পায়োনিকে অন্তত ছেড়ে দাও, শেষ আরেকবার কাতরস্বরে অনুনয় করলেন মোয়ি। ‘আমি চিরকুমার, কোন দায়-দায়িত্ব নেই: কিন্তু পায়োনির ছেলেমেয়েরা এখনও নিজের পায়ে দাঁড়াতে পারেনি। আমার কাছে মাস্টার কার্ড আছে—বলো কত টাকা চাও।’

‘আমরা টাকার লোভী নই,’ বলল ফো। ‘মাউং, কাপড় গৌজার আগে বানচোতটার মুখে একটা লাথি মারতে ভুলো না। শালা আমাকে ঘুষ দিয়ে দূষিত করতে চাইছে!’

পায়োনির মুখে রুমাল গৌজার পর মোয়ির হাত দুটো পিছমোড়া করে বাঁধল মাউং। পা দুটোও এক করে বাঁধল। পকেট হাতড়ে মানিব্যাগটা বের করে খুলল সে, লাথি মারার কথা ভুলে গেছে। ‘শালা এক নম্বর মিথ্যাক! কোথায় টাকা? কোথায় মাস্টার কার্ড?’

মোয়ি তাড়াতাড়ি বললেন, ‘চাবি নিয়ে ডেস্কের দেরাজ খোলো, মাস্টার কার্ড পাবে...’

‘ওর কথায় কান দিয়ে না, মাউং,’ বলল ফো। ‘তুমি তোমার কাজ সারো। আমরা এখানে টাকার জন্যে আসিনি।’

‘আমরা এখানে টাকার জন্যে আসিনি,’ বিড়বিড় করল মাউং। বেশ খানিকটা রশি গোল পাকিয়ে মোয়ির মুখে জোর করে গুজে দিল সে। ‘ওস্তাদ, পালাবার সময় কেউ বাধা দিলে? এতবড় অফিস, কেউ নেই তো আশপাশে?’

‘ছিল, মাউং। দু’দু’জন দারোয়ান ছিল,’ মনে করিয়ে দেয়ার সুরে বলল ফো। ‘তুমি তাদেরকে মেরে ফেলেছ।’

‘আমি তাদেরকে মেরে ফেলেছি!’ মনে পড়তে মাউং-এর চোখ দুটো চকচক করে উঠল।

‘এবার যাও, রস নিয়ে এসো।’

চেম্বার থেকে বেরিয়ে গেল মাউং। হাতির মত পা, অথচ হাঁটার সময় কোন শব্দ হয় না।

একটু পরই পাশের কামরা থেকে চারটে প্লাস্টিকের জাগ নিয়ে ফিরে এল মাউং। গ্যাসলিন, তেল আর পানি মিশিয়ে ভরা হয়েছে ওগুলোয়। শুধু গ্যাসলিনের চেয়ে এই মিশেল অনেক ভালভাবে জ্বলবে।

গ্যাসলিনের গন্ধ পেয়ে পায়োনি আর মোয়ি গোঙাতে শুরু করলেন।

‘একটা রাখো ডেস্কের নিচে, একটা ফাইলিং কেবিনেটের পাশে,’ বলল ফো। ‘বাকি দুটো জাগ চারপাশে খালি করো।’

তৃতীয় জাগটা খুলে ডেস্কে ফুয়েল ঢালল মাউং।

‘বেশি করে ঢালো। সমস্ত ডকুমেন্ট পোড়া চাই। সাবধান, তোমার গায়ে যেন আবার না লাগে।’

‘আমার গায়ে যেন আবার না লাগে!’ চতুর্থ জাগটা খুলে পায়োনি আর

মোয়িকে গোসল করাল মাউং, তারপর ডেস্ক ঘুরে পিছু হটে দরজার কাছে চলে এল। জাগটা খালি করার পর জিজ্ঞেস করল, 'অনুমতি দিচ্ছে তো, ওস্তাদ?'

'দিচ্ছি বৈকি।' সস্নেহে হাসল ফো, চেম্বার থেকে বেরিয়ে এল।

দেশলাই জ্বালল মাউং। আবার চকচক করে উঠল তার চোখ দুটো।

পায়োনি মেঝেতে কাত হয়ে পড়ল, মেঝেতে ঘষটে ঘষটে দরজার দিকে এগোবার ব্যর্থ চেষ্টা করছে। মোয়ি সম্পূর্ণ শান্ত, বাঁচার কোন উপায় নেই দেখে তিনি তাঁর নিয়তিকে মেনে নিয়েছেন।

জুলন্ত কাঠিটা চেম্বারের মেঝেতে ছুঁড়ে দিল মাউং। কার্পেটে ড্রপ খেয়ে ঘরের মাঝখানে স্থির হলো সেটা। হুস করে একটা শব্দের সঙ্গে মিক্চারটা জ্বলে উঠল, আগুনের শিখায় ভরাট হয়ে গেল কামরা। ফোর পিছু নিয়ে এলিভেটরের দিকে ছুটল মাউং। করিডরে পড়ে থাকা দুটো লাশ উপকাতে হলো তাদের।

আগুনের শিখা জাগ দুটোর নাগাল পেয়ে গেল। নাপাম বোমার মত বিস্ফোরিত হলো ওগুলো, কেউ যেন নারকীয় অগ্নিঝড়ের লাগাম ছেড়ে দিয়েছে।

নিচে নেমে রাস্তা পেরুল ওরা। গভীর রাত, রাস্তায় লোকজন জমতে সময় লাগল। ততক্ষণে ওই এলাকা থেকে অনেকটা দূরে চলে এসেছে ওরা দু'জন।

'মুখে কিছু গোঁজা না থাকলে আমরা হয়তো এখান থেকেও ওদের চিৎকার শুনতে পেতাম,' মুখ ভার করে বলল মাউং।

'দুঃখ কোরো না,' তার কাঁধ চাপড়ে সান্ত্বনা দিল ফো। 'সামনে আরও সুযোগ আসছে।'

চার

লন্ডন।

অনেকদিন পর আজ আবার ফুপিকে জড়িয়ে ধরে চোখের পানি ফেলল ঋণী হায়দার। তার একটা প্রতিজ্ঞা নিষ্ঠা ও অধ্যবসায়ের গুণে আজ সফল হয়েছে, বাবার মতই অক্সফোর্ড ইউনিভার্সিটি থেকে আর্কিওলজিতে মাস্টার্স পাস করেছে সে। রেজাল্ট পেয়ে দেরি করেনি, বাস ধরে সোজা ফিরে এসেছে ফ্ল্যাটে। তবে তার এই কান্না যতটা না আনন্দের, তারচেয়ে বেশি বেদনার।

একেবারে ছোটবেলায় মাকে হারিয়ে বাবাকেই একমাত্র আপনজন হিসেবে পেয়েছিল ঋণী। বয়স ও বুদ্ধি বাড়ার পর উপলব্ধি করেছিল, তার বাবার মত আদর্শ মানুষ দুনিয়ায় আর বোধহয় দ্বিতীয়টি নেই। কিন্তু তারপরই বিনা মেঘে বজ্রপাতের মত খবর এল আর্কিওলজিকাল এক্সপিডিশন থেকে মুহিত হায়দার সম্ভবত আর কোনদিন ফিরবেন না, কারণ বার্মায় প্লেন সহ নিখোঁজ হয়েছেন তিনি। শুধু কি নিখোঁজ হলেন? না, সেই সঙ্গে তাঁর নামের সঙ্গে লেপ্টে দেয়া হলো দুরপন্যে একটা কলঙ্ক-ড. মুহিত হায়দার প্রায় দুই বিলিয়ন ডলার মূল্যের

প্রাচীন বার্মিজ আর্টিফ্যাক্ট পাওয়া গেছে বলে ঘোষণা দিয়েও তা বার্মা সরকারের হাতে তুলে দিতে বার্থ হন; ফলে সংশ্লিষ্ট মহল থেকে সারা বিশ্বে গুজব ছড়িয়ে দেয়া হলো, ওগুলো কোথাও লুকিয়ে রেখেছেন তিনি। বলা হলো, তিনি নিখোঁজ হননি, পা টাকা দিয়ে লুকিয়ে আছেন কোথাও।

সেটা আজ থেকে ঠিক দশ বছর আগের ঘটনা, ঋণীর বয়স তখন সবে সতেরো। সেদিনও বাবার নিখোঁজ সংবাদ পেয়ে ঠিক এভাবেই ফুপিকে জড়িয়ে ধরে কেঁদেছিল সে। ফুপা সান্ত্বনা দিচ্ছিলেন। ঋণীকে বোঝালেন, বাবার প্রতি দায়িত্ব পালন করার একটাই উপায়—বাবার মত তাকেও আর্কিওলজিতে মাস্টার্স করতে হবে, সদস্য হতে হবে ব্রিটিশ আর্কিওলজিকাল সোসাইটির, তারপর বার্মায় এক্সপিডিশনের যাবার অনুমতি সংগ্রহ করে তদন্ত চালিয়ে দেখতে হবে তার বাবা সত্যি নিখোঁজ হয়েছেন, নাকি তাঁকে খুন বা গুম করা হয়েছে। পুলিশ বা আর কাউকে দিয়ে এ কাজ হবার নয়, ঋণীকেই প্রমাণ করতে হবে তার বাবা অসৎ মানুষ ছিলেন না, তাঁর নামে যা রটানো হয়েছে তার সবই মিথ্যে।

আজ ঋণীর রেজাল্ট। নাসরিন জানত। তাই কিচেনে ব্যস্ত ছিল ভাইঝির প্রিয় একটা রেসিপি তৈরির কাজে। দরজা খোলাই ছিল, ঋণী কখন ফিরেছে টেরও পায়নি সে; টের পেল পিছন থেকে তাকে জড়িয়ে ধরায়, কাঁধে মুখ গুঁজে ডুকরে কেঁদে ওঠায়।

ঋণীকে নিয়ে বেডরুমে চলে এল নাসরিন। ভাল ছাত্রী, পরীক্ষাও খারাপ হয়নি, তবু উদ্বিগ্ন হয়ে জিজ্ঞেস করল, ‘রেজাল্ট ভাল হয়নি?’

একই প্রশ্ন কয়েকবার করতে হলো। অবশেষে ঋণী জবাব দিল, ‘সেকেন্ড ক্লাস পেয়েছি আমি। সেজন্যে কাঁদছি না, কাঁদছি বাবার জন্যে। তোমাকে বলিনি, তবে গত কয়েক দিন ধরে আবার ওরা বাবার কথা লিখছে।’

‘ভাইয়ার কথা লিখছে? ভাইয়ার কি কথা লিখছে?’ নাসরিন আকাশ থেকে পড়ল। ‘আমাকে বলিসনি কেন?’

কথা না বলে ব্যাগ থেকে ব্রিটিশ আর্কিওলজিকাল সোসাইটির সাপ্তাহিক ম্যাগাজিনটা বের করে ফুপির হাতে ধরিয়ে দিল ঋণী। একই প্রসঙ্গে একাধিক খবর ছাপা হয়েছে পত্রিকায়, এক এক করে সবগুলো পড়ল নাসরিন। ড. মুহিত হায়দারকে নিয়ে হারিয়ে যাওয়া প্লেনটা দশ বছর পর মায়ানমারের আকিয়াব অঞ্চলে পাওয়া গেছে, তারপর সে খবর মিথ্যে বলে দাবি করা হয়েছে, এ বিষয়ে তথ্যসমৃদ্ধ আরও খবর ছাপার প্রস্তুতি নেয়ার সময় দৈনিক মায়ানমার-এর প্রকাশক ও সম্পাদক খুন হয়ে গেছেন। ‘ঋণী! এ তো ভয়ংকর ব্যাপার! এত কিছু ঘটে গেছে অথচ তুই সব চেপে রেখেছিস কেন?’

ঋণী সে-কথার জবাব না দিয়ে ছলছল চোখে চাইল ফুপির দিকে, ‘তোমার কথামত আর্কিওলজি নিয়ে পড়লাম, কিন্তু কি লাভ হলো বলতে পারো?’

কিছুক্ষণ চিন্তা করে নাসরিন বলল, ‘ভেবেছিস এত সহজে তোকে আমি হার মানতে দেব? একটা কথা কখনও ভুলবি না, ঋণী—সত্যি কোনদিন চাপা থাকে না। মায়ানমারে আজ সামরিক জাভা ক্ষমতায়, জানি ওদের কাছ থেকে কোন সাহায্য

তুই পারি না। তাছাড়া, ভাইয়ার নিখোজ সংক্রান্ত ব্যাপারটা নিয়ে এখনও যেহেতু খুন-খারাবি চলছে, আমিও তোকে ওখানে পাঠাতে পারব না। তবে সময় কি ফুরিয়ে যাচ্ছে? একদিন ঠিকই সুযোগ আসবে, মায়ানমারে গিয়ে তুই...

‘তুমি সব তথ্য জানো না তাই এ-কথা বলছ,’ নাসরিনকে বাধা দিয়ে বলল ঋণী। ‘আমি আর্কিওলজি সোসাইটির চেয়ারম্যানের সঙ্গে কয়েকবার আলাপ করেছি। প্রথম বাধা হলো, কাউকে সরাসরি সদস্য করার নিয়ম নেই ওদের। কোনও এক্সপিডিশনে একজন প্রফেসরের অধীনে অন্তত এক বছর কাজ না করলে সদস্যপদের জন্যে আবেদনই করা যায় না। এরকম বাধা একটা নয়, বহু। তারপর, সদস্য হলেই আমি মায়ানমারে যেতে পারব না। মায়ানমার সরকার যদি আমন্ত্রণ জানায়, সেটা রক্ষা করার দায়িত্ব দেয়া হবে নামকরা কোন প্রফেসরকে, তিনি তাঁর সহকারী হিসেবে আমাকে নিতেও পারেন আবার না-ও নিতে পারেন...’

‘ঠিক আছে, বুঝলাম, ব্যাপারটা সোজা নয়...’

‘ফুপি,’ চোখ মুছে নড়েচড়ে বলল ঋণী, গলায় জোর ধরেন কথা বলছে। ‘আমি পাস করেছি, এখন ভাল একটা চাকরিও পাব।’

‘তাই?’ খুশি হলেন নাসরিন।

ফুপিকে আবার জড়িয়ে ধরল ঋণী। ‘বৈচে থাকলে মা আমার জন্যে যতটা করত, তুমি তারচেয়েও বেশি করেছ।’

জবাবে কিছু বলা হলো না নাসরিনের, কারণ ঠিক এই সময় নক হলো দরজায়।

এলোমেলো বসন ঠিকঠাক করে বসার ঘরে চলে এল ওরা। দরজার কবাট খুলল ঋণী।

দোরগোড়ায় যেন সাক্ষাৎ দেবদূত দাঁড়িয়ে আছে। ঋণীর শরীর কি এক আবেশে অবশ হয়ে এল। হাঁ করে প্রায় নির্লজ্জের মত তাকিয়ে থাকল সে, আগন্তুক তাকে যেন সম্মোহিত করে ফেলেছে। মন থেকে কে যেন সকৌতুকে বলল, ‘দেখ লো, দেখ! প্রাণ ভরে দেখ!’

‘এখানে কি ড. মুহিত হায়দারের মেয়ে ঋণী হায়দার থাকেন?’ মার্জিত কণ্ঠে জানতে চাইল আগন্তুক।

‘জ্বী, আমিই,’ দ্রুত নিজেকে সামলে নিল ঋণী। ‘আপনি?’

‘আমি ব্রিটিশ আর্কিওলজিকাল সোসাইটির একজন সদস্য,’ বলল আগন্তুক। ‘আপনার সঙ্গে ড. হায়দার সম্পর্কে একটু আলাপ করতে চাই।’

পথ দেখিয়ে ভেতরে এনে তাকে বসাল ঋণী। নাসরিনকে দেখিয়ে বলল, ‘আমার ফুপি। তো কি আলাপ করতে চান বলুন।’

‘বিশেষ একটা কাজে আমাকে মায়ানমার যেতে হবে,’ বলল আগন্তুক। ‘তাই ভাবছি সময় ও সুযোগ পেলে ড. হায়দারের নিখোজ হওয়ার ব্যাপারটা তদন্ত করে দেখব। আপনার কাছে এসেছি যদি কোন তথ্য বা সূত্র পাই...’

‘তদন্ত করে দেখবেন...আপনি কি স্কটল্যান্ড ইয়ার্ড থেকে আসছেন, নাকি ইন্টারপোল থেকে?’ ঋণী নয়, প্রশ্ন করল নাসরিন।

‘দুর্গখিত, প্রথমেই নিজের পরিচয় দেয়া উচিত ছিল আমার। আমি মাসুদ রানা। রানা এজেন্সি নামে আমার একটা প্রাইভেট ইনভেস্টিগেশন ফার্ম আছে। সাধারণত ক্লায়েন্টরাই কেস নিয়ে আমাদের কাছে যায়, তবে আপনার ভাই ড. হায়দারের বেলায় উল্টোটা ঘটছে। ওনার কেসটা ইন্টারেস্টিং মনে হওয়ায় আমিই চলে এলাম...’

‘আমার বাবা চোর কিনা এটা জানাই আপনার উদ্দেশ্য, তাই না?’ হঠাৎ তীক্ষ্ণকণ্ঠে জানতে চাইল ঋণী। ‘দেখতে এসেছেন আর্টিফ্যাক্ট বেচা টাকায় কেমন বিলাসবহুল জীবন যাপন করছি আমরা?’

প্রশ্নটা শুনে বিব্রত বোধ করল রানা। ঋণী যে অভিযোগ করছে তা আংশিক হলেও সত্যি। এরই নাম অকুপেশনাল হ্যার্ড। জীবিত হোক বা মৃত, কোন মানুষের উপকার করতে হলে প্রথমেই জানতে হবে তার সম্পর্কে উচ্চারিত অভিযোগের পিছনে আসলে কোনও ভিত্তি আছে কিনা। ব্যাপারটা অবশ্য এরইমধ্যে রানার কাছে পরিষ্কার হয়ে গেছে। যে এলাকায় এই ফ্ল্যাট, ফ্ল্যাটের যে সাদামাঠা আসবাব, এ-সব দেখে বিশ্বাস করার কোন কারণ নেই এই পরিবারের প্রধান দশ বছর আগে দুই বিলিয়ন ডলার হাতে পেয়েছিলেন।

‘আমাকে ভুল বুঝবেন না, প্রীজ, বলল ও। ‘কেসটা আমার কাছে ইন্টারেস্টিং মনে হয়েছে এত বছর পর অদ্ভুত সব ডেভেলপমেন্ট ঘটতে দেখে। তাছাড়া, ড. হায়দার আমারই মত একজন বাঙালী।’

‘দেখুন, মি. রানা,’ বলল ঋণী, ‘আমরা শুধু একটা ব্যাপারে আগ্রহী। আমরা চাই বাবার নামে যে মিথ্যে অপবাদ রটানো হয়েছে তার অবসান হোক। কিন্তু কাজটা আমরা...আমি নিজেই করতে চাই। তাছাড়া, প্রাইভেট একটা ডিটেকটিভ ফার্মকে ভাড়া করব, সে সামর্থ্যও আমাদের নেই।’

‘নিজে করতে চান মানে? আপনি কি মায়ানমারে যাবার কথা ভাবছেন?’

‘ভাবব না? মায়ানমারে গিয়ে তদন্ত করব বলেই তো আর্কিওলজি নিয়ে মাস্টার্স পাস করলাম।’

‘আপনার স্পিরিট দেখে সত্যি ভাল লাগছে,’ প্রশংসার সুরে বলল রানা। ‘কিন্তু সৎ পরামর্শ চাইলে বলব, বর্তমান পরিস্থিতিতে কোন মেয়ের জন্যে মায়ানমার স্রেফ একটা নরক। প্রায় নিশ্চিতভাবে ধরে নিতে পারেন, ওখানে গেলে প্রাণ নিয়ে আপনি ফিরে আসতে পারবেন না।’

নাসরিন বলল, ‘ওখানকার পরিস্থিতি সম্পর্কে আসলে আমাদের কোন ধারণা ছিল না। আপনার কথা শুনে বুঝতে পারছি ঋণীকে ওখানে পাঠানো উচিত হবে না।’

‘তার তো কোন প্রয়োজনও নেই,’ বলল রানা। ‘ঋণী, আপনি যা চান, আমিও তাই চাই-ড. হায়দারের নিখোঁজ রহস্য তদন্ত করে দেখা। রানা এজেন্সি নিজের গরজেই করবে কাজটা, কাজেই আপনাদেরকে কোন ফী দিতে হবে না।’

‘গরজটা কিসের বলুন তো?’

রানা পাল্টা প্রশ্ন করল, ‘এ প্রশ্নের জবাব কি আপনাকে পেতেই হবে?’

‘হবে না? অচেনা এক ভদ্রলোক যেচে পড়ে এসে বলছেন তিনি আমার বাবার নিখোঁজ রহস্য তদন্ত করার জন্যে মায়ানমারের মত নরকে যেতে চান। আমি জানতে চাইব না, কি তাঁর স্বার্থ?’

‘এই টেলিগ্রামটা পড়ে দেখুন, তাহলেই গরজটা আঁচ করতে পারবেন,’ বলে পকেট থেকে বহু বছরের পুরানো একটা টেলিগ্রাম শীট বের করে ঋণীর দিকে বাড়িয়ে ধরল রানা।

দশ বছরের পুরানো টেলিগ্রাম, অনুবাদ করলে অর্থ দাঁড়ায়—

“প্রাচীন যং ও বৌদ্ধ সভ্যতার নিদর্শন আবিষ্কারের এই অভিযান গুরুতর হুমকির সম্মুখীন। ফালাম থেকে একদিকে বিপুল আর্টিফ্যাক্ট উদ্ধারের সম্ভাবনা যেমন উজ্জ্বল হয়ে উঠেছে, যার আনুমানিক মূল্য দুই বিলিয়ন মার্কিন ডলারের কম হবে না বলে ধারণা করছি; অন্যদিকে স্থানীয় সরকারী প্রশাসনের কর্মকর্তারা পাকিস্তানী ইন্টেলিজেন্স সার্ভিস আইএসআই-এর সঙ্গে হাত মিলিয়ে সব মেয়ে দেয়ার জন্যে ষড়যন্ত্র শুরু করেছে। শুনতে পাচ্ছি, ওরা নাকি ফালাম বাঁধটাও উড়িয়ে দেবে। আশংকা করছি তৃতীয় একটা পক্ষ ওদের সঙ্গে হাত মেলাবে। যত তাড়াতাড়ি সম্ভব বিস্তারিত জানাব। এই একই টেলিগ্রাম আমি বাংলাদেশ সরকার, ইন্টারপোল ও ব্রিটিশ আর্কি সোসাইটির ঠিকানায় পাঠালাম। ড. মুহিত হায়দার।”

‘ফুপি, বাবার পাঠানো টেলিগ্রাম!’ ঝট করে রানার দিকে ফিরল ঋণী। ‘এ আপনি কোথেকে পেলেন? কেউ তো আমাদেরকে বলেনি যে রাবা নিখোঁজ হবার আগে তিন জায়গায় এরকম টেলিগ্রাম করেছিলেন!’

‘বাংলাদেশ সরকার ও ইন্টারপোল এই টেলিগ্রাম পায়নি,’ বলল রানা। ‘ধারণা করছি টেলিগ্রাম দুটো বিলি করার আগেই আইএসআই-এর এজেন্টরা পোস্ট অফিস থেকে সরিয়ে ফেলে।’

‘কিন্তু এটা?’

‘এটা যেভাবেই হোক ব্রিটিশ আর্কিওলজিকাল সোসাইটির ঠিকানায় ঠিকমতই পৌঁছেছিল,’ বলল রানা। ‘কিন্তু যে এটা রিসিভ করে সে সম্ভবত গাফিলতি করে কর্মকর্তাদের হাতে দেয়নি, কিংবা কর্মকর্তারা ড. হায়দারের বক্তব্য গুরুত্বের সঙ্গে নেননি। তা না নেয়ার পিছনে একটা সম্ভাব্য যুক্তিও আছে—বার্মার ওই আকিয়াব অঞ্চলে প্রাচীন সভ্যতা গড়ে উঠেছিল, সোসাইটির অভিজ্ঞ কর্মকর্তারা তা বিশ্বাস করতেন না। তবে ভাগ্য ভাল যে টেলিগ্রামটা ফেলে দেয়া হয়নি। আর্কাইভে খোঁজ করতে গিয়ে ড. হায়দারের পুরানো ফাইলটা আমি পেয়ে যাই, তাতেই ছিল এটা।’

‘কিন্তু বাবার এই টেলিগ্রাম খুঁজে পাওয়ার সঙ্গে আপনার গরজের সম্পর্কটা কিন্তু পরিষ্কার হলো না।’

‘ড. হায়দারের টেলিগ্রামের অংশবিশেষ স্মরণ করুন,’ বলল রানা। ‘বাংলাদেশ সরকার ও তৃতীয় পক্ষ।’

টেলিগ্রামটা আরেকবার চোখের সামনে তুলল ঋণী।

‘তৃতীয় পক্ষ...বাংলাদেশ সরকার। তো?’

‘মূল্যবান আর্টিফ্যাক্ট নিয়ে স্থানীয় প্রশাসন ও পাকিস্তানী এজেন্টরা ষড়যন্ত্র করছিল, তাদের সঙ্গে তৃতীয় পক্ষ অর্থাৎ বাংলাদেশের কিছু কর্মকর্তাও হাত মেলায়,’ বলল রানা, ‘তবে এ-সব ওর নিজের কথা নয়; ঢাকায় ওকে ব্রিফ করার সময় বিসিআই চীফ মেজর জেনারেল’ (অবসরপ্রাপ্ত) রাহাত খান যা বলেছেন, শুধু সেই কথাগুলোই পুনরাবৃত্তি করেছে ও। ‘মায়ানমারে বাংলাদেশের কর্মকর্তা বলতে নিশ্চয়ই দূতাবাসের অফিসারদের বোঝানো হয়েছে। সবাই জানে, দূতাবাসের নিজস্ব ইন্টেলিজেন্স অফিসার থাকে, সাধারণত তাদেরকে লিগাল অ্যাডভাইজার বলা হয়। লুট করা আর্টিফ্যাক্টের ভাগ দেয়ার বিনিময়ে আইএসআই যদি বাংলাদেশ দূতাবাসে নিজেদের চর ঢুকিয়ে থাকে, তাতে আশ্চর্য হবার কিছু নেই।’

‘না হয় আশ্চর্য হলাম না,’ বলল ঋণী। ‘কিন্তু এটা তো বাংলাদেশ সরকারের মাথাব্যথা, সেজন্যে আপনাকে কেন ঝুঁকি নিয়ে মায়ানমারে যেতে হবে?’

‘আপনি দেখছি পুলিশেরও বাড়ী!’ হেসে ফেলল রানা। ‘চেষ্টা করলে আপনি দক্ষ ইন্টারোগেটর হতে পারবেন। ওনুন, আপনি এমন একটা প্রশ্ন করেছেন, অন্য কেউ হলে উত্তর দিতাম না। আশা করি কথাটা এই ঘরের বাইরে যাবে না। ঠিক আছে?’

‘যাবে না,’ ঋণী ও নাসরিন একযোগে কথা দিল।

‘আমার অনেক পরিচয়, তার মধ্যে একটা-আমি বাংলাদেশ সরকারের একজন ক্রিনার। কোথাও দূষিত পদার্থ বা আবর্জনা জমলে আমাকে তা পরিষ্কার করতে হয়।’

‘তাই বলুন!’ ঋণীর চোখমুখ উজ্জ্বল হয়ে উঠল। ‘এতক্ষণে বুঝলাম!’ কি বুঝল তা অবশ্য ঋণীই জানে, রানা আর এ-প্রসঙ্গে কথা বাড়াতে চাইছে না। ‘তবে আপনার কাজটা অত্যন্ত জটিল। দশ বছর আগে ঠিক কি ঘটেছিল আজ কি আর তা জানা যাবে! আমাদের ধারণা, বাবা হয়তো আজও বেঁচে আছেন...’

রানা জানে, সে সম্ভাবনা নেই বললেই চলে। তবু ঋণীর মনটা ভেঙে দিতে ইচ্ছে করল না। ‘ধাকতেও পারেন। যদি বেঁচে থাকেন, আমি নিজে তাঁকে ফিরিয়ে আনব।’

‘মি. রানা...দূর ছাই! মাসুদ ভাই, আপনি আমাকেও কি মায়ানমারে নিয়ে যেতে পারেন না?’

‘সম্ভব হলে নিয়ে যেতাম,’ বলল রানা। ‘কিন্তু নিজেই যেখানে প্রাণ নিয়ে ফেরার সম্ভাবনা কম, সেখানে আপনাকে কিভাবে নিয়ে যাই বলুন।’

‘আপনার জন্যে আমরা দোয়া করব,’ বলল ঋণী।

চা খাবার জন্যে আরও আধঘণ্টা ওখানে থাকতে হলো রানাকে। গল্প করার এক ফাঁকে ড. মুহিত হায়দারের একটা ছবি দেখতে চাইল ও।

বিদায় নিয়ে ফিরে আসছে, কানে বাজতে থাকল শ্রদ্ধা, আস্থা ও আবদার মেশানো ঋণীর মিষ্টি কণ্ঠস্বর, ‘আপনার অপেক্ষায় আমরা দিন গুনব, ভাইয়া।’

একহণ্টা পর মায়ানমার এয়ার লাইন্সের একটা জেট থেকে ইয়ানগন ইন্টারন্যাশনাল এয়ারপোর্টে নামল রানা।

ক্ষমতায় যে সামরিক সরকার, টার্মিনাল বিভিঙে পা দিতেই টের পাওয়া গেল। লাঠিসর্বশ্ব পুলিশের পাশাপাশি ইউনিফর্ম পরা সশস্ত্র সৈনিকরা টহল দিয়ে বেড়াচ্ছে। কাঁধে বা কোমরে নয়, প্রত্যেকে তার মেশিন-পিস্তল হাতে রেখেছে।

কাস্টমস লাইনটা ধীরগতিতে এগোচ্ছে। রানার সামনে, তিনজনের পর, খাটো কিন্তু সুন্দরী এক মেয়ে দরদর করে ঘামছে। তার পরনের বহুরঙা লুঙ্গি ও ব্লাউজ। দামী সিল্ক। সম্ভবত এই প্রথমবার চোরাচালানে নেমেছে তরুণী, নার্সাস বোধ করার সেটাই কারণ। তার সঙ্গে কি আছে কে জানে। সোনা হবারই বেশি সম্ভাবনা। কিংবা ডলার। ড্রাগস্ মায়ানমার থেকে বেরোয় শুধু, ঢোকে না।

কাস্টমস অফিসার দু'জন সৈনিককে ইঙ্গিত করল। লাইন থেকে বের করে পিছনের একটা কামরায় নিয়ে যাওয়া হলো তরুণীকে। ওখানে মহিলা মিলিটারি-পুলিস কাপড় খুলে সার্চ করবে তাকে।

লাইনে দাঁড়ানো লোকজন ফিসফাস করছে।

এক সময় রানার পালা এল। হাতে পাসপোর্ট নিয়ে ওর চেহারা খুঁটিয়ে পরীক্ষা করল অফিসার। পাসপোর্টটা ইস্যু করা হয়েছে ভারতীয় নাগরিক সুব্রত বড়ুয়ার নামে। অফিসার প্রশ্ন করল, 'মায়ানমারে কেন এসেছেন, মি. বড়ুয়া?'

'ব্যবসার কাজে।'

'কতদিন থাকবেন?'

'দুই কি তিন হপ্তা।'

'অলিখিত তিনটি নিয়ম যদি মেনে চলেন,' বলল অফিসার, 'তাহলে মারাত্মক কোন বিপদে আপনাকে পড়তে হবে না। এক, পুলিশ সহ সরকারী কোন কর্মচারীকে ঘুষ দেবেন না। ধরা পড়লে আপনার জেল হয়ে যাবে। দুই, স্থানীয় বা বিদেশী, কারও সঙ্গেই সামরিক জাঙ্কার বিরুদ্ধে কোন আন্দোলন করবেন না। এর শাস্তি ভয়াবহ, এমনকি ফায়ারিং স্কোয়ারের সামনেও দাড় করানো হতে পারে। তিন, আন্ডারগ্রাউন্ডের কারও সঙ্গে লাগতে যাবেন না।'

'ধন্যবাদ।' রানা জানে, বার্মার আন্ডারগ্রাউন্ড থেকে প্রতি মাসে মোটা টাকা ভেট পায় জেনারেলরা, ফলে তাদের সাত খুন মাফ।

ওভারনাইট ব্যাগ আর সুটকেস নিয়ে একটা টেলিফোন বুদে ঢুকল রানা। রোলেব্রে দুপুর একটা। অ্যান্টিক শপের নম্বরটা মুখস্থ করা, তিনবার রিঙ হতে রিসিভার তুলল কেউ একজন। 'অ্যান্টিক শপ ঐতিহ্য।'

বার্মিজ ভাষায় দ্রুত কথা বলল রানা। 'আমি সুকমল, আমেরিকা থেকে আসছি। আপনাদের কালেকশন দেখার জন্যে আজ বিকেল চারটের দিকে একবার আসতে চাই।'

'এক মিনিট, প্লীজ। কি যেন নাম বললেন?'

'সুকমল।'

'মি. সুকমল, স্যার?' এবার লাইনে একটা মেয়ে। 'স্যার, অত্যন্ত দুঃখের সঙ্গে জানাচ্ছি, চারটের সময় আপনাকে আমরা অভ্যর্থনা জানাতে পারব না। আপনি এক ঘণ্টা পর পাঁচটায় আসতে পারেন না, প্লীজ?'

‘নো প্রবলেম,’ বলল রানা। ‘পাঁচটাতেই তাহলে আসছি।’

‘ভেরি গুড, স্যার। আপনার সঙ্গে ব্যবসা করার জন্যে অধীর আগ্রহে অপেক্ষায় থাকলাম আমরা।’

এরপর রিজার্ভেশন সম্পর্কে নিশ্চিত হবার জন্যে হোটেল ইন্টারকনে ফোন করল রানা। শহরে আসার দীর্ঘ পথে এত বেশি স্পীড তুলল ট্যাক্সি; সীটের কিনারায় বসে থাকতে বাধ্য হলো ও। হাইওয়ের ড্রাইভাররা যেন আত্মহত্যা করার প্রতিযোগিতায় নেমেছে।

শপিং ডিস্ট্রিক্ট জেনারেল সান হুয়া-য় ট্যাক্সি ছেড়ে দিয়ে কেনাকাটা শুরু করল রানা। বিভিন্ন দোকান থেকে উইগ, নিজের মাপের চেয়ে কয়েক সাইজ বড় স্পোর্টস জ্যাকেট, ঢোলা ট্রাউজার আর একজোড়া দামী লোফার্স পছন্দ করল।

হোটেল ইন্টারকন উ থান্ট স্কয়ারের কাছাকাছি। বিল্ডিংয়ের পিছনদিকে তিনতলায় রানার সুইট। দরজা বন্ধ করে আন্ডারওয়্যার ছাড়া খুলে ফেলল সব, আয়নার সামনে দাঁড়িয়ে প্রথমে পরল উইগটা। কাঁচি দিয়ে খানিকটা কাটছাঁট করার পর মানিয়ে গেল মাথা ও চেহারার সঙ্গে। এরপর চশমা। লেন্সে পাওয়ার নেই, রিম বানানো হয়েছে তার দিয়ে। সুকমলকে বুড়োটে ও ক্লান্ত দেখালে ভাল হয়, রাস্তায় বেরিয়ে কি ভঙ্গি নেবে আয়নার সামনে তারও রিহার্সেল হয়ে গেল। সামনের দিকে ঝুঁকে থাকলে কয়েক ইঞ্চি খাটো দেখায়। চেহারায় খানিকটা নিস্তেজ ও অন্যমনস্ক ভাব ব্যক্তির গুরুত্ব কমিয়ে ফেলে। কসমেটিক্স নয়, নিখুঁত ছদ্মবেশের রহস্য হলো মুখের অভিব্যক্তি।

অস্ত্র ছাড়া নিজেকে অর্ধনগ্ন লাগছে। অভাবটা পূরণ করার জন্যে রওনা হলো রানা।

বেশ কয়েক বছর পর ইয়ানগনে এসেছে, বাইরে বেরিয়ে খেয়াল করল অনেক রাস্তারই আগের নাম বদলে নতুন নাম রাখা হয়েছে। নতুনগুলো প্রায় সবই জেনারেলদের নামে নামকরণ করেছে সামরিক সরকার। রানার মনে পড়ল, গত বছর অ্যামনেস্টি ইন্টারন্যাশনাল তাদের বার্ষিক রিপোর্টে অভিযোগ করেছিল, যার নামে রাস্তার বা এলাকার নামকরণ করা হয়েছে সে বা তার পরিবার ওই রাস্তা বা এলাকার সমস্ত বৈধ-অবৈধ ব্যবসা থেকে চাঁদা পায়।

জেনারেল খই খই কুয়া অভিজাত এলাকা, বড়বড় হোটেল-রেস্তোরাঁ আর শপিং মল-এর ছড়াছড়ি। একটা হ্যান্ডিক্রাফট্‌স-এর দোকানকে পাশ কাটিয়ে এল রানা, সবুজ, নীল ও সাদা হরফে সাইনবোর্ড লেখা হয়েছে: ‘ঐতিহ্য-অ্যান্টিক্‌স অ্যান্ড হ্যান্ডিক্রাফট্‌স ফ্রম বাংলাদেশ।’

রাস্তা পেরিয়ে উল্টোদিক থেকে দোকানটার চারপাশে তাকাল রানা। ঐতিহ্যের ওপর কেউ নজর রাখছে বলে মনে হলো না। তবে তার মানে এই নয় যে সত্যি কেউ নজর রাখছে না। ভারতীয়, নেপালি আর ভুটানি দোকানগুলোর সামনে লোকজনের বেশ ভিড় দেখা যাচ্ছে।

চারটের সময় অ্যাপয়েন্টমেন্ট। সাড়ে তিনটে বাজে। ওকে পাঁচটায় যেতে বলাটা আসলে একটা সঙ্কেত।

ঐতিহ্য রানা এজেন্সির ইয়ানগন শাখা। সামরিক সরকার কাজ করার লাইসেন্স না দেয়ায় কৌশলের আশ্রয় নেয়া হয়েছে।

একটা রেস্টোরাঁয় বসে চা আর চুরুট খেয়ে সময়টা কাটাল রানা। সবাই যেখানে চুরুট খাচ্ছে, একজন না খেলে দৃষ্টি কাড়া হয়। ঠিক চারটের সময় পৌছাল ঐতিহ্যের দরজায়।

কাঁচের ভেতর দিয়ে বার্মিজ লুঙ্গি পরা খাটো এক তরুণ ওর দিকে তাকাল। কথা হলো ইন্টারকমে। 'বলুন, আপনার জন্যে কি করতে পারি।'

'আমি সুকমল। পাঁচটায় আমার অ্যাপয়েন্টমেন্ট।'

'কিন্তু এখন তো মাত্র চারটে বাজে।'

'ঘড়ি সব সময় ঠিক কথা বলে না।'

দরজার তালা খুলে গেল। 'প্লীজ, মি. সুকমল, ভেতরে আসুন।'

'ধন্যবাদ।'

দোকানটা সরু ও লম্বা। ছোট বড় বিভিন্ন আকারের কাঁচ মোড়া শোকেসে উপমহাদেশের প্রাচীন ধ্বংসাবশেষ থেকে উদ্ধার করা আর্টিফ্যাক্ট সাজিয়ে রাখা হয়েছে। একদিকের দেয়াল জুড়ে শেলফ, তাতে হিন্দু দেবদেবীদের মূর্তি, বুদ্ধমূর্তি, দুর্লভ পেইন্টিং, ভাস্কর্য, ইত্যাদি রাখা হয়েছে। আরেকদিকে বাংলাদেশী হস্তশিল্প, জামদানি ও মসলিন থেকে গুরু করে বরের টোপর পর্যন্ত অনেককিছুই আছে।

'স্যার, আমি মনির হাসান,' তরুণ বলল। 'আসুন, আপনার জন্যে ম্যাডাম বৃষ্টি অপেক্ষা করছেন।'

তার পিছু নিয়ে পিছনদিকে, ডিসপ্লে এরিয়ায় চলে এল রানা। এখানে প্রকাণ্ড একটা অ্যান্টিক ডেস্কের পিছনে সূট পরা এক লোক বসে আছে, বয়স হবে ছাব্বিশ কি সাতাশ। তরুণ বলল, 'মি. সুকমল, ইনি আমাদের অ্যাসিস্ট্যান্ট ম্যানেজার শহীদুল হক।'

তাড়াহুড়ো করে চেয়ার ছাড়ল শহীদ, উজ্জ্বল হাসিতে উদ্ভাসিত হয়ে উঠেছে মুখ, ডেস্ক ঘুরে রানার দিকে প্রায় ছুটে এল, ডান হাতটা সামনে বাড়ানো। 'রাখো তোমার হাবিজাবি ট্রেডক্রাফট!' তরুণকে তিরস্কার করল সে। 'ওহ, মাসুদ ভাই! আপনার সঙ্গে কতদিন পর দেখা! কল্পনাও করিনি ইয়ানগনে আপনাকে দেখতে পাব...'

হাতটা রানা মেলাল ঠিকই, তবে ঠাণ্ডা ও নির্লিপ্ত স্বরে বলল, 'আপনি আমাকে অন্য ক্রেউ বলে ভুল করছেন। আমি সুকমল বড়ুয়া।'

'হে-হে, এখানে সবাই আমরা আপনার শিষ্য, মাসুদ ভাই! একান্ত্রও যদি অভিনয় করতে হয় তাহলে শ্রদ্ধা জানাব...'

'আমার শিষ্যরা সবাই জানে কোন অবস্থাতেই কাভার ভাঙা চলবে না,' শান্ত গলায় বলল রানা।

'বুঝেছি, আপনি ঠাট্টা করছেন!' শহীদ এখনও হাসছে। 'নাকি ভাবছেন দোকানে মাইক্রোফোন লুকানো আছে? রোজ একবার করে সার্চ করি আমরা,

মাসুদ ভাই-নেই।’

‘একজন লিপরিডার বিনকিউলার নিয়ে এদিকে তাকিয়ে থাকলে তুমি এইমাত্র আমার কাভার ফাঁস করে দিয়েছ।’ রানা রাস্তার দিকে পিছন ফিরে দাঁড়িয়ে আছে।

শহীদের মুখের হাসি ধীরে ধীরে ম্লান হলো। তবে বোকার মত আরেকটা মন্তব্য করে বসল, ‘আমি কিন্তু মাসুদ ভাই বাংলায় কথা বলছিলাম।’

‘তারমানে তুমি ধরে নিচ্ছ বাংলা জানে এমন প্রতিপক্ষ আমাদের নেই?’

‘মি. সুকমল, স্যার,’ মনে করিয়ে দেয়ার সুরে, সবিনয়ে বলল মনির হাসান, ‘ম্যাডাম বৃষ্টি আপনার জন্যে অপেক্ষা করছেন।’

শহীদ কি বলে শোনার জন্যে অপেক্ষা না করে হাসানের পিছু নিয়ে ডেস্কটাকে পাশ কাটাল রানা। বোতামে চাপ দিল হাসান, ডেস্কের পিছনের দরজাটা খুলে গেল। ভেতরে আরেকটা দরজা। সেদিকে পা বাড়াতে সেটাও খুলে গেল। চৌকো, জানালাবিহীন একটা কামরায় ঢুকল রানা। চারদিকে ফাইলিং কেবিনেট, কমবিনেশন লক, সফিসটিকেটেড ইলেকট্রনিক ইকুইপমেন্ট দেখা যাচ্ছে।

ফারহানা আহমেদ বৃষ্টি রানা এজেন্সির ইয়ানগন শাখার প্রধান। মিষ্টি চেহারা, বুদ্ধিদীপ্ত চোখ, একহারা গড়ন। জুডো-কারাতে জানে, পিস্তলে দক্ষ, বেশ কয়েকটি ভাষায় ভাল দখল আছে। বিভিন্ন দেশে চাকরি করার অভিজ্ঞতা আছে, যে-কোন পরিবেশে সহজেই মানিয়ে নিতে পারে নিজেকে। আজ তার পোশাক বার্মিজ লুঙ্গি ও আঁটসাঁট ব্লাউজ।

রানাকে দেখে বৃষ্টি ব্যস্ত হলো না, শুধু হ্যান্ডশেক করার জন্যে একবার দাঁড়াল, রানা একটা চেয়ার টেনে বসার পর বলল, ‘ছয়বেশটা মন্দ হয়নি, তবে জ্যাকেটটা বড় বেশি ঢোলা।’

মনে মনে খুশি হলো রানা। বৃষ্টি সরাসরি কাজের কথা পেড়েছে। ‘অস্ত্র রাখার জন্যে একটু বেশি জায়গা দরকার আমার।’

ডেস্কের দেওয়াল খুলে ভেতর থেকে একটা ডিপ্লোম্যাটিক পাউচ বের করল বৃষ্টি। ‘আপনার আগেই পৌছেছে এটা।’

‘দূতবাসের লোকেরা বিরক্ত হয়নি?’ জিজ্ঞেস করল রানা। ‘এ-ধরনের কাজ করতে ওরা সাধারণত রাজি হয় না।’

‘রস্ট্রদূত মোস্তফা সাহেব টের পেলে খেপে যেতেন,’ বলল বৃষ্টি। ‘কাজটা তাঁকে গোপন করে করতে হয়েছে। আপনি তো জানেন, অবৈধ কোন কাজ তিনি একদমই সমর্থন করেন না।’

‘হ্যাঁ, শুনেছি। খেয়াল রেখো তিনি যেন জানতে না পারেন এখানে আমি কিজন্যে এসেছি।’ রানা হাসছে। পাউচ থেকে বের করে বৃষ্টির ডেস্কে শোভার হোলস্টার সহ একটা নাইনএমএম ল্যুগার রাখল, পাশে রাখল স্ট্র্যাপসহ একটা ছুরি আর বাদাম আকৃতির খুদে কয়েকটা বোমা। জ্যাকেট খুলে শার্টের আন্তিন গুটাল, বগলের তলায় স্ট্র্যাপ আটকে খাপসহ ছুরিটা লুকিয়ে রাখল সেখানে। জ্যাকেট পরার পর ল্যুপাবটা চেক করল।

‘লুগারটা পেয়ে আপনার চেহারা ই বদলে গেল, মাসুদ ভাই!’ বৃষ্টি হাসছে।
‘এটাকে আমার অর্ধাঙ্গিনী বললেও কম বলা হয়।’ শোস্তার হোলস্টারটা পরল রানা। লোডেড একটা ক্লিপ ঢোকাল লুগারে। ‘এখন আমি কাজে হাত দেয়ার জন্যে তৈরি।’

‘এই দু’জনকে ফেলতে হবে আপনার।’ ডেস্কে একজোড়া ফটোগ্রাফ রাখল বৃষ্টি। ‘তা না হলে এরাই আপনাকে ফেলে দেবে।’

একটা ফটো তুলে খুঁটিয়ে দেখল রানা। ‘চেহারাটা যেন কমিক বুকের কোন চরিত্র। ফ্যানাটিক নাকি?’

‘বলুন ম্যানিয়াক। ওর নাম হিনান ফো।’

‘এই লোকটাই আগুন নিয়ে খেলে?’

‘হ্যাঁ। প্যাথলজিকাল স্যাডিস্ট, মাসুদ ভাই। আগুন তার নেশা। তবে পিস্তলেও ভয়ানক।’

‘আর এই জায়ান্টটা?’

‘চো মাউং। মানসিক প্রতিবন্ধী। ধর্ষণ করে মেরে ফেলে। ভায়োলেটস ই পেশা। অস্ত্র বলতে খালি হাত। ফো তার একমাত্র গুরু। জেলখানায় দেখা। রোহিঙ্গা গেরিলাদের সঙ্গে তখনই ওদের যোগাযোগ হয়।’

‘এরা রাজনীতি করছে বলে বিশ্বাস হয় না।’

‘শুধু টাকা আর পরস্পরের প্রতি দুর্বল ওরা,’ বলল বৃষ্টি। ‘কিছু অবসরপ্রাপ্ত জেনারেল আন্ডারগ্রাউন্ডে দাপট দেখিয়ে বেড়াচ্ছে, ফো আর মাউং তাদের হয়ে কিছু কিছু কাজ করে বলে শোনা যায়। তবে টাকা দিলে সবার কাজই করবে ওরা।’

‘এখানেই সুব্রত বড়য়া প্রসঙ্গ এসে পড়ে,’ বলল রানা।

‘ঠিক। সম্পত্তির মালিক হতে কেমন লাগে আপনার?’

‘সম্পত্তিটা আগে দেখতে হবে।’

‘ভাঙাচোরা, পরিত্যক্ত একটা ওয়্যারহাউস। পাইয়োপন এলাকায়।’

‘ভাল। পুড়ে ছাই হয়ে গেলে কারও কোন ক্ষতি নেই। ওটা আজই আমি দেখতে চাই, বৃষ্টি।’

‘কিভাবে ওখানে যেতে হবে মনির জানে। সুব্রতর নামে সে-ই ওটা কিনেছে।’

‘গুড। মনির নিয়ম মেনে কাজ করে। আমার যদি কখনও ব্যাকআপ দরকার হয়, শহীদকে পাঠিয়ে না।’

‘কোন কারণ আছে, মাসুদ ভাই?’ গলার স্বরই বলে দিল কারণটা বৃষ্টি জানে।

‘ওর অ্যাটিচুড আমার পছন্দ নয়।’

‘হিসাব আর অফে শহীদ রীতিমত একটা প্রতিভা,’ বলল বৃষ্টি। ‘কিন্তু সিক্রেট অপারেশনে নিজেকে খাপ খাওয়াতে পারে না।’

‘তুমি যদি সুপারিশ করো, ওকে আমি ঢাকায় পাঠিয়ে ডেস্কে বসিয়ে দিতে পারি।’

‘লোকবলের এই অভাবের সময়? পরে, মাসুদ ভাই।’

‘ওকে নিয়ে তুমি কাজ করবে, তুমি যা চাও তাই হবে।’ একটু থেমে জিজ্ঞেস করল। ‘এবার তোমার খবর বলো।’

হেসে উঠল বৃষ্টি। ‘পরিণত, বয়সেও মেলে, এমন বাঙালী ছেলে মায়ানমারে আমি কোথায় পাব? কাজেই আপনি দেশে ফেরত না পাঠানো পর্যন্ত প্রেম বা বিয়ে কিছুই আমার কপালে নেই।’

‘মন খারাপ কোরো না। আজ তুমি আমাকে ডিনারের প্রস্তাব দিলে আমি হ্যাঁ বলব।’

‘আপনার সঙ্গে বেরুতে পারা তো ভাগ্যের ব্যাপার,’ বলল বৃষ্টি। ‘কিন্তু পায়ে কুড়ুলটা আমি নিজেই মেরেছি। আজ সন্ধ্যায় আপনি বুকড।’

‘ভাগ্যবতী ভদ্রমহিলাটি কে?’

‘মিনা রুজ। মহিলা, তবে সে ভদ্র নয়। রুজ হলো আপনার আর হিনান ফোর মাঝখানে পাইপলাইন। ওই লাইন সম্ভবত আরও দূরে, রহস্যমানব পর্যন্ত পৌঁছেছে।’

‘রহস্যমানব?’

‘লোকটা মায়ানমারে মার্ক্সিস্ট মার্ভার নেটওয়ার্ক চালায়। আজ পর্যন্ত কেউ তার পরিচয় সম্পর্কে নিশ্চিত হতে পারেনি।’

‘রাতটা মনে হচ্ছে খুব ইন্টারেস্টিং হবে,’ মন্তব্য করল রানা।

পাঁচ

পাইয়োপন প্রাচীন বন্দরনগরী। শুধু ওয়্যারহাউসটা নয়, পলি জমে নাব্যতা হারানোর ফলে গোটা বন্দরটাই পরিত্যক্ত ঘোষিত হয়েছে, বিশ মাইল দূরে নতুন আরেকটা বন্দর গড়ে ওঠার পর। দীর্ঘ যাত্রা, প্রচলিত দরের চেয়ে তিনগুণ বেশি পয়সা দিয়ে ক্যাব ড্রাইভারকে যেতে রাজি করল রানা।

সূর্য ডুবতে কয়েক ঘণ্টা বাকি থাকতেই বিল্ডিংটার সামনে থামল ক্যাব। অতিরিক্ত আরও কিছু বকশিশ দিয়ে ড্রাইভারকে অপেক্ষা করতে বলল রানা।

‘তবে বেশি দেরি করবেন না, স্যার,’ বলল ড্রাইভার। ‘এদিকে দিনের বেলাই ছিনতাই হয়, রাতে শ্রেফ খুন হয়ে যাব।’

লমা ও হ্যান্সারসদৃশ ওয়্যারহাউস জেটির মুখে পড়ে আছে, সরু পাশটা রাস্তার দিকে। চেইন লিঙ্ক দিয়ে তৈরি করা বেড়া, মাথার দিকটায় কাঁটাতার। বাঁ দিকে ওটার প্রতিবেশী বিধ্বস্ত একটা ডক, ডান দিকে পনেরো বছর আগে লালবাতি জ্বালা একটা ক্যানারি।

মেইন গেটে চেইনের সঙ্গে তালা ঝুলছে। বৃষ্টির দেয়া চাবি বের করে খুলল রানা। টকটকে লাল চোখ, গায়ে-গতরে পালোয়ান, গার্ডক্রম থেকে থপ-থপ

পায়ের আওয়াজ তুলে ছুটে এল একজন। ‘করেন কি! কে আপনি?’

‘মালিক। সম্পত্তি দেখতে এসেছি। কেন, সুব্রত বড়ুয়া সম্পর্কে তোমাকে জানানো হয়নি?’

‘ও, আচ্ছা, আপনিই তাহলে! ক্ষমা চাই, মহাশয়, হাজার বার ক্ষমা চাই। তবে পরিচয়-পত্রটা একবার দেখতে হবে আমাদের।’

লোকটার নাম কাইয়ু, একটা সিকিউরিটি ফার্মে চাকরি করে। একদল লইয়ার সম্পত্তিটা ক্রয় ও হস্তান্তরের দায়িত্ব নেয়, তারাই সিকিউরিটি ফার্মের সার্ভিস ভাড়া করেছে।

একবার চোখ বুলিয়েই পাসপোর্টটা ফিরিয়ে দিল কাইয়ু। ‘আপনি ঘুরেফিরে দেখুন, আমি গেটে তালা দিয়ে আসি,’ বলল সে।

‘তার আগে ড্রাইভারকে ভেতরে আসতে বলো।’ রানা ভয় পাচ্ছে ওকে রেখেই না পালিয়ে যায় লোকটা। ‘ক্যাবটা তোমার গাড়ির পাশে এনে রাখুক।’

ক্যাব ভেতরে ঢোকান পর গেট বন্ধ করল কাইয়ু, হাতে কী রিড নিয়ে চারদিকটা ঘুরিয়ে দেখাচ্ছে রানাকে। কোন কোম্পানির নাম বা লোগো, কিছুই চোখে পড়ল না। গেটের পাশে ছোট্ট টিনের পাতে শুধু রাস্তার নাম আর হোল্ডিং নম্বর ৫০৩ লেখা আছে। ভাঙাচোরা ও পরিত্যক্ত বললে কিছুই বলা হয় না, ওয়ারহাউস থেকে রীতিমত দুর্গন্ধ ছড়াচ্ছে। বিশাল উঠান আর জেটির বেশিরভাগ জায়গা জুড়ে পাহাড়ের মত উঁচু হয়ে আছে পঞ্চাশ গ্যালন ড্রামে, ভেতরে শিল্পবর্জ্য। ঝাঁঝাল রাসায়নিক দুর্গন্ধের উৎস ওই ড্রামগুলোই। দু’পেয়ে প্রাণী দেখে কিচ-কিচ্ শুরু করল কয়েকশো ইঁদুর, ড্রামগুলোর ফাঁকে গর্ত খুঁড়ে আস্তানা গেড়েছে।

মেইন বিল্ডিংয়ের তালা খুলল কাইয়ু। ইলেকট্রিক লাইন অনেক আগেই বিচ্ছিন্ন করা হয়েছে, মাকড়সার জাল ভেদ করে নোংরা স্কাইলাইট থেকে নেমে আসা দিনের আলোয় উজ্জ্বলতা নেই, ফাঁকা জায়গার শুধু মসজিদখানটা আলোকিত। বাকিটা চোখে তুলে ধরল কাইয়ুর টর্চ।

ওয়ারহাউসের ভেতরেও প্রচুর টক্সিক ওয়েস্ট ক্যানিস্টার স্ফূপ হয়ে আছে। গন্ধটা তীব্র ও অস্বাস্থ্যকর। নাকে রুমাল চেপেও তেমন লাভ হচ্ছে না।

পরবর্তী আধঘন্টা ঘুরেফিরে দেখল রানা, পুরো লেআউট গেঁথে নিল স্মৃতিতে-বেরুবার ক’টা পথ, লুকানোর জায়গা, পালাবার রাস্তা। সবশেষে কাইয়ুকে বলল, ‘এখন এখানে এমন কিছু নেই যে তোমাকে পাহারা দিতে হবে। তোমার ফার্মকে জানিয়ে দিয়ে আমার কোন গার্ড দরকার নেই আর।’

স্মান মুখে কাইয়ু বলল, ‘জী।’ চাবিটা রানার হাতে ধরিয়ে দিল সে। ‘আমি তাহলে এখনই ফিরে যেতে চাই।’

ইয়ানগনে ফিরে আসতে সন্ধ্যা পার হয়ে গেল।

ইরাবতী নদী আর আন্দামান সাগরের মোহনার খুব কাছেই ঝিক ঝিক নাইটক্লাবটা। রাজধানী থেকে বেশ দূরে, এলাকার নাম এত বড় আর কর্কশ যে

উচ্চারণ করতে দাঁত ভেঙে যেতে পারে, তাই ক্যাব ড্রাইভারকে রানা সংক্ষেপে জিজ্ঞেস করল, 'উন চেনো?'

হেসে মাথা ঝাঁকাল ড্রাইভার। আধঘণ্টার মধ্যে জায়গামত পৌছেও দিল। ক্লাবে ঢুকে রানা দেখল শেষ শো-তে নাচছে মিনা রুজ।

যদ্দেশে যদাচার, একা একটা টেবিল নিয়ে বসলে খাও আর না খাও ব্র্যান্ডির অর্ডার দিতে হবে তোমাকে। বকশিশ দিয়ে মঞ্চের কাছেই, বসল রানা। মেয়ে যথেষ্ট লম্বা না হলে ক্যাবারেই জমাতে পারে না, তবে পরিষ্কার বোঝা গেল রুজ ব্যতিক্রম। হাউস ব্যান্ডে ডিসকো বাজছে, তার উদ্দাম গতির সঙ্গে তাল বজায় রেখে রীতিমত জাদু দেখাচ্ছে মেয়েটা, দর্শকদের উল্লাস বর্ণনার অতীত। হলরুমের তাপমাত্রা কয়েক ডিগ্রী বাড়িয়ে দিয়ে নাচ শেষ করল সে, উত্তেজিত দর্শকরা স্টেজে উঠে পড়ার আগেই গুরু নিতম্বে ঢেউ তুলে উইং হয়ে পালিয়ে গেল। টেবিল ছেড়ে রানাও চলে এল মঞ্চের পিছন দিকে।

ওকে যে থামাল সে দু'পেয়ে, এবং উচ্চতায় সাড়ে চার ফুট, তা না হলে গার্ডের বদলে বুলডগ বলে চালিয়ে দেয়া যেত। অবশ্য ঘেউ ঘেউ না করে কোমরে ঝোলানো হোলস্টারে হাত রেখে চোখ গরম করে তাকাল শুধু। রানার আঙুলে বিশ ডলারের নোট দেখে খালি হাতটা চিল হয়ে ছৌঁ দিল। বুলডগ হতে ব্যর্থ গার্ড রানার দিকে পিছন ফিরে দাঁড়াল। তাকে পাশ কাটিয়ে পারফরমারদের ভিড়ে মিশে গেল রানা, তারপর অর্ধনগ্ন একজন নর্তকীর পথ আটকে জানতে চাইল রুজকে কোথায় পাওয়া যাবে।

'আমাকে তোমার পছন্দ নয়?' অভিমানে ঠোট ফোলাল সে।

'কিন্তু আমার যে আগে থেকেই ডেট আছে!'

'রুজের ড্রেসিংরুম হলওয়ার শেষ মাথায়, বাঁ দিকের দরজা।' রানা রওনা হতে পিছন থেকে চিৎকার করে আবার বলল, 'রুজের দর কিন্তু চড়া!'

-তা আর বলতে, ভাবল রানা। রুজের সার্ভিস পেতে রানা এজেন্সিকে ভাল ক্রিয়াত খরচ করতে হচ্ছে।

• ড্রেসিংরুমের দরজায় নক করল রানা।

'যেই হও, ভাগো। এখন দেখা হবে না, জরুরী অ্যাপয়েন্টমেন্ট আছে আমার।'

'আমিই তোমার সেই অ্যাপয়েন্টমেন্ট-সুব্রত।'

'দরজা খোলা আছে।'

ড্রেসিংরুমে পাউডার, পারফিউম, লোশন আর ক্রীমের গন্ধ। গায়ে সাদা রোব জড়িয়ে আয়নার সামনে বসে মেকআপ তুলছে রুজ। আয়নায় রানার চেহারা দেখে চোখে আগ্রহ ফুটল, টুলের ওপর নিতম্বে ঘষে ঘুরে বসল তাড়াতাড়ি। 'আপনিই তাহলে সুব্রত বাবু। আমি ভেবেছিলাম মাঝবয়সী কোন কুঁজো লোক হবে। টাকা এনেছেন তো?'

জ্যাকেটের পকেট থেকে একটা এনভেলোপ বের করে রুজের বাড়ানো হাতে ধরিয়ে দিল রানা।

এনভেলাপ খুলে একতড়া কিয়াত্ত গুনল রুজ। ভুরু কুঁচকে মুখ তুলল।
'ছেলেটার সঙ্গে যত কিয়াতে রফা হয়েছিল, এখানে তার অর্ধেক দেখছি কেন?'

'ছেলেটা' আসলে মনির হাসানের কাভার আইডেনটিটি। জ্যাকেটের পকেট থেকে আরেকটা এনভেলাপ বের করে রুজকে দেখাল রানা। 'বাকিটা এখানে।
নান তুং-এর সঙ্গে আমার পরিচয় করিয়ে দেয়ার পর পাবে।'

'জানব কিভাবে আপনি ঠকাবেন না?'

'আমিই বা বুঝব কিভাবে নান তুং আমাকে হিনান ফোর হদিশ বলতে পারবে?'

রুজের চোখ প্রথমে বড়, তারপর সরু হলো। টুল থেকে নেমে নিঃশব্দ পায়ে দরজার কাছে এল, কবাট খুলে উঁকি দিয়ে দেখল বাইরেটা। সন্দেহজনক কিছু চোখে পড়েনি, ঘুরে চলে এল রানার সামনে। ইতিমধ্যে রানাও দরজার দিকে ঘুরে দাঁড়িয়েছে। 'আগুন নিয়ে খেলবেন না, প্লীজ। চারদিকে তার চর আছে। ওই নাম কারও মুখে শুনলে খেপে যায় তারা,' শুকিয়ে যাওয়ায় ফ্যাসফেসে শোনা তার গলা। পাশ কাটিয়ে টুলের দিকে ফেরার সময় খেয়াল করল না, আলোড়িত নিতম্বের ডেউ রানার উরুতে আঘাত করল মদু।

রানা বলল, 'আমি আগুন নিয়ে খেলতে ভয় পাই না।'

'খুব বাজে একটা কৌতুক করলেন,' টুলে বসে বলল রুজ, 'এদিক ওদিক মাথা নাড়ল।' এমনকি পিস্তলবাজ পুলিশরা পর্যন্ত তাকে ভয় পায়। এ-ও শোনা যায় যে অবসরপ্রাপ্ত জেনারেলরাও তাকে কাজে লাগায়।'

'আমিও একজন ব্যবসায়ী হিসেবে তাকে কাজে লাগাতেই চাই,' বলল রানা। 'কিন্তু সেজন্যে তাকে আমার ভয় পেতে হবে কেন?'

'আপনি হয় অত্যন্ত বোকা, নয়তো অসম্ভব সাহসী,' বলল রুজ। 'বোকা হলে নির্ঘাত খুন হয়ে যাবেন, সেক্ষেত্রে বাকি কিয়াত্ত আমি আর পাব না। আপনি বরং এখনই পুরো পাওনা মিটিয়ে দিন।'

'বাকিটা কাজ শেষ হলে,' বলল রানা। 'রাজি না থাকলে বলো, আমি অন্য কাউকে ধরি।'

'ঠিক আছে, ওটার আশা আমি নাহয় ছেড়েই দিলাম,' বলল রুজ। 'তবে যতটা পারা যায় পুষ্টিয়ে নিতে হবে আমাকে। আপনি আমাকে আজ ডিনার খাওয়াচ্ছেন।'

'তা না হয় খাওয়াব, কিন্তু নান তুঙের সঙ্গে দেখা করার কি হবে?'

'রাত তো হবে শুরু। সে তার আড্ডা ছেড়ে কোথাও যাবে না।' টুল ছেড়ে নামল রুজ, টয়লেটের দরজা খুলে ঘাড় ফেরাল। 'এদিকে তাকাবেন না, শাওয়ারে আমি দরজা খুলেই দাঁড়াই।'

গোসল করার পর আবার মেকআপ করল রুজ, তারপর রানাকে নিজের হাতটা ধরতে দিয়ে বেরিয়ে এল নাইটক্লাব থেকে। একটা ট্যাক্সি নিয়ে জেনারেল পাকুয়া অ্যাভিনিউ-এ চলে এল ওরা। ওং ফং রেস্টোরাঁর ঢুকে মেনু দেখল রুজ, অর্ডার দিল সবচেয়ে দামী ফিলিট বীফস্টেক-এর। সঙ্গে রেড ওয়াইন।

খাওয়াদাওয়া শেষ হতে টেবিল ছেড়ে দাঁড়িয়ে পড়ল রুজ।

‘কোন রকম চালাকি কোরো না,’ সাবধান করে দিল রানা। ‘তোমার যদি পিছনের দরজা দিয়ে পালাবার ইচ্ছা থাকে, শুধু মনে রাখতে বলব আমি জানি তোমাকে কোথায় পাওয়া যাবে।’

কথা না বলে চলে গেল রুজ, একটু বোধহয় রেগেই গেছে।

কয়েক মিনিট পর তাকে ফিরে আসতে দেখে স্বস্তিবোধ করল রানা। একা নয়, সঙ্গী হিসেবে সর্দি নিয়ে এসেছে সে। ঘন ঘন নাক টানছে, হঠাৎ যেন ঠাণ্ডা লেগেছে। নাকের ফুটোয় সাদা একটু দাগও দেখা গেল।

‘তুমি ড্রাগ অ্যাডিক্ট,’ মৃদু কণ্ঠে বলল রানা।

‘মানে?’ হকচকিয়ে গেল রুজ।

‘অভ্যাসটা দেখা যাচ্ছে,’ বলে নিজের নাক ঝুলো রানা।

ন্যাপকিন ঘষে নাক মুছল রুজ।

‘এবার বলো, আগুন নিয়ে কে খেলছে?’ জিজ্ঞেস করল রানা।

‘আমাকে নিয়ে আপনার মাথা ঘামাতে হবে না।’

‘কে বলল তোমাকে নিয়ে মাথা ঘামাচ্ছি? আমি নিজের নিরাপত্তার কথা ভাবছি। ড্রাগ নিয়ে তুমি ধরা পড়লে আমিও ফেসে যাব।’

ডেজার্ট এ কফি খাবার সময় অস্থির দেখাল রুজকে। কফিতে মাত্র একবার চুমুক দিল, বলল, ‘চলুন, অন্য কোথাও যাই। এখানে আমার ভাল লাগছে না।’

বিল মিটিয়ে দিল রানা, রুজকে নিয়ে দরজার দিকে এগোল।

দরজা খুলে ভেতরে ঢুকল এক লোক।

রানার বাহু ধরা রুজের হাত লোহা হয়ে গেল, শার্টের আন্তিন ভেদ করে মাংসে নখ ঢুকে যাচ্ছে।

আগন্তুক লোকটা মধ্যম আকৃতির, গাঢ় চকলেট রঙের সুট পরে আছে। চওড়া গৌফ আর মোটা ফ্রেমের চশমায় মুখের বেশিরভাগই ঢাকা। রানার অভিজ্ঞ চোখে হিপ হোলস্টার ধরা পড়ল।

রুজকে দেখে অকৃত্রিম আনন্দে উজ্জ্বল হয়ে উঠল তার চোখমুখ। ‘মিনা, ডার্লিং! তোমাকে দেখে কি ভালই না লাগছে!’

‘আমারও ভাল লাগছে, মি. ইয়ে আউং,’ মুখে যাই বলুক, গলাটা রুজের গুকনো কাঠ।

মাথা নুইয়ে সম্মান জানাল ইয়ে আউং, কেতাদুরস্ত ভঙ্গিতে চুমো খেলো রুজের হাতের উল্টোপিঠে। ‘ভাগ্যবান ভদ্রলোককে মনে হচ্ছে বিদেশী, আমার সঙ্গে পরিচয় করিয়ে দেবে না, ডার্লিং?’

‘হ্যাঁ, অবশ্যই।’ রুজের মুখে স্বাভাবিক রঙ ফিরে আসছে। ‘সুব্রত, ইনি মেজর ইয়ে আউং, বিখ্যাত ডিটেকটিভ।’

‘বিখ্যাত? তুমি কৌতুক করছ, মিনা।’ মেজরের মুখে পেকে ফেটে যাওয়া কাঁঠালের হাসি।

‘মি. আউং, ইনি সুব্রত,’ বলল রুজ। ‘ট্যুরিস্ট, ভারত থেকে আসছেন।’

রানার সঙ্গে হ্যাভশেক করল মেজর আউং। ‘পরিচিত হয়ে খুশি হলাম, মি. সুব্রত। তা উদ্দেশ্যটা কি শুধুই বেড়ানো, স্যার?’

মাথা নাড়ল রানা। ‘না। ঘুরেফিরে দেখতে চাই বিনিয়োগের ভাল কোন সুযোগ আছে কিনা।’

‘আমি আপনার সাফল্য কামনা করি। মায়ানমারে সুযোগের কোন অভাব নেই।’

‘ধন্যবাদ, মেজর,’ বলল রানা। ‘তাহলে বিদায়, কেমন? আমরা একটু ব্যস্ত আছি।’

‘আমি নিশ্চিত, আবার আমাদের দেখা হবে, মি. সুব্রত। এখন কিন্তু শুধু আউং বললেই হবে। সবাই তাই বলে আর কি।’

‘আপনিও আমার নাম ধরবেন।’

‘দু’জনকেই শুভেচ্ছা,’ বলে রেস্টোরার ভেতর দিকে চলে গেল মেজর আউং।

রুজকে নিয়ে বাইরে বেরিয়ে এল রানা। ‘শীত করছে, রুজ? তুমি কাঁপছ।’

‘এ কাকতালীয় না হয়ে যায় না। হ্যাঁ, অবশ্যই। তা না হলে শয়তানের বাচ্চাটা আজ রাতেই এদিকে আসবে কেন! অবশ্যই কোইসিডেন্স!’ রুজ নার্ভাস, রানার কাঁধ প্রায় খামচে ধরল।

‘শয়তান আছে, এরকম ধারণা কিন্তু সায়েন্টিফিক নয়,’ বলল রানা। ‘তার আবার বাচ্চা হয় কি করে?’ নিজের কৌতুকে হাসছে, উদ্দেশ্য রুজকে খানিকটা অভয় দান।

‘ঠাট্টা নয়, সুব্রত। ডিবি-র অতি কুখ্যাত অফিসার আউং। অত্যন্ত বিপজ্জনক।’

‘বিপজ্জনক, ধরো, হিনান ফোর’চেয়েও?’ জিজ্ঞেস করল রানা।

ওদের কথা কেউ শুনছে কিনা দেখার জন্যে ঝট করে পিছনটা একবার দেখে নিল রুজ। ‘একজন যদি টারগ্যানটিউলা হয় তো আরেকজন কাঁকড়া বিছে।’

‘তাই?’ ধীরে ধীরে জিজ্ঞেস করল রানা। ‘কে কোনটা?’

‘দু’জনেই বিষ, সুব্রত। আমার এই কথা সব সময় মনে রাখবেন।’

একটা ট্যাক্সি নিল ওরা। ড্রাইভারকে রাস্তার নাম বলল রুজ—জেনারেল উন উন সান অ্যাভিনিউ।

‘গন্তব্যে প্রায় পৌঁছে গেছি,’ দশ মিনিট পর রানার কাঁধে মাথা রেখে বলল রুজ। ‘আপনি আমাকে বাকি টাকাটা দিয়ে দিলেই তো পারেন।’

‘প্রথমে নান তুং, তারপর টাকা।’

রানার কাছ থেকে সরে সীটের আরেক প্রান্তে চলে গেল রুজ।

চারদিক অন্ধকার। ট্যাক্সির স্পীড কমে এল। নোংরা একটা রোডে ঢুকল ওরা। অন্ধকারের ভেতর সাতরঙা নিওনসাইন দেখা গেল, ওই রঙধনুর পাশেই গাড়ি থামাল ড্রাইভার। রাস্তার দু’পাশে দামী গাড়ির বহর। বেঁটে, ইউনিফর্ম পরা শোফাররা পাহারা দিচ্ছে, তাদের প্রায় সবাইকে সশস্ত্র বলে মনে হলো। ফুটপাথে ছোট ছোট ভিড়। ক্লাবটার নাম কালো বিড়াল।

ওরা ট্যাক্সি থেকে নামতেই রুজকে দেখে শিস দিল কয়েক তরুণ, কালো বিড়ালের খোলা মুখের পাশে জটলা পাকাচ্ছে। দরজায় একজন বডিবিন্ডার পাহারায় আছে, তরুণদের ভেতরে ঢুকতে বাধা দিলেও তাদের উচ্ছৃঙ্খলতা গ্রাহ্য করছে না। রুজকে লক্ষ্য করে অশ্লীল মন্তব্য ছুঁড়ে দিল তারা। একজন জুলন্ত সিগারেট ছুঁড়ল, রানার পায়ের কাছে বিস্ফোরিত হলো আগুনের ফুলকি। হাঁটার গতি বাড়িয়ে দিল রুজ, রানার বাহু ধরে আছে।

ক্লাবের ভেতর নরক গুলজার। বিশাল একটা হলঘর। আলো কম, ধোঁয়া বেশি। বডিবিন্ডার রুজকে চেনে, হাত ধরে ভেতরে ঠেলে দিল।

‘এ তুমি আমাকে কোথায় নিয়ে এলে?’

রানার কানে ফিসফিস করল রুজ। ‘দেখে, যাই মনে হোক, এখানেই আন্ডারওয়ার্ল্ডের সঙ্গে যোগাযোগ হয় এলিটদের। নীতিবাগীশ সমাজতন্ত্রী সাতখুনের আসামীর সঙ্গে কাঁধ ঘষে, দেখে বোঝার উপায় নেই কে কোনজন। তাছাড়া, কালো বিড়ালকে আপনি বাজারও বলতে পারেন।’

‘কি বিক্রি হয় এখানে?’

‘বলুন কি বিক্রি হয় না। যা চান তাই পাবেন—ছেলে, মেয়ে, বারুদ, ড্রাগ, পেশী, সোনা।’

‘ধরো, দালানে আগুন ধরাবার জন্যে আমার একজন লোক দরকার।’

‘না!’ জোরে মাথা নাড়ায় রুজের কাঁধের ওপর ছড়িয়ে পড়ল একরাশ কালো চুল। ‘এ-সব আমি শুনতে পর্যন্ত চাই না!’

‘আপাতত অবশ্য একটা টেবিল পেলেই আমি সন্তুষ্ট,’ বলল রানা।

‘নান তুংকে দেখতে পাচ্ছি,’ বলল রুজ। ‘ওর টেবিলেই বসব আমরা।’

চারপাশে এত লোক, রুজ কার দিকে আঙুল তুলল বোঝা গেল না। উপচে পড়া টেবিলগুলোকে পাশ কাটাবার সময় রুজের হাত ধরে থাকল রানা। একবার দাঁড়িয়ে ওর কানে ঠোঁট ছোঁয়াল সে, বলল, ‘তুংকে বোলো না মেজর আউং-এর সঙ্গে আমাদের দেখা হয়েছে।’

সামনে ইংরেজি ইউ হরফের আকৃতি নিয়েছে জায়গাটা। হরফের দুই বাহু ঢালু হয়ে নেমে গেছে নিচে, যেখানে ডাল ফ্লোর। একটা বাহুর দেয়াল ঘেঁষে ফেলা টেবিলটা ভুঙের। টেবিলটা চৌকো একটা বুদের ভেতর, বুদের ছাদে ফুলের টব। টেবিলে বেশ কয়েকজন বসে আছে।

রুজ ফিসফিস করল। ‘টাকা?’

‘এখনি নয়,’ বলল রানা। ‘আগে পরিচয় করিয়ে দাও, কথা বলে দেখি।’

‘তুং মাঝখানে বসে আছে।’

‘আমার আন্দাজ মিলে গেল,’ বলল রানা। বোঝা গেল সহজেই। হিনান ফোর এজেন্ট বা কন্ট্রাস্টর নান তুং পাঁচজনের মধ্যে একা ডিনার জ্যাকেট পরে আছে। ব্যাকব্রাশ করা চুল তেল চকচকে। চ্যাপ্টা মুখ বামীজদের বৈশিষ্ট্য, কিন্তু নান তুঙের চেহারা সরু ও তীক্ষ্ণ। সঙ্গীদের সঙ্গে গভীর কোন আলোচনায় মগ্ন বলে মনে হলো তাকে, তা সত্ত্বেও তার সতর্ক দৃষ্টি অনেক দূর থেকেই আসতে

দেখল রানাকে।

তুঙের ডান ও বাম দিকে একটা করে মেয়ে। ডান দিকের মেয়েটার গায়ের রঙ প্রায় হলুদ, মাথার দু'পাশে বড় আকারের দুটো খোঁপা। বামদিকের মেয়েটা ফর্সা, পরনে থাই পোশাক, হেভি মেকআপ, তুং তার নগ্ন কাঁধে একটা হাত রেখেছে।

সীটের দুই প্রান্তে বসেছে দু'জন পুরুষ। একজনের মুখ তোবড়ানো, মাথায় ছোট টাক, ভাঙা নাকটাকে ঘিরে রেখেছে ঘন ভুরু আর গৌঁফ।

রুজ বলল, 'ওর নাম মাইয়ো মিন, তুঙের লেফটেন্যান্ট। আরেক মাথায় সেং জা।'

সেং জার বয়স পঁচিশের বেশি হবে না, সগর্বে মাথাটা উঁচু করে আছে, নিজের প্রকাণ্ড কাঠামো সম্পর্কে সচেতন। রুজকে আসতে দেখে জ্যোতি ফুটল চেহারায়ে।

রুজ বলল, 'মেয়েগুলোর সঙ্গে আমার পরিচয় নেই, তবে নাম জানি। থাই ড্রেস পরা মেয়েটা নিনি। জোড়া খোঁপার নাম হুদ।'

নান তুং সিধে হয়ে টেবিলের ওপর ঝুঁকে রুজের হাত ধরল। 'তোমরা আসতে পারায় আমরা খুশি।'

টেবিলে দুটো চেয়ার দিয়ে গেল ওয়েটার। বসল ওরা।

রুজের উদ্দেশ্যে একটা চুমো ছুঁড়ে দিল সেং জা। 'হাই, ডার্লিং!'

তুং বলল, 'আপনি নিশ্চয়ই সুব্রত?'

মাথা ঝাঁকাল রানা। হ্যান্ডশেক করল ওরা। তুঙের হাত লোহা, তবে চাপ বাড়াতে গিয়ে যেই টের পেল রানার হাত ইস্পাত, অমনি টিল দিল সে। হাসিমুখে সবাইকে অপেক্ষা করতে বলে বুদ থেকে বেরিয়ে এল, এতক্ষণে রানার হাত ছেড়ে বলল, 'এখানে এত গোলমালের মধ্যে আলাপ করা সম্ভব নয়, ওপরে চলুন।'

'চলুন।'

রানাকে নিয়ে একটা খিলানের দিকে এগোল তুং। এখানেও একজন বডিবিল্ডার পাহারা দিচ্ছে। 'ইনি আমার বন্ধু, সিঁড়িতে এক মিনিট কথা বলেই নেমে আসব।'

বডিবিল্ডার মাথা ঝাঁকাতো দুই প্রস্থ সিঁড়ি টপকে ল্যান্ডিংয়ে থামল ওরা। রানা ও তুং একযোগে পকেট থেকে চুরুট বের করল। তুঙের চুরুট মোটা, কালচে রঙের; রানার চুরুট বাদামী ও সরু। 'হাভানা সিগার?' অবাক হয়ে জিজ্ঞেস করল তুং, রানার বাড়ানো হাত থেকে নিয়ে ঘুরিয়ে ফিরিয়ে পরীক্ষা করল। 'মায়ানমারে বাইরের চুরুট আমদানি করা নিষিদ্ধ। তবে হাভানার স্বাদ-আহা!'

প্রথমে নিজের, তারপর তুঙের সিগারে আগুন ধরাল রানা। লাইটার সঙ্গে সঙ্গে না নিভিয়ে বলল, 'আগুনের অনেক গুণ, কি বলেন?'

'হুম-ম্।'

'আগুন সব ধরনের সমস্যার সমাধান এনে দেয়।'

'একদম সত্যি কথা।' নাক দিয়ে সুগন্ধী ধোঁয়া ছাড়ল তুং। 'আর রুজের কাছ

থেকে যতটুকু শুনেছি, আপনি একটা সমস্যায় পড়েই আমার সঙ্গে দেখা করতে চেয়েছেন।’

‘সমস্যা একটা হলেও, তাতেই পুরো একটা ওয়্যারহাউস ভরাট হয়ে আছে।’

‘সব কথা খুলে বলুন।’

‘একটা ইন্টারন্যাশনাল ইনভেস্টর গ্রুপের প্রতিনিধি আমি,’ শুরু করল রানা। ‘অর্থনৈতিক মন্দা চলছে এরকম দেশে পানির দরে সম্পত্তি কিনি আমরা, ওই সম্পত্তির শ্রীবৃদ্ধি ঘটাই, স্রেফ আবর্জনাকে সম্পদে পরিণত করি, তারপর ভাল লাভে বেচে দিই।’

‘ইন্টারেস্টিং তো!’ তুং মনোযোগী হয়ে উঠল।

‘এবার এক মার্কিন ধনকুবেরের কথা বলি। তিনি তাঁর বিপুল টাকা জনহিতকর কাজে ব্যয় করবেন। ভদ্রলোক একটা ফাউন্ডেশন গড়ে তুলেছেন, সেটার কাজ হলো একটা ওশোনোগ্রাফিক ইন্সটিটিউটকে ফান্ড যোগানো। গোপন সূত্রে আমি জানতে পারি ওই ইন্সটিটিউট মায়ানমারে, আন্দামান সাগরের কাছাকাছি, রিসার্চ সেন্টার খোলার জন্যে একটা সম্পত্তি খুঁজছে। ওদের প্ল্যান হলো আন্দামান ও বঙ্গোপসাগরে প্রতি বছর যে সামুদ্রিক ঝড় হয় তার ওপর গবেষণা করা। কাজেই সাগরের কিনারায় তাদের একটা সেন্ট্রাল লোকেশন দরকার।’

‘সেরকম একটা লোকেশন আপনি পেয়েছেন।’

‘ঠিক। হায়,’ আক্ষেপে নিজের কপাল চাপড়াল রানা, ‘শুধু কি পেয়েছি? না দেখে কিনেও ফেলেছি। ভাল মন্দ যাচাই না করে কিছু কেনার বান্দা নই আমি, কিন্তু এই ব্যবসায় তাড়াহুড়ো না করে উপায় ছিল না। ম্যাপ দেখে সাইটটাকে আমার আদর্শ মনে হয়েছিল। আর দাম? পানির চেয়েও সস্তা। একটাই মাত্র সমস্যা, কিন্তু সে সমস্যার কথা মালিক আমাকে জানায়নি, হাতে টাকা পাবার পর বাতাসে মিলিয়ে গেছে।’

‘সমস্যাটা কি?’

‘বর্জ্য। টক্সিক ওয়েস্ট। ওয়্যারহাউস আর জেটিতে কয়েকশো ব্যারেল ইন্ডাসট্রিয়াল পলিউট্যান্ট ফেলে রাখা হয়েছে।’

‘হ্যাঁ, মুসিবতই বটে!’ তুং সহানুভূতি দেখাল।

‘বল্টিংটা আমার ভেঙে ফেলার প্ল্যান আছে, কিন্তু ওই শালার ব্যারেলগুলো নিয়ে কি করব?’

‘কেন, সাগরে ফেলে দিলেই তো হয়,’ বুদ্ধি দিল তুং। ‘কিংবা ট্রাকে তুলে অন্য কোথাও পাঠিয়ে দিতে পারেন।’

‘পরিত্যক্ত বন্দরের ওদিকটায় সাগরে ড্রেয়িং চলছে,’ বলল রানা। ‘তাছাড়া, কাজটা ছোট নয়, সরাতে গেলে রাজনার চেয়ে রাজনা বেশি হয়ে যাবে—আমার লাভ বলে কিছুই থাকবে না।’

‘আচ্ছা।’

‘কিন্তু যদি সম্পত্তিটায় আগুন লাগে, আমি ভারমুক্ত হতে পারি।’

‘হ্যাঁ, দুর্ঘটনা তো ঘটেই।’

‘বিশেষ করে যদি সামান্য আয়োজন করা হয়। কাজটা বড়, পেশাদারি দক্ষতার প্রয়োজন আছে। আমি জড়িত, বাতাসে এরকম গুজবও থাকা চলবে না। ইন্সটিটিউটে পরিবেশবাদী পাগলরা আছে, তারা জানতে পারলে এই সম্পত্তি কিনতেই চাইবে না।’

‘আমি একটা প্রশ্ন করতে পারি?’

‘হ্যাঁ, অবশ্যই।’

‘আমার কথা আপনি কার কাছে শুনলেন?’

‘আমি পুরানো পদ্ধতিতে তথ্য সংগ্রহ করি,’ বলল রানা। ‘আমি টাকা ছড়াই, কারণ টাকা কথা বলে। আমার স্থানীয় কন্ট্রাক্টকে বলি, এ কাজে সেরা পেশাদার লোক দরকার আমার। তারা আপনার সঙ্গে যোগাযোগ করার পরামর্শ দিল।’

‘তাদের পরামর্শ ঠিকই আছে,’ বলল তুং। ‘আপনি জায়গামতই পৌঁছেছেন। তবে একটা কথা। আমি কিন্তু শুধুই কন্ট্রাক্টর। সংবাদদাতাও বলতে পারেন। কাজের লোকদের আমি চিনি, কে কাজ করাবে এই খবরটা শুধু তাদেরকে পৌঁছে দিই। মূল কাজ তারা করবে, আমার সঙ্গে কোন সম্পর্ক থাকে না।’

‘বুঝতে পারছি। তবে আমারও একটা কথা আছে। কাজের লোকটাকে অবশ্যই প্রফেশনাল হতে হবে। আমার সম্পত্তিটা বিরাট। এ স্বেচ্ছা একটা বাড়ি পোড়ানো নয়। কয়েক হণ্ডা আগে ইয়ানগনের একটা নিউজপেপার বিস্ফিঙে আঙুন লেগেছিল, ঘটনাটা আপনি জানেন?’

তুং একটু বেশি স্বাভাবিক থাকল। ‘হ্যাঁ, এরকম একটা ঘটনার কথা মনে পড়ছে বটে।’

‘ঠিক ওই মানের কাজ দরকার আমার,’ বলল রানা। ‘যে ফ্লোরে খবরের কাগজের অফিস, শুধু সেই ফ্লোরটাই পোড়ানো হয়েছে। দক্ষ প্রফেশনালের কাজ। তবে আমার কাজের ধরনটা অবশ্য সম্পূর্ণ আলাদা। আমি চাই ওয়্যারহাউসটা মাটির সঙ্গে মিশে যাক। ‘মার্কিন ডলারে পেমেন্ট করব। মজুরিও কম দেব না।’

‘মানসম্পন্ন কাজ সন্তায় পাওয়াও যায় না।’

‘ঠিক কথা।’

‘আমার ধারণা, সবার জন্যে সন্তোষজনক একটা চুক্তিতে আসা সম্ভব।’

‘চুক্তির প্রথম শর্ত সময়,’ বলল রানা। ‘হয় কাজটা দ্রুত করতে হবে, তা না হলে করাবার দরকারই নেই।’

‘আমার সহকারীরা সম্পত্তিটা না দেখা পর্যন্ত সম্ভাব্য খরচ সম্পর্কে আমি কোন ধারণা দিতে পারছি না। কত ক্রটিন তার ওপর নির্ভর করবে কত লাগবে।’

‘তারা কি কাল দেখতে যেতে পারবে?’ জিজ্ঞেস করল রানা।

‘না পারার তো কোন কারণ দেখি না। ঠিক আছে, এই ধরুন পাঁচটার দিকে আবার আমাদের দেখা হবে।’

‘ভেরি গুড।’ তুংকে পাইয়োপন-এর ঠিকানা বলল রানা। ‘লিখে ‘নেবেন না?’

মাথায় টোকা মারল তুং। ‘এখানে লেখা হয়ে গেছে।’ রানাকে নিজের নাম

লেখা একটা কার্ড দিল সে। 'টেলিফোন নম্বরটা ইয়ানগনের,' বলল সে। 'অ্যানসারিং সার্ভিসের মাধ্যমে আমার সঙ্গে যোগাযোগ করতে পারবেন। শেডিউল নিয়ে ঝামেলা দেখা দিলে আপনার সঙ্গে যোগাযোগের উপায় কি?'

'আমি বাজধানীতেই থাকছি, ইন্টারকনে।'

'ওদের সুইমিংপুলটা দারুণ। আমিও মাঝেমধ্যে ওখানে থাকি।'

'আপাতত তাহলে এই পর্যন্তই আলোচনা,' বলল রানা।

'শেষ একটা কথা, সুব্রত বাবু। আমাদের এই আয়োজন এমন নয় যে শর্ত ইত্যাদি কাগজে লেখা যাবে। তবে কথা পাকা হবার পর ওটাকে লিগাল ডকুমেন্ট হিসেবেই গণ্য করব আমরা। আগেই আলোচনা ভেঙে দিতে পারেন আপনি, কিন্তু পাকা কথার পর পিছু হটতে পারবেন না।'

'বুঝেছি।'

'আর, পেমেন্ট হবে নগদ ডলারে।' ঠোট সুরু করে হাসল তুং। 'আপনি হয়তো লোক ভাল, কিন্তু আপনার চেক ভাল কিনা বুঝব কিভাবে।'

'নো প্রবলেম।'

'চলুন, মেয়েরা আমাদের সান্নিধ্য থেকে বঞ্চিত হচ্ছে।'

'চলুন।'

ছয়

মেইনফ্রোরে ফিরে এসে ওরা দেখল লোকজনের ভিড় আর হৈ-চৈ আগের চেয়েও বেড়ে গেছে।

হলঘরের আরেক দিকে কাউকে দেখতে পেয়ে হাত নাড়ল নান তুং। 'অনেকদিন পর পুরানো কিছু বস্তুকে দেখতে পাচ্ছি। ওদের একটু খবর নিয়ে আসি। আপনি আমাদের টেবিলে বসুন, দু'মিনিট পরেই আসছি আমি।'

'ঠিক আছে,' বলল রানা। নতুন যে ফ্রপটার সঙ্গে মিলিত হলো তুং তারা সবাই মাঝবয়েসী, গোশাক-পরিচ্ছদে ধোপদুরন্ত, প্রত্যেকে সঙ্গে করে স্ত্রী বা সঙ্গিনীকে শিয়ে এসেছে। পরিচয় যাই হোক, ওদেরকে রানার কোন হুমকি বলে মনে হলো না। নিজেনদের টেবিলে তুংকে তারা সাদরেই গ্রহণ করল।

ভিড় ঠেলে ধীরে ধীরে এগোতে হলো রানাকে। টেবিলে ফিরে এসে দেখল মাইয়ো মিন, তুঙের লেফটেন্যান্ট, ক্লাবের এক চাকুরে মেয়েকে নিজের উরুর ওপর বসতে দিয়েছে। বয়স হবে বিশ কি বাইশ, ভরাট স্বাস্থ্য, খাটো ব্লাউজে অবাধ্য স্তন যুগলের আবাসিক চাহিদা মাত্র আংশিক মিটেছে; মেয়েটার গলায় ঝলছে একটা ক্যামেরা। রানাকে দেখেই লাফ দিয়ে নিজের পায়ে দাঁড়াল, খিলখিল হাসির ফাঁকে বেরিয়ে। এল কথাগুলো, 'কালো বিড়ালে আপনার এই স্মরণীয় মুহূর্ত ধরে রাখুন! বিনিময়ে যা খুশি তাই দেবেন, কোন জবরদস্তি নেই।'

‘দুঃখিত,’ হাসিমুখেই বলল রানা, ‘আমার সঙ্গিনীর এতে অনুমতি আছে বলে মনে হয় না।’

‘না, নেই,’ কি উত্তর দিতে হবে তার ইঙ্গিত রানার কথাতেই পেয়ে গেছে রুজ। ‘আমার ক্যামেরা ফেস ভাল নয়, কাজেই আমি ছবি তুলব না। আর আমাকে ছাড়া আমার সঙ্গী ছবি তুললে সেটাকে আমি আমার অপমান বলে মনে করব।’

মাথার খোঁপা ঠিকঠাক করছিল হুদ, লাফ দিয়ে সীট ছেড়ে মাইয়ো মিলের ওপর ঝুঁকে পড়ে বলল, ‘বলো সব খরচ তোমার, ও আমাদের ছবি তুলুক।’

থাই ড্রেস পরা নিনি আরও এক কাঠি সরেস, মাইয়ো মিনের ঘাড় ধরে প্রায় ঝুলে পড়ল। ‘বলো, বলো না গো! কতদিন ছবি তুলি না—প্লীজ, বলো!’

উৎসাহিত হয়ে চোখে ক্যামেরা তুলল ফটোগ্রাফার মেয়েটা। কিন্তু মাইয়ো মিন হাত তুলে নাড়ল। ‘খবরদার! কোন ছবি নয়!’

মনে মনে হাসল রানা। মিনের ছবি তুলতে না চাওয়ার কারণটা পরিষ্কার। শেষবার যে ছবি তার তোলা হয়েছিল, সেটার গায়ে নিশ্চয়ই পুলিশ ফাইলের নম্বর লেখা ছিল।

মিন তিন মেয়েকে নিরুৎসাহিত করতে ব্যস্ত, এই সুযোগে গায়ে পড়া ভাব নিয়ে রুজকে বিরক্ত করছে বডিবিন্ডার সেং জা। ‘আমি তোমার সাংঘাতিক ভক্ত, তোমার একটু দয়া-দাক্ষিণ্য আমার জীবনটাকে সার্থক করে তুলতে পারে।’ কথাগুলো মিষ্টি হলেও, মুখের ওপর দুর্গন্ধময় নিঃশ্বাস কতক্ষণ সহ্য করা যায়। ইতিমধ্যে সাবধান করেছে রুজ, তবু সরে বসতে রাজি নয় জা। এবার সে রুজের কাঁধে একটা হাত তুলে দিল। কাঁধ ঝাঁকিয়ে নিজেকে মুক্ত করল রুজ। আবার একই কাজ করল জা, নিজের দিকে টানছে রুজকে, তার নরম মাংসে ডেবে যাচ্ছে মোটা আঙুল।

ব্যথায় উফ করে উঠল রুজ, চোখ মুখ কুঁচকে আছে। ভারী গলায় হেসে উঠল জা, ব্যথা দিয়ে মজা পাচ্ছে সে; দেখতে পায়নি রানা ঠিক তার পিছনেই দাঁড়িয়ে আছে। তবে রানা কিছু করার আগে রুজই ব্যবস্থা নিল।

হঠাৎ হাসতে দেখা গেল রুজকে। ওই হাসিমুখেই সিগারেটের জ্বলন্ত ডগাটা জার লোমশ হাতে চেপে ধরল।

ব্যথায় চেঁচিয়ে উঠল জা, ঝট করে টেনে নিল হাতটা। ‘ডাইনী! বেশ্যা!’

একটা গ্লাসের সবটুকু শ্যাম্পেন জার মুখে ছুঁড়ে মারল রুজ।

রাগে অন্ধ, রুজকে চড় মারার জন্যে হাত তুলল জা।

খপ করে সেই হাত ধরেই বুড়ো আঙুলটা উল্টোদিকে ঠেলে দিল রানা, যতদূর যায়। আত্ননাদ বেরিয়ে এল জার গলা থেকে, সীট ছাড়ার সময় যন্ত্রণাদায়ক চাপ কমাবার জন্যে সরে আসছে রানার দিকে। ‘ছাড়, শালা! ছাড়, বেজন্মা!’

‘ভদ্র হও,’ রানার গলা নরম ও শান্ত।

চোখের মণি পাক খাচ্ছে, আরও খুলে যাচ্ছে মুখ, জার গলা থেকে ঘড়ঘড়

শব্দ বেরুচ্ছে। ফুঁপিয়ে কেঁদে ওঠার আওয়াজটা গলায় আটকে যেতে হাতটা ছেড়ে দিল রানা।

সবার দৃষ্টি যখন জার ওপর, টেবিলের দিকে লম্বা হয়ে যা খুঁজছিল তুলে নিল রানার হাত। রুজকে ও বলল, ‘আমরা এখন ফিরব।’

চেয়ার ছেড়ে রানার পিছনে চলে আসছে রুজ, ফিসফিস করে। বলল, ‘সাবধান! ও তোমাকে ছাড়বে না!’

মাইয়ো মিন সীটে হেলান দিয়ে সবই দেখছে, কিন্তু কিছু করছে না। তবে মনে হলো এই প্রথম রানার প্রতি তার আগ্রহ জন্মেছে।

‘তোকে আমি খুন করব!’ লাফ দিয়ে সীট ছাড়ল জা। টেবিলটা উল্টে পড়তে যাচ্ছিল, গ্লাস আর বোতল ছিটকে পড়ল মেঝেতে।

ভয়ে ফুঁপিয়ে উঠল নিনি, কিন্তু হৃদয় মুখে হাত চাপা দিয়ে কেঁপে কেঁপে হাসছে।

সেং জার বৃষস্কন্ধ ফুলে ফুলে উঠল। লাল মুখে শিরাগুলো উঁচু হয়ে আছে। দু’হাত বাড়িয়ে রানাকে ধরতে এল সে।

জা পুরোপুরি উন্মুক্ত। রানা একটা রাইট জ্যাব মারল, থেঁতলে ফেটে গেল জার চিবুক। দ্বিতীয় আঘাতটা লাগল চোয়ালে, শব্দটার ধাতব অনুরণন কাছাকাছি যারা দাঁড়িয়ে আছে তাদেরকে বিস্মিত করল। বৃদের পিছনের দেয়ালে ছিটকে পড়ল জা, ছাদ থেকে খসে পাশের টেবিলে বসা অতিথিদের ওপর পড়ল ফুলের একটা টব। চোখ উল্টে গেছে জার, শুধু সাদা দেখাচ্ছে। দেয়াল থেকে হড়কে টেবিলের তলায় চলে গেল শরীরটা।

একটা ফ্ল্যাশবালব জ্বলে উঠল। ফটোগ্রাফার মেয়েটা রেকর্ড করল দৃশ্যটা।

কপালে তোলা ভুরু নিচু করল মাইয়ো মিন। ‘আপনার ওই দ্বিতীয় ঘুসির কোন তুলনা হয় না, সুরত বাবু।’

‘ও কিছু না।’ বোঞ্জের ভারী অ্যাশট্রেটা টেবিল থেকে ওকে কেউ তুলতে দেখেনি, রাখতেও দেখল না। ওটা ভুবড়ে গেছে।

এতক্ষণে ছুটে এল নান তুং। ‘কি ঘটছে এখানে?’

‘সেং জা বেশি মদ খেয়ে ফেলেছে।’ কালো বো টাই ঠিকঠাক করল রানা।

‘সুস্থ হবার জন্যে টেবিলের তলায় ঘুমাচ্ছে।’

‘অবিশ্বাস্য, ওস্তাদ!’ তুংকে বলল মিন। ‘রুজের বিদেশী বন্ধু মাত্র দুই ঘুসিতে জাকে ঘুম পাড়িয়ে দিয়েছে!’

দুটো ভুরুই কপালে তুলল তুং। ‘ইম।’

‘আপনার সন্কেটা মাটি করলাম না তো?’ জিজ্ঞেস করল রানা।

‘প্রশ্নই ওঠে না,’ বলল তুং। ‘যে লোক নিজেকে রক্ষা করতে জানে তাকে আমি পছন্দ করি।’

‘এবার আমাদের যেতে হয়। সবাইকে শুভরাত্রি।’ তুংকে পাশ কাটাবার সময় আবার মুখ খুলল রানা, ‘কাল আবার দেখা হচ্ছে, পারলে আমার একটা উপকার করবেন।’

‘বলুন।’

‘জাকে বাড়িতে রেখে বেরুবেন। মানে, ততক্ষণে যদি তার ঘুম ভাঙে আর কি।’

‘চিন্তা করবেন না। মদ্যপ ভাঁড়টাকে আমি সিঁধে করে ছাড়ব।’

স্বপ্নমেয়াদি লড়াইটা দেখার জন্যে ছোটখাট ভিড় জমে উঠেছিল, সেই ভিড় দু’ফাঁক হয়ে রানা আর রুজকে পথ করে দিল।

টেকিলের তলা থেকে মাথা বের করে মিন বলল, ‘ওস্তাদ, জার জ্ঞান ফেরাতে পারছি না।’

‘ওখানেই পড়ে থাক,’ বলল তুং, ক্লাব ফটোগ্রাফারের খোঁজে আরেক দিকে চলে যাচ্ছে।

‘আপনাকে অত্যন্ত সাবধানে থাকতে হবে,’ রানাকে বলল রুজ। ‘আপনাকে খুন না করে জা বিশ্রাম নেবে না।’

‘বিশ্রামেই আছে সে।’ হেসে উঠল রানা।

ওর হাসি ধীরে ধীরে নিভে গেল বার থেকে এক লোককে এগিয়ে আসতে দেখে।

‘আবার আমাদের দেখা হলো, সুব্রত বাবু!’

‘হ্যালো, মেজর আউং,’ বলল রানা। ‘আপনাকে হুইস্কি অফার করতাম, কিন্তু দেখতেই তো পাচ্ছেন, আমরা চলে যাচ্ছি।’

‘না, না, আমি যেন আপনাদের দেরি করিয়ে না দিই। ভাল কথা, সুব্রতবাবু, বগলের তলায় আগ্নেয়াস্ত্র নিয়ে ঘুরছেন, সঙ্গে পারমিট আছে?’

‘আপনার চোখ বটে, মেজর।’

‘আমার চাকরিই তো এ-সব লক্ষ করা,’ বিনয়ী সাজল মেজর আউং।

পুলিসের সঙ্গে দ্বন্দ্ব জড়িয়ে পড়া রানার ইচ্ছে নয়। বলল, ‘বিদেশীদের স্মল আর্মস রাখার পারমিট দেয়া হয়, শুনেই এটা যোগাড় করে ফেলেছি, পারমিটের জন্যে আবেদন জানাবার কথা মনে ছিল না। কি রকম খরচ পড়বে বলুন তো।’

‘আপনার ধারণা ঘুষ খাওয়ার জন্যে ঘুর ঘুর করছি আমি?’

‘চিন্তাটা মাথায় আসেনি বললে মিথ্যেকথা বলা হবে।’

মেজর আউং হেসে উঠল। ‘আরে, না! আপনি আমাকে ভুল বুঝেছেন। নিজেকে রক্ষা করার ব্যবস্থা তো থাকতেই হবে। বিশেষ করে আমাদের দেশে আইনশৃংখলার যে করুণ দশা! না, সুব্রত বাবু, ব্যাপারটাকে আমি সিরিয়াসলি নিচ্ছি না।’

‘ধন্যবাদ,’ বলল রানা। ‘আপনার আন্তরিকতা আমি ভুলব না।’

‘তবে পারমিটটা সংগ্রহ করুন। সব অফিসার আমার মত উদার নয়।’

‘আমার মনে থাকবে।’

‘আপনাদেরকে আর দেরি করিয়ে দেব না।’ পথ ছেড়ে একপাশে সরে দাঁড়াল ইয়ে আউং। ‘শুভরাত্রি, ডার্লিং!’ রুজকে বলল।

‘শুভরাত্রি,’ বিড়বিড় করল রুজ। ‘এবার নিয়ে দু’বার হলো।’

‘আবার আমাদের দেখা হবে, সুব্রত,’ বলে ভিড়ের মধ্যে মিশে গেল ডিবি অফিসার।

‘লোকটার হঠাৎ করে উদয় হবার একটা বিচ্ছিন্ন প্রবণতা আছে। একটু চিন্তিত রানাও।

‘এখানে ওর আসাটা অ্যাক্সিডেন্ট নয়,’ বলল রুজ। ‘কারণ জানি না, তবে বুঝতে পারছি আপনার ওপর ওর চোখ পড়েছে।’

‘তবে অস্ত্রটা নিয়ে বাড়াবাড়ি করতে পারত, করেনি।’ দরজা খুলে ধরল রানা, তারপর রুজের পিছু নিয়ে বেরিয়ে এল ক্লাব থেকে।

‘ঘুম খায়নি, তার কারণ অস্ত্র সস্ত্র নয়,’ বলল রুজ। ‘বড় দাঁও মারার তালে আছে।’

‘আচ্ছা!’

একটা ট্যাক্সি নিয়ে উন-এ ফিরে এল ওরা, রুজের ফ্ল্যাটটাও এখানে। দ্বিতীয় এনভেলোপটা রুজের হাতে গুঁজে দিল রানা। তাড়াতাড়ি সেটা নিজের হাতব্যাগে ভরে ফেলল রুজ। ভেতরে পাথর বসানো হাতলসহ একটা পিস্তল দেখল রানা।

‘টাকাটা গুনলে না যে?’

‘পরে গুনব।’

সাগর থেকে মেঘের মত উড়ে আসছে কুয়াশা, গভীর রাতের নির্জন রাস্তা ঢাকা পড়ে যাচ্ছে, ব্যাপসা করে তুলছে স্ট্রীটলাইটগুলোকে। ফ্ল্যাটবাড়ির সামনে থামল ট্যাক্সি। ‘সময় দিয়েছ, সন্কেটাও ভাল কাটল, সেজন্যে তোমাকে ধন্যবাদ।’

রুজ বিস্মিত। ‘আপনি ফ্ল্যাটে আসছেন না?’

‘আমাদের কাজ শেষ হয়ে গেছে, রুজ।’

‘গল্পও শোনেননি, বার্মিজ মেয়েরা কি রকম অতিথিপরায়ণ হয়?’ রুজকে অভিমানী মনে হলো। ‘একবার যার সঙ্গে পরিচয় হয়, আমরা চেষ্টা করি সারাজীবন সে যেন আমাদেরকে ভুলতে না পারে। আপ্যায়ন বা সেবা করার একটা সুযোগ কি আমি পেতে পারি না?’

হাসি চেপে রানা বলল, ‘তোমার কথা শুনে আমার ভয় লাগছে কেন?’

হেসে উঠে রুজ বলল, ‘অভয় দিচ্ছি, ভয়ের কোন কারণই নেই। শুধু এক কাপ কফি খাইয়ে ছেড়ে দেব।’

অগত্যা চারতলায় উঠতে হলো রানাকে।

সাত

ইয়ানগন কালচারাল সেন্টারে বামপন্থী কবি প্রফেসর মায়াতকা থুয়ে কবিতা পাঠ করছে। হলের আসন সংখ্যা আড়াইশো, ছড়িয়ে ছিটিয়ে বসেছে মাত্র পঁচিশজন দর্শক-শ্রোতা। তাদের মধ্যে পাঁচজন পেশাদার ভিক্ষুক, পরিষ্কার ও ঠাণ্ডা জায়গায়

ভাল ঘুম হবার আশায় এসেছে।

থুয়ে মাঝবয়েসী, মুখে কাঁচাপাকা অল্প দাড়ি। ভরাট কণ্ঠে আবৃত্তি করছে স্বরচিত কবিতা, তাতে সর্বহারা শ্রেণীকে-উদাত্ত আহ্বান জানানো হয়েছে-এই বলে যে না চাইলে জন্মদাত্রী মা-ও তার শিশুকে দুধ খেতে দেয় না, কাজেই সর্বহারাকে তার নিজের অধিকার চাইতে তো হবেই, প্রয়োজনে জোর করে কেড়ে নিতে হবে। এক সময় মনে হলো শোষিত শ্রেণীর প্রতি দরদে তার চোখ থেকে পানি গড়াচ্ছে, তবে তা স্রেফ দৃষ্টিভ্রম। আসলে কনট্যাক্ট লেন্সটা ঠিকমত অ্যাডজাস্ট না করায় চোখ দুটো চুলকাচ্ছে।

একক কবিতা পাঠের আসর শেষ হতে দেখা গেল দর্শক-শ্রোতাদের সংখ্যা কমে অর্ধেক হয়ে গেছে। তবে ভিক্ষুরা সবাই শেষ পর্যন্ত থাকল। কালচারাল সেন্টারের কর্মচারীরা লাঠি নিয়ে তাড়া না করলে তারা বোধহয় সারাজীবনই থেকে যেত।

পডিয়াম থেকে নেমে এল মায়াতকা-থুয়ে, এই সময় এক ভক্ত ও ছাত্রী রুদ্ধশ্বাসে ছুটে এসে আলিঙ্গন করল তাকে। 'দারুণ! অপূর্ব!'

কবি গর্বিত ও আনন্দিত। কিন্তু মেয়েটির ফিসফিসানি সব নষ্ট করে দিল। 'কি বললে?' জিজ্ঞেস করল প্রফেসর থুয়ে।

'আরশাদ আপনার সঙ্গে হরে রাম হরে কৃষ্ণয় দেখা করবে।'

একশো পঞ্চাশ নম্বর উথান্ট অ্যাভিনিউয়ের হরে রাম হরে কৃষ্ণ নিরামিষ রেস্টোরাঁটা মাথা কামানো কৃষ্ণভক্তরা চালায়। ভাসিটির ছাত্র-শিক্ষকদের প্রিয় আড্ডা হলেও বিকেলের দিকে পৌছে থুয়ে তেমন লোকজন দেখল না। একটা কেবিনে একা বসে আছে আরশাদ সুফিয়ান। মধ্যবয়সী লোক, চৌকো মুখ, কলপ লাগানো কালো চুল; গ্রে রঙের সুট পরেছে। কর্নেল আরশাদ সুফিয়ান পাকিস্তান ইন্টেলিজেন্স আইএসআই-এর একজন কর্মকর্তা। ইয়ানগনের পাকিস্তানী দূতাবাসে কমার্স সেক্রেটারির পদে দায়িত্ব পালন করে সে। তবে তার আসল কাজ রোহিঙ্গা বিদ্রোহী গ্রুপগুলোকে অস্ত্র সংগ্রহে সাহায্য করা, তাদেরকে বাংলাদেশ বিরোধী তৎপরতায় উৎসাহ দান, ভারতীয় বিচ্ছিন্নতাবাদী রাজনৈতিক দলের ক্যাডারদের ট্রেনিংয়ের ব্যবস্থা করা ইত্যাদি।

থুয়ে কেবিনে ঢুকে বসতেই কাজের কথা পাড়ল সুফিয়ান। 'তোমার কুরিয়ার আজ সকালে যে ছবিগুলো দিয়ে এল, সনাক্ত করার জন্যে ওগুলো আমাকে ইসলামাবাদে পাঠাতে হয়নি।' টেবিলে একজোড়া ফটো রাখল সে।

প্রথম ফটোটো কালো বিড়ালের ফটোগ্রাফারের কাছ থেকে নান তুং-এর কেনা। বৃন্দ সহ তুঙের পার্টির দৃশ্য ধরা পড়েছে তাতে। দ্বিতীয় ফটোতেও একই দৃশ্য, প্রথমটাই এনলার্জ করা। ডিটেইলস দেখা যাচ্ছে। এটায় সুদর্শন এক তরুণকে দেখা যাচ্ছে, অত্যন্ত ভাল স্বাস্থ্য, পরনে ডিনার জ্যাকেট। 'এই সাবজেক্টকে তুমি চেনো?' জানতে চাইল সুফিয়ান।

'এই লোক সুব্রত বড়ুয়া বলে নিজের পরিচয় দিচ্ছে,' বলল থুয়ে। 'বলছে ভারতীয়, ব্যবসার কাজে মায়ানমারে এসেছে। সত্যি কথা বলতে কি, চরিত্রটি

আমার কাছে রহস্যময়। সেজন্যেই ছবিগুলো তোমার কাছে পাঠিয়েছি।’

‘হ্যাঁ, রহস্যময় চরিত্রই বটে, ঠিক তোমার মত।’ সুফিয়ান হাসছে না। ‘ওর নাম মাসুদ রানা। তুমি এর তাৎপর্য বোঝো, মিস্ট্রি ম্যান?’

‘না।’

‘বাংলাদেশ কাউন্টার ইন্টেলিজেন্স-এর মহা ধুরন্ধর এজেন্ট। বিলিভ ইট অর নট, শালার কৈ মাছের জান। কতবার যে ওকে আমরা টার্গেট করেছি তার হিসাব নেই, কিন্তু প্রতিবার ফাঁদ গলে বহাল তবিয়ে বেরিয়ে গেছে। আমাদের হিট লিস্টে এখনও ওর নাম এক নম্বরে।’

থুয়ে একটা চুরুট ধরাল। ‘চিন্তার কিছু নেই। ইয়ানগনেই ওকে শোয়ানো হবে।’

‘আমরা বহু বছর ধরে চেষ্টা করছি,’ বলল সুফিয়ান। ‘অথচ আজও ব্যাটা মরেনি। যারা ওকে মারার দায়িত্ব নিয়েছিল আজ তাদের কেউ বেঁচে নেই।’

‘বললাম তো, ইয়ানগনেই ওকে পোড়ানো হবে।’ থুয়ে হাসছে।

‘তোমার প্র্যান্টা আমাকে ব্যাখ্যা করো।’

‘হিনান ফোকে ডাকছি আমি,’ বলল থুয়ে। ‘সে তার ডান হাত চো মাউংকে নিয়ে কাজ সারবে।’

‘হিনানকে আমি বিশ্বাস করি না। লোকটার মাথায় গুণ্গোল আছে। তাছাড়া, নীতির কোন বালাই নেই তার।’

‘হিনানকে আমরা স্রেফ হাতিয়ার হিসেবে দেখব, সুফিয়ান। হাতিয়ারের কোন নীতি থাকে? নোংরা, অপ্রীতিকর, বিপজ্জনক কাজগুলো ওকে দিয়ে করিয়ে নিজেদের হাত পরিষ্কার রাখব আমরা, ব্যস।’

‘আমি কিন্তু তোমাকে কোন ব্যাক-আপ দিয়ে সাহায্য করতে পারব না,’ বলল সুফিয়ান। ‘আমার নেটওর্ক পরিচয় ফাঁস হবার ঝুঁকি নেবে না।’

‘আমি কি বলেছি ব্যাক-আপ দরকার হবে?’

‘বেশ। আর সব খবর বলো। দৈনিক মায়ানমারে তথ্যগুলো কে পাঠিয়েছিল, জানা গেছে?’

‘না। তদন্ত করে আমার লোকজন কিছুই পায়নি। আমি আমার ব্যর্থতা মেনে নিচ্ছি। তুমি নিজে চেষ্টা করে দেখো—যত তাড়াতাড়ি সম্ভব।’

চেয়ার ছেড়ে দাঁড়াল সুফিয়ান। ‘আগামী মাসে তোমার ক্যাডারদের জন্যে চীনা রাইফেলের একটা চালান আসছে। চালানোর অর্ধেকটা ব্ল্যাকমার্কেটে বিক্রি করলে তোমার হাতে ভাল একটা ফান্ড চলে আসবে।’

‘ধন্যবাদ।’

‘তোমার হাতের কাজ শেষ না হওয়া পর্যন্ত আমাদের আর দেখা হচ্ছে না,’ বলে কেবিন থেকে একাই বেরিয়ে গেল আরশাদ সুফিয়ান।

নান তুং তার সহকারীদের নিয়ে বিকেল পাঁচটার সময় আসবে। রানা পৌছাল চার ঘণ্টা আগে।

সামুদ্রিক কুয়াশায় সাদাটে হয়ে আছে আকাশ। রেন্ট-আ-কার কোম্পানির গাড়িটা ব্যারেল দিয়ে তৈরি পাঁচিলের আড়ালে থামাল রানা, রাস্তা থেকে এদিকে তাকালে কেউ যাতে দেখতে না পায়।

গাড়িটা 'ঐতিহ্য'র লোকেরা ভাড়া করেছে। তবে রানার সিদ্ধান্ত, ওদের অর্থাৎ রানা এজেন্সির সক্রিয় সাহায্য নেবে না ও। শাখা প্রধান হিসেবে বৃষ্টি এত বেশি মূল্যবান যে তাকে ঝুঁকির মধ্যে ফেলা যায় না, গুলি চালানোয় শহীদের হাত ভাল নয়, আর নিষ্ঠাবান ও যোগ্য বলে মনে হলেও মনিরের কোয়ালিটি সম্পর্কে এখনও নিশ্চিত হওয়া যায়নি। রানার হাতে অনেক কাজ, ইয়ানগন শাখার নিরাপত্তা নিয়ে মাথা ঘামাতে হলে পিছিয়ে পড়তে হবে ওকে।

অ্যাকশনের জন্যে তৈরি রানা। গাড়ি রঙের জ্যাকেটের নিচে বুলেট প্রুফ ভেস্ট পরেছে। জ্যাকেটের পকেটগুলো ভারী হয়ে আছে অ্যামুনিশনের স্পেয়ার ক্লিপে।

হাতে ল্যুগার, তীক্ষ্ণদৃষ্টিতে দেখছে চারপাশ। গলি-ঘুপচি কিছুই বাদ দিল না। নিশ্চিত হওয়া জরুরী, ওর জন্যে আগে থেকে এখানে কেউ অপেক্ষা করছে না।

বিষাক্ত ঝাঁঝ থেকে বাঁচার জন্যে নাকে-মুখে রুমাল বাঁধল রানা, তারপর টুকিটাকি কাজের জিনিস কি পাওয়া যায় দেখার জন্যে গোটা ওয়্যারহাউস চষে ফেলল। তেল-কালি মাখা কয়েক প্রস্থ ক্যানভাস পাওয়া গেল, ওগুলো দিয়ে ঢাকলে গাড়ির অস্তিত্ব গোপন রাখা যাবে। তবে তারচেয়েও অনেক মূল্যবান জিনিস পাওয়া গেল অন্ধকার এক কোণে—একটা ফর্কলিফট।

বাকিট সীটে উঠে বসল রানা, একটুকরো ন্যাকড়া দিয়ে কন্ট্রোল পরিষ্কার করল, তারপর দেখল স্টার্ট নেয় কিনা। সাড়া দিলেও প্রতিবাদে মুখর হলো এঞ্জিন, খক-খক করে কাশল, কিন্তু সচল হতে পারল না। বনেট তুলে এঞ্জিনের গায়ে পেনলাইট তাক করল রানা। প্রতিটি পার্টসে ধুলোর পুরু আস্তর জমে আছে।

ব্যাটারি নিঃশেষ হয়নি, ভালই পাওয়ার সাপ্লাই পাওয়া যাবে। ফুয়েল গজ বলছে গ্যাস ট্যাংক এখনও অর্ধেক ভরা। ছুরির ধারাল ডগা দিয়ে বিভিন্ন পয়েন্ট থেকে মরচে সাফ করল রানা। কারবুরেটরটাও পরিষ্কার করতে হলো। যা যা করার সব করে আবার দেখল রানা স্টার্ট নেয় কিনা। বিকট ব্যাকফায়ার ভেহিকেলটাকে বার কয়েক ঝাঁকি দিল। সগর্জনে জ্যাক্ত হলো এঞ্জিন। এগজস্ট থেকে বিস্ফোরিত হলো নীল ও ধূসর ধোঁয়া।

ঠোটে হাসি, গিয়ার দিল রানা; ব্যারেলের স্তূপগুলোকে পাশ কাটিয়ে ফর্কলিফট চালাল। মেটাল স্লাইডিং ডোরটা বিরাট, ওটার কাছে থামল ও। খানিকটা জোর খাটাতে মরচে ধরা চেইন ও পুলি সিস্টেম ঘড়ঘড় করে দরজাটাকে ওপরে তুলে দিল। ফর্কলিফট বের করে এনে জেটির শেষপ্রান্তে থামাল, মুখ থেকে রুমাল খুলে তাজা বাতাসে ভরে নিল বুকটা। ওয়্যারহাউসে গ্যাস আর কেমিকেলের ঝাঁঝ এত বেশি, আর কিছুক্ষণ থাকতে হলে নির্ঘাত অসুস্থ হয়ে পড়ত।

মাথার ঝিম ধরা ভাবটা কেটে যেতে আবার ভেতরে ঢুকল রানা, ক্যানভাসের শীটগুলো লিফটে তুলে লুকানো গাড়ির কাছে চলে এল। ওগুলো দিয়ে গাড়িটা

ঢাকার পর খানিক পিছু হটে এসে তাকাল। কেউ বলে না দিলে কারও বোঝার সাধ্য নেই যে ক্যানভাসের নিচে একটা গাড়ি আছে।

ফর্কলিফটটা বারবার স্টার্ট দিল ও বন্ধ করল রানা; কাজের সময় যাতে চাওয়ামাত্র জ্যান্ত হয়। তারপর ওটাকে চালিয়ে আনল গার্ডরুমের পিছনে। গার্ডরুমটা তালা মারা মেইন গেটের এক পাশে।

আর কোন কাজ নেই, এখন শুধু অপেক্ষার পালা।

ভাগ্য যদি এতটুকু সাহায্য করে, আঙুন ধরাবার লাভজনক একটা টোপ গোপন আস্তানা থেকে “সুব্রত”-র সঙ্গে দেখা করার জন্যে বের করে আনবে হিনান ফোকে। কোন কারণে যদি সে না আসে, তারপরও রানার হাতে নান তুং থাকবে। আত্মবিশ্বাসের কোন অভাব নেই, ও জানে দেহরক্ষীদের অচল করে দিয়ে তুঙের কাছ থেকে হিনান ফোর ঠিকানা আদায় করা ওর জন্যে কোন সমস্যা নয়।

গার্ডরুমটা ভালই আড়াল দিচ্ছে, এটার পিছন থেকে রাস্তার ওপর চোখ রাখছে রানা। আকারে চারটে ফোন বুদের সমান, মাথার ওপর ছাদটা ঢালু। যে পাশটা জেটির দিকে সেটা খোলা, কজা সহ দরজার কবাট অনেক দিন আগেই অদৃশ্য হয়ে গেছে। বাইরে চোখ রাখার জন্যে বাকি তিন দিকে রয়েছে সরু জানালা।

গার্ডরুমের ভেতরে একটা টেবিল আর দুটো চেয়ার; একটা চেয়ার নিয়ে এমন এক পজিশনে বসেছে রানা, সরু ফাটল আকৃতির তিন জানালার ওপর নজর রাখতে পারছে।

ওরা এল দু’ঘন্টা আগে; ঠিক বিকেল তিনটের সময়।

হালকা নীল একটা ভ্যান। রাস্তা ধরে অলস ভঙ্গিতে আসছে। মাথা নামিয়ে নিল রানা, সরু ফাটলের কিনারা দিয়ে তাকিয়ে থাকল।

থামল না, শামুকের মত মহুরগতিতে সাইটটাকে পাশ কাটাল ভ্যান, বাঁক ঘুরে অদৃশ্য হয়ে গেল।

কয়েক মিনিট পর বাঁকে দু’জন লোক দেখা গেল। হাসিখুশি, অসতর্ক, দুই বন্ধু যেন বেড়াতে বেরিয়েছে। পাঁচশো তিন নম্বর ওয়্যারহাউসের সামনে এসে সহজ ভঙ্গিতে দাঁড়াল তারা।

একজন রোগা-পাতলা তরুণ। তার সঙ্গীর বয়স একটু বেশি, গায়ে হলুদ শার্ট।

ট্রাউজারের পকেট থেকে চাবির রিঙ বের করল তরুণ, রিঙে কয়েকটা মাস্টার কী ছাড়াও মোটা সুচ আকৃতির ধাতব কাঠি ও ওয়াশার রয়েছে। তালার ওপর কাজ করার সময় শিস দিচ্ছে সে। তার সামনে দাঁড়িয়ে চুরুট ধরাল হলুদ শার্ট, দৈবাৎ রাস্তায় কেউ উদয় হলে তরুণকে যাতে দেখতে না পায়।

শিস থামল। ক্লিক শব্দ করে খুলে গেল তালা।

মাথা নিচু করে গার্ডরুম থেকে বেরিয়ে এসে ফর্কলিফটের পিছনে আড়াল নিল রানা।

সাইটে ঢুকে গেট বন্ধ করে দিল তরুণ, দেখে যাতে মর্নে হয় কেউ ওটায় হাত দেয়নি।

নিজের জায়গায় দাঁড়িয়ে আছে হলুদ শার্ট, গেটের দিকে পিছন ফিরে। রাস্তার ওপর চোখ, চুরট ফুঁকছে।

সন্তর্পণে গার্ডরুমের দিকে হেঁটে এল তরুণ। সাবধানী, প্রচুর সময় নিচ্ছে। উঁকি দিয়ে ভেতরটা দেখল। গার্ডরুম খালি দেখে ঠোট মুড়ে হাসল। সুইচব্লেন্ডের বোতামে চাপ দিল সে, জায়গা মত ফিরে গেল আট ইঞ্চি লম্বা ফলা। ঘুণাশ্বরেও টের পায়নি মাত্র কয়েক ফুট দূরে লুকিয়ে রয়েছে রানা।

এখনি তাকে কাবু করতে পারে রানা, তবে সেটা সময়ের আগে হয়ে যায়। মেহমানরা সবাই এখনও এসে পৌঁছায়নি। ও জানে, একটু পরই চলে আসবে তারা।

সাবধানী তরুণ সতর্ক পায়ে জেটি ধরে এগোল। একটা ফাঁকে তাকাল সে, গাড়িটা যেখানে লুকানো রয়েছে, কিন্তু ক্যানভাসের স্তূপ সরিয়ে দেখার কথা ভাবল না। ওয়্যারহাউসে একবার ঢুকলই শুধু, প্রায় সঙ্গে সঙ্গে বেরিয়ে এল। টক্সিক ঝাঁঝ সহ্য করতে পারেনি, কুঁজো হয়ে কাশল কিছুক্ষণ।

গেটে ফিরে এসে সঙ্গীকে রিপোর্ট করল তরুণ। ‘অল ক্রিয়ার!’ এখনও দু’একটা কাশি দিচ্ছে, চোখ থেকে পানিও মুছল।

‘ঘটনাটা কি?’ হলুদ শার্ট হাসছে।

‘উহ্!’ নাকমুখ কুচকে বিকৃত করে ফেলল তরুণ। ‘দুর্গন্ধে ওখানে টেকা দায়!’

‘ও, আমি ভাবলাম বেচারা বাংলাদেশীর জন্যে কাঁদছ তুমি।’

‘কাঁদতে হবে তাকেই।’ বুক ভরে শ্বাস নিল তরুণ।

‘ওই ওরা আসছে।’

বাঁক ঘুরে ফিরে আসতে দেখা গেল ভ্যানটাকে। হাত তুলে সঙ্কেত দিল হলুদ শার্ট—অল ক্রিয়ার।

গেটটা পুরোপুরি খুলে দিল ওরা। ভেতরে ঢুকল ভ্যান। মাইয়ো মিন চালাচ্ছে, পাশের প্যাসেঞ্জার সীটে বসে আছে নান তুং।

উঠানে পৌঁছে ব্যাক গিয়ার দিল মিন, পিছু হটে গার্ডরুমের সামনে খানিকটা আড়াআড়িভাবে ভ্যান থামাল। ব্যারেলের উঁচু একটা স্তূপ রাস্তা থেকে আড়াল করে রেখেছে ওটাকে। গেটের দিকে মুখ, প্রয়োজনে তাড়াতাড়ি কেটে পড়া যাবে।

এঞ্জিন বন্ধ হলো। ক্যাব থেকে নামল মিন আর তুং। মেঘলা দিনের নিস্তেজ আলোতেও ফ্যাকাসে দেখাচ্ছে তুংকে।

ভ্যানের গায়ে দুটো চাপড় মারল মিন। পিছনের দরজা খুলে দু’জন লোক নামল।

লোক দু’জনকে নীচ, শক্ত আর হিংস্র মনে হলো। একজনের হাতে অটোমেটিক রাইফেল, সঙ্গে ব্যানানা ক্লিপ। অপর লোকটার হাতে এম-আই মেশিন পিস্তল।

‘গেট,’ নির্দেশ দিল তুং।

তরুণ ও হলুদ শার্ট গেট বন্ধ করল। গেটের দুই ভাগ যেখানে মিলিত হবে তার বাইরে হাত বের করে দিয়ে তালা লাগাল তরুণ।

‘শালা জানতেই পারবে না এখানে তার চেয়ে আগে পৌঁছেছি আমরা,’ কর্কশ হেসে বলল হলুদ শার্ট।

মেশিন গানার জিজ্ঞেস করল, ‘কি করব এখন আমরা?’

তার দিকে ফিরল মিন। ‘অপেক্ষা।’

তুং একটা চুরুট ধরাল। ‘বুদ্ধিমান হলে পাঁচটার খানিক আগেই পৌঁছাবে রানা।’

‘বুদ্ধিমান হলে সে আসবেই না, ওস্তাদ!’

‘রানার ধারণা সে আমাদেরকে বোকা বানিয়েছে। এই ভুলের জন্যে কঠিন মূল্য দিতে হবে তাকে।’ হাতঘড়ি দেখল তুং। ‘তোমরা সবাই চারটের সময় পজিশন নেবে। রানা ভেতরে পা রাখার পর আর সময় নিয়ো না।’

দাঁতে দাঁত চেপে রানা ভাবল, তুং ওর পরিচয় জানল কিভাবে!

রাইফেলম্যান বলল, ‘একজন লোকের জন্যে আয়োজনটা একটু বেশি হয়ে যাচ্ছে না? এত ফায়ার পাওয়ারের সতিাই কি দরকার ছিল?’

‘আমারও তো ‘সেই কথা!’ মিনের গলায় অসন্তোষ। হাতের .৪৫ ক্যালিবারের রিভলভারটা আঙুলে ঘোরাচ্ছে। ‘এটা যখন আছে, তার জন্যে আমি একাই তো যথেষ্ট।’

‘এতে কারও হাত নেই,’ বলল তুং। ‘বস্ এভাবেই চেয়েছেন।’

‘বস্ শুধু শুধু অপব্যয় করছেন।’

‘তাতে তোমার কি, মিন? টাকাটা তো তারই।’

‘ঠিকই তো,’ কৌতুক করে বলল রাইফেলম্যান। ‘আমরা দু’পয়সা কামাচ্ছি দেখে তোমার চোখ টাটাচ্ছে বুঝি?’

একটা ব্যারেলে লাথি মারল হলুদ শার্ট। ‘এগুলোয় গু-গোবর কি আছে বলো তো? এমন দুর্গন্ধ নরকেও থাকে না।’

তরুণ দু’একটা কাশি দিল। ‘আশা করি বেশিক্ষণ অপেক্ষা করতে হবে না।’

‘আচ্ছা,’ হঠাৎ কি কারণে যেন উত্তেজিত দেখাল মিনকে, ‘আমরা শালাকে জ্যান্ত ধরলে ক্ষতি কি? সেক্ষেত্রে মারার আগে কিছুক্ষণ মজা করা যেত।’

‘ওসব চলবে না। গুলি করে তাড়াতাড়ি ঝামেলা চোকাবে।’ একটু কঠিন হলো তুঙের চোখ। ‘মনে রেখো, লোকটা সহজ নয়। দেখলে না কাল রাতে সেং জার কি অবস্থা করল?’

‘আমি না থাকায় বঞ্চিত হয়েছি।’ ঠোট মুড়ে হাসল মেশিন গানার।

‘এই কাজটায় জা থাকলে ভাল হত,’ বলল হলুদ শার্ট। ‘অপমানের বদলা নেয়ার সুযোগ পেত বেচারী।’

‘মায়াকান্না কেঁদে না তো। তোমাদের চেয়ে ভাগ্যবান সে। নাচুনে বেশ্যাটার ব্যবস্থা করতে পাঠানো হয়েছে তাকে।’ তুঙের ঠোটে ক্ষীণ হাসি।

বাকি সবাই হেসে উঠল।

তথ্য গোটা পরিস্থিতি বদলে দিল। রানার প্ল্যান ছিল, বিচ্ছিন্ন হয়ে যে যার পজিশনে চলে যাবার পর এক এক করে ওদেরকে কাবু করবে। জেরা করার জন্যে তুংকে বাঁচিয়ে রাখতে চেয়েছিল ও।

কিন্তু প্ল্যানটা এখন না বদলে উপায় নেই।

আজ সকালেই রুজকে ফোন করে সাবধান করে দিয়েছে রানা, দিন কয়েকের জন্যে অবশ্যই ওর গা ঢাকা দেয়া উচিত। কিন্তু কথাটা সে হেসেই উড়িয়ে দিয়েছে। হেসে উঠে বলেছে, আত্মরক্ষা করার কৌশল জানা আছে তার।

সেং জা তার ব্যবস্থা করতে গেছে, এ-কথা শোনার পর রানা চুপ করে থাকতে পারে না। সময়ের আগে অ্যাকশন শুরু করায় এখন যদি তুং মারাও যায়, ওর কিছু করার নেই।

ট্রাউজারের পকেট থেকে একটা মিনি বোমা বের করল রানা। পরিবর্তিত পরিস্থিতিতে হামলা চালাবার এটাই আদর্শ সময়, অ্যামবুশাররা সবাই যখন এক জায়গায় দাঁড়িয়ে।

বোমার লাল আর্মিং বাটনে চাপ দিল রানা। খুদে গ্রেনেডে আর্মিং ও ডিটোনেশন-এর মাঝখানে পাঁচ সেকেন্ড ভিলে আছে। রানা নিঃশ্বাসের সঙ্গে গুনছে, 'ওয়ান ওয়ান থাউজেন্ড, টু ওয়ান থাউজেন্ড, থ্রী ওয়ান থাউজেন্ড...'

ফর্কলিফটের পিছন থেকে কাত হয়ে খানিকটা বেরুল রানা, জেটির ওপর দিয়ে ভ্যানের দিকে গড়িয়ে দিল গ্রেনেডটা।

শরীরটা আড়ালে টেনে নিচ্ছে রানা, কে যেন বলে উঠল, 'এই! কি ওটা?'

আরেকজন অকস্মাৎ চিৎকার জুড়ে দিল।

ছোট্ট কিন্তু শক্তিশালী গ্রেনেডের বিস্ফোরণ থামিয়ে দিল লোকটাকে।

লাফ দিয়ে ফর্কলিফটে উঠে স্টার্ট দিল রানা। রক্ত হিম করা এক মুহূর্ত বিরতির পর সগর্জনে সাড়া দিল এঞ্জিন।

সাগর থেকে ছুটে আসা বাতাসে ধোঁয়ার পাঁচিল ভেঙে গেছে, উন্মুক্ত হয়ে পড়েছে রক্তাক্ত দৃশ্যটা।

নিজের তাজা রক্তের ওপর হাত-পা ছড়িয়ে পড়ে রয়েছে হলুদ শার্ট, পাশেই তার সঙ্গীর খেঁতলানো ও ভাঙাচোরা শরীর।

রাইফেলম্যান অস্ত্র ফেলে দু'হাত দিয়ে চোখ চেপে ধরেছে। অন্ধ। অন্ধের মতই হোঁচট খাচ্ছে আর ব্যথায় চিৎকার করছে। দেখে মনে হলো তার ওপর কেউ করাত চালিয়েছে।

লাফ দিয়ে ব্যারেলের পিছনে সরে যাওয়ায় ভাল আড়াল পেয়ে গেছে মেশিনগানার। প্রায় এক ডজন ফুটো দিয়ে বিষাক্ত তরল পদার্থ বেরিয়ে আসছে ব্যারেল থেকে, তবে সে পুরোপুরি অক্ষত।

লোকটার হাতে জ্যান্ত হয়ে উঠল মেশিন পিস্তল। এক পশলা বুলেট ফর্কলিফটের সামনের লিফটিং গিয়ারে লেগে দিগ্বিদিক ছুটল, ওটা হেভি-ডিউটি স্টীলের তৈরি।

ভ্যানের তলা থেকেও পিস্তলের গুলি হলো। থেনেডটা ফাটার আগেই গড়িয়ে ওটার নিচে চলে গেছে তুং। তার ডান হাত কোন কাজ করছে না। গুলি করছে বাঁ হাত দিয়ে, একটা বুলেটও লক্ষ্যের কাছাকাছি আসছে না।

ভ্যানের ক্যাবে রয়েছে মিন, মাথা নিচু; এক হাতে গুলি করছে, অপর হাত দিয়ে চেষ্টা করছে স্টার্ট দেয়ার।

গিয়ার দিয়ে ফর্কলিফট ছেড়ে দিল রানা, টার্গেট করল মেশিন গানারকে। ট্রিগার টিপতে ভুলে গেল লোকটা, আতঙ্কে বিস্ফারিত চোখে তাকিয়ে থাকল। ফর্কলিফট দ্রুত কাছে চলে আসছে, কিন্তু তার পালাবার কোন জায়গা নেই।

ব্যারেলের তৈরি পাঁচিল ভেঙে দিল ফর্কলিফট, ওগুলোর নিচে চিড়ে চ্যাপ্টা, কিংবা হয়তো আলুভর্তাই হয়ে গেল মেশিনগানার।

ব্যাক গিয়ার দিল রানা, ভেঙে পড়া ব্যারেলের পাঁচিল থেকে পিছিয়ে আসছে ফর্কলিফট।

ভ্যানের এঞ্জিনটাকে ফুয়েলে ভাসিয়ে দিয়েছে মিন। সরাসরি সংঘর্ষের পথ ধরে ফর্কলিফটকে ছুটে আসতে দেখে নিষ্ফল রাগে গর্জে উঠল সে।

ভ্যানের চওড়া দিকটায় আঘাত করল ফর্ক লিফট, স্টীলের বর্ধিত ফর্ক গা ভেদ করল রক্তার আর্ম-এর ওপরে। টিনফয়েলের মত দুমড়েমুচড়ে গেল ধাতব গা। সংঘর্ষের পরপরই একটা অচলাবস্থার সৃষ্টি হলো, দুটো ভেহিকেলের একটাও নড়ল না।

গিয়ার বদলে গ্যাস পেডাল মেঝেতে চেপে ধরল রানা। গর্জে উঠে সামনে বাড়ল ফর্কলিফট, ভ্যানটাকে ঠেলে নিয়ে যাচ্ছে।

জান হাতে নিয়ে ক্রল করছে তুং। শরীরের ওপরের অংশ ভ্যানের নিচে থেকে বের হলো। হাতে এখনও পিস্তল থাকলেও কারও জ্ঞান কবচ করার সময় নেই তার। ভ্যানের ডান ও সামনের চাকা তার শরীরের মাঝখানে উঠে পড়ল। মরণচিৎকার বেরিয়ে এল গলা থেকে, থেমে গেল মাঝপথে।

ভ্যানটাকে ঠেলে জেটির কিনারায় নিয়ে এল ফর্কলিফট।

ক্যাবের ভেতর, চারদিকে, ফুটবলের মত ঘন ঘন বাড়ি খাচ্ছে মিন। কোন রকমে দরজার ফ্রেমটা দু'হাতে ধরতে পারল। নিজেকে তুলতে যাবে, এই সময় পিছনদিকে কাত হতে শুরু করল ভ্যান।

ছিটকে ড্রাইভারের সাইড ডোরের ওপর পড়ল মিন। ভ্যান পানিতে পড়ছে, লাফ দিয়ে তফাতে সরে এল রানা। ভ্যানের পিছু নিয়ে সাগরে ডাইভ দিল ফর্কলিফট। মাটিতে পড়ে গড়াল রানা, স্থির হলো এক হাঁটুতে সিধে অবস্থায়, হাতে ল্যুগার।

ওকে চ্যালেঞ্জ করার মত নেই কেউ।

মেশিন গানারের পরিণতি সম্পর্কে সংশয় আছে মনে, এলোমেলোভাবে পড়ে থাকা ব্যারেলগুলোর দিকে সাবধানে এগোল রানা। রাসায়নিক তরল বর্জ্যে ভেসে যাচ্ছে চারদিক, ঝাঁঝাল ধোঁয়া আর উৎকট দুর্গন্ধে অসুস্থ বোধ করছে ও।

মেশিনগানার মারা গেছে। ব্যারেলের স্তূপ সরাসরি আঘাত করায় হাড়গোড়

গুঁড়ো হওয়া সত্ত্বেও প্রাণে হয়তো বেঁচে যেত, কিন্তু আহত অবস্থায় তরল বিষে ডুবে মরেছে সে।

সবচেয়ে করুণ অবস্থা তুঙের। ভ্যানের চাকা ঠিক মাঝখানে তাকে টুথপেস্ট ভরা টিউবের মত তুবড়ে দিয়ে গেছে।

পানি থেকে বুদ্ধ উঠছে। কিছুক্ষণ অপেক্ষা করল রানা, কিন্তু উঠল না মিন।

ক্যানভাস সরিয়ে গাড়িতে বসল রানা। খোলার জন্যে নামল না ও, গেট ভেঙে বেরিয়ে এল রাস্তায়।

রুজের ফ্ল্যাট এখন থেকে প্রায় চল্লিশ মাইল দূরে।

জেটির নিচে পিচ্ছিল একটা পিলার ধরে ঝুলে রয়েছে মিন। হাঁপাচ্ছে সে, নিঃশ্বাসের সঙ্গে বেরিয়ে আসছে সাগরের লোনা পানি।

রানার চলে যাবার শব্দ পেয়ে সীতরে তীরে উঠল ও। কি করতে হবে জানে সে। বাংলাদেশী স্পাইকে ঠেকাবার এখনও একটা সুযোগ আছে। শুধু যদি একটা ফোন করতে পারে সে।

আট

ফ্ল্যাটের দরজা খোলা। বাকুদের পরিচিত গন্ধ ঢুকল নাকে।

হাতে লুগার নিয়ে ঝুঁকে আছে রানা, সাঁত্থ করে ভেতরে ঢুকল, টার্গেট খুঁজছে গানমাজল।

লাশ তো টার্গেট হয় না। প্রকাণ্ড শরীর, মুখ খুবড়ে পড়ে আছে, মাথার ক্ষত থেকে বেরিয়ে আসা রক্ত শুষে নিচ্ছে নকশাদার কার্পেট।

সাবধানে এগোল রানা। লাশের নিচে জুতোর ডগা ঢুকিয়ে চিৎ করল। দৃষ্টিহীন চোখ সিলিঙের দিকে তাকিয়ে, শেষ মুহূর্তের বিস্ময় এখনও সেং জার চেহারায় স্পষ্ট।

‘লে বাবা!’ বিড়বিড় করল রানা।

লিভিংরুম থেকে হলওয়াতে চলে এল। সার্মনে একটা দরজা, কবাট সামান্য একটু খোলা।

চোখের ভুল বা কল্পনা, নাকি সত্যি আরও একটু ফাঁক হলো কবাট? দেয়ালে পিঠ ঘষে এগোচ্ছে রানা, নরম গলায় ডাকল, ‘রুজ?’

দরজার ভেতর থেকে খসখস শব্দ ভেসে এল।

‘রুজ? আমি সুব্রত!’

হাতলে পাথর বসানো পিস্তলটা দরজার ফাঁক দিয়ে বেরিয়ে এল। পরমুহূর্তে বিস্ফোরিত হলো কবাট।

দরজার ভেতর ঘর নয়, কুজিট। সেখানে গুড়ি মেরে বসে রয়েছে রুজ,

দু'হাতে ধরা পিস্তল রানার দিকে তাক করা।

রানা চায় না আতকে উঠে ট্রিগার টেনে দিক রুজ, তবু নিজের অস্ত্র নিচু করল না। মেয়েটা সম্পূর্ণ অন্য এক জগতের, এত সহজে চিনতে পারার কথা নয়। 'শুটিঙে দেখছি সত্যি খুব ভাল হাত তোমার,' ঘরোয়া আলাপের সুরে বলল ও।

'আপনাকে তো বলেছি, আত্মরক্ষা করতে জানি আমি।'

'পুলিস হয়তো অন্য কোন অর্থ করবে। ওরা পৌছানোর আগেই আমাদের সুরে পড়া উচিত না?'

'হ্যাঁ।' পিস্তল সরিয়ে ক্লজিট থেকে বেরিয়ে এল রুজ।

আটকে রাখা নিঃশ্বাস ছেড়ে রুজের সামনে দাঁড়াল রানা। রুজের চোখ এখনও বড় হয়ে আছে। সামান্য একটু কাঁপছেও। তবে কোথাও আঘাত পায়নি। 'পিস্তলের সেফটি অন করলে খুশি হতাম,' বলল ও।

'কেন আপনাকে আমি বিশ্বাস করব?'

'এই মুহূর্তে একমাত্র আমাকেই শুধু বিশ্বাস করতে পারো তুমি, রুজ। তোমার একদিকে জার লোকেরা, আরেক দিকে পুলিস।'

'নিজেকে রক্ষা করাটা ক্রাইম নয়। তাছাড়া, আমার এই বিপদের জন্যে আপনিই দায়ী।'

'খেলতে রাজি হয়ে টাকা নিয়েছ তুমি। খেলোয়াড় যেখানে জা আর তুঙের মত লোক, এরকম কিছু একটা ঘটনা স্রেফ সময়ের ব্যাপার ছিল মাত্র। দেরি করলে এখানে আরও ঘটনা ঘটবে।'

দেয়ালে হেলান দিল রুজ। ক্লান্ত ও বিধ্বস্ত লাগছে তাকে। 'হ্যাঁ, ঠিক বলেছেন। আমার লাশ না দেখে থামবে না তুং।'

'তাকে থামানো হয়েছে।'

শিরদাঁড়া খাড়া করল রুজ, মুখের রঙ খানিকটা ফিরে পেল। 'আপনি থামিয়েছেন? তাহলে আমি হয়তো বিজয়ী দলকেই সমর্থন করেছিলাম।'

'তুমি কিন্তু অযথা ঝুঁকি নিচ্ছ।'

পিস্তলের সেফটি অন করল রুজ। 'আপনার সঙ্গে গাড়ি আছে, সুবত? নাকি এটা আপনার আসল নাম নয়?'

'মাসুদ রানা আমার আরও একটা নাম।' খুঁটিয়ে লক্ষ করল রানা, তবে রুজের চেহারায় এমন কিছু ফুটল না যা দেখে বোঝা যায় নামটার বিশেষ কোন তাৎপর্য আছে তার কাছে।

'ঠিক আছে, মাসুদ রানা—আপনার সঙ্গে পালাব আমি।' ছুটে বেডরুমে ঢুকল রুজ, আরেক ক্লজিট থেকে সুটকেস বের করে বিছানায় ফেলল।

'করো কি!' প্রতিবাদ করল রানা। 'সুটকেস গোছাবার সময় কোথায়!' ভয় পাবার কারণ আছে ওর। ফ্ল্যাটের দরজা খোলা। প্রতিবেশীরা নিশ্চয়ই কেউ গুলির শব্দ শুনেছে। 'জা'র দেরি হচ্ছে দেখে উঠে আসতে পারে ব্যাকআপ, যদি থাকে। ফোন পেয়ে থাকলে পুলিসও চলে আসতে পারে।

‘বলেন কি!’ হেসে উঠল রুজ। ‘সারাজীবনের সঞ্চয় ফেলে চলে যাব?’ ঘরের এক কোণে এসে হাঁটু গাড়ল সে, খানিকটা কার্পেট তুলে গুটিয়ে রাখল। কোথাও লুকানো হাতল আছে, সেটা ধরে টান দিতে কাঠের মেঝেতে ছোট্ট ফাঁক তৈরি হলো। ফাঁকের ভেতর, স্ট্রাকচারাল বীম-এর সঙ্গে বোল্ট দিয়ে আটকানো, একটা কম্বিনেশন সেফ দেখা গেল। ডায়াল ঘুরিয়ে সেফ খুলল রুজ। ‘সুটকেস দিন, প্লীজ।’

রুজের পাশে সুটকেস এনে রাখল রানা। সেফে হাত ঢুকিয়ে এক মুঠো অলঙ্কার তুলল রুজ। হাতটা বারবার সেফে ঢুকল, মুঠো মুঠো সোনা উঠে আসছে।

‘ওগুলো যদি খাঁটি হয়, তুমি রীতিমত ধনী মেয়ে।’

‘অনেক খেটে কামিয়েছি। চেষ্টা করেছি কেউ যাতে আমাকে ঠকাতে না পারে।’

‘বেশি দেরি করলে এ-সবই পুলিশকে ঘুষ দিতে বেরিয়ে যাবে।’

‘এই তো, হয়ে এসেছে।’

সেফে আর কোন অলঙ্কার নেই, কিন্তু এখনও ওটার তলায় হাত দেয়নি রুজ। তলা থেকে কিয়াতের মোটা এক জোড়া বাডিল উঠে এল। অলঙ্কারের স্তূপে ওগুলো রেখে সুটকেস বন্ধ করল সে। পিস্তলটা ঠাই পেল হাতব্যাগে। ‘চলুন এবার।’

লিভিংরুমে ঢুকে জানালার দিকে এগোল রানা। পর্দার কিনারা সরিয়ে এক চোখে বাইরে তাকাল।

ছোটখাট হলেও, নিচের রাস্তায় একটা ভিড় জমেছে। লোকজন মুখ তুলে রুজের ফ্ল্যাটের দিকে তাকিয়ে নিজেদের মধ্যে কথা বলছে। তবে কোন পুলিশ কার বা ইউনিফর্ম চোখে পড়ল না।

পর্দা ছেড়ে দিয়ে পিছিয়ে আসবে রানা, এই সময় রাস্তায় চাকা ঘষার আওয়াজ শুনতে পেল। হঠাৎ পাখিদের উড়াল দেয়ার ভঙ্গিতে ছড়িয়ে পড়ল লোকজন। বাঁক ঘুরে তাদের দিকে ছুটে আসছে একটা ট্যাক্সি। সরাসরি ফ্ল্যাটবাড়ির সামনে এসে থামল সেটা। বিক্ষোভিত দরজা দিয়ে মুখোশ পরা চারজন লোক লাফ দিল।

‘পিছন দিকে কোন দরজা আছে?’ রুজের কাঁধ ধরে বাঁকাল রানা।

‘হ্যাঁ, কিন্তু...’

‘জলদি!’ রুজের কাঁধ ছেড়ে কজি চেপে ধরল রানা।

রানাকে নিয়ে কিচেনে চলে এল রুজ। পিছনের দরজায় তালা দেয়া রয়েছে, তবে দরজার পাশেই পেরেকের সঙ্গে ঝুলছে চাবিটা। তালা খোলার সময় রুজ জিজ্ঞেস করল, ‘কারা ওরা?’

‘সেং জার বন্ধু।’

ফ্ল্যাটের সামনের সিঁড়িতে পায়ের আওয়াজ হলো। লোকগুলো কাছে চলে এসেছে। এভাবে পালাতে চেষ্টা করাটা বিপজ্জনক মনে হলো রানার, পিছন থেকে

আক্রান্ত হলে বাঁচা-মরা ভাগ্যের ওপর নির্ভর করবে। রুজকে রেখে ছুটে হলে চলে এল ও।

হলে ও-ও ঢুকল, একই সঙ্গে মুখোশ পরা প্রথম লোকটাও। পেঁচানোই ছিল আঙুল, পর পর দু'বার শুধু টান দিতে হলো ট্রিগারে। গর্জে উঠে লোকটার বুকে একজোড়া বুলেট ঢুকিয়ে দিল ল্যাগার।

গুরুতর আহত, কাত হয়ে মেঝেতে ঢলে পড়ল মুখোশ পরা আততায়ী; জীবন রক্ষাকারী শোণিত ধারা দু'হাতে ঠেকিয়ে রাখতে এত ব্যস্ত যে খসে পড়া অস্ত্রের কথা ভুলে গেছে।

গুলির শব্দে সাবধান, দ্বিতীয় লোকটা দরজার পাশের দেয়ালে আড়াল নিয়েছে। মুখের অংশ বিশেষ আর অস্ত্র ধরা হাত বের করে গুলি করল। ভাঙা প্লাস্টার আর ধুলো বৃষ্টির মত নেমে এল রানার মাথায়, তবে কোথাও চোট পায়নি। তাড়াহুড়ো না করে একবারই ট্রিগার টানল, মুখোশ পরা মাথার দু'ইঞ্চি ওপরে দরজার ফ্রেমে লাগল বুলেট। দ্বিতীয় গুলি করার সময় পাওয়া গেল না, তার আগেই সরে গেছে মাথা।

এখানে দাঁড়িয়ে থেকে ওদেরকে টার্গেট প্র্যাকটিস করতে দেয়ার কোন মানে হয় না। দরজার দিকে দুটো গুলি করে পিছিয়ে কিচেনে ফিরে এল রানা, ঠোঁটে আঙুল তুলে চুপ থাকার নির্দেশ দিল রুজকে। পিছনের দরজা খুলে সশব্দে বন্ধ করল ও।

এক সেকেন্ড পরই সদর দরজার খুন্সীটা লাফ দিয়ে ভেতরে ঢুকল, আওয়াজ শুনে ধরে নিয়েছে পিছনের সিঁড়ি বেয়ে নেমে যাচ্ছে রানা ও রুজ। হলওয়েতে সে ঢুকল রানার বুলেট খাবার জন্যে। একটা বুলেট সত্যি সত্যি মুখে পুরল সে, প্রায় নিখুঁত ভঙ্গিতে ডিগবাজি খেলো পিছন দিকে।

পিছনের পথটা উঁকি দিয়ে দেখে নিল রানা। কেউ কোথাও নেই, কাজেই নিরাপদ। কিন্তু মন বলল, এত সহজে কি ওরা পালাতে দেবে?

রানার দিকে তাকিয়ে অসহায় ভঙ্গিতে দাঁড়িয়ে আছে রুজ, এক হাতে পিস্তল, অপরহাতে সুটকেস।

'দাঁড়াও এখানে,' বলে সিঁড়ি বেয়ে তরতর করে নামল রানা। ল্যান্ডিংটা সিঁড়ির মাঝামাঝি, ওখানে পৌঁছে আক্রমণাত্মক ভঙ্গি নিল-সামান্য একটু কুঁজো হলো, পুরোপুরি লম্বা করা দুই হাতের তালুতে ল্যাগারের হাতল।

সিঁড়ির নিচে করিডরে উদয় হলো বাকি দু'জন। চার নম্বরটা তিন নম্বরের চেয়ে বেশি চালাক, সঙ্গীকে সামনে থাকতে দিয়ে নিজে বেশ খানিকটা পিছিয়ে পড়েছে।

সামনের লোকটার মাথা গরম, তা না হলে রানাকে দেখা মাত্র গুলি করতে করতে সিঁড়ি বেয়ে উঠত না। তার বোধহয় ধারণা বেশি গুলি করলে এক-আধটা লাগবেই। তিন ধাপও ওঠেনি, ক্লিপ প্রায় খালি করে ফেলল, অথচ লক্ষ্যস্থির করেনি।

রানা করল। একটা বুলেটই খামিয়ে দিল লোকটারকে, সিঁড়িতে পড়ে ধাপ

বেয়ে গড়িয়ে নেমে গেল নিচে, মেঝেতে স্থির হলো মরা মানুষ।

করিডরের বাকি আড়াল নিয়ে সঙ্গীর পাগলামি দেখাছিল চার নম্বর, রানা তাকে টার্গেট করার সুযোগই পায়নি। তবু দুটো গুলি করল ও, বাকের মুখে দেয়ালের কিনারা ভাঙল বুলেট। ল্যান্ডিঙের রেইল টপকে আট ফুট নিচে নামল রানা, মেঝেতে পড়ে গড়িয়ে দিল নিজেকে। স্থির হলো উপড় করা শরীর, হাতের ল্যুগার টার্গেট খুঁজছে। ছুটন্ত পায়ের আওয়াজ ঢুকল কানে। মুখোশের ভেতর সবচেয়ে চতুর লোকটা পালাচ্ছে। ট্যাক্সির আওয়াজ বলে দিল, তাকে ধাওয়া করেও এখন আর কোন লাভ নেই।

রুজকে নিয়ে কেটে পড়ল রানাও।

পুলিস এল পনেরো মিনিট পর।

আয়ে মোয়েকে যেন ভূতে ধরেছে, চুরি করা ট্যাক্সি তার হাতে পড়ে পাগলামি শুরু করল। ইয়ানগনের প্রতি ইঞ্চি তার চেনা, চোখে পষ্টি বেঁধে দিলেও যে-কোন ঠিকানায় পৌঁছে যাবে সে। কিন্তু উন তার কাছে অচেনা বিদেশ বললেও চলে। এখনকার অ্যাভিনিউ, বাক, উঁচু ফুটপাথ, সরু গলি, কানাগলি—সব মিলিয়ে জটিল একটা গোলকধাঁধার মত লাগছে। ওয়ান ওয়ে রাস্তা ধরে যাচ্ছিল, খানিক পর খেয়াল করল এটা তার জন্যে রঙ ওয়ে।

উল্টোদিক থেকে আসা ড্রাইভারদের চোখেমুখে আতঙ্ক দেখে উল্লাসবোধ করল আয়ে মোয়ে। ট্যাক্সিটাকে এড়াবার জন্যে নিজেদের গাড়ি দ্রুত ডানে বাঁয়ে সরিয়ে নিচ্ছে তারা, তা না হলে মুখোমুখি সংঘর্ষ কেউ ঠেকাতে পারবে না। অনেকেই গাড়ি নিয়ে ফুটপাথে উঠে পড়তে বাধ্য হলো।

মনে হচ্ছে এই তো মাত্র এক মুহূর্ত আগে মাইয়ো মিন তাকে ফোন করেছিল। ৫০৩ নম্বর ওয়্যারহাউসে সাংঘাতিক একটা ম্যাসাকার ঘটে গেছে। এ কি বিশ্বাস করার মত একটা ঘটনা? একজন মাত্র লোক নান তুঙের গোটা দলকে নিশ্চিহ্ন করে দিল? বেঁচে থাকল একা শুধু মিন?

‘তাড়াতাড়ি পৌঁছাতে পারলে ওকে তুমি ধরতে পারবে,’ মিন তাকে বলেছে। ‘আমি জানি কোথায় সে যাচ্ছে।’

মিনা রুজ উন-এ থাকে, ঠিকানাটা লিখে নিয়ে মিনকে সে জানিয়েছে যত তাড়াতাড়ি সম্ভব রক্তপিপাসু বিদেশী খুনীর একটা ব্যবস্থা করবে সে।

এখন গতি হলো সবচেয়ে মূল্যবান। সময়ের অভাবে খবর দিয়ে প্রফেশনাল হিটম্যানদের জড়ো করতে পারেনি সে। তবে তার মানে এই নয় যে সে নিজে রানার সঙ্গে লাগতে যাবে। ইউনিভার্সিটির ছাত্র সে, ক্যাডার হিসেবে ফ্রীল্যান্সার, গুরু হিসেবে রহস্যমানব মায়াতকা থুয়েকে শ্রদ্ধা-ভক্তি করে; সেই সূত্রে কমিউনিস্ট পার্টির ছাত্র শাখার কয়েকজন উগ্রপন্থী ক্যাডারকে চেনে। ফোন করে সেই কমরেডদের তিনজনকে পায় সে। ক্যাম্পাসের কাছাকাছি একটা রেস্তোরাঁয় অপেক্ষা করতে বলে তাদের, কথা দেয় দশ মিনিটের মধ্যে দেখা হবে।

একটা ব্যাগে কয়েকটা পিস্তল আর অ্যামিউনিশন ভরে মোয়ে। রাইফেল আর

মেশিন গান হলে ভাল হত, কিন্তু স্টকে হ্যান্ডগান ছাড়া অন্য কিছু ছিল না। আসলে সময়ের অভাবেই আরও ভারী কিছু যোগাড় করা যায়নি।

ফ্ল্যাট থেকে বেরিয়ে একটা ট্যাক্সি দাঁড় করায় মোয়ে। প্যাসেঞ্জার সীটের দরজা খোলার জন্যে ক্যাব থেকে নেমে পড়ে ড্রাইভার, অমনি তার মুখে পিস্তল চেপে ধরে সে। ওই পিস্তলের বাড়ি খেয়েই জ্ঞান হারাল ড্রাইভার। ফলে ট্যাক্সি হাইজ্যাক হবার পরপরই খবরটা পায়নি পুলিশ।

রেস্তোরার সামনে সশস্ত্রে ট্যাক্সি থামতে তিন কমরেড বন্ধু বুঝতে পারল বড় ধরনের কিছু একটা ঘটতে যাচ্ছে। তাড়াহুড়ো করে ট্যাক্সিতে উঠে বসল তারা। সঙ্গে সঙ্গে আবার স্পীড তুলল মোয়ে।

কাভার স্টোরিটা মুখস্থ বলে গেল সে। ‘গোপন সূত্রে খবর পেয়েছি, ইয়ানগনে কমিউনিস্টদের তৎপরতা বন্ধ করার জন্যে সিআইএ একজন এজেন্টকে পাঠিয়েছে। তার কাজ মৌলবাদী গোষ্ঠীগুলোকে টাকা দিয়ে কমিউনিজম বিরোধী আন্দোলনে উৎসাহিত করে তোলা। কাজ সেরে মায়ানমার ছেড়ে চলে যাচ্ছে লোকটা, কিন্তু আমরা দেরি না করলে এখনও তাকে ধরা সম্ভব।’

কোন প্রশ্ন ছাড়াই গল্পটা বিশ্বাস করল মাওপন্থী কমরেডরা। সিআইএ মানে যে আমেরিকা, আর আমেরিকা মানেই যে কমিউনিস্টদের শত্রু এটা সবাই জানে। তিন কমরেড উত্তেজনায় টগবগ করছে। এতবড় কাজে এর আগে তারা হাত দেয়নি।

এই প্রথম তারা মানুষ খুন করতে যাচ্ছে।

মোয়ে তাদেরকে অস্ত্র আর মুখোশ দিল, তারপর সতর্ক করে দিয়ে বলল, ‘সাবধান কিন্তু! শুনলাম এই এজেন্ট ব্যাটা সিআইএ-র টপ ট্রিগারম্যান।’

মানুষ খুন না করলেও, ওদেরকে আনাড়ি বলা যাবে না। নাং ও ফাই এর আগেও পিস্তল চালিয়েছে, আর খাইয়াংও মার্কসম্যানশিপ প্রতিযোগিতায় মেডেল জিতেছে।

তবে রেঞ্জে টার্গেট প্র্যাকটিস আর বন্দুকযুদ্ধ এক কথা নয়। টার্গেট কখনও পাল্টা গুলি করে না।

বাস্তবে দেখা গেল ‘সিআইএ এজেন্ট’ একাই একশো। তার সামনে ওরা কেউ দাঁড়াতেই পারল না।

ফলাফল?

তিন কমরেড খুন হয়ে গেছে। আর আয়ে মোয়ে আটকা পড়েছে অচেনা রাস্তার জটিল জালে।

বিড়বিড় করে প্রার্থনা করছে মোয়ে। শোকে কাঁদবে সে পরে, এই মুহূর্তে তার প্রার্থনা: তিন কমরেড বন্ধুই যেন মারা গিয়ে থাকে। কেউ যদি বেঁচে থাকে, তাহলে মনে করতে হবে তার ভাগ্যটাই বিশ্বাসঘাতক। সবাই মরে গেলে পুলিশকে কেউ বলার থাকবে না, কার নেতৃত্বে খুনটা করতে গিয়েছিল তারা।

ওয়ান ওয়ে রাস্তার শেষ মাথায় পৌঁছে দিক বদল করল মোয়ে। রঙ ওয়েতে না থাকায় চিন্তা করার অবসর পেল সে। প্রথমেই ডাবল, উন্মাদের মত গাড়ি

চালালে পুলিশ তাকে থামাবে। ট্যাক্সির স্পীড কমাল সে। কিছুক্ষণ পর নিশ্চিত হলো, কেউ তাকে অনুসরণ করছে না।

পালানো তাহলে সম্ভব।

মাথা ঠাণ্ডা রেখে অজুহাত খুঁজছে মোয়ে। বাংলাদেশী এজেন্ট মাসুদ রানাকে খুন করতে কেন সে ব্যর্থ হলো, এর একটা গ্রহণযোগ্য ব্যাখ্যা প্রফেসর মায়াতকা থুয়েকে অবশ্যই তার দিতে হবে।

আরও আধমাইল ছোট্টার পর চমকে উঠে উপলব্ধি করল মোয়ে, মুখোশটা এখনও খোলেনি সে।

নয়

বৃষ্টির সঙ্গে যোগাযোগ করল রানা। পে-ফোন থেকে ডায়াল করছে, এক লাইন থেকে আরেক লাইনে চলে গেল কলটা, শেষ লাইনে বৃষ্টির নম্বরটা সকল অর্থেই নিরাপদ, কারও পক্ষে ট্রেস করা সম্ভব নয়।

সর্বশেষ কি ঘটেছে শোনার আগেই বৃষ্টি বলল, ‘এদিকের আবহাওয়া খুব গরম, মাসুদ ভাই।’

রানা মন্তব্য করল, ‘সবটুকু তুমি এখনও জানো না।’

‘আপনার মূল কাতার নষ্ট হয়ে গেছে। আপনি এখন আর সুবত নন।’

‘বাকিটুকু বলো।’

‘দূতাবাস থেকে একের পর এক ফোন আসছে আজ। প্রথমবার করেছেন জাহাঙ্গীর সাহেব। নঈম জাহাঙ্গীর, দূতাবাসের লিগাল অ্যাডভাইজার। সাংঘাতিক খেপে আছেন ভদ্রলোক। আপনার পরিচয় জানেন তিনি, জিজ্ঞেস করছেন আপনার উদ্দেশ্যটা কি।’

‘কি উত্তর দিলে তুমি?’

‘উত্তর দেব? আমি আপনাকে চিনি নাকি?’

‘ওউ। ভদ্রলোককে শান্ত করার এটাই একমাত্র উপায়।’ হাসল রানা।

‘জাহাঙ্গীর সাহেব মানুষ ভাল, মানে আমার সঙ্গে এমনি সময়ে ভালই বনে। আজ ভদ্রলোককে সম্পূর্ণ অচেনা লাগল। সন্দেহ হচ্ছিল, তাঁর ওপর কোন চাপ আছে। দশ মিনিট পরই আমার ধারণা সত্যি প্রমাণিত হলো। ফোন করলেন উনি নিজে।’

‘সৈয়দ তারিক মোস্তফা?’

‘হ্যাঁ।’

রানা চিন্তিত। দূতাবাস প্রধান নাক গলাচ্ছেন, তাঁর ভূমিকাটা কি? ‘কি বললেন তিনি?’

‘তার আগে জেনে নিই, আপনি কি জানেন, মোস্তফা সাহেব এবার নিয়ে

তিনবার মায়ানমার এলেন?’

‘হ্যাঁ, জানি। এর আগে নেপাল ও কুয়েতে ছিলেন, সেকেন্ড সেক্রেটারি হিসেবে। দ্বিতীয়বার মায়ানমারে আসেন চার বছর আগে, ফাস্ট সেক্রেটারি হয়ে। প্রথমবার, সে অনেক বছর আগের কথা, জুনিয়ার অফিসার হিসেবে ছিলেন এখানে। এবারই তাকে প্রথম দূতাবাস প্রধান করে পাঠানো হয়েছে।’

‘হ্যাঁ। তো উনি যখন নেপালে ছিলেন তখন ওখানে আমিও ছিলাম, সেই থেকে আমার পরিচয় ও পেশা সম্পর্কে জানেন উনি। দূতাবাসের আর মাত্র একজন আমার সম্পর্কে জানেন—নঈম জাহাঙ্গীর।’

‘আমরা বোধহয় প্রসঙ্গ থেকে সরে যাচ্ছি,’ বলল রানা। ‘মোস্তফা সাহেব ফোন করে কি বললেন, তোমাকে?’

‘উনি আমাকে মায়ানমারের বায়ট অ্যাক্ট পড়ে শোনালেন। জানতে চাইলেন এখানে আপনি কি ধরনের অপারেশন চালাচ্ছেন। জানতে চাইলেন, তাঁর অনুমতি চাওয়া হয়নি কেন।’

‘সবাই দেখছি মঞ্চে উঠতে চায়।’

‘তাকেও আমি শুই একই জবাব দিয়েছি। অর্থাৎ কিছুই বলিনি। তারপর আমি ঢাকায় ফোন করে অভিযোগ করেছি।’

‘ঢাকায় কাকে ফোন করলে?’

‘ইচ্ছা ছিল সোহেল ভাইকে বলব, কিন্তু তাকে পাইনি। হঠাৎ কলজেটা লাফিয়ে উঠল, মাসুদ ভাই! সেই জলদগদ্বীর কণ্ঠস্বর! যখন বুঝতে পারলাম অপর প্রান্তে আমার বসের বস কথা বলছেন, যেমে নেয়ে উঠলাম আমি।’ বৃষ্টি হাসছে।

‘কি বললেন বস?’

‘প্রায় কিছুই বললেন না, আমার অভিযোগ শুনে শুধু হুঁ-হ্যাঁ করলেন। তবে দূতাবাস এভাবে নাক গলানোয় তিনি যে চিন্তিত হয়ে পড়েছেন, তাতে কোন সন্দেহ নেই।’

‘জানা কথা পররাষ্ট্র মন্ত্রণালয়কে এক হাত নেবেন তিনি।’ রানা হাসল।

‘কিন্তু, মাসুদ ভাই, জাহাঙ্গীর সাহেব আপনাকে সতর্ক করার নামে কামেলা করতে পারেন, তার কি হবে?’

‘এ-সব ঘরোয়া ব্যাপারে আমার কোন দৃষ্টিভঙ্গি নেই,’ বলল রানা। ‘ওঁরা কি তোমাকে খুব বেশি বিরক্ত করছেন?’

‘না, মানে, ব্যাপারটা হয়তো অ্যাডমিনিস্ট্রেটিভ লেভেলে পাওয়ার প্লে ছাড়া কিছু নয়, যা বলা হচ্ছে সবই খুব সিভিলাইজড ওয়েতে। কিন্তু আপনার বেলায় ওঁরা হয়তো কর্কশ ট্যাকটিক্স ব্যবহার করবেন।’

‘আমার কাছে এমন কিছু খবর আছে, শোনার পর দূতাবাসের ওঁরা স্বীকারই করবে না যে আমি বাংলাদেশী।’ এরপর আজ সারাদিন কি কি ঘটেছে তার সংক্ষিপ্ত বর্ণনা দিল রানা।

‘গুড গড, মাসুদ ভাই!’ সব শুনে প্রায় আঁতকে উঠল বৃষ্টি। ‘আপনি তো দেখছি রীতিমত যুদ্ধ বাধিয়ে দিয়েছেন!’

‘জীবনে একঘেয়েমি থাকা উচিত নয়,’ শুকনো গলায় দর্শন আওড়াল রানা।
‘এটাও অদ্ভুত এক কাকতালীয় ব্যাপার যে সবাই একই সময়ে হঠাৎ করে
আবিষ্কার করল সুব্রত আসলে সুব্রত নন।’

‘হ্যাঁ, অদ্ভুতই বলতে হবে।’

‘এরপর কি, মাসুদ ভাই?’

‘আমরা নিরাপত্তা না দিলে রুজু খুন হয়ে যাবে,’ বলল রানা। ‘ওর জন্যে
একটা সেফ হাউস দরকার।’

‘এয়ারপোর্টের কাছাকাছি হলে চলবে?’

‘চলবে।’

রানাকে ঠিকানা আর ক্রোড বলে দিল বৃষ্টি। ‘ওরা আপনাদের জন্যে অপেক্ষা
করবে।’

দূতাবাসের লিগাল অ্যাডভাইজার নঈম জাহাঙ্গীর এই সেফ হাউস সম্পর্কে
জানেন কি জানেন না, এ নিয়ে রানার কোন দৃষ্টিভঙ্গি নেই। রানা এজেন্সির সেফ
হাউস সম্পর্কে কখনোই বাইরের কাউকে কিছু জানানো হয় না। ‘ধন্যবাদ, বৃষ্টি।
খেলাটা কঠিন হয়ে উঠছে, একটু সতর্ক থেকো।’

‘সতর্ক তো বটেই, আমি তৈরিও হয়ে আছি, মাসুদ ভাই,’ দৃঢ়কণ্ঠে বলল
বৃষ্টি। ‘ডাকলেই পাবেন আমাকে।’

আরেকবার ধন্যবাদ দিয়ে যোগাযোগ কেটে দিল রানা। গাড়িতে ফিরে এসে
কিছু বলল না, সাগর ঘেঁষা রাস্তা ধরে কয়েকমাইল প্রায় উড়ে এল।

‘রানা—,’ বলে ধেমে গেল রুজু।

‘শুনছি।’ গাড়ির স্পীড কমিয়ে আনল রানা।

‘আপনাকে আমি একটা কথা বলতে চাই।’

‘বলো।’

ড্রেসের একটা আলগা সুতো আঙুলে পেঁচাচ্ছে রুজু। ‘মেজর ইয়ে আউংকে
আমি আপনার সম্পর্কে বলেছি—মানে, সুব্রত সম্পর্কে আর কি।’

‘আমি আশ্চর্য হচ্ছি না।’

‘আপনার রাগ হচ্ছে না?’

‘সেটা অন্য প্রসঙ্গ,’ বলল রানা। ‘আশ্চর্য হচ্ছি না এই কারণে যে তার সঙ্গে
একবার দেখা হওয়াটা হয়তো কাকতালীয় হতে পারত...তারমানে এই নয় যে
কাকতালীয় ব্যাপারে আমি বিশ্বাস করি। তবে কেউ নিশ্চয়ই তাকে জানিয়েছিল যে
আমরা কালো বিভাগে যাচ্ছি। আমি বলিনি। বাকি থাকলে শুধু তুমি।’

‘আপনি আমার ওপর রেগে আছেন?’

‘ব্যাপারটা আমি মেনে নিয়েছি,’ বলল রানা। ‘আমার অনুভূতির কথা জানতে
না চেয়ে তুমি বরং তার ভূমিকাটা পরিষ্কার করো।’

‘আমি একবার আমার এক বন্ধুকে খানিকটা কোকেন দিয়েছিলাম।
দিয়েছিলাম, বেচিনি। খুবই সামান্য, তাও হাতে-পায়ে ধরেছিল বলে। এর মধ্যে
কি এমন অভ্যাস ছিল, বলুন? সবাই যেখানে কোটি কোটি ক্রয়াক্রয়ের কোকেন নিয়ে

ব্যবসা করছে?’

রুজের চোখ ছিল ছিল করছে। ‘তখন কি আর আমি জানতাম যে আমার ওই বন্ধু আসলে মেজর আউংয়ের চর। ওই একটুখানি কোকেন দেয়ার অপরাধে মেজর আমাকে গ্রেফতার করল। বলল, তার হয়ে কাজ করতে রাজি হলে অভিযোগ তুলে নেবে সে। আর রাজি না হলে সাক্ষী-সাবুদ যোগাড় করে এমন ভাবে ফাঁসাবে, জেল থেকে ছাড়া পাব বুড়ি হওয়ার পর।’

দু’হাতে মুখ ঢেকে শিউরে উঠল রুজ। ‘বুড়ি হওয়ার সুযোগ আমি পেতাম না, রানা। কয়েদীরা আমাকে মেরে ফেলার আগে আমি নিজেই আত্মহত্যা করতাম।’

‘তো সেই থেকে মেজরের হয়ে কাজ করছ তুমি।’

‘হ্যাঁ, ও আমাকে তার একজন স্পাই বানাল।’

‘তার সুতোটা কার হাতে? মানে সে কার হয়ে কাজ করছে?’

‘আউং নিজেই নিজের রাজা। বলে, সে কাউকে জমা খরচ দেয় না।’

‘আমার পিছনে লাগার কারণ?’

‘ঠিক জানি না। এমন হতে পারে যে আপনার ব্যাপারে সে আগ্রহী নয়, আগ্রহী নান তুং আর হিনান ফো...’

‘কেন?’

‘তার একটা জেদ, দৈনিক মায়ানমার যারা পুড়িয়েছে তাদেরকে সে ধরবেই ধরবে। তার সম্ভেদ, কাজটা হিনান ফো-ই করেছে।’

‘ধরল, কিন্তু তারপর? গ্রেফতার করবে, নাকি মোটা টাকা ঘুষ খেয়ে ছেড়ে দেবে?’

‘এর জবাব শুধু মেজর আউংই দিতে পারবে।’ কাঁধ ঝাঁকাল রুজ। ‘লোকটা অসৎ পুলিশ অফিসার, ঠিক, কিন্তু ক্রিমিনালদের ঘণা করে। সে যদি ঘুষ খেয়েও হিনান ফোকে জেলে ভরে, আমি আশ্চর্য হব না।’

‘বাহ! এরকম নমুনা আমাদের দেশেও কিছু আছে!’

‘কিংবা হয়তো মেরেই ফেলবে,’ বলল রুজ। ‘আউং একটা খুনীও।’

তিক্ত হেসে রানা বলল, ‘তুমি দেখছি ভাল লোকদের সঙ্গেই ওঠাবসা করো।’ গাড়ি ঘুরিয়ে নিয়ে এয়ারপোর্টের দিকে রওনা হলো।

নিজের সীটে নেতিয়ে পড়ল রুজ। ‘কি জানি, আমার কপালটাই বোধহয় খারাপ। দেখুন না, এখন আবার পালাচ্ছিও আরেকজন খুনীর সঙ্গে। জানি না অভিশপ্ত ভাগ্য কোথায় আমাকে নিয়ে যাবে।’

‘তুমি পালাচ্ছ না, তোমার সঙ্গীটিও খুনী নয়,’ বলল রানা। ‘তোমাকে একটা নিরাপদ আশ্রয়ে নিয়ে যাওয়া হচ্ছে। ওখান থেকে যেদিন তুমি বেরুবে, দেখবে সেদিন থেকে কেউ তোমাকে আর অযথা বিরক্ত করছে না।’

‘রুজের শিরদাঁড়া খাড়া হয়ে গেল। ‘মানে? কি বলছেন আপনি, রানা?’

‘তুমি মারাত্মক হুমকির মধ্যে পড়েছ, সেজন্যে আমি দায়ী,’ বলল রানা। ‘কাজেই তোমাকে বাঁচিয়ে রাখাটা আমারই দায়িত্ব। বিপদ না কাটা পর্যন্ত তুমি

আমাদের নিরাপদ আশ্রয়ে থাকবে।’

‘আমি কি তাহলে আপনাকে চিনতে ভুল করেছি?’ বিহ্বল দেখাল রুজকে। একটু পর অভিমানের সুরে বলল, ‘আপনি আমাকে সব কথা বলছেন না। আসলে আপনি কে?’

‘বিনা স্বার্থে তোমার ভাল চাই, এর বেশি কিছু জানতে চেয়ো না।’

‘আমাকে নিরাপদ জায়গায় রেখে আপনি কোথায় যাবেন?’ জিজ্ঞেস করল রুজ, চোখ দুটো ভেজা ভেজা।

‘কিছু আলাগা সুতো জোড়া লাগাতে হবে আমাকে,’ বলল রানা। ‘এক কি দু’হণ্ডা পর আবার আমাদের দেখা হবে।’

‘যদি না ওরা আপনাকে মেরে ফেলে।’ অসহায় মেয়েটা এবার কেঁদেই ফেলল।

রাজধানীর উপকণ্ঠে, ইরাবতী নদীর কিনারায়, ম্যাডাম জয়াতুন-এর ব্রুথেল। তিনতলা দালানের ত্রিশটা কামরায় রাতদিন চব্বিশ ঘণ্টা মদ, গাঁজা, কোকেন আর হেরোইনের জমজমাট আসর চলছে, তারই ফাঁকে ফাঁকে চলে আদিরসের চর্চা। এখানে যৌনকর্মীদের পালাবদল ঘটে, কিন্তু আসর ভাঙে না।

নিচতলার বড় একটা কামরায় চেয়ার টেবিল ফেলা আছে, অতিথিদের এখানেই প্রথমে স্বাগত জানানো হয়। আজ রাতে খন্দেরের সংখ্যা বেশি, ফলে নরক একেবারে গুলজার। গাঁজার ধোঁয়ায় ভারী হয়ে আছে বাতাস, তারপরও ঘাম আর সস্তা পারফিউমের গন্ধ একেবারে দূর হয়নি।

ম্যাডাম জয়াতুনকে দেখে মনে হবে মাতাল একজন ট্রাক ড্রাইভার। বিশাল কাঠামো, তাতে চর্বির পরিমাণ কমই, বেয়াড়া খন্দেরদের একাই সামলাতে পারে। তবে তার একজন দেহরক্ষী আছে। ময়ে নয়ে একজন বডিবিন্ডার, ক্ষুর চালানোয় গুস্তাদ, পিস্তলেও ভাল হাত।

চারজন যৌনকর্মীকে এক লাইনে দাঁড় করাল মাদাম জয়াতুন। দু’জন মোটাসোটা, বাকি দু’জন হাড়িসার ড্রাগ অ্যাডিক্ট। ‘বলুন, এদের মধ্যে কাকে আপনাদের মনে ধরে। কে সেই ভাগ্যবতী?’

‘একজোড়া মাদী শেয়াল, আর একজোড়া নেড়ীকুস্তা।’ হিনান ফো হাসছে না। ‘আমাদের চোখকে তুমি অপমান করছ, মাদাম জয়াতুন। বিদায় করো ওদের।’

চো মাউং বলল, ‘বিদায় করো ওদের। আমরা ফ্রেশ জিনিস চাই।’

‘ফ্রেশ মেয়েছেলে?’ হাসল জয়াতুন। ‘মেয়েছেলে তো গোসল করলেই ফ্রেশ! ভাল করে দেখুন,’ বলে একটা মেয়ের চিবুকে হাত রাখল সে। ‘দেখুন, সব কটা দাঁতই আসল।’

‘দাঁত? গরু নাকি যে কেনার আগে দাঁত দেখতে হবে?’ হিনান ফো মেজাজ খারাপ করেছে না। ‘যা বলছি শোনো, জয়াতুন। নতুন জিনিস দেখাও।’

‘বুঝেছি! আপনারা আসলে তরমুজের মত বড় বড় পার্টস চান।’ জয়াতুনের

মুখে সবজাত্তার হাসি। 'তাহলে এই থান নোয়িকে নিন। তাকান, ভাল করে দেখুন...'

ফো বলল, 'কি হে, পার্টনার, পছন্দ হয়?'

চো মাউং অন্যদিকে তাকিয়ে আছে। মদের গ্লাস সাজানো ট্রে নিয়ে এক টেবিল থেকে আরেক টেবিলে যাচ্ছে কিশোরী একটা মেয়ে, বাচ্চা বললেই হয়, টেনে টুনে বছর পনেরো বয়স হবে; তারই ওপর আঠার মত আটকে আছে মাউং-এর চোখ। একা মাউং নয়, অন্যান্য টেবিলের লোকজনও দেখছে তাকে। কেউ কেউ হাতও বাড়ছে। তবে মেয়েটা সতর্ক, কৌশলে নাগালের বাইরে থাকছে।

ফোও তাকে দেখল। 'হুমম। এটাকে তো আগে কখনও দেখিনি।'

'খিন আয়াং নতুন,' জয়াতুন বলল, মুখের হাসি নিভে গেছে। 'এখনও কঁচি, কাজ শুরু করার বয়স হয়নি। না পাকলে ঠোকর দিয়ে কি লাভ। আপনাদের আসলে দরকার পাকা ফল।'

'আমাদের হাতে ছেড়ে দাও, আমরা একরাতেই পাকিয়ে দেব।'

'না-না। নির্যাতন ওর সহ্য হবে না।'

'যার সহ্য হয় না তাকেই তো নির্যাতন করে মজা!' হেসে উঠল ফো।

জয়াতুন উদ্ভিগ্ন। 'ওর পিছনে আমার এক কাঁড়ি টাকা খরচ হয়েছে। আপনাদের হাতে পড়লে ওর যা অবস্থা হবে, তারপর ওর আর বাজারদর বলে কিছু থাকবে না।'

'কেন, খানিক আগে তুমিই না বললে-গোসল করলেই মেয়েছেলে ফ্রেশ? চিন্তার কিছু নেই, জয়াতুন, বিনিময়ে তোমাকে ন্যায্য ক্রিয়াতই দেয়া হবে।'

'না, মানে, বলছিলাম কি, আপনাদের হাতে পড়লে বাচ্চা মেয়েটা না মরে যায়...'

চুরুট প্রায় শেষ, নতুন আরেকটা ধরাল ফো, প্রথমটা ফেলে দিল ছুঁড়ে। জয়াতুনের পায়ের কাছে কার্পেটের ওপর পড়ল সেটা। জয়াতুন হাঁ করে তাকিয়ে থাকল জ্বলন্ত চুরুটের দিকে।

জুতো দিয়ে মাড়িয়ে সেটা নেভাল ফো। 'আগুন দেখলেই কিছু না কিছু আমার ধরাতে ইচ্ছা করে, নিজেকে সামলে রাখতে পারি না।'

পাশের একটা টেবিলে একদল নির্মাণ শ্রমিক বসেছে, পেটা লোহার মত শক্ত তাদের কাঠামো। তাদেরকে বিয়ার পরিবেশন করছে কিশোরী খিন আয়াং। চো মাউং তার বাহু ধরল। 'এদিকে এসো, কচি ময়না।'

শ্রমিকদের একজন, বিশাল এক দৈত্য, কর্কশ গলায় বলল, 'এখানে ওর কাজ আগে শেষ হোক।'

আয়াঙের হাত থেকে ট্রেটা নিয়ে টেবিলের ওপর আছাড় মারল মাউং। টেবিল থেকে ভাঙা কাঁচ আর বিয়ার বরে পড়ল কার্পেটে। 'হয়েছে? ওর কাজ শেষ হয়েছে? চলো, সুন্দরী, ওপরতলায় যাই আমরা।'

বাহটা ছাড়াবার চেষ্টা করে ব্যর্থ হলো আয়াং। ব্যথা পাচ্ছে সে। 'ছাড়ুন! আহ, ব্যথা লাগছে!'

‘ব্যথা লাগছে? ওপরে চলো, আরাম লাগবে...’

চেয়ার ঠেলে দৈত্যটা খাড়া হলো। যথেষ্ট লম্বা সে, কিন্তু তারপরও মাউং-এর চেয়ে ছ’ইঞ্চি খাটো। তবে চওড়ায় বেশি সে। চার সঙ্গী তাকে উৎসাহ যোগাল। প্রায় একযোগে চেঁচিয়ে উঠল তারা। ‘ব্যটাকে একটু শিক্ষা দিয়ে দাও!’

‘এই,’ মাউংকে ডাকল দৈত্য।

‘তোমার কোন সমস্যা হয়েছে?’ জানতে চাইল মাউং।

‘আমার নয়, সমস্যা হয়েছে তোমার,’ জবাব দিল দৈত্য।

‘উনকুয়ে, একটা ঘুসি মেরে বসে পড়ো, নিজের দাঁত নিজেই কুড়িয়ে নেবে ও,’ বলে হেসে উঠল শ্রমিকদের একজন।

উনকুয়ে টের পাচ্ছে আশপাশের সব টেবিল থেকে লোকজন লক্ষ করছে তাকে। নিজের কাছে তার দাম বেড়ে গেল। সে যেন মঞ্চে অভিনয় করছে। ‘শুরু থেকেই তোমাকে লক্ষ করছি আমি। ভেতরে এমনভাবে ঢুকলে, এটা যেন তোমার বাপের কেনা বাড়ি। তারপর আমাদের বিয়ার ফেলে দিলে, তোমার মেয়ের বয়েসী আয়াংকে কুপ্তস্তাব দিলে। নিজেকে তুমি আসলে কি ভাবছ বলো তো?’

‘ভাবছি তোমার কপালে আমার মার লেখা আছে।’ মাউং-এর মুখে ছেলেমানুষের মত সরল হাসি।

হাসল দৈত্য উনকুয়েও। ‘তাহলে দেখাই যাক কে কাকে মারে!’

দেখে মনে হলো মাউং শুধু হাতঝাপটা দিয়েছে। কিন্তু তার ফলে উনকুয়ে কিভাবে যে শূন্যে উঠে পড়ল, কেউ বলতে পারবে না। টেবিলে পড়ল সে, তারপর টেবিলসহ কার্পেটে। তার বন্ধুরা লাফ দিয়ে চেয়ার ছাড়ল।

ধীরে ধীরে সিঁধে হলো উনকুয়ে। কয়েকবার ঝাঁকিয়ে মাথাটা পরিষ্কার করে নিল। ‘এটাই যদি তোমার সেরা মার হয়, আজ তোমার কপালে খারাবি আছে।’

বন্ধুদের একজন বলল, ‘উনকুয়ে, শালাকে ভর্তা বানা!’

ওদেরই আরেকজন চেঁচাচ্ছে, ‘তুই স্বরে আয়, উনকুয়ে, আমাকে একটা চাল দে।’

চারজনই ওরা উনকুয়ের সাহায্যে একযোগে এগিয়ে এল। মাত্র দু’তিন পা এগিয়েছে, এই সময় একটা গুলি হলো।

সবাই দেখল ফোর পিস্তল থেকে ধোঁয়া উঠছে। ‘সবাই চুপচাপ বসে পড়ো। তোমাদের উচিত বঁচে থাকার চেষ্টা করা।’

থমকে দাঁড়ানো চারজনের একজন বলল, ‘সঙ্গে অস্ত্র থাকলে আমরাও উপদেশ দিতে পারতাম। কিন্তু গুলি তুমি কজনকে করবে? সবাইকে তো আর মেরে ফেলতে পারবে না। আমরা একজন ঠিকই তোমাকে ধরব...’

ফো নড়ল না, ফলে বোম্বা যায়নি সে গুলি করতে যাচ্ছে। কোমরের কাছে ধরা পিস্তল থেকে শুধু আগুনের কিছু ফুলকি ছুটল।

উনকুয়ের যে বন্ধুটা কথা বলছিল ব্যথায় গুঁড়িয়ে উঠল সে, হাত দিয়ে চেপে ধরল রক্তাক্ত কানটা। ফো তার কানের লতি উড়িয়ে দিয়েছে।

‘এরপর পুরো কানটা,’ নরম সুরে বলল ফো, মিটিমিটি হাসছে।

মাদাম জয়াতুন তার দেহরক্ষী ময়ে নয়ের দিকে তাকাল। কোমরের বেলেট গৌজা পিন্ডলের দিকে একটু একটু করে হাত বাড়চ্ছে ময়ে নয়।

‘কজি উড়ে যাচ্ছে,’ ফিসফিস করল মাউং।

হাতটা শরীরের পাশে নামিয়ে নিল ময়ে নয়।

নিঃশব্দে হাসল মাউং।

কান চেপে ধরে নিজের চেয়ারে বসে পড়ল উনকুয়ের বন্ধু। দেখাদেখি তার বাকি সঙ্গীরাও, সবার শেষে উনকুয়ে।

ফোর পিন্ডল ঘুরে গেল সদ্য আগত এক লোকের দিকে। লোকটাকে দেখার পর ট্রিগার পঁচানো আঙুলে টিল দিল সে। ‘আয়ে মোয়ে।’ অবাক হয়ে বলল সে। ‘তুমি! তুমি এখানে কি করছ?’

‘আয়ে মোয়ে আর মেয়েমানুষ? নাহ!’ মাথা নাড়ল মাউং। ‘ওর ওইটা নেই, কাজেই মেয়েমানুষ নিয়ে কি করবে!’

আয়ে মোয়ে বলল, ‘আমি বেশ্যাদের ঘৃণা করি।’

‘তোমার বাপ করত না,’ ঝাঁঝিয়ে উঠল জয়াতুন।

‘ঘটনা কি?’ জ্ঞানতে চাইল ফো।

‘জরুরী একটা কাজ সারতে হবে,’ বলল আয়ে মোয়ে।

‘ফো আর মাউং পরস্পরের দিকে তাকাল, তারপর একযোগে ফিরল আয়ে মোয়ের দিকে। ‘এখানে, এই মাদী শুয়োরের খোঁয়াড়ে কি করছি আমরা? চলো, যাই!’

‘কি করছি আমরা!’ প্রতিধ্বনি তুলল মাউং। ‘চলো!’ থিন আয়াংকে ছেড়ে দিল সে। ‘অন্য কোন সময়, কচি ময়না।’

উনকুয়ে আর চার বন্ধুদের উদ্দেশে মাথা নুইয়ে ফো বলল, ‘আজ তোমরা লটারি জিতেছ। সেই লটারির নাম জীবন।’ কোমরের কাছ থেকে পর পর দুটো গুলি করে উনকুয়ের চেয়ারের একজোড়া পায়া ভেঙে দিল, দৈত্যাকৃতি উনকুয়ে ধপাস করে বসে পড়ল কার্পেটে। ‘আমাকে যাতে ভুলে না যাও,’ বলে আয়ে মোয়ে আর মাউঙের পিছু নিয়ে কামরা থেকে বেরিয়ে গেল।

দশ

মর্নিংওয়াক শেষে হোটেলে ফিরছে রানা।

আপাতত ওর হাতে কোন সূত্র নেই। তবে জানে অ্যাকশনের কোন অভাব হবে না। কারণ ও এখন একটা টার্গেট। মর্নিংওয়াকে বেরুবার উদ্দেশ্য ছিল প্রতিপক্ষদের চোখে ধরা দেয়া, তারপর দেখা, কি ঘটে।

হোটেলের ফ্রন্ট ডোর দিয়েই ভেতরে ঢুকল রানা। ইউনিফর্ম পরা ডোরম্যান মাথা নুইয়ে সম্মান জনাল, ‘গুড মর্নিং, স্যার।’

‘মর্নিং।’

লবিতে প্রচুর ঠাণ্ডা আলো। ফ্লাওয়ার ভাসে এইমাত্র তাজা ফুল সাজানো হয়েছে, মিষ্টি গন্ধে প্রাণ ভরে গেল। সোফা আর চেয়ারগুলো বেশিরভাগই খালি দেখা যাচ্ছে। অল্প যে কজন লোক আছে তাদের মধ্যে একজনকে বাঙালী বলে সন্দেহ হলো রানার। ছোট করে ছাঁটা চুল খুলি কামড়ে আছে, অ্যাথলেটের মত সুঠাম কাঠামো।

লোকটা লবির দূরপ্রান্তে বসেছে, দরজার দিকে মুখ করে। সামনে খোলা খবরের কাগজ, তবে পড়ছে না। রানাকে দেখে কাগজে মুখ লুকাল।

রানা তার দিকে দ্বিতীয়বার না তাকিয়ে লবির মেঝে পার হয়ে সিঁড়ি বেয়ে উঠে এল। লোকটার দৃষ্টিপথ থেকে সরে এসে দোতলার একটা পিলারের আড়ালে গা ঢাকা দিল ও, উঁকি দিয়ে তাকিয়ে আছে।

বাঙালী তরুণ খবরের কাগজ ফেলে ছুটল ফোন বুদের দিকে। দু’একটা কথা বলে বুদ থেকে বেরিয়ে এল সে, হন-হন করে হেঁটে এসে ঢুকে পড়ল একটা এলিভেটরে।

এলিভেটর থেকে চারতলায় নামল তরুণ। ওখানে তার জন্যে অপেক্ষা করছে রানা।

তরুণ কোন দিকে না তাকিয়ে রানার স্যুইটের দিকে যাচ্ছে। সিঁড়ির দরজা খুলে তার পিছনে চলে এল রানা। পায়ের আওয়াজ পেয়ে ঘাড় ফেরাতে যাবে, তরুণের পিঠে তর্জনী ঠেকাল ও। ‘হাত দুটো শরীরের পাশে ঝুলিয়ে রাখো। তা না হলে ট্রিগার টেনে দেব।’

তারপরও রানাকে দেখার জন্যে ঘাড় ফেরাতে গেল তরুণ। আঙুলটা তার পিঠে আরও একটু ঢোকাল রানা। ‘সোজা সামনে তাকাও।’

‘আমি জানি তুমি গুলি করবে না!’ রুদ্ধশ্বাসে বলল তরুণ। ‘অন্তত এরকম খোলা জায়গায়...’

‘দেখতে চাও?’ ধমক দিল রানা। উত্তরের অপেক্ষায় থাকল না। ‘দেয়ালে নাক ঠেকিয়ে দাঁড়াও।’

‘শোনো, তুমি...’

‘কি বললাম!’

দু’পা এগিয়ে দেয়ালে নাক ঠেকিয়ে দাঁড়াল তরুণ। সার্চ করে তার পকেট থেকে একটা ওয়ালথার পিপিকে বের করল রানা। আঙুলের বদলে কাজে লাগল গুটা। ট্রাইজারের পকেটে পাওয়া গেল মানি ব্যাগ। সেটা খুলে আইডেনটি কার্ড বের করল। ‘বাবুল আখতার, বাংলাদেশ পুলিশ, ডিটেকটিভ ব্রাঞ্চ,’ পড়ল ও, মুখ তুলে বলল, ‘এখানে কেন আসা হয়েছে, কি করা হচ্ছে, এ-সব পরে; তার আগে এক জায়গায় যাব আমরা।’

‘কোথায়?’

‘না, বেশি দূরে কোথাও নয়। এই তো, আমার স্যুইটে। কোন চালাকি নয়, কেমন?’

করিডর ধরে রওনা হলো ওরা। আখতারের ঠিক পিছনেই রয়েছে রানা। আখতার বলল, ‘কাজটা কিন্তু তুমি ভাল করছ না, রানা। আমি সরকারী দায়িত্ব পালন করছি, তাতে বাধা দেয়া তোমার উচিত হচ্ছে না। এখন যদি আমি চিৎকার করি, এখনকার পুলিশ এসে তোমাকে অ্যারেস্ট করে নিয়ে যাবে।’

‘তার আগে তুমি আমার গুলি খেয়ে মারা যাবে,’ বলল রানা। ‘আমার নাম যখন জানো, তাহলে এ-ও জানো যে সত্যি আমি গুলি করব।’

‘অতীতে তুমি যতই নাম কিনে থাকো,’ হিসহিস করে বলল আখতার, ‘এবার যে বিপদে জড়িয়েছ তা থেকে তোমার আর বাঁচার কোন উপায় নেই!’

‘কিন্তু দু’জনের মধ্যে শুধু আমার হাতে অস্ত্র।’

নিজের স্যুইটের কাছাকাছি এসে রানা জানতে চাইল, ‘ভেতরে ক’জন, আখতার?’

‘ক’জন মানে...উফ!’

গান মাজল দিয়ে পাজরের ফাঁকে খোঁচা মারায় ব্যাথায় গুঁড়িয়ে উঠল আখতার। ‘চালাকি করতে নিষেধ করিনি? ক’জন?’ আবার জিজ্ঞেস করল রানা।

‘একজন।’

‘মাত্র একজন?’

‘খোদার কসম!’

‘নাম?’

‘শাহিন।’ রানার স্যুইটের সামনে দাঁড়িয়ে পড়ল আখতার।

‘আবার বলছি, কোন চালাকি নয়। শাহিনকে যদি কোনভাবে সাবধান করো, তোমাকে দু’হণ্ডা হাসপাতালে গুয়ে থাকতে হবে। নক করো।’

আখতার নক করল। কিন্তু ভেতর থেকে কোন সাড়া পাওয়া গেল না।

‘আমি হোটেলে ফিরে এসে অন্য দিক দিয়ে আবার বেরিয়ে গেছি,’ ফিসফিস করল রানা।

ঠোট কামড়ে আবার নক করল আখতার। ‘শাহিন! আমি, বাবুল! দরজা খোলো!’

এক মুহূর্ত পর দরজা খুলে গেল। ভারী একটা গলা ঝেঁকিয়ে উঠল, ‘ওই ব্যাটা কোথায়?’

‘হোটেলে ফিরে এসে অন্য দিক দিয়ে আবার বেরিয়ে...’

পিঠে ধাক্কা দিয়ে আখতারকে ঘরের ভেতর ঠেলে দিল রানা। হেডিওয়াইট বস্ত্রারের মত কাঠামো, বয়স হবে ত্রিশ, আখতারের ধাক্কা খেয়ে ছিটকে পড়ল কার্পেটের ওপর, আখতারকে বুকে নিয়ে।

ঘরে ঢুকে পা ছুঁড়ে দরজা বন্ধ করল রানা, ওয়ালথার তাক করল দুই ডিবি অফিসারের দিকে।

আখতারকে বুক থেকে ঠেলে সরিয়ে দিয়ে দাঁড়াল শাহিন। ‘এর মানে কি?’ রানার স্যুইটে একা সময় কাটাবার সময় একটু আরাম পাবার লোভ ছাড়তে পারেনি সে। জ্যাকেটটা খুলে একটা চেয়ারের পিঠে ঝুলিয়ে রেখেছে। গলার কাছে

ঢিলে হয়ে আছে টাই। শার্টের আন্ত্রিন গুটানো।

কোমরে, উঁচু করে, একটা হোলস্টার পরে আছে সে, তাতে একটা .৩৮ স্পেশাল দেখা যাচ্ছে।

‘ওটা নিলাম।’ শাহিনের পিছনে এসে তার মাথায় ওয়ালথার ঠেকাল রানা, হোলস্টার থেকে রিভলভারটা তুলে কোমরে গুঁজে রাখল।

‘গর্দভ!’ আখতারের উদ্দেশ্যে বলল শাহিন। রাগে ফোঁস ফোঁস করছে।

‘আমি...আমার...’ শুরু করল আখতার।

‘তুমি একটা স্টুপিড!’ ধমক মারল শাহিন। তারপর রানার দিকে ফিরল। ‘তুমিও তাই।’

‘সেজন্যেই আমার হাতে অস্ত্র আর তোমার হাত খালি।’ রানা হাসল।

‘আপাতত, বন্ধু, আপাতত।’

‘দেয়ালে পিঠ ঠেকিয়ে বসো তোমরা,’ নির্দেশ দিল রানা। ‘মাথার পিছনে হাত রাখতে ভুলো না। মুভ!’

নির্দেশ পালন করল ওরা।

ওয়াল্ডোব থেকে সুটকেস বের করে বিছানার ওপর ফেলল রানা। ‘বাধ্য হয়ে চলে যেতে হচ্ছে,’ বলল ও। ‘ইন্টারকনে অবাস্তিত অ্যামেচারদের বড় বেশি ভিড়।’ নিজের জিনিস-পত্র সুটকেসে ভরছে।

‘পালাচ্ছ, পালাও,’ বলল শাহিন। ‘কিন্তু বেশিদিন লুকিয়ে থাকতে পারবে না।’

‘আমি ভয়ে কাঁদছি।’

‘দু’দিন পরই কাঁদতে হবে, কাজেই হেসে নাও।’

‘নঈম জাহাঙ্গীরকে বলবে, এরপর উনি যেন প্রফেশনালদের পাঠান।’

‘নঈম জাহাঙ্গীর!’ মাথা নাড়ল শাহিন। ‘তার মত অযোগ্য লোককে সাহায্য করতে বয়েই গেছে আমাদের। আমরা চৌধুরী সাহেবের নির্দেশে কাজ করছি।’

রানার হাত স্থির হয়ে গেল। ‘চৌধুরী?’

‘মিনহাজ চৌধুরী। নামটা শোনোনি?’

‘শুনেছি বৈকি,’ বলল রানা।

মিনহাজ চৌধুরী ডিবি-র অ্যাসিস্ট্যান্ট কমিশনার। ডিকিতে ফরেন ডেস্ক নামে একটা সেকশন আছে, সেই সেকশনের প্রধান তিনি। তাঁর কাজ হলো বিদেশে, বিশেষ করে বাংলাদেশী দূতাবাসে, কোন অপরাধ বা দুর্নীতির ঘটনা ঘটলে তা তদন্ত করা এবং তদন্তের রিপোর্ট বাংলাদেশ পররাষ্ট্র মন্ত্রণালয়ে জমা দেয়া।

রানার আরও মনে পড়ল, দশ বছর আগে ইয়ানগনের বাংলাদেশ দূতাবাসে লিগাল অ্যাডভাইজার হিসেবে চাকরি করে গেছেন মিনহাজ চৌধুরী। পুলিশ অফিসার হিসেবে ক্যারিয়ার শুরু করলেও, আইনের ওপর তার পড়াশোনা ও দখল রীতিমত ঈর্ষণীয়।

রানার চিন্তামগ্নতার ভুল অর্থ করল শাহিন। ‘এতক্ষণে তোমার টনক নড়ল, কেমন? মিনহাজ সাহেবকে খেপালে তোমার কপালে সত্যি ভোগান্তি আছে।’

‘হাত তোলো!’ ধমক দিল রানা।

নামিয়ে নিয়েছিল, ধমক খেয়ে আবার মাথার পিছনে হাত রাখল শাহিন।
‘তুমি আসলেই গর্দভ! তা না হলে মিনহাজ সয়ারকে ভয় পাচ্ছে না কেন?’

‘ওঁর সঙ্গে আমি কথা বলব।’ মাথার চুলে আঙুল চালান রানা।

‘বলতে তুমি বাধ্য। তোমাকে টাইট করতেই তো ইয়ানগনে এসেছেন তিনি।’

‘উনি এখানে!’

‘হ্যাঁ, এখানে,’ বিদ্রূপের সুরে বলল শাহিন। ‘তোমাকে তুলে নিয়ে যাবার জন্যে আমাদেরকে পাঠিয়েছেন। নিজের ভাল চাইলে অস্ত্রগুলো ফেরত দাও, তারপর আমাদের সঙ্গে চলো।’

কথা না বলে ‘ক্রেডল থেকে ফোনের রিসিভার তুলল রানা।

‘কাকে ফোন করছ?’ জানতে চাইল শাহিন।

রানা জবাব দিল না। হোটেলের অপারেটরকে বলল, ‘বাংলাদেশ দূতাবাসের সঙ্গে কথা বলব।’ লাইন পাবার পর নঈম জাহাঙ্গীরকে চাইল ও।

‘নঈম জাহাঙ্গীর এক মিনিট পর লাইনে এলেন। ‘লিগাল অ্যাডভাইজার, বাংলাদেশ দূতাবাস।’

‘আমি মাসুদ রানা। খোলা লাইন, কাজেই কথা বলার সময় সাবধান।’

এক মুহূর্ত চুপচাপ কটল, তারপর নঈম জাহাঙ্গীর বললেন, ‘শুনুন, মি. রানা...’

‘না, আপনি শুনুন। আমি এখানে দু’জন জোকারকে বসিয়ে রেখেছি, নাম বলছে আখতার আর শাহিন।’

‘কারা ওরা?’

‘বলছে ডিবি’র অফিসার, অ্যাসিস্ট্যান্ট কমিশনার মিনহাজ চৌধুরী পাঠিয়েছেন। ভাব দেখে মনে হচ্ছে বাংলাদেশ সরকার নয়, মিনহাজ চৌধুরী পোষেন ওদেরকে।’

‘মিনহাজ চৌধুরীর লোক? আপনি ঠিক জানেন?’

‘ওরা আরও বলছে, চৌধুরী সাহেব নাকি ইয়ানগনে।’

‘অসম্ভব! সে এখন ঢাকায়।’

‘আপনি হানড্রেড পার্সেন্ট নিশ্চিত, মি. জাহাঙ্গীর?’

‘না, মানে, সে ইয়ানগনে আসবে অথচ আমি জানব না?’

‘এখন জানলেন। দেখে শুনে মনে হচ্ছে আপনার জঙ্গলে শিকার করে বেড়াচ্ছেন চৌধুরী।’

‘তা করলে আমি তাকে দেখে নেব! সে...’ নিজের ওপর নিয়ন্ত্রণ ফিরে পাবার জন্যে চুপ করে গেলেন নঈম জাহাঙ্গীর। তারপর অস্বাভাবিক শান্ত গলায় বললেন, ‘এ এমন একটা বিষয়, টেলিফোনে আমরা আলোচনা করতে পারি না।’

‘না, পারি না,’ একমত হলো রানা। ‘আমি একটা মীটিং চাই—আপনি, চৌধুরী আর আমি বসব। আয়োজনটা কি রকম হবে পরে আপনাকে জানাচ্ছি।’

‘এক মিনিট, প্লীজ...’

যোগাযোগ কেটে দিল রানা।

‘আমাদেরকে ঝামেলায় জড়ানোর জন্যে ধন্যবাদ।’ শব্দ করে নিঃশ্বাস ফেলল শাহিন।

‘মাই প্লেজার।’

‘এ আমি ভুলব না।’

শাহিনের অস্ত্র ভরে সুটকেস বন্ধ করল রানা।

‘আরে, কি করছ তুমি?’ টেঁচিয়ে উঠল শাহিন।

‘তোমাদের অস্ত্র জাহাঙ্গীর সাহেবের মাধ্যমে ফেরত দেব,’ বলল রানা। ‘তার সঙ্গে দেখা করে চাইলেই পেয়ে যাবে।’

‘ধন্যবাদ,’ বিভ্রিড় করল আখতার।

সুটকেস নিয়ে দরজার কাছে চলে এল রানা, এতক্ষণে পকেটে ভরল ওয়ালথারটা। রানার হাত খালি, তবু ভাগ্য পরীক্ষায় উৎসাহিত হলো না আখতার। মেঝেতে বসেই থাকল সে।

‘এখানে দুপুর পর্যন্ত থাকতে পারবে তোমরা, তারপরও থাকতে চাইলে ভাড়া দিতে হবে। ততক্ষণ আরাম করো।’

ফাঁকা করিডরে বেরিয়ে এল রানা। এলিভেটরে ঢোকার সময়ও কাউকে দেখতে পেল না। নিচের লবিতে লোকজন বেড়েছে, তবে তাদের মধ্যে গুকে কেউ বিশেষভাবে লক্ষ্য করছে বলে মনে হলো না।

সুইংডোর ঠেলে লবি থেকে বেরিয়ে এল রানা। গেট দিয়ে ঢুকে গাড়ি-বারান্দায় একটা ট্যাক্সি এসে থামল, ড্রাইভার দরজা খুলে দিতে নিচে নামল প্রৌঢ় এক চীনা দম্পতি, সঙ্গে ষোলো-সতেরো বছরের একটা মেয়ে। বোঝাই যায়, নিরীহ ট্যুরিস্ট। একজন পোর্টার ট্যাক্সি থেকে তাদের ব্যাগগুলো নামাল, তারপর ট্যুরিস্টদের পিছু নিয়ে লবিতে ঢুকে পড়ল।

ধাপ ক’টা উপকে নিচে নামল রানা, চারদিকে একবার চোখ বুলিয়ে দরজা খুলে উঠে বসল ট্যাক্সির ব্যাক সীটে। ড্রাইভারকে বলল, ‘খই খই কুয়া।’

ড্রাইভার ইংরেজিতে বলল, ‘ইয়েস, স্যার!’

রাস্তায় যানবাহনের অবিচ্ছিন্ন মিছিল, রানার ড্রাইভার গেট থেকে ট্যাক্সি নিয়ে বেরুতেই পারছে না। জানালা দিয়ে মাথা বের করে ফাঁক খুঁজছে সে।

ওদের পিছনের বাঁকে ট্র্যাফিক লাইট বদলে যেতে মিছিলে সাময়িক ছেদ পড়ল।

গেট থেকে রাস্তায় বেরুচ্ছে ট্যাক্সি।

কেউ একজন হর্ন চেপে ধরার পর আর ছাড়ছে না। বিরক্ত হয়ে পিছনের উইন্ডো দিয়ে বাইরে তাকাল রানা।

হঠাৎ একটা মার্সিডিজ ট্রাক রেডলাইট অগ্রাহ্য করে ছুটে এল। একসঙ্গে বেজে উঠল আরও কয়েকটা হর্ন, তার সঙ্গে শোনা গেল অকস্মাৎ ব্রেক করায় কংক্রিটের সঙ্গে চাকার ঘর্ষণ।

মার্সিডিজ ট্রাক থামছে না। সোজা রানার ট্যাক্সি লক্ষ্য করে ছুটে আসছে বলে

মনে হলো।

‘ব্যাটা কি মানুষ মারবে?’ আঁতকে উঠল ড্রাইভার।

রাস্তায় অর্ধেকটা বেরিয়েছে রানার ট্যাক্সি। ইতিমধ্যে পিছনে দুটো প্রাইভেট কার চলে এসেছে, সামনে যাবার পথও বন্ধ। কি ঘটতে যাচ্ছে বুঝতে পেরে দরজা খুলেই ডাইভ দিল রানা। ডাইভটা এমনভাবে দিল, মাথাটা ফুটপাথেই পড়ার কথা, তবে তার আগেই কায়দা করে শরীরের নিচে কাঁধ নামাল, তারপর ডিগবাজি খেয়ে এক লাফে খাড়া হলো। তবে সংঘর্ষটা ঘটল ও যখন ডিগবাজির মাঝখানে রয়েছে।

ট্রাক ড্রাইভার ট্যাক্সি ড্রাইভারের আতঁনাদ গ্রাহ্য করেনি, ট্রাকটা সরাসরি ভুলে দিল ট্যাক্সির ওপর।

প্রচণ্ড চাপে দুমড়ে গেল ট্যাক্সি, বিস্ফোরিত কাঁচ ছিটকে পড়ল রাস্তার ওপর। রাস্তা থেকে ট্যাক্সিকে ফুটপাথে তুলল মার্সিডিজ, ফুটপাথ থেকে দুর্ভাগা দু’জন পথিকেকেও তুলল, তারপর ছুঁড়ে দিল হোটেলের লাগোয়া ডিপার্টমেন্টাল স্টোরের শো-কেসের গায়ে।

চিৎকার চেঁচামেচি আগেই শুরু হয়েছে, তার সঙ্গে ভাঙচুরের কর্কশ আওয়াজ যোগ হলো। ট্যাক্সির ফাটা রেডিয়েটর থেকে হিসহিস শব্দে বেরিয়ে আসছে বাষ্প।

হাতের তালু আর হাঁটুর চামড়া উঠে গেছে সামান্য, তাছাড়া আর কোথাও লাগেনি রানার।

ট্যাক্সির ড্রাইভার ওর ভাগ্য নিয়ে জন্মায়নি। তার যেটুকু অবশিষ্ট আছে, দেখে মনে হলো টিনের ফাটা ক্যান থেকে কাঁচা মাংস বেরিয়ে আসছে।

ট্রাক ড্রাইভার লাফ দিয়ে ক্যাব থেকে নেমে ছুটল। তার মাথায় নির্মাণ শ্রমিকের ক্যাপ, শার্টের ওপর চকলেট রঙের জ্যাকেট।

চারদিকে লোকজন, গুলি করতে না পেরে লোকটাকে ধাওয়া করল রানা।

লোকটার অবশ্য সে ধরনের কোন উদ্বেগ বা বিবেচনাবোধ নেই, রাস্তা পার হয়েই কোমরের কাছ থেকে একটা পিস্তল বের করে রানার দিকে তাক করল সে।

ছুটন্ত একটা বাদামী পাজেরোকে এড়াবার জন্যে লাফ দিয়ে পিছিয়ে এল রানা। এক পলকের জন্যে দেখতে পেল পাজেরোয় যণ্ডামার্কি চারজন লোক।

প্রায় কাত হয়ে রানাকে এড়াল পাজেরো জীপ, রাস্তার মাঝখানে প্রচণ্ড চাকা ঘষে ইউ টার্ন নিল, ফুলস্পীডে ছুটল উল্টোদিকে।

ট্রাক ড্রাইভার গুলি করার কথা ভুলে খিচে দৌড় দিল। তার সামনে বাঁকটা বেশি দূরে নয়। মনে হলো বাঁক ঘুরে সে পালাতে পারবে।

বাদামী পাজেরো রাস্তা ছেড়ে উঠে পড়ল ফুটপাথে, ভাবটা যেন লোকটাকে চাপা দিতে কোন বাধাই মানবে না। কারের ডানদিকের ফ্রন্ট ফেন্ডার ড্রাইভারকে আঘাত করল, হাঁটের একটা পাঁচিলে প্রায় গোঁথেই ফেলল বলা যায়।

পাজেরোর গতিতে এক কি দুই সেকেন্ডের জন্যে ছেদ পড়ল মাত্র, ওটার হেভি-ডিউটি সাসপেনসন সংঘর্ষের ধকল সামলে নিয়েছে। রাস্তায় ফিরে এসে

স্পীড আরও বেড়ে গেল। ড্রাইভার থেমে থেমে বার কয়েক হর্ন বাজাল, যেন নিজের বিজয় ঘোষণা করছে। চোখের পলকে বাকের কাছে পৌছে গেল ওটা। বাক ঘুরছে, এই সময় ড্রাইভার জানালা দিয়ে মুখ বের করে প্রথমে হাসল, তারপর হাত নাড়ল—কার উদ্দেশে বলা মুশকিল। তবে রানার মনে হলো লোকটার দৃষ্টি ওর ওপরই স্থির ছিল।

রাস্তার ওপারে, ট্রাক ড্রাইভারের দিকে তাকাল রানা। রক্তাক্ত ন্যাকড়া দিয়ে তৈরি একটা পুতুলের মত লাগছে তাকে। তবে মুখটা প্রায় অক্ষতই।

রানা তাকে চেনে না।

বিধ্বস্ত ট্রাক্স থেকে সুটকেস উদ্ধার করতে যাওয়াটা এখন বোকামিই হবে। ট্র্যাফিক পুলিশ এরই মধ্যে পৌছে গেছে। সুটকেসে অবশ্য এমন কিছু নেই যা দেখে পুলিশ ওর পরিচয় জানতে পারবে। তবে শাহিনের অস্ত্রটা আছে। থাক, ক্ষতি যা হবার ডিবি-র অযোগ্য অফিসারের হবে।

ফুটপাথ ধরে হাঁটছে রানা, ভাবটা যেন, কিছুই হয়নি। হোটেল ইন্টারকন থেকে যত তাড়াতাড়ি সম্ভব দূরে সরে যাওয়া উচিত।

রানা চলে যাওয়ার পর একটা বন্ধ দরজার আড়াল থেকে ফুটপাথে নেমে এল মাইয়ো মিন। 'রেজন্মাটা ভাগ্যবান!' বিভ্রিড় করল সে। রানা পালিয়ে গেছে, তবে তার দৃষ্টিতে ওর তেমন কোন গুরুত্ব নেই। রানাকে সে জিন্দালাশ বলেই ভাবছে। তাদের দল আজ হোক বা কাল, ঠিকই ওকে খুন করবে।

গুরুত্বপূর্ণ হলো বাদামী পাজেরোর প্যাসেঞ্জারদের চিনতে পেরেছে মিন। ব্যাপারটা তার কাছে শুধুই একটা ঘটনা নয়। এটা একটা উৎকট ধাঁধা। ওরা চারজন 'হাতুড়ি'-র সদস্য। হাতুড়ি হলো পুরানো একটা গ্যাঙ। ওদের কথা লোকজন আজকাল প্রায় ভুলেই গেছে। এর রহস্যটা তাহলে কি? ওরা কেন নাক গলাচ্ছে? রানাকে বাঁচাবার পিছনে নিশ্চয়ই কোন কারণ আছে। কি হতে পারে সেটা?

কারণ যাই হোক, খবরটা মায়াতকা খুয়েকে জানাতে হবে। এই রহস্যের সমাধান একমাত্র তিনিই যদি করতে পারেন।

এগারো

বৃষ্টির শোফার ও বডিগার্ড একজন বার্মিজ, নাম লুইন খুইন। পেশীবহুল চওড়া কাঠামো, বুলেটপ্রুফ আর্মারড লিমোজিনটাতে দক্ষ হাতে পাহাড়ী পথ ধরে প্রায় উড়িয়ে নিয়ে যাচ্ছে সে, চুলের কাঁটার মত বিপজ্জনক বাকগুলোতেও স্পীড কমচ্ছে না। বাংলাদেশী দূতাবাস প্রধান সৈয়দ তারিক মোস্তফার বাড়িতে যাচ্ছে ওরা।

ওদের নিচে ও পিছনে আলো ঝলমলে রাজধানী ইয়ানগন। আরও পিছনে

আন্দামান সাগর, বিশাল ও কালো একটা গহ্বরের মত লাগছে।

রানা ও বৃষ্টি পিছনের সীটে বসেছে।

‘মেজর আউং ডিটেকটিভ অফিসার হলে কি হবে, পদের চেয়েও অনেক বেশি ক্ষমতার অধিকারী সে,’ রানার একটা প্রশ্নের উত্তরে বলল বৃষ্টি। ‘সরকারের প্রভাবশালী কিছু কর্মকর্তা তাকে খুব পছন্দ করেন।’

‘তাদের এতই প্রভাব যে আটটা খুন চাপা দিতে পারবে?’

‘আট, আশি, আটশো-সংখ্যাটা বড় কথা নয়, মাসুদ ভাই। ওরা এমনকি রাতকেও দিন বলে চালিয়ে দিতে পারে। আমাকে যেটা অবাক করছে, ওয়ারহাউস ও রুজের ফ্ল্যাটে যে খুনগুলো হলো, তার সঙ্গে আপনি জড়িত থাকলেও এই তথ্যটা ভুলেও উল্লেখ করা হচ্ছে না।’

‘নিশ্চয়ই এর পিছনে কোন কারণ আছে।’

‘কি জানি কি কারণ...’

‘মেজর আউং হয়তো এর মধ্যে টাকার গন্ধ পাচ্ছে। কিংবা সে হয়তো চায় তার কাজ অন্য কেউ করে দিক-ক্রিমিনালদের গুলি করে মারুক।’

‘উদ্দেশ্য যাই থাক, সেজন্যে আমি ভাগ্যের প্রতি কৃতজ্ঞ,’ বলল বৃষ্টি। ‘তা না হলে এই মুহূর্তে দেশ জুড়ে আপনার খোঁজে ব্যাপক তল্লাশী চলত।’

‘ঘটছেও হয়তো ঠিক তাই,’ বলল রানা। ‘আউং হয়তো খুঁজছেই কাউকে, শিকারকে গর্ত থেকে বের করার কাজে ব্যবহার করছে আমাকে।’

‘অসম্ভব নয়।’

‘রুজকে সেফ হাউসে পাঠিয়ে স্বস্তি বোধ করছি আমি,’ বলল রানা। ‘আমাকে ব্ল্যাকমেইল করার জন্যে ওকে হয়তো ব্যবহার করত সে।’ একটু থেমে অন্য প্রসঙ্গে চলে গেল রানা, ‘ভাল কথা, বৃষ্টি, এজেন্সির অফিস আজ কার হাতে ছেড়ে এলে?’

‘রাতে শহীদের ডিউটি ছিল, তবে মনিরকেও থাকতে বলে এসেছি।’

‘গুড,’ মন্তব্য করল রানা।

‘ক্রাইসিসে পড়েছি, তা না হলে শহীদকে আমি ঢাকার অফিসে ফেরত পাঠাতাম।’

‘পিছনে গাড়ি,’ বলল থুইন।

আধমাইল পিছনে উঁচু-নিচু হচ্ছে একজোড়া হেডলাইট।

ল্যুগারি ভরা হোলস্টার একটু ঢিল করে রাখল রানা। দুই পকেটের মিনি-হ্রোনেডের ওজনও স্বস্তিকর।

গাড়ির স্পীড একই রাখল থুইন। পিছনের গাড়িটাও মধ্যবর্তী দূরত্ব কমিয়ে আনার চেষ্টা করছে না।

সামনে ও ওপরে, রাস্তা যেখানে সমতল হয়ে গেছে, ছবির মত লাগছে তারিক মোস্তফার আলোকিত ভিলা।

ঠিক পাহাড় নয়, মাটির এক বিশাল টিলার ওপর বাড়িটা। চারদিকে উঁচু পাথরের প্যাঁচিল, প্যাঁচিলের মাথায় কাঁটাতারের বেড়া। বেড়ার ভেতরে ও বাইরে

আলোর প্রখরতা চোখ ধাঁধিয়ে দিল। বাড়ির চারদিকে একশো ফুটের মধ্যে সমস্ত ঝোপ কেটে ফেলা হয়েছে।

গেটের ঠিক সামনে গাড়ি থামাল থুইন। গেট নয়, পাশের দরজা খুলে বেরিয়ে এল সাদা পোশাক পরা গার্ড।

গার্ডকে থুইন নিজের ও আরোহীদের পরিচয় জানাচ্ছে, পিছনে এসে থামতে গাড়িটাকে চিনতে পারল বৃষ্টি। ‘নঈম জাহাঙ্গীর, মাসুদ ভাই।’

ল্যুগারের বাঁট থেকে সরিয়ে হাঁটুর ওপর হাত রাখল রানা।

পরিচয় যাচাই করার পর গেটের ভেতর দাঁড়ানো এক লোককে ইঙ্গিত করল গার্ড। গেট খুলে দিল লোকটা।

চাকা গড়াল, প্রকাণ্ড উঠানে ঢুকল গাড়ি। ওদের পিছনে বন্ধ হয়ে গেল গেট, নঈম জাহাঙ্গীরের পরিচয় যাচাই করছে গার্ড।

ঘোড়ার খুর আকৃতির ড্রাইভওয়ে, দু’পাশে সবুজ বাগান। নিচু পাঁচিল দিয়ে ঘেরা লম্বাটে দালানের সামনে চওড়া গাড়ি-বারান্দায় থামল থুইন। গাড়ি থেকে নেমে বৃষ্টির দিকের দরজা খুলে দিল সে। রানা নিজেই নামল, উল্টোদিকের দরজা দিয়ে।

ইউনিফর্ম পরা একজন গার্ড পথ দেখিয়ে ওদেরকে বাড়ির ভেতর নিয়ে এল। তার কোমরে জড়ানো গানবেল্ট, হোলস্টারে ভরা সাইডআর্ম। ‘এদিকে, প্লীজ।’

‘এক মিনিট,’ বলল রানা। ‘জাহাঙ্গীর সাহেবের জন্যে অপেক্ষা করি।’

লিমোজিনের পিছনে থামল দ্বিতীয় গাড়িটা, ভেতর থেকে নামলেন বাংলাদেশ দূতাবাসের লিগাল অ্যাডভাইজার নঈম জাহাঙ্গীর। শুনলে হয়তো অপমান বোধ করবেন, তবে তাঁকে দেখে ফুটবলের কথাই মনে পড়ল রানার। নিজের শারীরিক গঠন ভদ্রলোক নষ্ট করে ফেলেছেন, নিশ্চয় অতিভোজনই দায়ী। খুব ক্লান্ত দেখাচ্ছে তাঁকে। ‘গুড ইভিনিং, বৃষ্টি।’

‘ইভিনিং। ভাল তো, জাহাঙ্গীর সাহেব?’

বৃষ্টির সঙ্গে হ্যান্ডশেক করে রানার দিকে তাকালেন লিগাল অ্যাডভাইজার। ‘আপনিই তাহলে আমাদের সেই...’ কি কারণে তিনিই বলতে পারবেন, নামটা উচ্চারণ করলেন না। ‘আপনার সঙ্গে পরিচিত হয়ে খুশি হলাম।’ যদিও চোখমুখে খুশির কোন ছাপ দেখা গেল না।

‘কেন?’ হ্যান্ডশেকের সময় একটু কৌতুক করল রানা।

গলা খাদে নামিয়ে জাহাঙ্গীর বললেন, ‘মিনহাজ চৌধুরীর যে-কোন শত্রু আমার বন্ধু।’

‘কিন্তু আমি তো ভেবেছিলাম আপনারা দু’জন একই দলে।’

‘দল তো আমাদের সবাইই একটা, কিন্তু তারমানে এই নয় যে চৌধুরী তার পোষা গুণাদের নিয়ে আমার সীমানায় ঢুকে পেশী ফোলাবে আর আমাকে তা সহ্য করতে হবে। আমি ভাবতেও পারছি না কোন সাহসে, কি অধিকারে মায়ানমারে এল সে!’

‘এসেছেন যখন, নিশ্চয়ই কারও অনুমতি নিয়েই এসেছেন। কাজটা হয়তো

খুব জরুরী...'

'কি কাজ, কার অনুমতি, সব আমি খোঁজ নিয়ে দেখব তবে সে যে ডিবি'র ফরেন ডেস্ক-এর দায়িত্বে আছে, এ-কথা সবাই জানে, বেশ ক'বছর হলো তাকে ওই ডেস্ক কামড়ে পড়ে থাকতে বাধ্য করা হচ্ছে। তার বিরুদ্ধে গুরুতর কোন অভিযোগ না থাকলে এরকম হওয়ার কথা নয়। ছিল তো ফরেন ডিপার্টমেন্টে, কেন তাকে হোম-এ নিয়ে এসে ফেলা হয়েছে সেটাও একটা প্রশ্ন।'

'একটু সাবধানে, জাহাঙ্গীর সাহেব,' বলল বৃষ্টি। 'ভুলে যাবেন না, ওপরমহলে তাঁর প্রভাব-প্রতিপত্তি কম নয়।'

'আরে রাখুন, বৃষ্টি! ওর কি রকম এক আত্মীয় প্রধানমন্ত্রীর উপদেষ্টা। তো কি হয়েছে? এ-সবে আমি অন্তত ভয় পাই না।' নঈম জাহাঙ্গীর আরেকবার দেখে নিলেন গার্ডরা তাঁর কথা শুনছে কিনা, তারপর গলার আওয়াজ কমিয়ে জিজ্ঞেস করলেন, 'ভাল কথা, কি নিয়ে এতকিছু ঘটছে?'

'চলুন না, ভেতরে ঢুকে জানা যাক,' বলল রানা।

'চমৎকার আইডিয়া,' সায় দিল বৃষ্টি।

এসকট-এর পিছু নিয়ে ফ্রন্ট হলে ঢুকল ওরা, একটা খিলান হয়ে বেরিয়ে এল সফ্র ও লম্বা করিডরে। ওটার শেষ মাথায় একটা কাঠের দরজা, কাঠের গায়ে খোদাই করা নকশা, হাতলটা রূপোলি। গার্ড একপাশে সরে দাঁড়িয়ে ঢুকতে দিল, তারপর ওদের পিছনে বন্ধ করে দিল কবাট। চওড়া অ্যান্টিক্রুমে রয়েছে ওরা। একটা ফ্লোর ল্যাম্পের দু'পাশে সবুজ লেদার মোড়া দুটো আর্মচেয়ারে বসে রয়েছে আখতার ও শাহিন। রানাকে দেখামাত্র লাফিয়ে চেয়ার ছাড়ল তারা।

লিগাল অ্যাডভাইজারকে রানা বলল, 'ডিবি'র এই-জোকারের কথাই বলছিলাম আপনাকে।'

তরুণ আখতারকে বিব্রত দেখাল। শাহিনের চেহারা রাগে লালচে হয়ে উঠল। রানার চোখে চোখ, কোমরে হাত রাখল সে, বৃক্ষক্ষ ফুলছে। 'আমার অস্ত্র কোথায়?'

'হারিয়ে গেছে,' বলল রানা।

'ইউ বাস্টার্ড! এর জন্যে তোমাকে ভুগতে হবে। ওটা আমার নিজের টাকায় কেনা...'

'চৌধুরীকে বললে আরেকটা কিনে দেবেন,' বলল রানা।

'তোমার এত বড় স্পর্ধা, আমার সঙ্গে কৌতুক করো!' শার্টের আঙ্গিন গুটাচ্ছে শাহিন।

'আহ, কি গুরু করলে! মাথা ঠাণ্ডা করো!' শাহিনকে শান্ত করতে চাইল আখতার।

'শাট আপ!' আখতারকে চুপ করিয়ে রানাকে চ্যালেঞ্জ করে বসল শাহিন, 'তুমি, মাসুদ রানা, আমার একটা লোমও ছিঁড়তে পারবে না শক্তি থাকে তো ঠেকাও, আমি তোমাকে এখন পিটিয়ে তক্তা বানাবু।'

অবিশ্বাস্য ক্ষিপ্রতায় রানার গোটা কাঠামো ঝাপসা হয়ে গেল। ওর গতি এত

দ্রুত যে চোখ দিয়ে অনুসরণ করা গেল না। শাহিন তার চিবুক সামনের দিকে ঠেলে দিয়েছিল, তার সামনে উড়ে এল রানা, ডান হাতের ঘুসিটা লাগল ওই চিবুকে। চোখের পলকে শূন্যে উঠে পড়ল শাহিন। খপ করে তার একটা হাত ধরে থামল রানা, হ্যাঁচকা টান দিয়ে শরীরটাকে বসিয়ে দিল চেয়ারে। ছেড়ে দিতে চেয়ারেই ঢলে পড়ল শাহিন, জ্ঞান হারিয়েছে।

‘এরকম মার আগে কখনও দেখিনি। ঘুসিটার কি বিশেষ কোন নাম আছে?’ সকৌতুকে কৌতূহল প্রকাশ করলেন নঈম জাহাঙ্গীর।

‘যথেষ্ট হয়েছে, মাসুদ ভাই,’ নরম সুরে বলল বৃষ্টি।

ভেতর দিকের একটা দরজা খুলে অ্যান্টিক্রুমে ঢুকলেন দু’জন ভদ্রলোক।

প্রথম ব্যক্তির চালচলনে আভিজাত্য। চোখেমুখে দৃঢ় আত্মবিশ্বাস। তাঁর শুধু কানের দু’পাশে পাক ধরেছে চুলে। তবে ভুরু জোড়া সাদা। গোঁফ পেসিলের মত সরু, কাঁচা-পাকা। ইনিই সৈয়দ তারিক মোস্তফা, মায়ানমারে বাংলাদেশের রাষ্ট্রদূত। মীটিঙে ওরা তাঁরই মেহমান হয়ে এসেছে।

দ্বিতীয় ব্যক্তি মিনহাজ চৌধুরী। তাঁর কাঁধ দুটো বিশাল, পেট ঢোলের মত ফোলা, কোমরের নিচের অংশটা অসম্ভব চওড়া। ধবধবে ফর্সা তিনি, তবে দৃশ্যটা দেখেই লালচে হয়ে উঠল চেহারা। ‘কি ঘটছে এখানে?’ জানতে চাইলেন তিনি, চোয়ালের নিচে বুলে পড়া চামড়া ঢাকা চর্বি একটু কাঁপল।

পিন মারার সুযোগটা নঈম জাহাঙ্গীর হাতছাড়া করলেন না। ‘তোমার লোক দায়িত্ব পালনে ব্যর্থ হয়ে লজ্জায় শুয়ে পড়েছে, চৌধুরী।’ সম্পূর্ণ নির্লিপ্ত তিনি।

রাষ্ট্রদূত হতবিস্মল হয়ে দাঁড়িয়ে আছেন।

দু’পা এগিয়ে শাহিনের সামনে দাঁড়ালেন মিনহাজ চৌধুরী। ‘ও তো দেখছি জ্ঞান হারিয়েছে! কে মারল ওকে? কেন মারল?’

‘মারলে তো মরেই যেত,’ বলল রানা। ‘মারিনি-মারার ভঙ্গি করেছি শুধু।’

‘দেখুন, সবাইকেই বলছি,’ দৃঢ় কণ্ঠ, তিরস্কারের সুরে কথা বলছেন রাষ্ট্রদূত। ‘আমার বাড়িতে আমি ভায়েলেস সহ্য করব না। এখানে অত্যন্ত সিরিয়াস একটা মীটিং হবার কথা, অথচ আপনারা স্কুল ছাত্রদের মত ঝগড়া করছেন।’

‘শাহিন, এই শাহিন! ধ্যাত, চোখ মেলো তো!’ শাহিনের মুখে বারকয়েক হালকা চড় মারলেন মিনহাজ চৌধুরী।

একটু গোঙাল শাহিন, তবে চোখ মেলেনি।

টেবিলে এক গ্লাস পানি দেখে হাতে নিলেন চৌধুরী, শাহিনের মুখে ঢেলে দিলেন খানিকটা।

চোখ মেলল শাহিন, তবে চোখে দৃষ্টি নেই, ব্রেনও কাজ করছে না। ‘কে...কি...কোথায়...’

‘কি ব্যাপার? শুয়ে কেন?’ চৌধুরীর গলায় ধমক। জবাব না পেয়ে রেগে গেলেন আরও। ‘যদি কথাই বলতে না পারো, তাহলে দূর হও আমার সামনে থেকে! আখতার, নিয়ে যাও ওকে, তাজা বাতাসে বসিয়ে রাখো কিছুক্ষণ।’

‘ইয়েস, স্যার।’ চেয়ার থেকে তুলে শাহিনকে দাঁড় করাল আখতার। টলমল

করছে শাহিনের পা, আখতারের কাঁধে ভর দিয়ে অ্যান্টিক্রুম থেকে বেরিয়ে গেল সে।

‘আমি জানতে চাই, কিভাবে আপনি এই অবস্থা করলেন ওর,’ দাঁতের ফাঁক দিয়ে হিসহিস করে জানতে চাইলেন চৌধুরী। ‘শাহিন আমার সেরা অফিসারদের একজন!’

‘এই সেরা দিয়ে কাজ হবে না,’ বলল রানা। ‘আরও ভাল কেউ থাকলে আনিয়ে নিন।’

‘তুমি বরং এক কাজ করো, চৌধুরী,’ পরামর্শ দিলেন জাহাঙ্গীর। ‘ওদেরকে ঢাকায় ফেরত পাঠাও। আর সঙ্গে তুমিও চলে যাও।’

‘তোমার ব্যঙ্গ আমি সহ্য করব না, জাহাঙ্গীর!’ চৌধুরী চোখ গরম করলেন।

‘বেলাইনে চললে শুধু ব্যঙ্গ নয়, সর্প-ব্যঙ্গ সবকিছুই তোমাকে সহ্য করতে হবে, চৌধুরী। ভাল কথা, তুমি ইয়ানগনে কেন মরতে এলে?’

‘জেন্টেলমেন, প্লীজ!’ রাষ্ট্রদূত ভব্যতা ও যৌক্তিকতার পথে থাকার আবেদন জানালেন। ‘আমরা সবাই গলা নামিয়ে কথা বললেও তো পারি।’

‘খুব ভাল সাজেশন, মি. মোস্তফা, স্যার,’ বলল বৃষ্টি। ‘পরিবেশ শান্ত হলে প্রশ্নগুলোর জবাব পেতে সুবিধে হবে আমাদের।’

‘আপনারা সবাই আমার স্টাডিতে আসুন, প্লীজ,’ বলে ঘুরে দাঁড়ালেন রাষ্ট্রদূত।

অ্যান্টিক্রুম থেকে এক লাইনে বেরিয়ে এল সবাই। মিনহাজ চৌধুরীকে আগে থাকতে দিল রানা। ভদ্রলোককে নিজের পিছনে থাকতে দিলে অস্বস্তি বোধ করবে ও।

স্টাডিতে শুধু বই আর বই। বুককেসগুলো মেঝে থেকে সিলিং পর্যন্ত লম্বা। দেখার বিষয় হলো, বুককেসের প্রতিটি বই দামী লেদারে মোড়া।

একটা সাইডবোর্ডে বোতল, গ্লাস, মিস্ত্রার আর বরফ দেখা গেল।

‘কোল্ড ড্রিঙ্ক এখন খুব কাজ দেবে বলে মনে হয়,’ পরিবেশটা হালকা করার জন্যে হেসে বললেন রাষ্ট্রদূত।

রানা ও বৃষ্টি কোল্ড ড্রিঙ্কই নিল। বাকি তিনজন হুইস্কির বোতল থেকে নিজেদের গ্লাস ভরলেন

বড় একটা ডেস্কের পিছনে বসলেন রাষ্ট্রদূত। ডেস্কের সামনে অর্ধবৃত্তাকারে কয়েকটা চেয়ার ফেলা আছে, বৃষ্টি বসার পর বাকি তিনজনও বসল।

মিনহাজ চৌধুরীই কথা পাড়লেন, ‘যথেষ্ট হয়েছে, ভদ্রতার মুখোশ এবার খোলা যেতে পারে।’

‘পারে,’ বললেন নঈম জাহাঙ্গীর। ‘তুমি ইয়ানগনে কি করছ, চৌধুরী?’

‘করছি তোমার কাজ। সন্দেহ নেই তুমি সব জমিয়ে রেখেছ।’

‘এটা কি আমি পাগলের প্রলাপ বলে ধরে নেব?’

‘না বোঝার ভান করে কোন লাভ নেই,’ বললেন চৌধুরী।

খুক করে কেশে রাষ্ট্রদূত মোস্তফা সাহেব গলা পরিষ্কার করলেন। ‘এমন ভাব

দেখানো উচিত নয় যাতে মনে হয় আমরা একেকজন একেকটা উদ্দেশ্য নিয়ে কাজ করছি। আসলে তো আমাদের সবার একটাই লক্ষ্য।’

‘কি সেটা?’ জানতে চাইল বৃষ্টি।

‘ড. মুহিত হায়দারকে কে খুন করেছিল, এটা জানা,’ বললেন চৌধুরী।

‘কেন ভাবছেন তিনি খুন হয়েছিলেন?’ জিজ্ঞেস করল রানা। ‘প্লেনটা অ্যান্ড্রিভেন্টও করে থাকতে পারে।’

‘আপনি তা বিশ্বাস করেন না। অন্তত আমি করি না। দশ বছর আগে আমার দৃঢ় সন্দেহ ছিল, ড. হায়দার একটা ষড়যন্ত্রের শিকার হয়েছেন। সেই সন্দেহ এখন আরও বেড়েছে আমার।’

চৌধুরীর দিকে খানিকটা ঝুঁকল বৃষ্টি। ‘সে সময় আপনি লিগাল অ্যাডভাইজার হিসেবে মায়ানমারে ছিলেন, ড. হায়দারকে আইনগত অনেক পরামর্শও দিয়েছেন। কে বা কারা তাঁকে খুন করল, এ-সম্পর্কে আপনার তো কিছু না কিছু জানার কথা।’

‘জানব না কেন, অবশ্যই জানতাম,’ তিক্তকণ্ঠে বললেন চৌধুরী। ‘একজনকে নয়, বেশ কয়েকজনকেই সন্দেহ হয়েছিল আমার। কিন্তু ক্রু ধরে তদন্ত চালানো সম্ভব হয়নি। ড. হায়দার নিখোঁজ হবার সঙ্গে সঙ্গে সন্দেহভাজন চরিত্রগুলোও যেন বাতাসে মিলিয়ে গেল। তারপর বোমা মেরে উড়িয়ে দেয়া হলো ফালাম বাঁধ। বাঁধ ভাঙা পানির প্রবল তোড়ে আর কি ভেসে গেল জানি না, তবে রটিয়ে দেয়া হলো যে ড. হায়দারের আবিষ্কৃত বিপুল আর্টিফ্যাক্ট নষ্ট হয়ে সাংগরে ভেসে গেছে।’

‘ব্যাপারটা তাহলে স্রেফ একটা ধারণা নয়? প্রাচীন মং ও বৌদ্ধ সভ্যতার নিদর্শন ড. হায়দার সত্যি আবিষ্কার করেছিলেন?’ জিজ্ঞেস করল বৃষ্টি।

‘আপনার এ প্রশ্নের উত্তর দেয়া অত্যন্ত কঠিন,’ ম্লান মুখে বললেন চৌধুরী। ‘দূতাবাসের তরফ থেকে আমাকেই দায়িত্ব দেয়া হয় ড. হায়দারকে সাহায্য করার। ঘন ঘন দেখা তো হতই, আমি এমনকি তাঁর ক্যাম্পে রাতও কাটিয়েছি। কিন্তু মন খুলে সব কথা কখনোই তিনি আমাকে বলেননি। আবিষ্কার গোপন রাখার অদ্ভুত এক বাতিক থাকে আর্কিওলজিস্টদের, ড. হায়দারও ব্যতিক্রম ছিলেন না। তিনি শুধু সম্ভাবনার কথাই বলতেন। বলতেন, তাঁর ধারণা সত্যি হলে ফালাম থেকে দুই বিলিয়ন ডলার মূল্যের আর্টিফ্যাক্ট পাবে মায়ানমার সরকার।’

গ্লাসের বাকি হুইস্কি এক ঢোকে খেয়ে ফেললেন চৌধুরী। ‘কাছ থেকে দেখে তাঁকে আমার এত ভাল লেগে গেল, পরস্পরের ঘনিষ্ঠ বন্ধু হয়ে উঠলাম আমরা। তিনি নিখোঁজ হবার পর দশ বছর পার হতে চলল, সবাই তাঁর কথা ভুলে গেছে, কিন্তু আমি ভুলিনি। ভুলিনি, ভুলবও না। মনে মনে প্রতিজ্ঞা করেছিলাম, যত সময়ই লাগুক, তাঁর নিখোঁজ রহস্য ঠিকই একদিন আমি খুঁজে বের করব। দশ বছর পর আজ সেই সুযোগ এসেছে।’

চোখ দুটো লাল ও ভেজা ভেজা, একে একে বৃষ্টি, নষ্টম জাহাঙ্গীর ও রানার দিকে তাকালেন চৌধুরী। ‘রহস্যটা দশ বছরের পুরনো হলেও, কোথাও নিশ্চয়ই একটা সূত্র আছে। ওই সূত্র ধরে এগোতে পারলে আমি জানতে পারব কে ড.

হায়দারকে খুন করেছিল। টাকা বা সময় যতই লাগুক, আমি তৈরি। এমনভাবেই তৈরি, কেউ আমাকে বাধা দিয়ে ঠেকিয়ে রাখতে পারবে না।’

‘প্রপার চ্যানেল বলে একটা কথা আছে,’ বললেন লিগাল অ্যাডভাইজার জাহাঙ্গীর। ‘অন্য কোনও দেশের সীমানার ভেতর কাজ করতে হলে প্রপার চ্যানেল ধরে আসতে হয়। তুমি বোধহয় এ-সবের তোয়াক্কা করো না?’

‘আমি ব্যক্তিগতভাবে তদন্ত চালাবার বিশেষ অনুমতি নিয়েই এখানে এসেছি।’

‘অনুমতি নিয়ে এসেছ? কার? কে তোমাকে অনুমতি দিল? তোমার আত্মীয় ভদ্রলোক, ওই যে প্রধানমন্ত্রীর উপদেষ্টা?’

গর্বের হাসিটা চোখেমুখে ফুটতে দিয়েও দিলেন না চৌধুরী। ‘হ্যাঁ, তাঁর অনুমতি আমি পেয়েছি।’

‘কিন্তু পররাষ্ট্র মন্ত্রণালয় বলছে, লিগাল অ্যাডভাইজারের দায়িত্ব আমিই পালন করছি এখানে।’

‘কিন্তু প্রধানমন্ত্রীর অফিসের মাধ্যমে তাঁর একজন উপদেষ্টা বিদেশে তদন্ত চালাবার দায়িত্ব ডিবি-কে দিতে পারেন।’

‘পররাষ্ট্র মন্ত্রণালয়ের অনুমোদন ছাড়াই?’ নঈম জাহাঙ্গীরের গলায় চ্যালেঞ্জের সুর।

মিনহাজ চৌধুরী হাসলেন। ‘প্রভাবশালী আত্মীয়র এইটুকু প্রভাব কাজে লাগাব না? না-না, আমাকে ভুল বুঝো না, জাহাঙ্গীর। পররাষ্ট্র মন্ত্রণালয় এখানে আমার আসাটা অবশ্যই অনুমোদন করবে। তবে যেহেতু চাওয়া হয়েছে দেরিতে, অনুমোদন পেতে একটু দেরি হবে, এই যা। তুমি খোঁজ নিয়ে দেখতে পারো, এরই মধ্যে হয়তো অনুমোদন দিয়ে দিয়েছে ওরা। তোমাকে আরও একটা তথ্য দিই, জাহাঙ্গীর। মায়ানমারের প্রধান সামরিক প্রশাসকের অফিস থেকে আমাদের পররাষ্ট্র মন্ত্রণালয়কে একটা অনুরোধ জানানো হয়েছে। তাতে বলা হয়েছে, ড. হায়দারের কেসটা নতুন করে আলোড়ন সৃষ্টি করায় মায়ানমার সরকার ব্যাপারটা তদন্ত করে দেখার সিদ্ধান্ত নিয়েছে। এই তদন্তের কাজে, তাঁদের ধারণা, বাংলাদেশ ডিবি অ্যাসিস্ট্যান্ট কমিশনার মিনহাজ চৌধুরী সাহায্য করতে পারবেন। সংক্ষেপে, আমাকে তাঁরা মায়ানমারে আমন্ত্রণ জানিয়েছেন।’

‘কে চার্জে আছে তা নিয়ে ঝগড়া-ফ্যাসাদে না গিয়ে আপনারা একসঙ্গে কাজ করলেই তো পারেন,’ বলল বৃষ্টি।

সাবেক ও বর্তমান দুই লিগাল অ্যাডভাইজার এমনভাবে তাকালেন, বৃষ্টির যেন মাথা খরাপ হয়ে গেছে। অবশেষে চৌধুরী বললেন, ‘এরমধ্যে আপনার কি স্বার্থ? ব্যাপারটায় আমি তো রানা এজেন্সির কোন ভূমিকা দেখছি না।’

রানা হাতঘড়ি দেখল। ‘নটা দশ। ঘড়ি থেকে চোখ তুলে মৃদু হাসল ও।

‘হাসির কি ঘটল?’ ভুরু কঁচকালেন চৌধুরী।

‘দু’এক মিনিটের মধ্যেই জানতে পারবেন,’ বলল রানা। ‘মেসেজটা ঢাকা থেকে ইয়ানগনে পাঠানো হয়েছে মায়ানমার স্ট্যান্ডার্ড টাইম নটায়।’

‘কিসের মেসেজ?’

‘দূতাবাসের ক্রিপটোগ্রাফিক কর্মপটুটার মেসেজটা সঙ্গে সঙ্গে ডিকোড করবে। জনাব রাষ্ট্রদূতকে তাঁর স্টাফ মেসেজটা পৌঁছে দিতে সময় নেবে খুব বেশি হলে পনেরো মিনিট।’

‘কিসের মেসেজ?’ তারিক মোস্তফা বিস্মিত।

‘ওঁর কথায় কান দেবেন না,’ চৌধুরী বললেন। ‘উনি মনে হয় হেঁয়ালি করছেন।’

মুদু, প্রায় অস্পষ্ট, নক হলো দরজায়।

‘ওই বোধহয় এসে গেছে,’ বলল রানা।

রাষ্ট্রদূত কণ্ঠে দৃঢ়তা এনে বললেন, ‘কাম ইন।’

একজন গার্ড ঢুকল স্টাডিতে। ‘দূতাবাস থেকে আপনার কল, স্যার। ক্র্যান্সলার লাইনে।’

‘ঠিক আছে।’

স্যালুট করল গার্ড, ঘুরল, কামরা থেকে বেরিয়ে গিয়ে দরজাটা বন্ধ করে দিল বাইরে থেকে।

‘এক্সকিউজ মি, প্রীজ।’ রাষ্ট্রদূত, প্রায় হতভম্ব, ডেস্কের পিছনের একটা দরজা খুলে ভেতরে অদৃশ্য হয়ে গেলেন।

‘আপনার খেলাটা কি?’ চৌধুরী যেন জেরা করছেন রানাকে।

‘মোস্তফা সাহেবের মুখ থেকেই শুনুন,’ বলল রানা। ‘উনি বললে বিশ্বাস করাটা সহজ হবে।’

কামরার ভেতর হঠাৎ সবাই যেন অপ্রতিভ ও অপ্রস্তুত হয়ে পড়েছে। যে-যার জায়গায় দাঁড়িয়ে আছে আড়ষ্ট ভঙ্গিতে। শুধু রানাকে স্বাভাবিক মনে হলো।

কয়েক মিনিট পর রাষ্ট্রদূত ফিরে এলেন। তাঁকে রীতিমত বিস্মিত দেখাচ্ছে।

‘হ্যাঁ, বলুন? কি ব্যাপার?’ আটকে রাখা দম ছেড়ে জানতে চাইলেন চৌধুরী।

‘প্রীজ, আমার কানের কাছে এভাবে চিৎকার করবেন না, চৌধুরী সাহেব। বিশেষ করে খবরটা যখন আপনি আগেই শুনেছেন।’

‘কি খবর?’

রাষ্ট্রদূত তাঁর চেয়ারে বসলেন। ‘ওই লোক দূতাবাসের কোড ক্লার্ক। আজ ঠিক ন’টার সময় ঢাকা থেকে ওরা একটা টপ-প্রায়োরিটি কমিউনিকেই রিসিভ করেছে।’

‘কে পাঠিয়েছে?’

‘প্রধানমন্ত্রীর অফিস। মেসেজে বলা হয়েছে, ড. হায়দারের কেস তদন্ত করার ব্যাপারে রানা এজেন্সির অথরিটি অন্যান্য সকল সংস্থার অথরিটিকে সুপারসিড করবে।’

চৌধুরী বিস্ফোরিত হলেন। ‘এ আপনি কি বলছেন!’

‘আমাদেরকে অনুরোধ করা হয়েছে—আসলে হুকুম করা হয়েছে, যদিও ভাষার কেতাকায়দার আড়ালে মনে হবে অনুরোধ—আমরা যেন রানা এজেন্সিকে সাধ্যের’

মধ্যে সম্ভাব্য সব রকম সাহায্য-সহযোগিতা করি। রানা এজেন্সি বলতে স্পষ্ট করে বলা হয়েছে, এখানে বোঝাবে ফারহানা আহমেদ বৃষ্টি ও মাসুদ রানা।’

‘এ আমি বিশ্বাস করি না!’ নঈম জাহাঙ্গীর এমনকি হাসতেও ভুলে গেছেন।

দীর্ঘ নাকটা একটু উঁচু করে সেটা তাক করলেন রাষ্ট্রদূত লিগাল অ্যাডভাইজারের দিকে। চোখে ভর্তসনা। ‘আমার মুখের কথা সন্দেহজনক, এরকম মন্তব্য শুনে আমি অভ্যস্ত নই, জাহাঙ্গীর সাহেব।’

নঈম জাহাঙ্গীর দীর্ঘশ্বাস ফেললেন। ‘আমি আপনাকে মিথ্যেবাদী বলছি না, স্যার। আমি শুধু আমার বিশ্বাস প্রকাশ করছিলাম।’

‘এ যেন অসম্ভবকে সম্ভব করা হয়েছে,’ আক্রোশ চেপে রেখে স্বীকার করলেন চৌধুরী। ‘ক্ষমতা নিয়ে এই খেলার প্যাঁচ আপনি কোথেকে শিখলেন, মাসুদ রানা?’

‘আমার শেখার প্রয়োজন হয়নি,’ বলল রানা। ‘খেলাটা আমার উর্ধ্বতন কর্মকর্তা খেলেছেন। ক্ষমতা নিয়ে সত্যিকার খেলা যখন শুরু হয়, তিনিই সব্বার মাথার ওপর ছড়ি ঘোরান।’ একটু থেমে রানা আবার বলল, ‘জনার রাষ্ট্রদূত একটা বিষয় উল্লেখ করতে ভুলে গেছেন। উনি বলেননি, মেসেজের নিচে সইটা কার ছিল।’

‘ও, হ্যাঁ, তাই তো,’ বলে মুচকি হাসলেন রাষ্ট্রদূত, তারপর চৌধুরী ও জাহাঙ্গীর সাহেবের দিকে ফিরে বললেন, ‘সইটা খোদ গণ প্রজাতন্ত্রী বাংলাদেশ সরকারের মাননীয় প্রধানমন্ত্রী।’

রাষ্ট্রদূত তারিক মোস্তফা মায়ানমারের একটা রিলিফ ম্যাপের ভাঁজ খুললেন তাঁর ডেস্কে। মায়ানমার-ভারত ও মায়ানমার-বাংলাদেশ সীমান্তের কাছাকাছি তারকা চিহ্নিত একটা বিন্দুতে আঙুল তাক করে বললেন, ‘এই হলো ফালাম।’

ফালাম এখনও একটা শহর, তবে এই শহর অতীতের গৌরব ও গুরুত্ব অনেক কাল আগেই হারিয়ে ফেলেছে। ঐতিহাসিকদের ভাষ্য অনুসারে, কয়েক হাজার বছরের ব্যবধানে ফালামে অন্তত দুটো সভ্যতা বিকাশ লাভ করেছিল। একটা নিকট অতীতের ঘটনা: মাত্র দেড় হাজার বছর আগে ভারত ও তিব্বতীয় বৌদ্ধ ভিক্ষুরা ফালামে বিশালাকার কয়েক ডজন মন্দির নির্মাণ করেন, সেই মন্দিরগুলোকে কেন্দ্র করে গড়ে ওঠে সমৃদ্ধ জনপদ। দ্বিতীয় ঘটনাটি পাঁচ থেকে ছয় হাজার বছরের প্রাচীন: মং নামে স্থানীয় এক যুদ্ধপ্রিয় জাতি ফালামে বসতি স্থাপন করে, তাদের রাজা এক সময় গোটা মায়ানমার ছাড়াও থাইল্যান্ড ও চীনের অংশ বিশেষ দখল করে এক বিরাট সাম্রাজ্য গড়ে তোলেন। প্রাচীন বৌদ্ধ ও মং সভ্যতার পতন কোন যুদ্ধ বা মহামারীর কারণে ঘটেনি, দু’বারই আঘাত হেনেছিল প্রলয়ংকরী ভূমিকম্প।

ইয়ানগন থেকে ফালামের দূরত্ব উত্তরে সাড়ে চারশো মাইল।

ফালাম থেকে পঞ্চাশ মাইল পূবে একটা জায়গার নাম কোকো গুম, সেদিকে একটা আঙুল তাক করলেন তারিক মোস্তফা। ‘ড. মুহিত হায়দার ফালাম ও

শওয়েবুর মাঝামাঝি পাহাড় ও জঙ্গলের ভেতর কোকো গুন-এ প্রাচীন সভ্যতার নিদর্শন আবিষ্কার করেছিলেন-মানে, তাঁর দাবি আদৌ যদি সত্যি বলে ধরে নেয়া হয় আর কি। তবে এ প্রসঙ্গে আলোচনা করার আগে মায়ানমার সরকারের ফালাম প্রজেক্ট সম্পর্কে সবারই একটা ধারণা থাকলে ভাল হয়।

‘ফালাম ও শওয়েবু, এই দুই শহরকে রেলপথ বসিয়ে এক করার প্রজেক্ট ছিল ওটা। বলা হচ্ছিল, বিশাল বনভূমিতে রেলপথটা লাইফ লাইন হিসেবে অবদান রাখবে। স্থানীয় মানুষেরও বহুকালের স্বপ্ন ছিল এই রেলপথ। মায়ানমার সরকার দেশীয় পুঁজি ও লোকবল নিয়ে এই কাজে হাত দেয়, তবে বন্ধু রাষ্ট্র পাকিস্তানের বিশজন এঞ্জিনিয়ার এই কাজে তাদেরকে সাহায্য করছিল।

‘প্রজেক্টের কাজ শুরু হয় একই সঙ্গে দুই শহর থেকে। দুটো রেলপথ মাঝামাঝি জায়গায়, অর্থাৎ ইরাবতীর দুই তীরে এসে থামার কথা। নদীর ওপর একটা ব্রিজ ও বাঁধ তৈরি হবে, ব্রিজের ওপর থাকবে রেললাইন।’

‘এখানেই প্রজেক্টটা বাধা পেল,’ বললেন চৌধুরী।

‘বাঁধ তৈরির কাজ প্রায় শেষ হয়ে এসেছে, এই সময় গুজব রটে গেল যে ড. মুহিত হায়দার বিপুল পরিমাণ প্রাচীন আর্টিফ্যাক্ট আবিষ্কার করেছেন। বাতাসে ছড়ানো এই গুজব শুনে পিপড়ের মত ছুটে এল রোহিঙ্গা গেরিলারা। কি ব্যাপার? না, আবিষ্কৃত আর্টিফ্যাক্টের ভাগ চায় তারা; ওগুলো বিক্রি করে আর্মস-অ্যামিউনিশন কিনবে। বলাই বাহুল্য যে ওদেরকে লেলিয়ে দিয়েছিল আইএসআই এজেন্টরা। ওই পাকিস্তানী এজেন্টরাই ট্রেনিং দিচ্ছিল রোহিঙ্গাদের।

‘দুর্ভাগ্যই বলতে হবে, বাঁধ ও আর্টিফ্যাক্ট নিয়ে শুরু হয়ে গেল ভয়ঙ্কর এক ষড়যন্ত্র। আইএসআই এজেন্টদের সঙ্গে হাত মিলিয়ে বাঁধের কাজ বন্ধ করে দিল পাকিস্তানী এঞ্জিনিয়াররা। স্থানীয় প্রশাসনও গুপ্তধনের ভাগ পাবার জন্যে মরিয়া হয়ে উঠল। কি ঘটতে যাচ্ছে আঁচ করতে পেরে সরকার প্রথমে পুলিশ, তারপর সামরিক কর্মকর্তাদের পাঠাল পরিস্থিতি নিয়ন্ত্রণে রাখার জন্যে। কিন্তু কথায় আছে না, যে যায় লঙ্কায় সেই হয় রাবণ! এখানেও ঠিক তাই ঘটল।

‘এরপর আমরা, অর্থাৎ সে সময়কার বাংলাদেশ দূতাবাসের স্টাফও ঘটনার সঙ্গে জড়িয়ে পড়লাম। আমি তখন ছিলাম জুনিয়র সার্ভিস অফিসার, আমার ওপর দায়িত্ব ছিল যা কিছু ঘটছে তার রাজনৈতিক তাৎপর্য অনুসন্ধান করা। আর লিগাল অ্যাডভাইজার হিসেবে চৌধুরীর দায়িত্ব ছিল ড. মুহিত হায়দারকে প্রোটেকশন দেয়া।’

‘রাজনৈতিক তাৎপর্য খুঁজতে গিয়ে মোস্তফা সাহেব জানতে পারলেন রোহিঙ্গা গেরিলা এবং তাদের উপদেষ্টা ও ট্রেনার আইএসআই এজেন্টরা প্রথম থেকেই চাইছিল যেন বাঁধটা তৈরি না হয়,’ বললেন চৌধুরী। ‘এর কারণ পরিষ্কার। বাঁধ, ব্রিজ ও রেলপথ হলে ফালামে সরকারী সৈন্য খুব সহজেই আসতে পারবে, আর তা আসতে পারলে বাংলাদেশ মায়ানমার সীমান্তে রোহিঙ্গা গেরিলাদের তৎপরতায় বিঘ্ন সৃষ্টি হবে, সেই সঙ্গে গভীর জঙ্গলের ভেতর তাদের গোপন ক্যাম্পও গুরুতর হুমকির মুখে পড়বে। মোস্তফা সাহেব জানতে পারলেন, পাকিস্তানী এঞ্জিনিয়াররা

সাহায্য করার নামে বাঁধ তৈরিতে আসলে বাধাই দিচ্ছে।' নির্মাণ কৌশলে ত্রুটি দেখা দেয়ার পিছনে তাদেরই নোংরা হাত ছিল। শুধু তাই নয়, অতিরিক্ত মজুরি ও সুযোগ-সুবিধার দাবি তুলে শ্রমিকদের আন্দোলন করতেও উৎসাহ দেয় তারা, যার ফলে বাঁধের কাজ শেষ করে আনতে অস্বাভাবিক বেশি সময় লেগে যায়। তারপর কি ঘটল? এলাকায় উদয় হলো রোহিঙ্গা গেরিলা আর তাদের ট্রেনার পাকিস্তানী ইন্টেলিজেন্স আইএসআই-এর এজেন্টরা। এঞ্জিনিয়ারদের মধ্যেও দু-চারজন আইএসআই এজেন্ট ছিল, অর্থাৎ তাদের শক্তিবৃদ্ধি ঘটল। তারা প্ল্যান করল বিস্ফোরকের সাহায্যে বাঁধটা উড়িয়ে দেবে।

‘এদিকে ড. হায়দারকে নিয়ে আমি পড়লাম আরেক সঙ্কটে। প্রথমে তিনি বিপুল পরিমাণ আর্টিফ্যাক্ট পাবার কথা পঞ্চমুখে প্রচার করেছিলেন, কিন্তু তারপর হঠাৎ করেই মুখে কুলুপ আঁটলেন। আসলে কাউকেই তিনি বিশ্বাস করতে পারছিলেন না। তবে শেষ দিকে আমার সঙ্গে নিভতে কথা বলার কোন সুযোগও তিনি পাননি। স্থানীয় প্রশাসনের কর্মকর্তারা সারাক্ষণ তাঁকে ঘিরে রেখেছিল। প্রায় বন্দীই ছিলেন বলতে হবে। এক পর্যায়ে তাঁকে এমনকি সাইট থেকেও সরিয়ে আনা হয়। মাটি খুঁড়ে কি পাওয়া গেছে, আদৌ কিছু পাওয়া গেছে কিনা, কিছুই আমরা জানতে পারিনি। শুধু শুনেছি, সাইটকে ঘিরে দুটো দুর্ভেদ্য পাঁচিল তৈরি হয়েছিল—একটা তৈরি করে স্থানীয় প্রশাসন, অন্যটা রোহিঙ্গা গেরিলারা।’

‘আর এইরকম জটিল একটা পরিস্থিতির মধ্যে খুন হয়ে গেলেন ড. হায়দার।’

‘হ্যাঁ। ড. হায়দারকে তারা খুন করল, তার দু’দিন পর বাঁধটাও দিল উড়িয়ে। যে বিপুল পরিমাণ ডিনামাইট ব্যবহার করা হয়েছিল, একটা পাহাড়কে মাটির সঙ্গে মিশিয়ে দেয়ার জন্যে তা যথেষ্ট। এতদিনের পরিশ্রম, এত খরচ, সব বৃথা হয়ে গেল।’

‘স্থানীয় প্রশাসন সমস্ত দোষ চাপাল গেরিলাদের ওপর। সরকার আগে থেকেই জানত যে রোহিঙ্গারা চায় না বাঁধ তৈরি হোক, কাজেই এই ব্যাখ্যা ইয়ানগন এক রকম মেনেই নিল। আর প্রাচীন মং ও বৌদ্ধ সভ্যতা সম্পর্কে বলা হলো, ড. হায়দার মিথ্যা আশা দিয়েছিলেন, আসলে নাকি মাটি খুঁড়ে কিছুই পাওয়া যায়নি। তবে অন্যরকম একটা গুজবও ছড়িয়ে দেয়া হয়। তা হলো: ড. হায়দার যে বিপুল আর্টিফ্যাক্ট আবিষ্কার করেন তার সবই বাঁধ ভাঙা পানির তোড়ে ভেসে গেছে।’

এতক্ষণ ওঁদের কথা মন দিয়ে শুনেছে রানা, মিনহাজ চৌধুরী থামতে জিজ্ঞেস করল, ‘আপনার ধারণা ড. হায়দারকে খুন করা হয়েছে, এ ধারণা কেন হলো একটু খুলে বলুন, প্লীজ।’

‘ড. হায়দারের সহকারী ছিল রায়হান সিদ্দিকী,’ বললেন চৌধুরী। ‘ওই রায়হানই আমাকে বলেছিল, যে চাটার করা প্লেনে ড. হায়দার নিখোঁজ হন তাতে তারও থাকার কথা ছিল। কিন্তু বাধা দেয়ার কারণে প্লেনে সে উঠতে পারেনি...’

‘কে তাকে বাধা দিল?’

‘সে প্রসঙ্গে যাবার আগে এয়ারস্ট্রিপ আর চার্টার করা প্লেনটা সম্পর্কে দু’একটা কথা বলা দরকার। প্রচুর আর্টিফ্যাক্ট পাওয়া যাবে, সে-সব ইয়ানগনে নিয়ে যেতে হলে কার্গো প্লেন দরকার, ড. হায়দারের এই কথা শোনার পর সামরিক বাহিনী তাদের এয়ারস্ট্রিপটা ব্যবহার করার অনুমতি দিয়েছিল। অনুমতি পাবার পর চার্টার কোম্পানির প্লেন নিয়ে ইয়ানগন থেকে ফালাম ও ফালাম থেকে ইয়ানগনে কয়েকবার আসা-যাওয়াও করেছিলেন ড. হায়দার। কোম্পানিটার সঙ্গে তাঁর একটা সম্পর্ক গড়ে ওঠে, মোবাইল ফোনে অনুরোধ করলেই ইয়ানগন থেকে প্লেন পাঠিয়ে দিত তারা। সেদিন দুপুরবেলা সহকারী রায়হান সিদ্দিকীকে প্লেন চার্টার করার নির্দেশ দেন ড. হায়দার। প্লেন এসে পৌঁছায় সন্দের দিকে। সে সময় সিদ্দিকী এয়ারস্ট্রিপের কাছেই এক ঊড়ি হিন্দুর দোকানে বসে মদ খাচ্ছিল...’

বাধা দিল রানা। ‘ড. হায়দারের ছাত্র ছিল সিদ্দিকী—একটু পরই শিক্ষকের সঙ্গে প্লেনে চড়তে হবে তাকে, তাসত্ত্বেও সে মদ খাচ্ছিল?’

‘প্রশ্নটা আমিও তাকে করেছিলাম,’ বললেন চৌধুরী। ‘সিদ্দিকীর বক্তব্য ছিল, ড. হায়দার বাকি সবার মত তাকেও অবিশ্বাস করতেন, এমনকি প্রাচীন সভ্যতা আবিষ্কারের সম্ভাবনা স্পষ্ট হয়ে ওঠার পর থেকে তাকে তিনি সাইটেও নিয়ে যেতেন না। সেই দুঃখ ও অপমান ভোলার জন্যেই নাকি মদ খাওয়া ধরে সে। তো সে যাই হোক, ঊড়িখানায় বসে প্লেনটাকে আসতে দেখল সিদ্দিকী, কিন্তু প্লেনে ওঠার জন্যে ওখান থেকে সে বেরুতে পারেনি। কেউ একজন তার মাথার পিছনে আঘাত করে, ফলে জ্ঞান হারিয়ে ফেলে সে। জ্ঞান ফেরার পর দেখতে পায় ড. হায়দারকে নিয়ে চলে গেছে প্লেনটা।’

‘কিন্তু কে তাকে প্লেনে উঠতে দিল না, কারা ড. হায়দারকে খুন করল, পরে খোঁজ নেয়নি সে?’

‘হ্যাঁ, নিয়েছিল বৈকি। আমি তো তাকে সঙ্গে নিয়েই তদন্ত শুরু করি। কিন্তু তথ্য ও সূত্রের অভাবে নিরুৎসাহ কিছুই আমরা জানতে পারিনি।’

‘আপনি আমাকে মেকানিক হতর কো সম্পর্কে বলুন।’ রানা সামনের দিকে একটু ঝুঁকল।

‘হতর কো!’ চৌধুরী বিস্ময়ের একটা ধাক্কা খেলেন। ‘ওর নাম আপনি কিভাবে জানলেন?’

‘মায়ানমার পুলিশ তাদের তদন্তের ফাইলটা ফটোকপি করে বাংলাদেশে পাঠিয়েছিল, সেটার ওপর চোখ বোলাবার সুযোগ আমার হয়েছে।’

‘প্লেনটা ক্র্যাশ করাবার জন্যে তাকে দিয়েই যে কারিগরি ফলানো হয়, এ-ব্যাপারে আমার কোন সন্দেহ নেই,’ বললেন চৌধুরী। ‘ইয়ানগন থেকে সাড়ে চারশো মাইল উড়ে ফালামে এসেছিল প্লেনটা, স্বভাবতই খানিকটা সার্ভিসিং-এর প্রয়োজন দেখা দেয়। এর আগেও ইয়ানগন থেকে আসা প্লেনে সার্ভিসিং-এর প্রয়োজন হয়েছিল, প্রতিবার হতর কো-ই কাজটা করে। অর্থাৎ খুনীরা জানত হতর কো-কে দিয়েই কাজটা করাতে হবে। সন্দেহ নেই, মোটা টাকার লোভ দেখিয়ে তাকে রাজি করানো হয়।’

‘কো-ই তাহলে ষড়যন্ত্রকারীদের হাতিয়ার ছিল?’

‘হ্যাঁ। তাকে তার পাওনাও অবশ্য কড়ায়-গণ্ডায় বুঝিয়ে দেয়া হয়। সিদ্দিকী আর আমি তার লাশ দেখতে পাই এক হপ্তা পর। কেউ তার পেটে ছ’টা গুলি করেছিল।’

‘কঠিন মৃত্যু,’ বলল রানা।

চৌধুরীর ঠোটে শুকনো হাসি। ‘তবে সে ছিল নেহাতই ছোট মাছ। রাঘব-বোয়ালরা গা ঢাকা দেয় গভীর জলে।’

‘বড় মাপের সব অঘটনেই নারীচরিত্র একটা থাকতেই হবে,’ রাষ্ট্রদূত তারিক মোস্তফা বললেন। ‘এখানেও তার ব্যতিক্রম ঘটেনি। চৌধুরী, ওঁকে সেই ভদ্রমহিলার কথাও বলুন।’

‘উহু, আপনি বলুন, স্যার। কারণ শেষ দিকে আপনি তাকে চাকরি দেন—আপনার স্টাফ ছিলেন তিনি।’

ভুরু কুঁচকে রানা জিজ্ঞেস করল, ‘আপনারা কি মায়া মায়া মালহার-এর কথা বলছেন?’

‘আপনি তো দেখছি প্রায় সবই জানেন, মি. রানা,’ প্রশংসার সুরে বললেন রাষ্ট্রদূত। ‘হ্যাঁ। মায়া মায়া মালহার ইয়ানগনের এক অভিজাত পরিবারের মেয়ে ছিলেন। ড. হায়দারের সঙ্গে তাঁর পরিচয় লন্ডনে—পরিচয় মানে, ড. হায়দারের ছাত্রী ছিলেন তিনি। ড. হায়দার লন্ডন থেকে মায়ানমারে যখন এলেন, মায়া মালহার তখন ইয়ানগন ভাসিটিতে লেকচারারের চাকরি করছেন। ড. হায়দারের আর্কিওলজিকাল এক্সপিডিশনে কিছু স্বেচ্ছাসেবকের দরকার, শুনে চাকরি ছেড়ে দিয়ে ফালামে চলে আসেন তিনি।’

‘শুনেছি মায়া মালহার ড. হায়দারের প্রেমে পড়ে গিয়েছিলেন।’

‘হ্যাঁ, তবে ব্যাপারটা এক তরফা ছিল না,’ বললেন রাষ্ট্রদূত। ‘সম্পর্কটা তাঁরা গোপনও করেননি। বয়সের ব্যবধান যাই হোক, ড. হায়দার ছিলেন সুপুরুষ, আর মায়া মালহার ছিলেন অপরূপ সুন্দরী।’

‘আপনি তাঁকে চাকরি দিতে গেলেন কি মনে করে?’

‘তখন যিনি আমার বস ছিলেন, বুদ্ধিটা তাঁর,’ বললেন রাষ্ট্রদূত। ‘ড. হায়দার বিশ্বাস করে কাউকে কিছু বলছেন না, ফলে আমরা জানতে পারছি না সত্যি তিনি প্রাচীন আর্টিফ্যাক্ট আবিষ্কার করেছেন কিনা, এ-ও বুঝতে পারছি না আইএসআই তাঁকে ব্ল্যাকমেইল করছে কিনা। এই অবস্থায় আমরা মায়া মালহারকে আমাদের হয়ে কাজ করার প্রস্তাব দিই। তিনি রাজি হন ঠিকই, কিন্তু অনেক দেরি করে ফেলেন।’

‘তাঁকেও ওরা শেষ করে দেয়,’ বললেন চৌধুরী।

‘হ্যাঁ, কোন খোঁজই তো পাওয়া যায়নি।’

‘তিনি নিখোঁজ হন ড. হায়দারের আগে, তাই না?’ জিজ্ঞেস করল রানা।

‘দু’দিন আগে। সে সময় আমার একবারও সন্দেহ হয়নি মায়া মালহার কোন অপরাধের সঙ্গে নিজেকে জড়াতে পারেন। এরকম সন্দেহ ড. হায়দারের মনেও

জাগেনি। অন্তত আমাকে তিনি এ-ব্যাপারে কিছুই বলেননি। তবে আমার চেয়ে চৌধুরীর সঙ্গেই তাঁর বেশি ঘনিষ্ঠতা ছিল।’

মাথা নাড়লেন চৌধুরী। ‘নাহ্, আমাকেও কিছু বলেননি। ওই শেষ দু’দিন তাঁর মধ্যে আমি চরম অস্থিরতা লক্ষ করেছি। পরে, অনেক পরে, গোটা ব্যাপারটা সম্পর্কে আমার মনে একটা সন্দেহ জাগে।’

‘কি সন্দেহ?’

রানার দিকে ঝুঁকলেন মিনহাজ চৌধুরী, মাংসল ও লোমশ হাত রাখলেন বিশাল উরুতে, মাথাটা নিচের দিকে নুয়ে পড়ল। ‘দেখুন আপনি এর মধ্যে কোন অর্থ খুঁজে পান কিনা। যদি বলি মায়া মালহারকে কেউ রোপণ করেছিল? আসলে পাকিস্তানী স্পাই ছিল সে? আইএসআই-এর এজেন্ট?’

‘অসম্ভব!’ তীক্ষ্ণস্বরে প্রতিবাদ করলেন রাষ্ট্রদূত। ‘কি যা তা বলছেন আপনি!’

‘না না, আগে আমার সব কথা শুনুন, শ্রীজ!’ হাত নেড়ে আবেদন জানালেন চৌধুরী। ‘পাকিস্তানী এজিনিয়ারদের মধ্যে আইএসআই-এর এজেন্ট তো ছিলই, তাই না? ড. হায়দার কি করছেন, মাটি খুঁড়ে কিছু পাচ্ছেন কিনা, এ-সব নিশ্চয়ই তারা খোঁজ নিচ্ছিল। কিভাবে? ভেবে দেখুন, মায়া মালহার ছিলেন অপরূপ সুন্দরী, মধ্যবয়স্ক ও নিঃসঙ্গ ড. হায়দারের জন্যে আদর্শ টোপ।’

‘ইন্টারেস্টিং,’ বলল রানা।

‘ড. হায়দারের সঙ্গে কাজ করছিলেন মায়া, এমনকি তাঁর সঙ্গে হয়তো শুচ্ছিলেনও। এই বয়সে প্রেমে পড়লে কিছু কি আর গোপন রাখা সম্ভব? তাছাড়া, স্বেচ্ছাসেবিকা হিসেবে প্রজেক্টের সমস্ত তথ্য এমনিতেও পাচ্ছিলেন মায়া, এবং সে-সব তথ্য নিয়মিত পাচার করছিলেন। এটা প্রথম দিকের অবস্থা। এবার আন্দাজ করা যাক শেষদিকে কি ঘটেছিল। মায়া একটা নাটকও করে থাকতে পারেন, ড. হায়দারকে হয়তো বলেছেন যে তিনি খুব বিপদে পড়েছেন, আর তারপর দৃশ্যপট থেকে নিজেকে প্রত্যাহার করে নেন। মায়া নিখোঁজ হয়ে গেলে স্বভাবতই উদ্ভ্রান্ত হয়ে পড়েন ড. হায়দার। এই সময় মায়া তাঁর সঙ্গে যোগাযোগ করলেন, বললেন তিনি তাঁকে ভালবাসেন, তাঁকে ছাড়া তিনি বাঁচবেন না ইত্যাদি। আরও বললেন, ড. হায়দারের জন্যে অপেক্ষা করছেন তিনি-ইয়ানগনে।’

‘ইন্টারেস্টিং!’ বলল রানা।

‘একটা প্রশ্নের উত্তর কখনোই আমরা পাইনি, হঠাৎ প্লেন চাটার করে ইয়ানগনে যাবার কি প্রয়োজন ছিল ড. হায়দারের। আমি যেভাবে বলছি সেভাবে চিন্তা করলে এই প্রশ্নের একটা উত্তর পাওয়া যায়। মায়া মালহারই ছিলেন আইএসআই-এর টোপ। তিনিই ড. হায়দারকে ওই প্লেনে উঠতে প্ররোচিত করেন।’

‘এ আমি বিশ্বাস করি না। বিশ্বাস করতে পারি না। মায়া ড. হায়দারকে শুধু ভালবাসতেন না, দেবতা জ্ঞানে পূজো করতেন,’ বললেন রাষ্ট্রদূত।

‘কি করে বুঝলেন ওই প্রেম আর পূজো অভিনয় ছিল না?’ জিজ্ঞেস করলেন চৌধুরী।

মাথা নাড়লেন তারিক মোস্তফা। দীর্ঘ নীরবতা ভেঙে শুধু বললেন, 'বলিহারি আপনার কল্পনাশক্তি!'

'আপনি কি বলেন, মি. রানা?' রানার দিকে তাকালেন চৌধুরী। 'আমার সন্দেহ সম্পর্কে আপনার কি ধারণা?'

'নাহ্, উড়িয়ে দেয়ার মত নয়,' বলল রানা। 'যে-সব তথ্য ও ঘটনা আমরা জানি, তার সঙ্গে মেলে।'

'তাহলে এ-কথাও বলতে হয় যে অনেক তথ্য আমরা জানিও না,' বলল বৃষ্টি। 'সেই সব অজানা তথ্য আর ঘটনার সঙ্গে আপনার সন্দেহ হয়তো না-ও মিলতে পারে।'

'গোটা ব্যাপারটা এখন আপনাদের মাথাব্যথা।' চৌধুরী এত জোরে হেসে উঠলেন, তাঁর হাতের গ্লাস থেকে খানিকটা ভূইক্ষি ছলকে উঠল। 'আপনারা কেসটার দায়িত্ব নিজেদের কাঁধে নিতে চেয়েছিলেন-নি! দেখা যাক সবাই যেখানে ফেল মেরেছে রানা এজেন্সি সেখানে কি করতে পারে!'

বারো

অ্যান্টিক শপ ঐতিহ্য সাড়া দিচ্ছে না।

'আমার ভয় করছে, মাসুদ ভাই,' কার ফোন রেখে দিয়ে বলল বৃষ্টি। 'ওরা রিসিভার তুলছে না।'

'একটু পরই জানা যাবে কি ঘটনা,' বলল রানা।

ট্র্যাফিক আইনকে বুড়ো আঙুল দেখিয়ে একের পর এক ওভারটেক করছে থুইন, পিছনে পড়া ড্রাইভাররা নিষ্ফল আক্রোশে হর্ন বাজাচ্ছে।

সামনে একটা তেমাথা। ট্র্যাফিক লাইট লাল হয়ে গেল।

হর্নের বোতাম চেপে ধরে সিগন্যাল অমান্য করল থুইন। একটা কার ওদের রিয়ার বাম্পারকে দু'ইঞ্চির জন্যে মিস করল।

বৃষ্টির চোখমুখ শান্ত, তবে রানার হাতটা শক্ত করে ধরে আছে।

'আমাদের বোধহয় সীটবেল্ট বাঁধা উচিত,' বলল রানা।

'স্পীড কমে আসছে।' ড্রাইভারের সঙ্গে কথা বলার জন্যে সামনের দিকে ঝুঁকল বৃষ্টি। 'কি ব্যাপার, থুইন?'

'সিরিয়াস জ্যাম, ম্যাডাম।'

'গাড়ি সাইড করো!'

গাড়ির নাক ফুটপাথের দিকে ঘুরে গেল। চাকা থামার আগেই দরজা খুলে ফেলল রানা।

ফুটপাথ ধরে হন হন করে এগোল তিনজন। দু'বার বাঁক ঘোরার পর জে. খই খই কুয়া রোডে পৌঁছাল। আর মাত্র একটা বাঁক ঘুরলেই ঐতিহ্যকে দেখা

যাবে। কিন্তু তার আগেই আকাশের লালচে ভাব দেখে পেটের ভিতর শিরশিরে অনুভূতি হলো রানার। বাক ঘোরার পর ওদের আশঙ্কাই সত্যি প্রমাণিত হলো। দাউ দাউ করে জ্বলছে একটা বিল্ডিং।

‘সর্বনাশ!’ বলেই ছুটল বৃষ্টি।

খপ্প করে তার কজি চেপে ধরল রানা। ‘থামো। এটা আমাদের জন্যে একটা ফাঁদও হতে পারে।’

জ্যাকেটের পকেটে হাত ঢুকিয়ে পিস্তল ধরে আছে থুইন। তার চঞ্চল দৃষ্টি আগুন দেখতে জড়ো হওয়া ভিড়ের ওপর ঘুরে বেড়াচ্ছে।

ঐতিহ্যের জায়গায় অশুভ, কুৎসিত ও ভীতিকর একটা আভা দেখতে পেল ওরা। কালো মেঘের মত বেরিয়ে আসা ধোঁয়া মোচড় খেতে খেতে ওপরে উঠে যাচ্ছে। দোকানের ভেতরে আগুনের শিখাগুলো মনে হলো ছোটোছুটি করছে। অগ্নিঝড়ের ভেতর বড় আকারের আর্ট পীসগুলোকে কালচে আর বেটপ লাগছে দেখতে।

‘আগুনটা খুব বেশিক্ষণ আগে ধরেনি,’ বলল রানা। ‘তা ধরলে ভিড় আরও বড় হত।’

‘মনির আর শহীদ বেক্ষতে পেরেছে কিনা দেখা দরকার!’ বৃষ্টির গলায় মিনতি।

এখনও তার হাত ধরে আছে রানা। ‘বেরিয়ে থাকলে ভাল। আর যদি ভেতরে আটকা পড়ে থাকে, আমাদের কোনও সাহায্য ওদের কাজে লাগবে না।’

দোকানের সামনে প্রতি মুহূর্তে ভিড় বাড়ছে। নিরাপদ দূরত্বে দাঁড়িয়ে আহা-উহ করছে দর্শকরা, ভাল করে দেখার জন্যে ঠেলাঠেলিও চলছে। সাহসী লোকজন ঝুঁকি নিয়ে আগুনের কাছাকাছি চলে আসছে দেখে একজন পুলিশ কনস্টেবল বাধা দিচ্ছে। তবে একা ভিড়টাকে সামলাতে পারছে না।

‘মানুষ!’ হঠাৎ একটা চিৎকার শোনা গেল। ‘দেখো, দেখো! ভেতরে মানুষ রয়েছে!’

দৃশ্যটা এবার সবাই দেখতে পেল। শিখার ভেতর মোচড় খাচ্ছে একটা ছায়া। মনে হলো পুরুষমানুষ। মোচড় খেতে খেতে ছুটল সে। ছুটে এসে সরাসরি ধাক্কা খেলো ডিসপ্লে উইন্ডোয়, বাধা পেয়ে ফেরত গেল আবার।

‘হায় হায়, কি করি!’ কপাল চাপড়ে অসহায়ত্ব প্রকাশ করল কনস্টেবল, তারপর সমস্ত দ্বিধা ঝেড়ে ফেলে দোকানের দিকে ছুটল, আগুনের আঁচে কুঁকড়ে যাচ্ছে শরীর। দরজা ধরে টানাটানি শুরু করল সে। কিন্তু বৃথাই, খুলতে পারছে না। হাতের লাঠি দিয়ে উইন্ডোর কাঁচে বাড়ি মেরেও কোন লাভ হলো না।

আগুনের আঁচ কাবু করে ফেলল কনস্টেবলকে, দরজার সামনে ঢলে পড়ল সে। ভিড় থেকে ছুটে গেল দু’জন লোক, আগুন নাগাল পাবার আগেই টেনে সরিয়ে আনল তাকে।

দোকানের ভেতর জ্বলন্ত লোকটা ভারী একটা চেয়ার তুলে বাড়ি মারল কাঁচে। দ্বিতীয় আঘাতে চিড় ধরল গ্রাসে। তৃতীয় আঘাতে ঝাপসা হলো, তারপর

টুকরো টুকরো হয়ে ছড়িয়ে পড়ল ফুটপাথে। লোকটা যেন জ্বলন্ত মশাল, পিছিয়ে গিয়ে লাফ দিল সদ্য তৈরি ফাঁক লক্ষ্য করে।

আতকে উঠে পিছিয়ে এল ভিড়টা।

এক রাশ ভাঙা কাঁচ সহ ফুটপাথে পা দিয়ে পড়ল লোকটা, টলমলে পায়ে দু'ফুট এগোল, তারপর সটান আছাড় খেলো। ফুটপাথের ওপর মুখ খুবড়ে পড়ে থাকল সে।

ভিড়ে চ্যাপ্টা হচ্ছে রানা, কনুই আর হাঁটু চালিয়েও নিরেট পাঁচিল এতটুকু ফাঁক করতে পারছে না।

রানা ভিড় ঠেলে লোকটার কাছে পৌছাতে পারলে যা করতে পারত সেই কাজ দর্শকদের একজন করছে। নিজের গায়ের কোট খুলে জ্বলন্ত লোকটার গায়ে ঘন ঘন বাড়ি মারছে। তাকে সাহায্য করার জন্যে ভিড় থেকে আরেক লোক এগিয়ে এল।

খক্ খক্ করে কাশছে, উঠে বসল কনস্টেবল। 'দরজা আটকে গেছে...অনেক চেষ্টা করেও খুলতে পারলাম না...'

ভাঙা জানালা দিয়ে তাজা অক্সিজেন ঢুকছে দোকানের ভেতর, নতুন খোরাক পেয়ে উন্মত্ত হয়ে উঠল আগুন। লাল হয়ে উঠল কাঁচ। লালচে-হলুদ আগুনের চাদর দালানের মুখ চাটতে চাটতে ওপর দিকে উঠে যাচ্ছে।

উপকারী কয়েকজোড়া হাত পুড়ে সেন্ন হওয়া লোকটাকে টেনে সরিয়ে আনল। তার কাপড়ে বা শরীরে এখন কোন শিখা নেই, তবু পুড়ছে সে। সাহায্যকারীরা নিজেদের হাতে কাপড় জড়িয়ে লোকটাকে ধরে আরও খানিকটা দূরে সরিয়ে আনল।

ফুটপাথের যেখানে সে পড়েছিল সেখানে মানুষের আকৃতি ফুটে উঠেছে, নঁকশাটা থেকে ধোঁয়া উঠতে দেখা গেল।

লোকটাকে আলোয় নিয়ে আসতে ভিড়ের মধ্যে থেকে অনেকে কেঁদে ফেলল, তাদের মধ্যে সবাই মহিলা নয়। বৃষ্টির মনে হলো সে জ্ঞান হারাবে, রুদ্ধশ্বাসে বলল, 'ও আমাদের শহীদ!'

'কি করে বুঝলে?' পোড়ার মাত্রা এত বেশি, নারী না পুরুষ চিনতে পারছে না রানা।

'জুতো!'

দগ্ধ লোকটার পা থেকে খুলে গেছে একটা জুতো। রানা না চিনলেও, বৃষ্টি জানে ওটা কার।

থুইন বিড়বিড় করে প্রার্থনা করছে।

বৃষ্টি একটা লাইটপোস্টে হেলান দিল।

পোড়া শরীরটার দিকে আরেকবার তাকিয়ে চোখ সরিয়ে নিল রানা। এদিক ওদিক তাকাল ও, শুধু একটা দিকে ভুলেও সরাসরি তাকাচ্ছে না। কারণ ওদিকটায় দুজন লোককে আগেই দাঁড়িয়ে থাকতে দেখেছে সে। ওদেরকে দেখেই বৃষ্টিকে দোকানের সামনে যেতে দেয়নি ও।

ভিড়ের মুখ আতঙ্ক, করুণা আর শোকের প্রতিচ্ছবি। কিন্তু দু'জন লোকের অভিব্যক্তি সম্পূর্ণ অন্য রকম।

সরাসরি না তাকিয়ে তাদের অস্তিত্ব সম্পর্কে আর একবার নিশ্চিত হয়ে নিল রানা।

লোকটার বিশাল শরীরই একটা সাইনবোর্ড। সাড়ে ছ'ফুটের কম নয় সে, তার মাথাই সবার ওপরে।

তার পাশে দাঁড়ানো খুদে লোকটাকে ভিড় ফাঁক হলেই শুধু দেখা গেল।

দু'জনেই তারা চকচকে চোখে আগুনের দিকে তাকিয়ে আছে।

অগ্নিকুণ্ড থেকে একটা ঘর্ষি উঠল। লোক দু'জন সেটা দেখে পরস্পরের দিকে তাকিয়ে ঠোঁট টিপে তন্ত্রির হাসি হাসল।

'হিনান ফো আর চো মাউং।'

'কি?' ডানে বাঁয়ে তাকাল বৃষ্টি। 'কোথায়?'

'এখন তাকালেও দেখতে পাবে না,' বলল রানা। 'আমরা ভিড় থেকে বেরুচ্ছি না দেখে কেটে পড়ছে। থুইন!'

'ইয়েস, স্যার!'

'ম্যাডামকে দেখো। আশপাশে ওদের আরও লোক থাকতে পারে।' ভিড় ঠেলে এগোবার সময় এবার রানা নির্মম হয়ে উঠল।

হাঁটু আর কনুইয়ে গুঁতো খেয়ে লোকজন প্রায় দাঙ্গা বাধিয়ে দিল। এক তরুণী কাঁধের ধাক্কা খেয়ে খেপে গেল, হ্যান্ডব্যাগ দিয়ে রানার মুখে আঘাত করল সে। হাত দিয়ে ঢেকে চোখ দুটোকে বাঁচাল রানা। আরেক লোক সরাসরি ঘুসি চালানল, ভাগ্য ভাল যে রানার কাঁধে ঘষা খেয়ে পিছলে গেল সেটা।

ভিড় ঠেলে বেরিয়ে রানা দেখল ফো আর মাউং রাস্তার ওপারে চলে গেছে। এখন আর হাঁটছে না, দৌড়ে পালাচ্ছে। ধাওয়া করল রানা।

ঘাড় ফিরিয়ে তাকাল ওরা। রানাকে দেখে দু'জনের মুখের হাসি চওড়া হলো। তবে ছুটছে আগের চেয়েও জোরে।

রানার হাতে পিস্তল বেরিয়ে এল। অন্তত একজনকে আহত করতে পারলেও কাজ হয়।

সাইরেন বাজিয়ে বাঁক ঘুরল একটা ফায়ার এঞ্জিন।

রাস্তা পেরুতে গিয়েও লাফ দিয়ে পিছিয়ে আসতে হলো রানাকে। প্রকাণ্ড লাল মেশিনটা গা রিরি করা কর্কশ আওয়াজ তুলে দাঁড়িয়ে পড়ল। ফায়ারম্যানরা লাফ দিয়ে রাস্তায় নামল, দীর্ঘ হোস-এর কুণ্ডলী খুলছে দ্রুত। দু'একজনকে ধাক্কা দিয়ে রানাকে ছুটতে দেখে তিরস্কার করল হেড ফায়ারম্যান।

লম্বা একটা হুক-অ্যান্ড-ল্যাডার রিগ সঙ্গেসঙ্গে ব্রেক কষে দাঁড়িয়ে পড়ল প্রথম ফায়ার এঞ্জিনের পিছনে, লাফ দিয়ে আরও ফায়ারম্যান নামছে রাস্তায়।

গাড়ি ও লোকজনকে পিছনে ফেলে বেরিয়ে এল রানা। কিন্তু ফো বা মাউংকে কোথাও দেখতে পেল না।

ছোট্ট গতি বাড়িয়ে দিয়ে পরবর্তী বাঁকের দিকে যাচ্ছে রানা। ছায়ার ভেতর

লুকিয়ে থাকতে পারে, প্রতিটি দরজার আড়ালে চোখ বোলাচ্ছে। কিন্তু চৌরাস্তায় পৌছেও কোথাও কাউকে দেখতে পেল না।

বড় করে শ্বাস নিল রানা, দশ পর্যন্ত গুনল, তারপর ধীরে ধীরে নিঃশ্বাস ছাড়ল। কাজে লাগল না। ডাস্টবিনে ঝেড়ে একটা লাথি কষতে সামান্য একটু ঠাণ্ডা হলো মাথা।

আগুনের কাছে ফিরে এল রানা। লোকজনের ভিড় এত বেড়ে গেছে যে রাস্তায় তিল ধারণের জায়গা নেই। থুইনের লাল ক্যাপটা দেখতে পেয়ে সেদিকে এগোল ও।

কেউ একজন ওর আস্তিন ধরে টান দিল।

বন করে আধপাক ঘুরল রানা। ওর আক্রমণাত্মক ভঙ্গি দশ বছরের টোকাই ছেলেটাকে সন্ত্রস্ত করে তুলল। ‘মাসুদ রানা, স্যার?’

‘তুমি আমার নাম জানলে ক্রিভাবে?’

একটা এনভেলাপ এগিয়ে দিল ছেলেটা। ‘এটা আপনার, স্যার। ওরা আমাকে বলল আমি যদি আপনাকে স্যার বলি আর এটা দিই তাহলে আপনি আমাকে একশো ক্রিয়াতের একটা কড়কড়ে নোট দেবেন।’

ব্ল্যাকমার্কেটে একশো ক্রিয়াত মানে প্রায় এক মার্কিন ডলার। ‘ওরা কারা?’ জানতে চাইল রানা।

‘যারা বলল আপনি আমাকে একশো ক্রিয়াত দেবেন।’

নোটটা দিয়ে এনভেলাপটা নিল রানা।

‘আপনার মঙ্গল হোক, স্যার।’

‘সত্যি করে বলো, এই এনভেলাপ কে দিল তোমাকে?’ গলাটা আরও নরম করল রানা।

‘ওই তো, স্যার-গাড়িতে বসে আছেন,’ বলে হাত তুলে রাস্তার ওপারটা দেখাল টোকাই। সেদিকে তাকিয়ে বাদামী রঙের একটা পাজেরো জীপ দেখতে পেল রানা, রাস্তার পাশে পার্ক করা।

এই একই পাজেরো আজ ট্রাক ড্রাইভারকে চাপা দিয়েছে।

পাজেরো থেকে এক লোক একটা হাত বের করে নাড়ল রানার উদ্দেশে। চেহারা নয়, শুধু হাতটাই দেখা গেল। স্টার্ট দেয়াই ছিল, বাক নিয়ে চলে গেল পাজেরো। যাবার সময় কয়েকবার হর্ন বাজাল ড্রাইভার।

এনভেলাপটা পকেটে ভরে বৃষ্টি আর থুইনের কাছে ফিরে এল রানা।

আগুন ইতিমধ্যে নিভে এলেও পাঁচটা হোস পাইপ ঐতিহ্যের ভেতর এখনও পানি ছুঁড়ছে। বিল্ডিংয়ের বাকি দোকানগুলো রক্ষা পাওয়ায় ভাগ্যের প্রতি কৃতজ্ঞ মালিকরা আবেগে আপ্ত হয়ে পড়েছে। তাদের মধ্যে ভুটানি, নেপালি ও ভারতীয়রা বৃষ্টিকে আন্তরিক সহানুভূতি জানিয়ে গেল।

দোকানটাকে ঘিরে এখনও কালো ধোঁয়া দেখা যাচ্ছে। হঠাৎ নিভে আসা আগুনের ভেতর চোখ ধাঁধানো সাদা আভার ক্ষণস্থায়ী একটা বিস্ফোরণ ঘটল।

ম্লান মুখে বিড়বিড় করল বৃষ্টি, ‘অটোডেসট্রাক্ট তার কাজ করছে।’

রানা এজেন্সির সব শাখা অফিসেই এই ব্যবস্থাটা আছে। প্রতিটি ফাইল ও সফিসটিকেটেড ইলেকট্রনিক ইকুইপমেন্টে খুঁদে বোমা ফিট করা আছে, আগুন ও পানির সংস্পর্শে এলে বা প্রচণ্ড ঝাঁকি খেলে ওই বোমা নিজের থেকে ফেটে গিয়ে কয়েক সেকেন্ডের মধ্যে ছাই করে দেবে সব।

থুইন দোকানটার দিক থেকে চোখ ফেরাতে পারছে না। এক সময় ফিসফিস করে বলল, 'মনির সাহেব?'

'সে-ও বোধহয় ভেতরে ছিল,' বলল রানা, হাত দুটো মুঠো পাকানো।

'বলতে পারেন, স্যার, কারা এভাবে খুন করে?'

'কীট, নরকের কীট,' বলল রানা। 'প্রতিজ্ঞা করলাম, এই আগুন আমিও ওদেরকে খাওয়াব।'

বৃষ্টি বলল, 'মাসুদ ভাই, আমাকে একবার থানায় যেতে হচ্ছে...'

'একটু পর,' বলল রানা। 'তার আগে গাড়িতে এক মিনিট বসব আমরা।'

বুলেটপ্রুফ আর্মারড লিমোজিনে ফিরে এল ওরা। ব্যাকসীটে বসে আলো জ্বলে এনভেলাপটা পরীক্ষা করছে রানা।

'কি ওটা?' জিজ্ঞেস করল বৃষ্টি।

এনভেলাপটা কিভাবে পেয়েছে ব্যাখ্যা করল রানা।

'লেটার বম নয় তো?' বৃষ্টি উদ্ভিগ্ন।

তালুতে ফেলে খামটার ওজন অনুভব করল রানা, আলোর সামনে ধরে ভেতরে কি আছে বোঝার চেষ্টা করল। 'জানি এটা লেটার বম নয়, তবে চেক করে দেখতে ক্ষতি নেই,' বলল ও।

'আপনি ওদেরকে চেনেন?'

মাথা নাড়ল রানা।

'তাহলে কেন বলছেন জানেন ওটা বোমা নয়?'

'বোমা পাঠাবার ঝামেলায় যাবে কেন? আমাকে খুন করার আরও অনেক ভাল সুযোগ পেয়েও যখন কাজে লাগায়নি?'

ছুরি বের করে এনভেলাপের একটা প্রান্ত কাটল রানা। ভেতর থেকে ভাঁজ করা ছোট একটুকরো কাগজ বেরুল শুধু। কাগজে কি যেন লেখা রয়েছে। ভাষাটা ইংরেজি।

'কোন মেসেজ?' জিজ্ঞেস করল বৃষ্টি।

কাগজটা তার দিকে বাড়িয়ে ধরল রানা। তাতে লেখা:

জয়ে জয়ে থুনপুন

সাইট # ১০৫, কোকো গুন

ফালাম।

'ওটাই আমার পরবর্তী গন্তব্য,' বলল রানা।

তেরো

এই টরচার হাউস জনবসতিহীন জঙ্গলের ভেতর। এখানে চিৎকার করে কোন লাভ নেই, কারণ নির্যাতনকারীরা ছাড়া আর কেউ শুনতে পাবে না।

সিলিং থেকে নেমে আসা একটা শিকলের সঙ্গে ঝুলছে থান নোয়ে। সম্পূর্ণ বিবস্ত্র, তার পা দুটো ফাঁক করে রেখেছে একটা স্প্রেডার বার। এই মুহূর্তে নোয়ে চিৎকার করছে না, জ্ঞান হারিয়ে ফেলেছে।

‘কেউ একটা তোয়ালে দাও।’ হাত বাড়াল মাইয়ো মিন। ‘কুস্তার বাচ্চাটা আমার সারা শরীরে রক্ত মাখিয়ে দিয়েছে।’

‘এই নাও, ওর শার্ট,’ দলের একজন বলল। ‘পুড়িয়েই যখন ফেলব, তার আগে কাজে লাগাও।’

‘উফ!’ শার্টটা দিয়ে মুখ মুছল মিন। ‘এ শালার বড় খাটনির কাজ, এই টরচার করা। গলা গুঁকিয়ে কাঠ হয়ে গেছে।’

‘একটা বিয়ার নাও।’

একটা এক কোয়ার্ট বোতলের ছিপি খুলে এক ঢোকেই অর্ধেক বিয়ার গিলে ফেলল মিন। ‘আহ, শান্তি!’ হাতের উল্টোপিঠ দিয়ে মুখ মুছে হাসল।

মিন আর তার তিনজন সঙ্গী মেঝেতে হাত-পা ছড়িয়ে বসে বিশ্রাম নিচ্ছে। কামরাটা স্যাঁতসেঁতে, কোন জানালা নেই। পাথুরে দেয়াল, মেঝেটা মাটির। সন্ধ্যা তারের শেষ প্রান্তে একটা বালব জ্বলছে। ঘরের এক কোণে একটা গর্ত, তাতে কয়লা জ্বলছে। জ্বলন্ত কয়লা থেকে বেরিয়ে আছে বিভিন্ন আকৃতির লোহার শিকের হাতল।

কাঠের সিঁড়িতে ক্যাঁচক্যাঁচ শব্দ উঠল, ধাপ বেয়ে নেমে আসছে মায়াতকা থুয়ে ও আয়ে মোয়ে।

মিন আর তার শিষ্যরা বামপন্থী কবি মায়াতকা থুয়েকে দেখে দাঁড়াল, সম্মান দেখিয়ে কয়েকবার করে মাথা নোয়াল।

‘ও কথা বলেছে?’ থুয়ে জানতে চাইল।

‘না, একটা শব্দও করছে না,’ বলল মিন। ‘বুড়ো হলে-কি হবে, এখনও অসম্ভব শক্তি।’

‘না-না, যেভাবে পারো কথা বলাও!’ মায়াতকা থুয়েকে অসহিষ্ণু মনে হলো। ‘হাতুড়ির জন্য থেকে এই বুড়ো নোয়ে দলটার সঙ্গে আছে। হাতুড়ির প্রতিষ্ঠাতা উইন হাটাইকের সাক্ষাৎ শিষ্য। অবসর নিলেও, হাতুড়ির ওরা কি করে না করে সব খবরই রাখে।’

‘কথা বলছে না, অথচ তোমরা সবাই হাত-পা গুটিয়ে বসে ছিলে কি মনে করে?’ ঠাণ্ডা গলায় জানতে চাইল আয়ে মোয়ে।

‘বসেছিলাম-বুড়োর জ্ঞান নেই, তাই। তাছাড়া, যা বয়স হয়েছে, বেশি চাপ দিলে বাঁচবে না। কলেজ বয়, তোমার প্রশ্নের উত্তর পেলে?’ আয়ে মোয়েকে বিদ্রূপ করল মাইয়ো মিন।

‘আমি গুর হুঁশ ফিরিয়ে আনছি।’

‘শুনলে ছাত্রনেতা কি বলল?’ শিষ্যদের দিকে ফিরে চোখ মটকাল মিন। ‘ও আমাদেরকে কাজ শেখাবে!’ আয়ে মোয়ের দিকে ফিরল আবার। ‘তো দেখিয়ে দাও, কিভাবে জ্ঞান ফেরাতে হয় শিখি।’

‘তোমার স্পর্ধা তো কম নয়, আমাকে চ্যালেঞ্জ করো!’

‘তোমার ওপর দায়িত্ব ছিল বাঙালী বাবুটাকে খুন করা, সে দায়িত্ব কি তুমি পালন করেছ? তা করলে বুড়ো নোয়েকে নিয়ে এখানে আমাদের সময় নষ্ট করতে হত না।’

‘তার আগে তো কাজটা নান তুং আর তোমাকে দেয়া হয়েছিল। তোমরা কেন পারোনি?’

‘থামো তোমরা!’ কর্তৃত্বের সুরে বলল মায়াতকা থুয়ে। ‘তোমরা এভাবে চৌচামেচি করলে কাজ এগোবে? মোয়ে, ওকে একটা সুই দাও।’

পকেট থেকে লেদার দিয়ে মোড়া একটা কেস বের করল মোয়ে। আস্ত একটা ইটের মত দেখতে গুটা।

‘সুই মানে?’ জিজ্ঞেস করল মিন।

কেসের ভেতর মখমলের লাইনিং, তাতে গুয়ে আছে একটা হাইপডারমিক সিরিঞ্জ আর স্বচ্ছ তরল পদার্থ ভরা ছোট একটা ফাইল।

আলোর নিচে দাঁড়িয়ে সিরিঞ্জে ফাইলের ফুইড ভরল মোয়ে। অচেতন থান নোয়ের কাছে এসে সবার দিকে পিছন ফিরে দাঁড়াল সে, কেউ যাতে দেখতে না পায় পোড়া মাংসের গন্ধে নাক সিটকাচ্ছে। নোয়ের গলায় একটা শিরা খুঁজে নিয়ে সলিউশনটুকু ইনজেক্ট করল।

‘জিনিসটা কি?’ মিনের এক শিষ্য জিজ্ঞেস করল।

‘স্টিমিউল্যান্ট,’ বলল মোয়ে।

‘চোখেমুখে পানি ছিটালেও জ্ঞান ফিরত,’ মন্তব্য করল মিন।

‘এতে শুধু জ্ঞান ফিরবে না, তাঁরপর যতই টরচার করা হোক, আর অজ্ঞান হবে না।’

নোয়ে মোচড় ও ঝাঁকি খেলো, তারপর গুণ্ডিয়ে উঠে চোখ মেলে তাকাল।

‘আমার কাজ আবার শুরু হলো।’ জ্বলন্ত কয়লার স্তূপ থেকে টকটকে লাল একটা শিক তুলে নিয়ে নোয়ের সামনে এসে দাঁড়াল মিন।

পাঁচ মিনিট পরই নিজের পরাজয় স্বীকার করল সে, বলল, ‘এই লোককে কথা বলানো অসম্ভব আমার পক্ষে সম্ভব নয়। এরচেয়ে বেশি কিছু করতে গেলে মারা যাবে।’

মিনের কাঁধে হাত রেখে সান্ত্বনা দিল মায়াতকা থুয়ে। ‘তুমি লোক ভাল, মাইয়ো, কিন্তু তোমার কাজে সূক্ষ্ম কৌশলের অভাব রয়েছে।’ গায়ের কোট খুলে

একজনের হাতে ধরিয়ে দিল সে। শার্টের আন্তিন গুটিয়ে আগুন থেকে গরম একটা শিক তুলে নিল।

বাকি সবাই দেখার জন্যে তার দু'পাশে সরে এল।

'একটা কথা স্বীকার করতে হবে,' দলের একজন নিচু গলায় প্রশংসা করল, 'বস' কলেজে লেকচার দেন, পত্রিকায় কবিতা ছাপান, অথচ তারপরও নোংরা হবার ভয়ে হাত গুটিয়ে রাখেন না।'

থুয়ে কাজ শুরু করতেই আর্তনাদ শুরু হলো। কয়েক মিনিট পর কাজে বিরতি দিল সে, সেই সঙ্গে চিৎকারও থেমে গেল। নোয়ের মুখ থেকে দুর্বোধ্য শব্দ বেরুচ্ছে।

'কিছু বলছ, নোয়ে? আমাকে তোমার কিছু বলার আছে?' থুয়ের কণ্ঠস্বর নরম, আদর ও স্নেহ যেন ঝরে পড়ছে।

নোয়ে ঘন ঘন মুখ খুলছে।

'কি বলছে ও?'

'চুপ! শুনতে দাও!' হাত তুলে শব্দ করতে নিষেধ করল থুয়ে, তারপর নোয়ের ঠোঁটের কাছে কান নামাল।

এক মুহূর্ত পর মাথা ঝাঁকিয়ে সিধে হয়ে বসল সে। 'এ গ্যাঙটা হাতুড়িই, পরিষ্কার। ওরাই আমাদের সঙ্গে লাগছে। তবে বাঙালী বাবুকে কেন ওরা সাহায্য করছে তা নোয়ে জানে না। কেউ ওদেরকে প্রচুর টাকা দিচ্ছে, কেন দিচ্ছে তাও ওর জানা নেই। হাতুড়ির লোকজন ফালামের আর্কিওলজিকাল সাইটে গুরুত্বপূর্ণ একজন সাক্ষীকে আটকে রেখেছে।'

'বস, আপনি জাদু জানেন!' গদগদ কণ্ঠে বলল মিন।

'চুপ!' ফিসফিস করল মোয়ে। 'আরও কি যেন বলছে!'

নোয়ের মুখের সামনে আবার কান পাতল থুয়ে। তার ভুরু ধীরে ধীরে কুঁচকে উঠল। 'কি? কি? জোরে বলো, নোয়ে! তোমার কথা আমি শুনতে পাচ্ছি না।'

নোয়ের ঠোঁট নড়ছে।

'এখনও শুনতে পাচ্ছি না।' মাথাটা আরও নিচু করল থুয়ে। নোয়ের মুখ হঠাৎ উঁচু হলো। তার দু'সারি দাঁত থুয়ের কান কামড়ে ধরল।

'উ-উ-উ-ই-ই-ই!' আর্তনাদ বেরুচ্ছে থুয়ের গলা থেকে। 'আমার কান গেল! কান গেল!'

নোয়ের দাঁত কানটা ছাড়ছে না। সবাই মিলে তাকে লাথি, কিল, ঘুসি মারছে। কাজ হচ্ছে না দেখে মিন তার গলা চেপে ধরল।

শরীর মুচড়ে, মাথা ঝাঁকিয়ে কানটাকে মুক্ত করল থুয়ে। 'আমার কানের সর্বনাশ হয়ে গেছে। কামড়ে ফুটো করে দিয়েছে!'

মিনের আঙুল নোয়ের গলার গভীরে ডেবে গেল। 'বেজন্মা শুয়ো! মেরেই ফেলব তোকে...'

'তার আর দরকার নেই,' শান্ত গলায় বলল আয়ে মোয়ে। 'বুড়ো এরইমধ্যে পটল তুলেছে।'

গলা ছেড়ে দিয়ে সিধে হলো মিন।

নোয়ের মাথা একদিকে কাত হয়ে গেল। তার রক্তাক্ত নিশ্চ্রাণ মুখে এক চিলতে শয়তানী হাসি লেগে রয়েছে।

সকাল নটা। তোবড়ানো পিকআপ ট্রাকটা একটা মাইলস্টোনকে পাশ কাটাল। মাইলস্টোনে লেখা রয়েছে—কোকো গুন। তার নিচে লেখা—ফালাম ৫০ মাইল।

রাস্তাটা কাঁচা, মাটির ছোটবড় টিলাকে পাশ কাটিয়ে গাছপালার ছায়ার ভেতর হারিয়ে গেছে। চারদিকে জঙ্গল, তারই ভেতর ছড়ানো ছিটানো ঘর-বাড়ি। পুরানো টিনের চাল আর ভাঙা বেড়ার দেয়াল দেখে বোঝা যায় এলাকার মানুষ স্বচ্ছল নয়। এদিকে ঘর-বাড়ির চেয়ে প্রাচীন সভ্যতার সন্ধানে খোঁড়া পাহাড়ের সংখ্যাই বেশি। খুব একটা উঁচু না হলেও, কোন কোন পাহাড় আয়তনে বিশাল।

আরও তিন মাইল সামনে এরকম একটা বিশালায়তন পাহাড়কে চক্কর দিয়ে এগিয়েছে রাস্তাটা, সরু শাখা উঠে গেছে পাহাড়ের মাথায়। উপত্যকার তিনশো ফুট ওপরে পাহাড়ের সমতল চূড়া।

চূড়ায় কোন গাছপালা নেই। নিচ থেকে পাথরের কিছু স্তম্ভ দেখা গেল। সকালের প্রখর রোদে চকচক করছে কয়েকটা গাড়ি, স্তম্ভগুলোর পাশে দাঁড়িয়ে আছে। চূড়ায় কয়েকজন লোকও আছে।

এটাই ১০৫ নম্বর আর্কিওলজিকাল সাইট। তবে সশস্ত্র যে লোকগুলো ওখানে টহল দিচ্ছে তারা কেউ আর্কিওলজিস্ট নয়।

চক্কর শেষ করে পুরানো পিকআপটা গাছপালার ছায়ার ভেতর ঢুকে একটা বাঁক নিল, পাহাড় চূড়ায় লাইন দিয়ে দাঁড়িয়ে থাকা সেন্সিট্রা এখন আর গাড়িটাকে দেখতে পাচ্ছে না। ড্রাইভার স্পীড কমিয়ে আনল।

ট্রাকের ক্যাবে ড্রাইভার ছাড়া আর মাত্র একজন লোক রয়েছে। লোকটার পরনে দেহাতী পোশাক-ছাপা লুঙ্গি, হাত কাটা ফতুয়া, টায়ার কেটে তৈরি করা স্যাভেল আর শুকনো ঘাস দিয়ে বোনা মাখাল। কাঁধ থেকে লম্বা ও নাদুসনুদুস ক্যানভাসের একটা ব্যাগও ঝুলছে।

গতি আরও কমল, ট্রাকের প্রায় দাঁড়িয়ে পড়ার অবস্থা। ‘ধন্যবাদ, ভাই,’ ড্রাইভারকে বলল আরোহী। ‘তুমি আমাকে অনেক কম পরিসায় পৌঁছে দিলে। বাসে করে এলে দ্বিগুণ ক্রিয়াত গুনতে হত।’

‘আমারও উপরি দু’পরিসা আয় হলো।’ হাসল ড্রাইভার। ‘ফেরার পথে তোমাকে পাব তো?’

‘দশ মিনিট অপেক্ষা কোরো,’ বলল আরোহী। ‘আমাকে দেখতে না পেলে মনে করবে জরুরী কাজে আটকা পড়ে গেছি।’

দরজা খুলে লাফ দিল রানা, মাথা নিচু করে দ্রুত ঢুকে পড়ল ঝোপের আড়ালে, কান পেতে থাকায় শুনতে পেল এঞ্জিনের আওয়াজ দূরে মিলিয়ে যাচ্ছে।

অন্ধের মত কখনোই কোথাও যায় না রানা। কোকো গুন-এ যে বা যারাই ওকে ডেকে থাকুক, দেখা করার আগে আড়াল থেকে তাদের পরিচয় ও গতিবিধি

সম্পর্কে একটা ধারণা পেতে হবে ওকে।

ইয়ানগনের ট্রাক স্ট্যাণ্ডে খোঁজ নিয়ে ফালাম শহরে সওদা নিয়ে আসবে এরকম একজন ড্রাইভারকে পেতে ওর কোন অসুবিধে হয়নি। প্রস্তাব দিতেই ওকে কোকো গুনে পৌঁছে দিতে রাজি হয়ে গেল লোকটা। ও যে ছদ্মবেশ নিয়ে আছে, এটা বুঝেও তাকে কোন প্রশ্ন করেনি সে।

ড্রাইভার সাইটটা চিনত। ওটার চারপাশের জঙ্গলে মেটো পথের কোন অভাব নেই। সাইটটা খুঁজে বের করতে হলে অনেক সময় লাগত রানার।

কিছুক্ষণ অপেক্ষা করার পর নিশ্চিত হলো, ওর খোঁজে কেউ আসছে না। ঝোপ থেকে বেরিয়ে পথে নামূল রানা। মাথার ওপর গাছপালার ছাউনি, পথটা একেবের্কে এগিয়েছে, প্রতিটি বাকের পর বিশ-পঁচিশ গজের বেশি দেখা যায় না। জঙ্গলটা নিস্তব্ধ নয়। গাছে গাছে বানর আর পাখি ছুটোছুটি ও হৈ-চৈ করছে। ঝাঁকে ঝাঁকে ফড়িং আর প্রজাপতি দেখা যাচ্ছে, ঝোপ থেকে ঝোপে উড়ে গিয়ে ফুলে বসছে প্রজাপতিগুলো। কি মনে করে বছরঙা একটা প্রজাপতি রানার কাঁধেও একবার বসল।

রানা পা ফেলছে সাবধানে। মেঠো পথে শুকনো ঝরা পাতা প্রচুর, ওগুলোর নিচে ফাঁদ থাকতে পারে। এখনও তেমন কিছু দেখেনি, তবে পথের প্রতিটি বাকের ডেথট্র্যাপ লুকিয়ে থাকলেও আশ্চর্য হওয়ার কিছু নেই।

এক সময় পথ ছেড়ে একটা ছোট পাহাড়ে চড়ল রানা। গাছপালার ফাঁকে নীল আকাশ দেখা যাচ্ছে। ব্যাগ থেকে বিনকিউলার বের করে গলায় ঝোলাল, তারপর কোথায় আছে দেখার জন্যে লম্বা একটা গাছের মাথায় উঠে এল।

একশো পাঁচ নম্বর সাইট চারশো ফুট বা তারও বেশি উঁচু ছিল, খুঁড়ে তিনশো ফুটে নামিয়ে আনা হয়েছে। পাথরের স্তম্ভগুলো প্রাচীন সভ্যতার নিদর্শন। ওগুলোর পাশে একটা বাড়ি দেখা যাচ্ছে। বাড়ির সামনে দুটো পিকআপ ট্রাক আর একটা জীপ দাঁড়িয়ে আছে।

চওড়া একটা স্তম্ভের মাথায় পাহারায় দাঁড়িয়ে আছে সশস্ত্র একজন সেন্দ্রি, সতর্ক মনোযোগের সঙ্গে নিচের উপত্যকায় চোখ বোলাচ্ছে। তবে পিছনদিকে একবারও তাকাচ্ছে না। তাকালেও গাছের ভেতর রানাকে দেখতে পাবে বলে মনে হয় না।

ছায়ায় বসে আছে আটজন লোক। কারও হাতে চুরট, কেউ চুমুক দিচ্ছে গ্লাসে। গল্প করে অলস সময় কাটাচ্ছে ওরা। সবার কাছেই পিস্তল আছে। অন্তত পাঁচজনের কাছে রাইফেলও আছে।

দিনের আলো থাকতে তেমন কিছু করার নেই রানার। গাছ থেকে নেমে একটা ঝোপের ভেতর ঢুকে আরাম করে বসল। বেলা আরও একটু বাড়তে ব্যাগ থেকে স্যান্ডউইচ বের করে লাঞ্চ সারল। পানির বদলে ফ্লাস্ক থেকে কফি ঢেলে গলা ভেজাল।

রোদের আঁচে চোখে ঘুম চলে এল। ঝোপের ভেতর গাছের ছায়া আছে, কাত হয়ে চোখ বুজল রানা, মাথালটা মুখের ওপর ফেলে রোদের ঝাঁঝ ঠেকাল।

উঁচু জায়গায় অনেক দূরের শব্দও শোনা যায়। দ্রুত গতি গাড়ির আওয়াজে ভেঙে গেল ঘুমটা। কি ঘটছে দেখার জন্যে আরেকবার চড়তে হলো গাছটায়।

সাইটের লোকজন আগের মতই শান্ত ও অলস। গাড়িটাকে পাহাড়চূড়ায় উঠতে দেখছে তারা। পাহাড় পঁচানো রাস্তায় ধুলোর ওড়না উড়িয়ে উঠে যাচ্ছে গাড়ি।

ওটা সেই বাদামী পাজেরো।

সমতল চূড়ায় উঠে থামল পাজেরো। দরজা খুলে আরোহীরা নামছে।

ওদের দিকে বিনকিউলার তাক করল রানা। কয়েকজনকে চিনতে পারল, ইয়ানগনে দেখেছে।

পাজেরোর অবস্থা বেশ কাহিল। হবারই কথা, কারণ খুব বাজে রাস্তা ধরে চারশো মাইলেরও বেশি পথ পেরুতে হয়েছে।

কি কারণে যেন আগন্তুকরা সবাই খুব উত্তেজিত। সাইটে উপস্থিত সঙ্গীদের উদ্দেশ্যে চিৎকার করে কথা বলার সময় হাতের অস্ত্র নাড়ছে। রানা ধারণা করল, কোন দৃষ্টিসংবাদ নিয়ে এসেছে ওরা।

বাকি আটজনও উত্তেজিত ও ব্যস্ত হয়ে উঠল। কয়েকজন ছুটে ঢুকে পড়ল বাড়ির ভেতর। একটু পরই বেরিয়ে এল তারা, হাতে শটগান, মেশিন গান আর অ্যামিউনিশনের বাস্ত্র।

আগন্তুকরা পাজেরোয় উঠল আবার। সাইটের লোকগুলো উঠল দুটো পিকআপ ট্রাকে। দিক বদলে পাহাড় থেকে দ্রুতবেগে নেমে যাচ্ছে পাজেরো, ট্রাক দুটো পিছু নিল। নিচে নেমে ফালামের রাস্তা ধরল ওগুলো।

ধুলোর মেঘ সরে যেতে সাইটে মাত্র তিনজন লোককে দেখতে পেল রানা। স্তম্ভের ওপর থেকে নেমে এসেছে সেক্সি।

গাছ থেকে নেমে ব্যাগ থেকে জিনসের ট্রাইয়ার আর ক্যানভাস শূ বের করে পরল রানা, গায়ে চাপাল নীল শার্টের ওপর লেদার জ্যাকেট। পিস্তল, শ্বেনেড ইত্যাদি ব্যাগ থেকে বের করে যেখানে যা রাখার রেখে পাহাড় থেকে নেমে এল। রাস্তা থেকে দূরে থাকল ও, একশো পাঁচ নম্বর সাইটের দিকে যাচ্ছে। গাছপালা ও ঘন ঝোপ এড়িয়ে যেতে হচ্ছে, হাঁটার গতি তাতে কমে এলেও ভাল আড়াল পাওয়া যাচ্ছে।

সাইটটা সম্পর্কে কিছু তথ্য সংগ্রহ করেছে রানা, আরেকবার স্মরণ করল সব। দশ বছর আগে ব্রিটিশ আর্কিওলজিকাল সোসাইটির সদস্য ড. মুহিত হায়দারের তত্ত্বাবধানে এই পাহাড় কাটা হয়। মায়ানমার আর্কিওলজিকাল সোসাইটির রেকর্ড বৃকে বলা হয়েছে, একশো পাঁচ নম্বর সাইটে প্রাচীন বৌদ্ধ যুগের কিছু মন্দিরের ধ্বংসাবশেষ ছাড়া আর কিছু পাওয়া যায়নি। ড. মুহিত হায়দার নিখোঁজ হবার পর প্রজেক্টটা সরকার বাতিল ঘোষণা করে।

ইয়ানগনের আন্ডারগ্রাউন্ড থেকেও কিছু তথ্য সংগ্রহ করেছে রানা। প্রজেক্ট বাতিল ঘোষণা করার পর সরকারের উচিত ছিল আবিষ্কৃত ধ্বংসাবশেষ সংরক্ষণের ব্যবস্থা করা, কিন্তু কি কারণে কে জানে তা করা হয়নি। খালি পড়ে

থাকার সুযোগে একটা গ্যাঙ একশো পাঁচ নম্বর সাইট দখল করে নেয়। পাজোরো জীপের আরোহীরা সেই গ্যাঙেরই সদস্য।

পাহাড়ের ঢাল বেয়ে চূড়ায় উঠে এল রানা। ভাঙা প্রাচীর, বিধ্বস্ত মন্দিরের অংশ ইত্যাদি ছড়িয়ে ছিটিয়ে পড়ে আছে প্রাচীন শহরের চৌরাস্তায়। আড়াল নিয়ে এগোতে রানার কোন সমস্যা হচ্ছে না।

আড়াল থেকেই দেখতে পেল সেন্টি আর তার দুই সঙ্গী সেই আগের জায়গাতেই দাঁড়িয়ে আছে। হোলস্টার থেকে বের করে পিস্তলটা হাতে নিল রানা। ওরা কি বলাবলি করছে শুনতে পেলে অনেক প্রশ্নের উত্তর পাওয়া যেত, কিন্তু এখনি ঝুঁকি নিয়ে আরও কাছে যেতে রাজি নয় ও।

মিনিট পাঁচেক পর লোকগুলোর উত্তেজিত আলোচনা থামল। স্তম্ভের মাথায় তাম্র পোস্টে ফিরে যাচ্ছে সেন্টি। বাকি দু'জন ঢুকল বাড়ির ভেতর।

সেন্টি বিশ-বাইশ বছরের তরুণ, মাথার চুল কাঁধ পর্যন্ত লম্বা। গলা থেকে বিনকিউলার আর কাঁধ থেকে রাইফেল ঝুলছে।

সরু একটা পথ দেখতে পাচ্ছে রানা, বারান্দার ভাঙা একটা পাঁচিলের ভেতর দিয়ে এগিয়েছে। ফাঁকটার পাশে কয়েকটা পাথরের আড়ালে উবু হয়ে বসে থাকল ও। ওর অস্তিত্ব সম্পর্কে বেখেয়াল, ফাঁক গলে বেরিয়ে যাচ্ছে সেন্টি।

ঝট করে সিঁধে হলো রানা, সেন্টির মাথার পিছনে পিস্তল দিয়ে বাড়ি মারল।

নিঃপ্রাণ বোঝা হয়ে গেল তরুণ। টেনে তাকে পাঁচিলের আড়ালে নিয়ে এসে শোয়াল রানা। তারই বেল্ট খুলে হাত আর মোজা খুলে পা দুটো এক করে বাঁধল। ছুরি দিয়ে কাটা শার্টের ফালি মুখ বাঁধার কাজে লাগল। অন্তত এক ঘণ্টার আগে সেন্টির জ্ঞান ফিরবে না, তবু রানা কোন ঝুঁকি নিতে রাজি নয়। সেন্টির রাইফেলটা একটা ঝোপের ভেতর লুকিয়ে রাখল ও।

বাড়িটার পিছন দিকে চলে এল রানা। পিছনের দেয়ালে বড় একটা জানালা দেখা যাচ্ছে। জানালায় গরাদ বা কাঁচ নেই, শুধু মশা-মাছি ঠেকাবার জন্যে তারের জাল লাগানো আছে, তাও ছেঁড়া। জানালার ভেতর ছায়ামূর্তি হাঁটাচলা করছে, তবে কেউ তারা বাইরে তাকাচ্ছে না।

আকাশের গায়ে ছবি হয়ে দাঁড়িয়ে থাকাটা উচিত হচ্ছে না, ফ্রল করে বাড়িটার সামনের দিকে চলে এল রানা।

বাড়িটা রাস্তার দিকে মুখ করা। সামনের ফাঁকা জায়গায় দাঁড়িয়ে আছে জীপটা। বাড়ির দরজার পাশে, বেশ খানিকটা ওপরে, ছোট একটা জানালা দেখা যাচ্ছে। বাড়ির ভেতর কিভাবে ঢোকা যায় ভাবছে রানা, এই সময় দরজা খুলে বাইরে এসে দাঁড়াল এক লোক।

লম্বা-চওড়া কাঠামো, চোখে-মুখে হিংস্র ভাব, দু'কোমরের হোলস্টারে দুটো সাইডআর্ম। কয়েক পা হেঁটে এসে একটা ঝোপের সামনে দাঁড়াল, ট্রাউজারের চেইন ঝুলছে।

লোকটাকে হালকা হওয়ার সময় দিল রানা। ঠিক যখন চেইন লাগাচ্ছে, অনুভব করল খুলির পিছন দিকে শক্ত কি যেন ঠেকল। 'একদম চুপ!' হিস হিস

করল রানা, পিস্তল দুটো হোলস্টার থেকে তুলে নিয়ে ঝোপের দিকে ছুঁড়ে দিল।
'সাপ কোন শব্দ করে না। পিছন থেকে ছোবল মারে,' হঠাৎই যেন দার্শনিক হয়ে পড়ল লোকটা।

'শ-শ-শ।'

'তবে তুমি বোধহয় কামড়াবে না। কি চাই?'

'ঠিক ধরেছ। তোমার সঙ্গে আলাপ করতে চাই,' বলল রানা। 'চলো, ভেতরে ঢুক।'

বন্দীকে নিয়ে বাড়ির ভেতর ঢুকল রানা।

চোদ্দ

'মাইয়ো মিন, জলদি! দেখো কি ঘটছে ওখানে!'

উপত্যকার আরেক প্রান্তে এটাও একটা পাহাড়। চূড়ায় দাঁড়িয়ে একশো পাঁচ নম্বর সাইটের দিকে তাকিয়ে আছে লোকটা, খেয়াল নেই তার বিনকিউলারের লেন্সে লেগে প্রতিফলিত রোদ অনেক দূর থেকে দেখা যাবে।

রানার মার খেয়ে অজ্ঞান হয়ে গেছে সেন্টি, তা না হলে লোকটার অস্তিত্ব তার চোখে ঠিকই ধরা পড়ত।

'কি ব্যাপার, থান্ট?' জিজ্ঞেস করল মিন।

'নিজেই দেখো,' বলে বিনকিউলারটা মিনের হাতে ধরিয়ে দিল থান্ট।

একশো পাঁচ নম্বর সাইটের দিকে তাকাল মিন। হাতুড়ির একজন সদস্যকে চিনতে পারল সে, কিন্তু তার পিঠে পিস্তল ঠেকিয়ে দাঁড়িয়ে থাকা লোকটাকে ভাল করে দেখতে পাচ্ছে না। 'কে ও? আমাদের কোন লোক বলে তো মনে হচ্ছে না!'

বন্দীকে নিয়ে বাড়ির দিকে হাঁটছে লোকটা। মুহূর্তের জন্যে ঘাড় ফেরাল সে, বিনকিউলারের লেন্সে এবার তার মুখ ধরা পড়ল।

'কি সাংঘাতিক!' আঁতকে উঠল মিন। বিনকিউলার নামিয়ে হাতের উল্টোপিঠ দিয়ে চোখ রগড়াল। 'ও তো মাসুদ রানা!' আবার চোখে বিনকিউলার তুলল সে, তবে ইতিমধ্যেই বন্দীকে নিয়ে বাড়ির ভেতর অদৃশ্য হয়ে গেছে রানা।

'মাসুদ রানা? ওই শালাই নান তুংকে খুন করেছে?' জানতে চাইল থান্ট। 'কিন্তু এখানে কি করছে ও?'

হঠাৎ হাসল মিন। 'ওর দুর্ভাগ্যই ওকে এখানে টেনে এনেছে।'

'কিন্তু বস্ বললেন হাতুড়ির সঙ্গে হাত মিলিয়েছে লোকটা। তাহলে ওদের একজনকে পিস্তল ঠেকিয়েছে কেন?'

'তা জেনে আমাদের দরকার কি! আমরা শুধু জানি, মাসুদ রানা আমাদের কাজ পানির মত সহজ করে দিচ্ছে।' হাঁক-ডাক ছেড়ে দলের পিস্তলবাজ লোকদের জড়ো করল মিন। 'এখনি রওনা হচ্ছি আমরা। সবাই তৈরি হয়ে নাও।

মনে থাকে যেন, হামলা শুরু হলে কারও কোন গাফিলতি বা গা-বাঁচানো ভাব আমি সহ্য করব না। ওদের আস্তানার প্রতিটি কুকুর খুন হওয়া চাই।' পকেট থেকে একটা হ্যান্ড গ্রেনেড বের করল মিন। 'সবাইকে বলে দাও, হামলায় আমি নেতৃত্ব দেব।'

বন্দীর নাম উনু। বাড়ির ভেতর তার সঙ্গীর নাম তুতুপাই।

ওরা এক লোককে আটকে রেখেছে। তার নাম জা জা খুনপুন।

তিনজনকেই দেয়ালে পিঠ ঠেকিয়ে পাশাপাশি দাঁড়িয়ে থাকতে বাধ্য করল রানা, নিজে একটা চেয়ারে বসল। পিস্তলটা কারও দিকে তাক করেনি, কোলের ওপর ফেলে রেখেছে।

উনু গম্ভীর ও চুপচাপ। তুতুপাই নার্ভাস।

'আপনার পরিচয়?' প্রশ্নটা তুতুপাইই করল।

'তোমরা না, প্রশ্ন করব আমি,' বলল রানা। 'তোমাদের লোকজন তাড়াহুড়ো করে কোথায় গেল?'

'নাচ-গান হবে, তাই মেয়ে আনতে গেছে,' জবাব দিল উনু। 'চিন্তা কোরো না, এখনি সবাই ফিরে আসবে।'

'তোমরা সত্যি কথা বলছ না। আমাকে দাওয়াত দিয়ে অন্য কাজে চলে গেল-তাও মেয়ে আনার মত একটা কাজে?' মাথা নাড়ল রানা।

উনু আর তুতুপাই দ্রুত দৃষ্টি বিনিময় করল। তুতুপাইকে দেখে মনে হলো, হঠাৎ তার চোখের ঝাপসা ভাবটা কেটে গেছে। 'চিনি! আপনাকে আমি চিনি! আপনি মাসুদ রানা! এই ব্যাটা, উনু, ওর কথাই তো চুয়ান আমাদেরকে বলেছে।'

'কিন্তু চুয়ান কি এ-কথা বলেছিল যে মাসুদ রানা আমার অস্ত্র কেড়ে নেবে?'

'এখন যখন বোঝা যাচ্ছে পরস্পরের বন্ধু আমরা, উনি নিশ্চয়ই তোর পিস্তল দুটো ফেরত দেবেন।' দেয়াল থেকে পিঠ তুলে রানার দিকে পা বাড়াল তুতুপাই।

'না,' বলল রানা। 'জাম্বুগা ছেড়ে নড়বে না।'

'আমরা বন্ধু, এটা আপনি স্বীকার করেন না?' জিজ্ঞেস করল তুতুপাই, রীতিমত আহত দেখাচ্ছে তাকে। 'ভেবে দেখুন না, বন্ধু না হলে আপনার জন্যে ওকে ধরে আনতাম?' ইঙ্গিতে জা জা খুনপুনকে দেখাল সে।

'ওর কথা পরে,' বলল রানা। 'আগে নিজেদের পরিচয় দাও।'

'আমরা হাতুড়ি!' সগর্বে বলল তুতুপাই।

'সরিমানে কি তোমাদের পেশা পেরেক ঠোকা?' জিজ্ঞেস করল রানা। 'আমরা হাতুড়ি-কথাটার মানে কি?'

তুতুপাই হতভম্ব। 'কি আশ্চর্য, আপনি আমাদের কথা শোনেননি?'

রানা চুপ করে থাকল।

'আরে, ধ্যাত আমরাই তো ভুল করছি!' হাসছে তুতুপাই। 'কিভাবে গুনবেন, আপনি বিদেশী না!'

'বিদেশী স্পাই,' বিড়বিড় করল উনু।

‘তুই চুপ থাক, উনু!’ সঙ্গীকে ধমক দিয়ে রানার দিকে ফিরল তুতুপাই।
‘আমরা হাতুড়িরা অসাম্প্রদায়িক ও দেশপ্রেমিক দস্যু।’

হেসে ফেলল রানা।

‘হাসবেন না, স্যার, হাসবেন না! আমি একটুও বাড়িয়ে বলছি না। সত্যি আমরা অসাম্প্রদায়িক। আমাদের দলে সব ধর্মের ডাকাত আছে। জিজ্ঞেস করবেন আমরা দেশপ্রেমিক ইলাম-কিভাবে? শুনুন, আমরা মায়ানমার-ভারত সীমান্ত এলাকায় ডাকাতি করি, কিন্তু চোরাচালানের সঙ্গে কোন সম্পর্ক রাখি না। ভারতের বিচ্ছিন্নবাদীরা চোরাচালানের সঙ্গে জড়িত তাই ওদেরকে আমরা ঘৃণা করি। ওদেরকে সাহায্য করে আইএসআই, তাই পাকিস্তানী স্পাইদেরও আমরা ঘৃণা করি। আর কমিউনিস্টদের দু’চোখে দেখতে পারি না, কারণ মুখে বিরোধিতা করলেও তলে তলে সামরিক স্বৈরশাসককে সাহায্য করে ওরা। এ-সব কথা থাক, স্যার। আপনার জন্যে ওই ব্যাটাকে ধরে এনেছি, আপনার যা জানার জেরা করে জেনে নিন।’

বন্দী লোকটার বয়স হবে প্রায় পঞ্চাশ। ধুলোময়লা লেগে থাকলেও তার কাপড়চোপড় বেশ দামী। যতটা না সন্তুষ্ট তার চেয়ে বেশি বিষণ্ণ দেখাচ্ছে তাকে।

রানা তার নাম উচ্চারণ করল, ‘জয়ে-জয়ে খুনপুন।’

‘আপনি আমার নাম জানলেন কিভাবে?’ হান গলায় জিজ্ঞেস করল খুনপুন।
‘এরা আমাকে শুধু শুধু ধরে এনেছে। আপনি কি ওদের হাত থেকে আমাকে ছাড়িয়ে নিয়ে যাবেন?’

সরাসরি জবাব না দিয়ে রানা বলল, ‘মি. খুনপুন, আমি আপনার ফাইল পড়েছি। ফালাম ড্যাম অ্যান্ড রেলরোড প্রজেক্টের একজন এঞ্জিনিয়ার ছিলেন আপনি।’

‘ওই বাঁধ এখনও আমার কাছে একটা দুঃস্বপ্ন!’ ধীরে ধীরে খুনপুনের মাথা নুয়ে এল। ‘এখন মনে হয় ওই নোংরা টাকা নেয়ার বদলে নিজের হাতটা কেন কেটে ফেলিনি!’

‘কে আপনাকে টাকা দিল? কেন দিল?’

‘আমার ভাগটা আমি চীফ এঞ্জিনিয়ারের কাছ থেকে পাই। রেলরোড আর ড্যামসাইট ছেড়ে বাইরে বেরুনো নিষেধ করে দেয়া হয়, ফলে চীফ এঞ্জিনিয়ার কোথেকে টাকা নিয়ে এল তা আমি বলতে পারব না। তবে গুজব শুনছিলাম পাকিস্তানী এঞ্জিনিয়াররাই মার্কিন আর তাইওয়ানী আর্টিফ্যাক্ট সংগ্রাহকদের কাছ থেকে টাকা আনছে।’

‘কিসের বিনিময়ে আপনাকে টাকা দেয়া হলো?’

‘মুখ বন্ধ রাখার বিনিময়ে।’

‘কোন বিষয়ে?’

‘বিষয় যদিও দুটো ছিল, তবে আমরা স্থানীয় এঞ্জিনিয়াররা একটার সঙ্গে জড়িত ছিলাম-ড্যাম ও রেলরোড।’

‘কি কি গোপন তথ্য জানতেন আপনি?’

‘রড, সিমেন্ট, ইট, বালি—অর্থাৎ ড্যাম তৈরির জন্যে যা যা দরকার সবই নিম্নমানের সাপ্লাই দেয়া হচ্ছিল। অদ্ভুত এক কৌশলে সংশ্লিষ্ট সবাইকে খুশি রাখছিল পাকিস্তানী এঞ্জিনিয়াররা। কর্মবিরতিতে উৎসাহ দিয়ে শ্রমিকদের মজুরি বাড়াবার ব্যবস্থা করে তারা। ঠিকাদারদের বিল পরিশোধের সুপারিশ করে কাজের মান পরীক্ষা না করেই। সাপ্লাইয়ারদের কাছ থেকে নিম্নমানের নির্মাণ সামগ্রী নিয়ে দাম মেটানো হয় উন্নতমানের। স্থানীয় প্রশাসনিক কর্মকর্তাদের বশে রাখে মেয়েমানুষ আর মদ যুগিয়ে। ফলে কেউ তারা মুখ খোলেনি। সত্যি কথা বলতে কি, রোহিঙ্গা গেরিলারা ডিনামাইট দিয়ে ড্যামটা উড়িয়ে দেয়ায় আমার চেয়ে খুশি কেউ হয়নি...’

‘কেন?’

‘কারণ, বর্ষা মরশুম শুরু হলে এমনতিতেই ওটা ভেঙে যেত। তাতে ব্যাপক প্রাণহানির ঘটনা ঠেকানো যেত না।’

‘ড্যাম ভেঙে যেত, এটা আপনার প্রফেশনাল অভিমত?’

‘ফালাম ড্যামের ভবিষ্যৎ নির্ধারিত হয়ে যায় কাজে হাত দেয়ার পরপরই। কোনও অবস্থাতেই ওটা কয়েক মাসের বেশি টিকত না।’

‘দেখা যাচ্ছে দরকারী অনেক তথ্যই আপনি পাচ্ছেন, স্যার,’ বলল তুতুপাই। ‘ঘুষখোর বেইমানটাকে বাঁচিয়ে রেখে আমরা আপনার উপকারই করেছি, তাই না?’

‘সম্ভবত,’ বলল রানা। ‘এতে তোমাদের কি স্বার্থ?’

‘স্বার্থ? কোন স্বার্থ নেই! বললাম না, দস্যু হলেও আমরা দেশপ্রেমিক।’

‘ওর একটা কথাও আপনি বিশ্বাস করবেন না,’ বলল খুনপুন। ‘ওরা অত্যন্ত নীচ প্রকৃতির গুণ্ডা ছাড়া আর কিছু নয়।’

‘চোপ, শয়তানের ধাড়ী!’ ঝেঁকিয়ে উঠল উনু। ‘আর একটা কথা বলবি তো হাত-পা গুঁড়ো করে ফেলব।’

‘তোমাদের বাকি লোক ওরকম ব্যস্তভাবে কোথায় গেল?’ তুতুপাইকে জিজ্ঞেস করল রানা।

‘ঠিক আছে, বলছি।’ তুতুপাইকে গম্ভীর দেখাল। ‘বস্ যখন আপনাকে সাহায্য করতে চান, আপনাকে সত্যি কথাই বলা উচিত। মাওপন্থী কমিউনিস্ট গুণ্ডারা ফালামে আমাদের মূল আস্তানায় হামলা চালিয়েছে। খবর পেয়ে যুদ্ধ করতে গেছে ওরা।’

চেয়ার ছেড়ে রানা দাঁড়াল।

বোকার মত মুখ চাওয়াচাওয়ি করল উনু আর তুতুপাই। তারপর তুতুপাই বলল, ‘আপনি কোথাও যাচ্ছেন, স্যার?’

‘বাইরে একটা জীপ দেখলাম,’ বলল রানা। ‘চাবি আছে?’

‘তা আছে, কিন্তু...’

‘যত তাড়াতাড়ি সম্ভব এখান থেকে সরে যেতে হবে,’ বলল রানা। ‘তোমাদের ফালাম আস্তানায় হামলাটা ডাইভারশান হতে পারে—খুনপুনের কাছ

থেকে তোমাদের লোকজনকে সরিয়ে দিতে চেয়েছে।'

'সর্বনাশ! চলুন পালাই!'

উনু আর তুতুপাই দরজার দিকে ছুটল। আগে পৌছাল উনু, হ্যাঁচকা টান দিয়ে কবাট খুলে ফেলল সে।

একটা হাই-পাওয়ারড বুলেট তার বুকে আঘাত করল। পিঠ থেকে বিস্ফোরিত হলো রক্ত, মাংস আর হাড়।

দেয়ালে পিঠ ঠেকিয়ে কবাটে লাথি মারল তুতুপাই, দরজা বন্ধ হয়ে গেল। কবাট ফুটো করে কয়েকটা বুলেট ঢুকল ভেতরে, পাথরের দেয়ালে বাড়ি খেয়ে ছুটোছুটি করল কিছুক্ষণ।

ঘরের এক কোণে সরে গেল খুনপুন, চোখ বুজে হাত দিয়ে কান ঢেকে রেখেছে। ঠোঁটের কাঁপুনি থামাতে পারছে না।

বাড়ির পিছন থেকে একটা চিৎকার ভেসে এল। 'মাসুদ রানা, এটা তোমার জন্যে!'

জানালায় ছোঁড়া জাল গলে কিছু একটা ঢুকল ঘরে, ঠক করে পড়ল মেঝেতে। জিনিসটা স্থির হবার আগেই চিনতে পারল রানা।

পিন খোলা ঘেনেড।

বাঁচার মাত্র একটা পথই খোলা দেখল রানা। পিছনের জানালা লক্ষ্য করে লাফ দিল।

প্রচণ্ড শব্দে বিস্ফোরিত হলো ঘেনেড।

জানালায় বাইরে মাটিতে পড়ল রানা, শরীরটাকে গড়িয়ে দিতে সরাসরি ঢাল বেয়ে নেমে এল একটা গর্তে।

ঘেনেড ছোঁড়ার পর এই গর্তেই কাভার নিয়েছে মাইয়ো মিন। রানাকে চিনতে পেরে চেষ্টা করে উঠল সে, 'তুমি!'

এখনও পিস্তলটা ধরে আছে রানা। সেটা লক্ষ্য করে ছোঁ মারল মিন। পিস্তল সরিয়ে নিল রানা। মিন ওর কজি মুঠোয় নিয়ে মাটিতে চেপে ধরল, খালি হাতের আঙুল চালান চোখ লক্ষ্য করে।

ঝট করে মাথা নামাল রানা। মিনের ধারাল নখ রক্তাক্ত রেখা তৈরি করল কপালে।

ঘুসি মেরে প্রথমে মিনের নাকটা ভেঙে দিল রানা। মুঠোয় টিল পড়তে পিস্তল ধরা হাত মুক্ত করল, মাজল ঠেকাল মিনের পাঁজরে, তারপর ট্রিগার টেনে দিল।

শব্দটা ভোঁতা শোনাল। মাজল ফ্লোর লার্শের শাট পুড়িয়ে দিয়েছে।

একটা গভীন দিয়ে মিনের কাছ থেকে সরে এল রানা। পরমুহূর্তেই এক রাশ ধুলো উড়ল, বুলেটটা পড়েছে ওর মাথার মাত্র তিন ইঞ্চি দূরে।

থান্ট দাঁড়িয়ে আছে বাড়িটার কোণে, দ্বিতীয়বার গুলি করার আগে সময় নিয়ে লক্ষ্যস্থির করছে।

শরীরটা রানা অকস্মাৎ উল্টোদিকে গড়িয়ে দিল, ফলে থান্টের দ্বিতীয় গুলিটাও লাগল না। দ্বিতীয় বার ব্যর্থ হয়ে থান্ট বিস্মিত, এই সুযোগে পিস্তল ধরা

হাতটা লম্বা করে টিগার টানল রানা।

পায়ে গুলি খেয়ে হাঁটুর ওপর খাড়া হলো থান্ট। রানার দ্বিতীয় বুলেট তার বুকে লাগল।

পাথরের কড়ি থেকে ধোঁয়া বেরুচ্ছে। রানা জানে খুনপুন আর তুতুপাইয়ের কোন সাহায্য দরকার নেই। ছোট একটা ঘরে গ্রেনেড ফাটার পরও কেউ যদি বেঁচে থাকে, সেটা তার দুর্ভাগ্যই বলতে হবে।

অগভীর গর্তটা বাড়ির সঙ্গে সমান্তরাল রেখা ধরে এগিয়েছে। ক্রল করে দশ গজ আসার পর মাথা তুলল রানা।

ছ'জন সশস্ত্র লোকের একটা অর্ধবৃত্ত বাড়িটার দিকে এগোচ্ছে। ওরা অ্যাডভান্সড টীম। আক্রমণকারীদের মূল শক্তি দুটো গাড়িতে ভাগ হয়ে আছে। একটা গাড়ি চূড়ায় ওঠার অর্ধেক পথ পার হয়ে এসেছে। দ্বিতীয় গাড়িটা নিচে, উপত্যকায়, একশো পাঁচ নম্বর সাইট সীল করে দিয়ে দাঁড়িয়ে আছে।

রানার ব্যাগটা বাড়ির ভেতর। ছ'টা গ্রেনেড আর পিস্তলের জন্যে চারটে স্পেয়ার ক্লিপ আছে তাতে। পিস্তলে এখন মাত্র পাঁচ রাউন্ড গুলি। ছুরিটা ডান বাহুর সঙ্গে স্ট্র্যাপ দিয়ে আটকানো। খুদে বোমাটা উরুর ভেতর দিকে, টেপ খুললেই চলে আসবে হাতে।

থান্ট আর মিনই শুধু রানাকে বাড়ি থেকে বেরিয়ে আসতে দেখেছে।

এদিকে গর্তটা ছাড়া গা ঢাকা দেয়ার মত আর কিছু নেই। নিজের উপস্থিতি প্রকাশ না করে পিছনের ধ্বংসাবশেষ বা দু'পাশের জঙ্গলের দিকে নেমে যাওয়া সম্ভব নয়। শত্রুদের হাতে শুধু হ্যান্ডগান থাকলে দৌড়াবার একটা ঝুঁকি নিতে পারত। কিন্তু ওদের প্রায় সবার হাতেই রাইফেল দেখা যাচ্ছে।

টেপ খুলে উরু থেকে মিনি-গ্রেনেডটা নিয়ে পকেটে রাখল রানা।

জীপটা ওর কাছ থেকে পঞ্চাশ ফুট দূরে। অ্যাডভান্স টীমের কেউই সেদিকে তাকাচ্ছে না। সবার মনোযোগ বাড়ির দিকে, বিস্ফোরণের পরও কেউ বেঁচে থাকতে পারে ভেবে উদ্ভিগ্ন।

মিনি-গ্রেনেড বের করে লাল বোতামে চাপ দিল রানা। গর্ত থেকে উঠে জীপ লক্ষ্য করে ছুটছে।

রাইফেলধারীদের একজন চোখের কোণ দিয়ে দেখতে পেল। ঝট করে ঘুরে চিৎকার দিয়েই গুলি করল সে।

প্রথম গুলিটা অল্পের জন্যে লাগল না। লোকটা দ্বিতীয়বার গুলি করার আগেই খুদে গ্রেনেডটা ছুঁড়ে দিল রানা। একেবেঁকে ছুটল, বুলেটগুলো কানের পাশ দিয়ে বেরিয়ে গেল। একটা বুলেট দুই পায়ের ফাঁকে ধুলোর বিস্ফোরণ ঘটাল।

রানা বাক নিল, গাড়িয়ে দিল শরীরটা, সিধে হয়ে আরেক দিকে ছুটল। শেষ আরেকবার দিক বদলে পৌঁছে গেল জীপের কাছে।

বুম করে বিস্ফোরিত হলো গ্রেনেড।

কয়েক সেকেন্ডের মধ্যে রানা আর অ্যাডভান্স টীমের মাঝখানে কালো ধোঁয়ার মেঘ তৈরি হলো।

দেখতে না পেলোও গুলি করছে ওরা।

মাথা নিচু করে জীপে চড়ল রানা। ড্যাশবোর্ডের তলাটা হাতড়াল, ইগনিশন ওয়্যারগুলো পেয়ে ছিঁড়ে বের করে আনল বাইরে।

বোকার মত সাহস দেখাতে গিয়ে কালো ধোঁয়া থেকে ছুটে বেরিয়ে এল এক লোক। কাশছে, বলা যায় আধ কানা, গুলি করছে শূন্যে।

তার লোকেরা ধোঁয়ার ভেতর থেকে গুলি করছে, ছুটে আসা একটা গুলির পথ আটকাল সে। পড়ে গেল, তবে মারা যায়নি। মারা গেল রানার গুলিতে।

আবরণ থেকে বেরিয়ে আসা তামার দুটো তার এক করল রানা। আগুনের ফুলকি ছুটল ঠিকই, কিন্তু ওই পর্যন্তই।

হোঁচট খেয়ে আরেক লোক ধোঁয়া থেকে বেরুল। রানার গুলি খেয়ে ছিটকে পড়ল, গোঙাচ্ছে আর মোচড় খাচ্ছে।

তার দুটো আবার এক করল রানা। এঞ্জিন স্টার্ট না নিলে লাফিয়ে নেমে ঝেড়ে দৌড় দেবে।

এঞ্জিন কাশল। রানা থ্রটল খুলতে জ্যান্ত হয়ে উঠল মোটর। গিয়ার দিয়েই ক্লাচ ছেড়ে দিল ও। লাফ দিয়ে ছুটল জীপ।

পিছন থেকে গুলি হলো। রিয়ার প্যানেলে কয়েকটা ফুটো তৈরি হলো।

পেঁচানো রাস্তা থেকে সমতল চূড়ায় উঠে এল শত্রুপক্ষের গাড়ি, নাক বরাবর জীপের দিকে আসছে। এক হাতে স্টিয়ারিং, রানার অপর হাতে পিস্তল। সামনের গাড়ি এত কাছে, ফ্রন্ট সীটের আরোহীদের হাঁ করা মুখ দেখা যাচ্ছে। দু'বার ট্রিগার টানল রানা।

একটা গুলি লাগল। উইন্ডশীল্ড ভেদ করে ড্রাইভারের কপাল ফুটো করে দিয়েছে। পরমুহূর্তে গাড়িটা যেন খেপে গেল।

রাস্তাটা চূড়ার কিনারা ঘেঁষা। ড্রাইভারের পাশের লোকটা হুইল ধরে নিয়ন্ত্রণ ফিরে পেতে চাইল। কিন্তু পারল না।

কিনারা থেকে লাফ দিল গাড়িটা। কয়েক মুহূর্ত শূন্য থাকার পর ঢালের ওপর পড়ল সেটা, তারপর ডিগবাজি খেতে খেতে তিনশো ফুট নিচের জঙ্গলে নেমে গেল, যাবার পথে যেখানে খুশি ফেলে দিয়ে গেছে আরোহীদের।

পিস্তল হোলস্টারে রেখে দু'হাতে হুইল ধরল রানা। আর মাত্র একটা বুলেট আছে।

পাহাড় পেঁচানো সরু রাস্তা ধরে নিচে নামছে জীপ।

পাহাড়ের নিচে অপেক্ষা করছে প্রকাণ্ড একটা কালো মার্সিডিজ। ওটার পাশেই অপেক্ষা করছে পাঁচজন সশস্ত্র খুনী। অর্ধেক পথও নামেনি জীপ, টার্গেট প্র্যাকটিস শুরু করে দিল তারা।

রানাকে নিচের রাস্তাতে নামতে হবে, তবে এমন কোন কথা নেই যে রাস্তা দিয়েই। পুরো এক পাক বাকি থাকতে রাস্তা ছেড়ে ঘাস মোড়া ঢালে নেমে এল জীপ, ঘন ঘন জোর ঝাঁকি দিয়ে রানাকে ফেলে দিতে চাইল, নিজেও উল্টে পড়ার উপক্রম করল। ভাগ্য ভাল যে কোনরকম দুর্ঘটনা ঘটায় আগেই নিচের রাস্তায়,

কালো মার্সিডিজের কাছ থেকে ত্রিশ গজ দূরে, প্রায় একটা প্লেনের ভঙ্গিতে ল্যান্ড করল জীপ। নিয়ন্ত্রণ ফিরে পেতে যা দেরি, পূর্বদিকে ছুটল রানা। ম্যাপ দেখা আছে, কাজেই জানে যে ওদিকে ইরাবতী নদী পড়বে। তা পড়ুক, নদীর ওপর গত বছর একটা ব্রিজও বানানো হয়েছে।

কালো মার্সিডিজ ধাওয়া করল জীপটাকে।

পনেরো

রাস্তা কাঁচা, তবে জীপটা খুবই শক্ত আর মজবুত। তাছাড়া, মার্সিডিজটা এখনও অনেক পিছিয়ে আছে। রানা খুব একটা চিন্তিত নয়।

কিন্তু তারপরই গ্যাসের গন্ধ ঢুকল নাকে।

আধঘণ্টা জীপ ছুটিয়ে কয়েকটা পাহাড়কে পাশ কাটিয়েছে রানা, সামনে এখন খোলা উপত্যকা। আরও সামনে নদী। নদীর ওপারে ছোট একটা শহর, শহরের এক ধারে লম্বা রেললাইন।

ট্রেনটা এত দূরে, খেলনার মত লাগছে। অলস গতিতে এগিয়ে আসছে শহরের দিকে।

গ্যাসের ঝাঁঝ আরও বাড়ছে। এঞ্জিনে ছন্দপতন ঘটল, যেন কাশতে চায়।

পিছন দিকে তাকাল রানা। গ্যাস ট্যাংক ফুটো হয়নি, চিড় ধরেছে সামান্য। চুইয়ে চুইয়ে বেরুচ্ছে।

দূরের মার্সিডিজ কাছে চলে আসছে।

ঘাড় সোজা করে ব্রিজের দিকে তাকাল রানা। সড়ক, কাঠের ব্রিজ; এত সড়ক যে প্রতিবার মাত্র একটা গাড়ি পার হতে পারবে।

ব্রিজের ঠিক মাঝখানে জীপ থামিয়ে নেমে পড়ল রানা।

স্টেশনটা ব্রিজের কাছ থেকে বেশি দূরে নয়। একদল দেহাতী নারী-পুরুষ কৌতূহলী চোখে দেখছে ওকে। শার্টের নিচের দিকটা টেনে ছিড়ে ফেলল রানা। টুকরোটা ফুয়েলে ভেজাল, তারপর গ্যাস ট্যাংকের ক্যাপ খুলে গুঁজে দিল ভেতরে।

মার্সিডিজ আর মাত্র একশো গজ দূরে।

লাইটার জ্বালল রানা। শার্টের ছেঁড়া টুকরোয় আগুন ধরাল। দপ করে জ্বলে উঠল ওটা। রানা ছুটছে।

তিনবার হুইসেল দিল ট্রেন, স্টেশনে পৌঁছাতে যাচ্ছে।

ব্রিজে উঠল মার্সিডিজ, ব্রেক কষে দাঁড়িয়ে পড়ল।

আগুনটা গ্যাস ট্যাংকের ভেতর পৌঁছাল। খুব বেশি ফুয়েল নেই, কাজেই দর্শনীয় কোন বিস্ফোরণ ঘটল না। তবে জীপটা দাউ দাউ করে জ্বলে উঠল। সেই সঙ্গে ব্রিজের পাটাতনেও ধরে গেল আগুন।

মার্সিডিজের কেউ একজন চিৎকার করে এগোবার হুকুম দিল, কিন্তু আর

সবাই রাজি হলো না। গাড়ি থেকে নেমে রানাকে লক্ষ্য করে গুলি ছুঁড়েছে তারা।

ব্রিজ পার হয়ে একটা চওড়া গাছের আড়ালে গা ঢাকা দিল রানা, উঁকি দিয়ে মার্সিডিজের দিকে তাকাল। গাড়িটার পাশে পাঁচজন দাঁড়িয়ে আছে ওরা। দু'জনকে চিনতে পারল ও।

হিনান ফো আর চো মাউং।

আগুন দেখে হ্রসবে মাউং। দলকে পিছনে ফেলে জ্বলন্ত জীপের দিকে এগোল সে। কেউ কোন প্রশ্ন করল না বা বাধাও দিল না।

জীপের পাশে ফাঁকা জায়গা খুব সামান্যই, পাটাতনে আগুন লাগায় সেটাকে এখন আর ফাঁকাও বলা চলে না।

সৌজা হেঁটে এসে আগুনের ভেতর লাফ দিল মাউং। জীপের পাশে নাচানাচি করছে কমলা অগ্নিশিখা, তার ভেতর থেকে বেরিয়ে আসতে দেখা গেল লম্বা-চওড়া, দৈত্যাকার খুনীটাকে। মার্সিডিজের আশপাশ থেকে প্রশংসাসূচক ধ্বনি ভেসে এল।

মাউন্ডের এক হাতে পিস্তল। খালি হাত দিয়ে শার্ট ও ট্রাউজারে চাপড় মারল সে। সামান্য ধোঁয়া বেরুচ্ছিল, এখন আর বেরুচ্ছে না।

মাউং যখন মাত্র পনেরো গজ দূরে, গাছের আড়াল থেকে বেরিয়ে পিস্তল ধরা হাতটা লম্বা করল রানা। এই একটাই বুলেট আছে, কাজেই মিস করা চলবে না।

হাসছিল মাউং, রানাকে দেখে গুলি না করে ধরার জন্যে ছুটল। হাসিটা আরও যেন চওড়া হলো তার। লম্বা কিলিং মেশিনটাকে যেন মরণ-নেশায় পেয়েছে।

ট্রিগার টেনে দিল রানা।

মেকানিজম কোথাও জ্যাম হয়ে গেছে। দ্রুত আরও কয়েকবার ট্রিগার টেনেও গুলিটাকে বের করা গেল না।

পিস্তল ছুঁড়ে ফেলে দিল রানা।

ব্রিজ থেকে নেমে এল মাউং। রানার দেখাদেখি সে-ও একপাশে ফেলে দিল হাতের পিস্তল। 'তোমার সঙ্গে আমি খালি হাতে লড়াই,' বলে হেসে উঠল সে।

ব্রিজের পাশে নরম ঘাসজমি। আক্রমণাত্মক ভঙ্গি নিয়ে তৈরি হলো রানা। আঁবছাভাবে খেয়াল করল স্টেশনে দাঁড়িয়ে পড়েছে ট্রেন।

'মারি, ইয়া?' বলেই ছুটে এল মাউং। হাত দুটো সামনে বাড়িয়ে দিল সে, যেন রানার গলা ধরাই তার উদ্দেশ্য।

হাত দুটোকে এড়াবার জন্যে এক পাশে লাফ দিয়ে সরে যাবার চেষ্টা করল রানা, কিন্তু ঠিক সেদিকেই পা চালাল মাউং।

লাথিটা খেয়ে পাঁচ হাত দূরে ছিটকে পড়ল রানা। চোখে সর্ষে ফুল দেখছে। যদিও বিস্ময়ের আঘাতটাই বেশি অনুভব করছে।

'হে-হে,' হাসতে হাসতে আঙুল নাচাল মাউং, খাড়া হয়ে আবার লড়াইয়ে ফিরে আসতে বলছে রানাকে।

দুর্বল বা আহত নয়, এটা বোঝাবার জন্যে ছোট্ট একটা লাফ দিয়ে সিধে

হলো রানা।

আবার সেই একই ভঙ্গিতে, দুই হাত সামনে বাড়িয়ে ছুটে আসছে মাউং।

এবার রানা সরল না, স্থির হয়ে দাঁড়িয়ে থাকল। মাউঙের বোকা বোকা হাসিটা সামান্য হলেও বিরক্ত করছে ওকে।

হাত দুটোর লক্ষ্য গলা, বুঝতে পেরে একেবারে শেষ মুহূর্তে কুঁজো হয়ে গেল রানা, ইচ্ছা মাথা দিয়ে শত্রুর পেটে গুঁতো মারবে।

অদ্ভুত ক্ষিপ্ততার সাথে চোখের পলকে একপাশে সরে গেল মাউং; টার্গেট হারিয়ে রানা যখন হেঁচট খেয়ে পড়তে যাচ্ছে, পিছন থেকে আর একটা লাথি কষল ওর নিতম্বে।

ভাল করে কিছু বুঝে ওঠার আগেই রানা দেখল ঘাসের ওপর হাত-পা ছড়িয়ে পড়ে আছে ও। এভাবে উড়ে এসে পড়ার পরও হাড়গোড় কেন ভাঙেনি সেটাই আশ্চর্য। লোকটা বোকামি করেই হোক বা অলস বলেই হোক, পড়ে যাবার পর রানার ওপর চড়াও হচ্ছে না; হলে কি ঘটত বলা যায় না।

আবার সেই আগের মত আঙুল বাঁকা করে লড়াইয়ে রানাকে ফিরে আসার আহ্বান জানাচ্ছে মাউং।

ধীরেসুস্থে সিধে হলো রানা। প্রচণ্ড রাগে শরীর থেকে যেন ভাপ বেরুচ্ছে।

প্রচলিত পদ্ধতিতে কাজ হবে না, এই লোকের সঙ্গে অন্যভাবে লড়াইতে হবে।

আক্রান্ত হবার জন্যে অপেক্ষায় না থেকে এবার নিজেই রানা আক্রমণ করল। মাউং হাত দুটো সারাক্ষণ সামনে রাখায় ঘুসি মারার সুযোগ নেই। ছুটে এসে লাফ দিল রানা, জোড়া পা মাউংয়ের তলপেটে নামাবে।

পিছিয়ে গেল মাউং, দক্ষ গোলকীপারের মত বুকে টেনে নিল রানাকে, তারপর স্বেচ্ছায় ঢলে পড়ল পিছনদিকে।

মাটিতে গুয়ে আছে মাউং, রানা তার বুকের ওপর।

দমাদম কয়েকটা ঘুসি মেরে মাউঙের নাকটা ফাটিয়ে দিল রানা, হঠাৎ শিউরে উঠে অনুভব করল ওর গলাটা দু'হাতে পেঁচাবার চেষ্টা করছে সে।

মাউঙের আঙুল অস্বাভাবিক লম্বা। গলাটা রক্ষা করার চেষ্টায় সেই আঙুলের ভেতর নিজের আঙুল জড়াল রানা, অকস্মাৎ বাইরের দিকে প্রচণ্ড ঝাঁকি দিয়ে দুই হাতের অন্তত চারটে আঙুল ভেঙে দিল। ব্যথায় গুঙিয়ে উঠল মাউং, প্রচণ্ড আক্রোশে গলা ছেড়ে দিয়ে রানার একটা চোখে কনুই গাঁথার চেষ্টা করল।

গলায় ঢিল পড়তে ছেড়ে দেয়া স্প্রিংয়ের মত লাফ দিল রানা। কিন্তু চোখের পলক ফেলারও সময় পেল না, লাফ দিয়ে সিধে হলো মাউংও। হাত দুটো বাতাসে ঝাড়ছে সে। মুখের সেই হাসিটা নেই। তবে আক্রোশে ফুঁসতে ফুঁসতে এগিয়ে আসছে আবার।

দীর্ঘ ছইসেল। স্টেশন ছেড়ে রওনা হলো ট্রেন।

মাউঙের পাশ ঘেঁষে রানার দৃষ্টি ব্রিজের দিকে চলে গেল। জীপের আগুন নিভে আসছে। মার্সিডিজের আরোহীরা সেটাকে এড়িয়ে ব্রিজের এপারে আসার চেষ্টা করছে।

দুটো লাথি খেয়ে রানার শরীরের জয়েন্টগুলো প্রচণ্ড ঝাঁকি খেয়েছে। নেহাত ভাগ্যই বলতে হবে যে কোনও হাড় ভাঙেনি। তবে ওরকম আরও একটা লাথি খেলে কি ঘটবে বলা যায় না। তাছাড়া, এই লোকের সঙ্গে খালি হাতে লড়তে যাওয়াটা বোধহয় বোকামিই হচ্ছে।

রানার সঙ্গে ছুরি আছে। কিন্তু মাউং এত কাছে চলে এসেছে যে সেটা বের করার সময় নেই। এরকম পরিস্থিতিতে আত্মরক্ষার জন্যে একটা কাজই করার থাকে।

ঝট করে ঘুরেই ছুটল রানা।

কেউ যদি বলে পালাচ্ছে, রানা স্বীকার করবে না। হ্যাঁ, এ-কথা সত্যি যে চো মাউঙের সঙ্গে গায়ের জোরে পারা কঠিন, প্রায় অসম্ভবই বলা যায়, তবে দলের আরও লোকজন তাকে সাহায্য করতে আসছে দেখে শক্তি পরীক্ষার সুযোগ থেকে বাধ্য হয়েই নিজেকে বঞ্চিত করল রানা। এমন কি একে রণে ভঙ্গ দেয়া বলতেও রাজি নয় ও। বড় জোর কৌশল বদল। চো মাউং সত্যি জড়বুদ্ধি বা হাবাগোবা কিনা, এই সুযোগে পরীক্ষা করে দেখতে চায়।

ট্রেন লাইন বদল করে উত্তর দিকে রওনা হয়েছে। রেললাইন আর নদী পাশাপাশি এগিয়েছে, দুটোর মাঝখানে পায়ে চলা সরু একটা পথ দেখা যাচ্ছে। ওই পথ ধরে ছুটল রানা। ওই রকম আরও একটা সরু পথ ট্রেনের উল্টোদিকেও আছে।

পিছিয়ে পড়ার ভান করতে হলো না, ঝড়ের বেগে ধাওয়া করে রানার ঠিক পিছনে চলে এল মাউং। রানা তার নিঃশ্বাসের ফোঁস ফোঁস আওয়াজ শুনতে পাচ্ছে।

ছোট্টার গতি বাড়িয়ে দিল রানা। ট্রেনটা মালগাড়ি, প্রথমে হেলেদুলে ছুটলেও, গতি এখন ধীরে ধীরে বাড়ছে। কে কার আগে যেতে পারে, ট্রেনের সঙ্গে সেই প্রতিযোগিতা চলছে রানার।

তারপর ট্রেন ও রানাকে একসঙ্গে ছুটতে দেখা গেল, কেউ কারও চেয়ে পিছিয়ে নেই।

এদিকে রানার নাগাল পেতে যাচ্ছে মাউং। ভাঙা আঙুলের ব্যথা ভুলে আবার হাত দুটো সামনে বাড়িয়ে দিয়েছে সে। কিভাবে যেন মুখের সেই হাসিটাও ফিরে পেয়েছে বোকাটা। আর মাত্র এক গজ দূরত্ব কমিয়ে আনতে পারলেই রানার নাগাল পেয়ে যাবে।

ট্রেনকে ছাড়িয়ে এগিয়ে গেল রানা। ও সামনে বাড়ছে, ট্রেন পিছিয়ে পড়ছে। রানার দেখাদেখি মাউংকেও গতি বাড়তে হলো।

হঠাৎ দিক বদলে ট্রেনের সামনে, লাইনে উঠে পড়ল রানা। উঠে থামেনি, একলাফে লাইন টপকে অপর দিকে চলে এসেছে। রানার পিছু না ছেড়ে একই কাজ করতে গেল মাউং।

রানার সময়ের হিসাবটা ছিল চুলচেরা। লাইন টপকাতে ও যদি এক সেকেন্ড দেরি করত, ওকে পিষে ফেলত ট্রেন।

রানার চেয়ে এক সেকেন্ড পরে লাইনে উঠল মাউং। সংঘর্ষের শব্দ যদি হয়েও থাকে, এগুলির গর্জন আর চাকার ঘর্ষণ সেটাকে চাপা দিল।

নিরাপদ দূরত্বে দাঁড়িয়ে রানার মনে হলো, লাইনের ওপর দ্বিখণ্ডিত, রক্তাক্ত, থেঁতলানো যে মাংসপিণ্ডটা পড়ে আছে সেটাকে মাউং বলে শনাক্ত করা অসম্ভব।

তার সঙ্গীরা কোথায় বা কি করছে দেখার জন্যে অপেক্ষা করল না রানা। আবার ছুটে গুরু করে লাফ দিয়ে ট্রেনের একটা কার-এ উঠে পড়ল ও।

একটা ব্রিজ পার হয়ে ফালামে ঢুকল ট্রেন। আধঘণ্টা পর সামনে পড়ল ছোট একটা শহর। শহরে ঢোকার মুখে, একশো গজ দূরে রাস্তার ওপর কালো মার্সিডিজটাকে আবার দেখতে পেল রানা। হিনান ফো তার ডান হাতকে ট্রেনে কাটা পড়তে দেখেছে। এর জন্যে নির্ঘাত রানাকেই দায়ী ভাবছে সে। কাজেই প্রতিশোধ নেয়ার জন্যে একেবারে মরিয়া হয়ে উঠেছে।

পাঁচশো গজ সামনে, একটা বাক ঘোরার পরই, দাঁড়িয়ে পড়ল ট্রেন। কি ব্যাপার? না, লাল একটা পিকআপ ট্রাক লাইনের ওপর দাঁড়িয়ে আছে।

বাদামী রঙের পাজেরোটাকেও দেখতে পেল রানা। ওটা অপেক্ষা করছে ক্রসিং-এ। হাতুড়ির লোকজন পৌছে গেছে সদলবলে।

ট্রেনের ড্রাইভার ক্যাব থেকে মাথা বের করে তাকাল, বিরতিহীন হুইসেল বাজাচ্ছে। উত্তরে হাতুড়ির একজন সদস্য তার উদ্দেশ্যে হাতের অস্ত্র নাড়ল।

মাথাটা ঝট করে ভেতরে টেনে নিল ড্রাইভার।

সশস্ত্র লোকজন লাইনের দু'ধারে ছড়িয়ে পড়ল। তাদের একজন দেখতে পেল রানাকে।

পুরো দলটা ছুটে এল ওর দিকে।

ঘাড় ফিরিয়ে পিছন দিকে তাকাল রানা। কালো মার্সিডিজ রাস্তার ওপর দাঁড়িয়ে পড়েছে।

এক মুহূর্ত পর ইউ টার্ন নিয়ে ফিরতি পথ ধরল সেটা।

ষোলো

এমনকি চূড়ান্ত বিশ্লেষণেও এ-দ্বন্দ্বের নিরসন হওয়া সম্ভব নয় যে জীবনে ভালর সংখ্যা বেশি নাকি মন্দের। আবার ভাল ও মন্দের সংজ্ঞা নিয়েও প্রবল মত-পার্থক্য আছে। তবে কেউ যদি মাসুদ রানাকে প্রশ্ন করে সুন্দরী নারী ও সুরা সম্পর্কে ওর কি ধারণা, সুরার প্রতি ওর অভ্যাসক্তি না থাকা সত্ত্বেও নির্বিধায় জবাব দেবে ও-জীবনকে দেয়া প্রকৃতির শ্রেষ্ঠ উপহার এ-দুটিই।

কাজেই গভীর বনভূমির ভেতর প্রাসাদতুল্য অট্টালিকার অন্তরমহলে ওর হাতে সুরার পাত্র ধরিয়ে দিয়ে বনদেবীর মতই অপরূপ এক নারী যখন বলল, 'আসুন, আমরা অলিন্দে বসে পান করি,' রান্না তাকে প্রত্যাখ্যান করতে পারল না।

তার আগে শ্বেতপাথরের বিশাল ডাইনিং রুমে অবগুপ্তিত একদল তরুণী রাজকীয় ডিনার পরিবেশন করেছে। প্রশ্ন না করা সত্ত্বেও রানাকে জানানো হয়েছে, চোখ বাদে কালো কাপড়ে ঢাকা এই তরুণীরা সবাই দস্যুদল হাতুড়ির সদস্যা।

‘আপনার ধৈর্যের প্রশংসা করতে হয়,’ ডিনারের শেষ পর্যায়ে মন্তব্যটা শুনতে হলো রানাকে।

‘সুন্দা দু ও উপাদেয় এত সব ডিশ এমন যত্নের সঙ্গে পরিবেশন করা হচ্ছে, এখন প্রশ্ন করাটা রীতিমত অন্যায় হবে,’ জবাবে মনের কথাই বলেছে রানা।

সব শেষে ছোট পেস্টি আর কড়া কফি ছিল। আরেকদল তরুণী এসে টেবিল পরিষ্কার করে দিয়ে গেছে। লম্বা টেবিলের এক প্রান্তে রানা, অপরপ্রান্তে ওর মেজবান। শ্যাম্পেন ও ব্র্যান্ডি দিয়ে গেছে একজন পুরুষ ডাক্তার। তবে গ্লাস ভরেছে ওর মেজবান, ব্র্যান্ডির গ্লাসটা ওর হাতে ধরিয়েও দিয়েছে সে নিজে।

এই মুহূর্তে খোলা টেরেসে দুটো ইজি চেয়ারে বসে আছে ওরা।

বনদেবীর মতই রহস্যময়ী সে। বয়স নিশ্চয়ই চল্লিশ ছুই ছুই করছে। তবে রূপ আর লাভণ্যের কোন অভাব নেই। একহারা, যথেষ্ট লম্বা, চোখ দুটো যেমন মায়াভরা তেমনি বুদ্ধিদীপ্ত। কালো চুলে মস্ত খোপা, খোপায় একটা রূপোর চিরুনি গাঁথা। গলা পর্যন্ত ঢাকা কালো একটা ড্রেস পরেছে, আন্তিন কজি পর্যন্ত লম্বা।

রানার এই মেজবানই মায়া মায়া মালহার। ভারত-মায়ানমার সীমান্ত ঘেঁষা দুর্গম বনভূমির ভেতর অট্টালিকাটার সে-ই মালিক এখন। হাতুড়ির সদস্যরা এখানেই নিয়ে এসেছে রানাকে।

উঁচু টেরেস থেকে ছোট একটা লেক দেখা যাচ্ছে, ওপার থেকে আকাশে উঠে আসছে থালার মত চাঁদ।

‘আমি অনেক দিন ধরে অপেক্ষা করছি।’ শ্যাম্পেনে মাত্র একটা চুমুক দিয়ে গ্লাসটা নিচু টেবিলে নামিয়ে রেখেছে মায়া মালহার। ‘আজ দশ বছর। সব সময় মনে হয়েছে, কেউ একজন আসবে। শেষ পর্যন্ত সত্যি আপনি এলেন, মি. রানা।’

‘আপনি শুধু রানা বলুন।’

‘ধন্যবাদ। হ্যাঁ, নাম ধরতেই আমি স্বাচ্ছন্দ্য বোধ করব। বয়সে আপনি আমার চেয়ে ছোট। আপনিও ম্যাডাম না বলে শুধু মায়া বলুন। তো যা বলছিলাম, রানা। আমি ভুলিনি।’

‘কি ভোলেননি, মায়া?’

‘ড. হায়দারকে। মুহিত হায়দারকে।’

‘তঁার এবং আপনার, আমি আপনাদের দু’জনের কথাই শুনতে চাই।’

একটা দীর্ঘশ্বাস ফেলল মায়া মালহার। ‘প্রেমটা প্রথমে এক তরফাই ছিল। সেটা লভনে থাকতে। তিনি আমার শিক্ষক ছিলেন। এমন আদর্শপুরুষ আমার জীবনে আর আসেনি। ভালবাসলাম নিজের অজান্তেই। কিন্তু প্রত্যাখ্যান করতে পারেন এই ভয়ে তাঁকে জানাতেই পারলাম না। লেখাপড়া শেষ করে ফিরে এলাম দেশে, চেষ্টা করলাম তাঁকে ভুলে যাবার। ভুলে হয়তো যেতামও, কিন্তু নিয়তির যোগসাজসেই আবার তাঁর সঙ্গে আমার দেখা হয়ে গেল। মায়ানমারে এলেন

তিনি, বললেন আমাকে তাঁর দোভাষী হিসেবে দরকার। ব্যস, সব বাঁধ ভেঙে গেল আমার। চাকরি ছেড়ে দিয়ে তাঁর সঙ্গে ফালামে চলে এলাম। স্বভাবতই সম্পর্কটা ছাত্র-শিক্ষকের থাকল না। আমি তো আগেই মজেছিলাম, এবার তিনিও ডুবলেন।

রানা অপেক্ষা করছে।

‘পরস্পরকে আমরা এতই ভালবাসলাম—তিনি আমার জন্যে সব করতে পারেন, আমিও তাই। আর শেষ পর্যন্ত তিনি তা প্রমাণও করলেন—আমার জন্যে মারা গেলেন।’

‘কেন?’

‘উত্তরটা আপনার ধারণার সঙ্গে মিলবে না, রানা।’

‘ড. হায়দার নিখোঁজ হবার দু’দিন আগে গায়েব হয়ে যান আপনি।’

‘আমি গায়েব হইনি। আমাকে গায়েব করা হয়েছিল।’

‘কে করেছিল? কেন?’

‘আমি আপনার সব প্রশ্নেরই উত্তর দেব, রানা। তবে কাহিনীটা আপনি আমাকে আমার নিজস্ব চঙে বলতে দিন। আর, বিনিময়ে আপনাকে আমার একটা কাজ করে দিতে হবে।’

এমন কিছু রানা বলল না যাতে কথা দেয়া হয়ে যায়। ‘গভীর জঙ্গলের ভেতর ভারি সুন্দর আপনার এই বাড়ি। আপনার সঙ্গে এখানে আর কে থাকে?’

‘বাড়িটা আমার স্বামী তৈরি করেছিলেন। তিনি মারা গেছেন। আশপাশের প্রায় ত্রিশ মাইল এলাকা সরকারের কাছ থেকে লীজ নেন তিনি। তখন নো ম্যানস ল্যান্ড ছিল, পরে আমরা অনুমতি দেয়ায় কিছু লোক ঘর-বাড়ি তুলে চাষাবাদ শুরু করে। তারা সবাই এখন আমার প্রজা। বাড়িতে? আর কেউ থাকে না, আমি একা। তবে আমার দেখাশোনা করার জন্যে পঞ্চাশ ঘাট জন ছেলেমেয়ে আছে। আর মাঝে-মাঝে হাতুড়ির ওরাও বেড়াতে এসে দু’চারদিন কাটিয়ে যায়। তবে বিশেষ কোন কারণ বা উপলক্ষ ছাড়া সাধারণত ওরা আসে না। আজ এসেছে, আপনার আগমনটাই উপলক্ষ।’

‘আপনার স্বামী ভদ্রলোক বেপরোয়া মানুষ ছিলেন, তাই না?’ জিজ্ঞেস করল রানা। ‘শুনেছি ইয়ানগনে তাঁর গোপন আঁস্তানায় প্রতিদিন লাখ লাখ কিয়াতের জুয়া খেলা হত।’

ক্ষীণ হাসি ফুটল মায়া মালহারের ঠোঁটে। ‘আপনি কৌশলী হবার চেষ্টা করছেন, রানা। জুয়ার আসর বসালেও আমার স্বামী থিরি হাটাইক জুয়াড়ী ছিলেন না। তাঁর জন্ম হয় নোংরা বস্তিতে, খেতে না পেয়ে অপরাধে হাতেখড়ি, সেই অপরাধকে পুঁজি করেই নিজের বিশাল এক সাম্রাজ্য গড়ে তোলেন। হ্যাঁ, তিনি দুর্ধর্ষ গ্যাঙলীডার ছিলেন, ছিলেন পাষণ্ড ও খুনী—তবু বলব ওই জাতের লোকদের মধ্যে তিনি ছিলেন আশ্চর্য এক ব্যতিক্রম। সারা জীবনে যা কিছু তিনি অর্জন ও সঞ্চয় করেছেন, আমার জন্যে তার এক আনা রেখে পনেরো আনাই দান করে গেছেন নিজের হাতে গড়া দল হাতুড়ির উদ্দেশ্যে।’

‘হাতুড়ি। নামটা অদ্ভুত, তাই না? শুনেছি তার জুয়ার টেবিলে কেউ চুরি

করলে তার আঙুলে হাতুড়ি মারা হত, সেই থেকেই দলের নাম হয়ে যায় হাতুড়ি।’
মাথা ঝাঁকাল মায়া মালহার। ‘তবে, আগেই বলেছি, থিরি হাটাইক জুয়াড়ী ছিলেন না। তিনি জিতবেন নিশ্চিত হয়ে বাজি ধরতেন। জীবনে মাত্র একবারই জুয়া খেলেন তিনি। আমাকে নিয়ে।’

‘মানে?’

‘দশ বছর আগে একজনকে কিডন্যাপ করার দায়িত্ব পান তিনি। আমাকে।’

‘আর তাই নিঃশব্দে দৃশ্যপট থেকে অদৃশ্য হয়ে গিয়েছিলেন আপনি?’

‘খেলাটায় আমি ছিলাম নগণ্য একটা ঘুঁটি মাত্র। ড. হায়দারকে ব্ল্যাকমেইল করার জন্যে আমাকে জিম্মি করা হয়। গুরুত্বপূর্ণ কোন তথ্যই আমার জানা ছিল না, কিন্তু দুই বিলিয়ন ডলারের আর্টিফ্যাক্ট কারা আত্মসাৎ করতে চাইছে ড. হায়দার তা ভাল করেই জানতেন। তাঁকে শর্ত দেয়া হয়, তিনি বোবা হয়ে থাকলে আমাকে খুন করা হবে না।’

‘আরেকটু ব্যাখ্যা করুন, প্লীজ।’

‘আপনাকে তো বললামই, ড. হায়দার আমার জন্যে যে-কোন ত্যাগ স্বীকার করতে পারতেন। এমনকি নিজের মর্যাদাও। আমার প্রাণরক্ষার জন্যে নিজেকে তিনি দূষিত করলেন। কিন্তু তাঁর আত্মত্যাগ কোন কাজে লাগল না। সব বৃথা গেল।’

‘ড. হায়দার মারা গেলেন। খুন হয়ে গেলেন তিনি। তিনি চলে যাবার পর লুটেরাদের কাছে আমার প্রয়োজনও ফুরিয়ে গেল। থিরি হাটাইককে তারা আমাকে মেরে ফেলার নির্দেশ দিল। হাটাইক তাদেরকে জানালেন, নির্দেশ পালিত হয়েছে। কিন্তু তিনি মিথ্যে কথা বলেছিলেন। তারা অবশ্য কোনদিনই তা জানতে পারেনি।’

‘ব্যাপারটা হলো, রানা, থিরি আমার প্রেমে পড়ে গিয়েছিলেন। আমাকে খুন না করে গোপনে লুকিয়ে রাখলেন। আমার চেহারা কিছুটা বদল করা হলো। নতুন পরিচয় দেয়া হলো। তারপর গোপনে তিনি আমাকে বিয়ে করলেন। মায়া মায়া মালহার নামে এখন আর কেউ আমাকে চিনবে না। গত দশ বছর ধরে সবাই জানে আমার নাম সুশীলা থং-ভারতীয় বাবা, বার্মিজ মা।’

‘আপনাদের দাম্পত্য জীবন কেমন ছিল?’

‘সময় লেগেছে, তবে একসময় আমি তাঁর লক্ষ্মী বউ হয়ে উঠি। আমাকে পেয়ে থিরি সুখী হয়েছিলেন। আমি তাঁকে অপরাধজগৎ থেকে ফিরিয়ে আনি।’

‘জীবনের প্রথম ও শেষ জুয়া খেলায় সত্যিকার লাভবান হয়েছিলেন থিরি হাটাইক।’

‘থ্যাঙ্ক ইউ, রানা। ইউ আর কাইন্ড।’

‘তারপর কি হলো, সুশীলা?’

আবার একটা দীর্ঘশ্বাস ফেলল সুশীলা ওরফে মায়া মালহার। ‘বেশিরভাগ গ্যাঙলীডার অ্যামবিশাস শিষ্যের হাতে মারা যায়। থিরির স্বাভাবিক মৃত্যু হয়েছিল। এ থেকেই বোঝা যায় শিষ্যরা কি রকম বিশ্বস্ত আর অনুগত ছিল তার। থিরি ছিল তাদের কাছে দেবতা। তিনি মারা যাবার পর আমাকে ওরা দেবীর

আসনে বসাল। কিন্তু ওদের শত অনুরোধেও দলের নেতৃত্ব হাতে নিতে আমি রাজি হইনি। থিরি নিজে অপরাধজগৎ থেকে সরে এসেছিলেন, কিন্তু দলের লোকদের কখনও বলেননি এ-সব ছেড়ে দাও। আমি প্রশ্ন করায় তিনি উত্তর দিয়েছিলেন, ওরা ছাড়তে পারবে না। সে যাই হোক, আমিও ওদেরকে অযাচিতভাবে কোন পরামর্শ দিইনি। তবে আমি কখনও ওদের সাহায্যও নিইনি। শুধু একবার নিতে হলো—ড. হায়দারের প্লেনটা পাওয়ার পর।

‘পর্দার আড়ালে আপনিই তাহলে কাজ করছিলেন।’

‘হ্যাঁ। ব্যবসায়ীদের বিশেষ একটা মহল সামরিক স্বৈরশাসকদের সঙ্গে হাত মিলিয়েছে, রানা। এই বিশেষ মহলের সদস্যরা তাদের ব্যবসার পুঁজি যোগাড় করেছে ফালাম আর্কিওলজিকাল সাইট থেকে পাওয়া আর্টিফ্যাক্ট বিক্রি করে। এদের ক্ষমতা আর প্রভাবের বিরুদ্ধে দাঁড়াবার সাধ্য কারও নেই। প্লেনটা সনাক্ত করার সঙ্গে সঙ্গে তৎপর হয়ে ওঠে তারা। অ্যারোনটিক্স-এর ইন্সপেক্টর গাইয়ো সানকে ঘুম দিয়ে প্রথম রিপোর্ট বাতিল করানো হয়, দ্বিতীয় রিপোর্টে বলা হয় ওটা দশ বছর আগে নিখোঁজ ড. হায়দারের প্লেন নয়, তিন বছর আগে হারিয়ে যাওয়া একটা সার্ভে প্লেন।’

‘মিথ্যে রিপোর্টটা লিখিয়ে নিয়ে গাইয়ো সানকে খুন করেছে তারা, তাই না?’

‘না,’ মায়া মালহার বললেন। ‘তারাই খুনটা করত, কিন্তু তাদের আগে অন্য একদল সরিয়ে দিয়েছে তাকে।’

‘অন্য একদল মানে?’

‘হুঁ-হুঁ, এখানেই আপনার ভূমিকার কথা ওঠে, রানা। আর্টিফ্যাক্ট লুট আর ড্যাম উড়িয়ে দেয়ার সঙ্গে একাধিক গোষ্ঠি জড়িত ছিল। নিজেদের অপরাধ গোপন রাখার জন্যে সবাই তারা প্রয়োজনে খুন করবে। ইন্সপেক্টরকে খুন করেছে পাকিস্তানী আইএসআই। দৈনিক মায়ানমারের তিনজন স্টাফকেও খুন করা হয়েছে, আমার পাঠানো তথ্য ওদের অফিসে পৌঁছাবার পরপরই।’

‘ওদেরকে হিনান ফো খুন করে।’

‘ও তো স্রেফ ভাড়াটে খুনি। সাবধান কিন্তু, রানা! মাউন্টের মৃত্যুতে মারাত্মক চোট পেলেও, সঙ্গীকে হারিয়ে প্রায় পঙ্গুই হয়ে গেছে, তারপরও হিনান ফো আপনার জন্যে ভয়ঙ্কর একটা বিপদ।’

‘এ-ধরনের বিপদ আমি সামলাতে জানি।’

‘হ্যাঁ, আমার বিশ্বাস জানেন।’

‘কিন্তু ফোর পিছনের লোকটা কে?’

‘বলব, তবে তার আগে আপনাকে একটা কথা দিতে হবে।’

‘কি কথা?’

‘আমি চাই আপনি একটা লোককে খুন করবেন।’

মায়া মালহারের দিকে একদৃষ্টে তাকিয়ে থাকল রানা। অবশেষে বলল, ‘আপনার নিজের ক্ষমতা বা লোকবলের তো কোন অভাব নেই। আমাকে দিয়ে কেন করাতে চাইছেন কাজটা?’

‘যোগ্যতার বিচারে তারা কেউ আপনার ধারেকাছে ঘেঁষতে পারবে না। তাছাড়া, এ-ধরনের কোন কাজ ওদেরকে দিয়ে আমি করাতে চাই না। তা চাইলে অনেক আগেই করাতে পারতাম। আপনাকে তাহলে সত্যি কথাটাই বলি। ওদেরকে দিয়ে এ-ধরনের কোন কাজ করাতে আমার স্বামী আমাকে নিষেধ করে গেছেন।’

‘হঁ।’ চিন্তা করছে রানা।

‘আপনাকে অনুরোধ করার পিছনে আরেকটা কারণ আছে, সেটাই সবচেয়ে গুরুত্বপূর্ণ। কাকে খুন করতে হবে শোনার পর কারণটা আপনি বুঝতে পারবেন।’

‘কাকে?’

নামটা বলল মায়া মালহার।

তার কারণ ব্যাখ্যা শেষ হতে রাত গভীর হয়ে উঠল। জঙ্গলের ভেতর, বাড়ির ঘেরা চৌহদ্দির বাইরে, একটা বাঘের সগর্জন ঘোরাফেরা শুরু হয়েছে।

একসময় রানা নিস্তব্ধতা ভেঙে বলল, ‘আর একটা প্রশ্ন, সুশীলা। আপনি জানেন, ড. মুহিত হায়দারকে কে খুন করেছিল?’

‘জানি।’

‘কে?’

খুনীর নাম বলল মায়া মালহার।

শিউরে উঠল রানা।

ধীরে ধীরে চেয়ার ছাড়ল মায়া মালহার। ‘চলুন, অনেক রাত হলো—আপনাকে আপনার কামরায় পৌছে দিই।’

সতেরো

বাংলাদেশ-মায়ানমার সীমান্ত। বার্মিজ শহর পুতাপাইয়ে সূর্য উঠল। প্রায় ওই একই সময়ে রানাও উদয় হলো শহরে।

পুতাপাইয়ে একাই এসেছে রানা। ওর কাজে হাতুড়ির সদস্যরা কোন ভূমিকা রাখবে না। মঞ্চ থেকে বিদায় নিয়েছে তারা।

যতটুকু সম্ভব করেছে মায়া মালহার। অবশ্য আরও অনেক কিছুই করার ইচ্ছে ছিল তার। তা করতে গেলে স্বামীর রেখে যাওয়া প্রিয় দলটার মারাত্মক ক্ষতি করা হবে। সামরিক স্বৈরশাসকদের তরফ থেকে সেই হুমকিই দেয়া হয়েছে তাকে। বলা হয়েছে, ‘বেশি বাড় বেড়ো না। আর যদি নাক গলাও, বনভূমির লীজ বাতিল করে ভিটেছাড়া করা হবে তোমাকে, ধরে ধরে হাতুড়ির সব কজনকে খুনও করা হবে।’

ওরা তা পারে।

তবে রানাকে বিদায় দেয়ার সময় মায়া মালহার রুদ্ধকণ্ঠে বলেছে, ‘আমি

আপনার জন্যে প্রার্থনা করব।’

ধীর পায়ে শহরে ঢুকল রানা। ওকে নামিয়ে দিয়ে অনেক আগেই চলে গেছে ট্যাক্সিটা। কে জানে ড্রাইভার তার কথা রাখবে কিনা। সন্দের মধ্যে সে যদি না ফেরে, ইয়ানগনে ফেরার অন্য কোন ব্যবস্থা করতে হবে রানাকে।

গ্রামের পথে এক লোককে দেখা গেল। সামনে ছোট একটা হাট। অল্প কিছু লোকজন পসরা সাজিয়ে বসেছে। সীমান্তের কাছাকাছি, তাই বাংলাদেশী পণ্যের কোন অভাব নেই। ওই হাট থেকেই ওকে দেখতে পেয়ে এগিয়ে আসছে লোকটা।

‘আবার তাহলে আমাদের দেখা হলো, সুব্রত বাবু,’ বলে হাসল লোকটা।

‘ওড মর্নিং, মেজর আউং।’

‘মর্নিং। পুতাপাইয়ে কিন্তু দেখার মত কিছু নেই, সুব্রত বাবু। ট্যুরিস্টের ছদ্মবেশে স্মাগলাররা আসে বটে, কিন্তু আপনাকে আমি স্মাগলার বলে ছোট করতে রাজি নই।’

‘চোখ থাকলে দেখার অনেক কিছুই এখানে পাওয়া যাবে, মেজর আউং,’ বলল রানা।

‘তাই?’

‘তাছাড়া, দেখার কিছু না থাকলে আপনিই বা এখানে আসবেন কেন!’

‘আমি এসেছি কাজে। প্রশ্নটা আপনাকে নিয়ে।’

‘জবাব আপনি পেয়েছেনও—আমার চোখ আছে।’

‘ভরি মজার জবাব।’

‘চেহারা কিন্তু বলছে না যে আপনি মজা পেয়েছেন।’

‘বলছে না? তাহলে হয়তো মজা পাইনি। আপনি একটা সময় পর্যন্ত খুব কাজ দিয়েছেন, সুব্রত বাবু। নিশ্চিহ্ন হওয়া উচিত ছিল এমন কিছু বদ লোককে আপনি নিশ্চিহ্ন করেছেন। সেজন্যে আপনার লাগাম আমি টেনে ধরিনি।’

‘কিন্তু এখন আমার প্রয়োজন ফুরিয়েছে?’

‘অন্তত লাগাম টেনে ধরার সময় তো অবশ্যই হয়েছে।’

‘সে চেষ্টা অনেকবার করা হয়েছে।’

‘আমার দ্বারা নয়।’

‘মাউং চেষ্টা করেছিল।’ সে বেঁচে নেই।’

‘হোয়াট! ওহ! হাউ নাইস। এতে আমার কথারই সত্যতা প্রমাণিত হয়, সুব্রত বাবু—আপনি আমার একটা উদ্দেশ্য পূরণ করেছেন।’

‘তবে হিনান ফো এখনও বহাল তব্বিয়তে ঘুরে বেড়াচ্ছে।’

‘আপনার সঙ্গে যে-কোন মুহূর্তে তার দেখা হয়ে যেতে পারে। লম্বা তালগাছটাকে সন্তানের মত ভালবাসত সে। শুভেচ্ছা রইল, সুব্রত বাবু।’ ঘুরে শহরের দিকে হাঁটা ধরল মেজর আউং।

‘পরে আবার দেখা হবে, মি. আউং।’

‘ওডবাই, সুব্রত বাবু।’

লোকজনের ভিড়ে মেজর আউং হারিয়ে যাবার আরও খানিক পর পিস্তল

থেকে হাত সরাল রানা।

গ্রাম্যপথের ধারে ঝুলন্ত তার দেখা যাচ্ছে। রানা আন্দাজ করল, মেজর আউং কাউকে টেলিফোন করার জন্যেই তাড়াছড়ো করে চলে গেল।

শহর বা গ্রাম যাই বলা হোক, পুতাপাইয়ে যে-ক'টা রেস্তোরাঁ আছে সবই পরিষ্কার পরিচ্ছন্ন। নাস্তা সেরে সোজা মিশনারি স্কুলে চলে এল রানা, উদ্দেশ্য স্কুলের অধ্যক্ষ বেঞ্জামিন উইন সেইন-এর সঙ্গে দেখা করা।

স্কুল থেকে বলা হলো, ফাদার বেঞ্জামিন চ্যানসেলরিতে আছেন।

ছোট, পরিপাটি ভাবে সাজানো অফিসে রানাকে অভ্যর্থনা জানালেন ফাদার। স্কুলের অধ্যক্ষ, সেইন। ওই চার্চের যাজকও তিনি।

‘সাক্ষাৎ দেয়ার জন্যে ধন্যবাদ, ফাদার।’

‘ইউ আর ভেরি ওয়েলকাম। পুতাপাইয়ে ভিজিটর খুব কম আসেন। আপনি আসায় আমি খুশি হয়েছি।’

‘আপনি বোধহয় সাম্প্রতিক সময়ের কথা বলছেন না।’

‘ও, আচ্ছা, নিখোঁজ প্লেনটার কথা বলছেন আপনি। আসলে বলা উচিত খুঁজে পাওয়া প্লেনটা। হ্যাঁ, ঘটনাটা বেশ উত্তেজনা ছড়িয়েছিল এলাকায়। তবে দু'এক হপ্তা পরই আবার সব শান্ত হয়ে গেছে।’ রানার দিকে তীক্ষ্ণ চোখে তাকালেন ফাদার। ‘এ-ব্যাপারে আপনার কি বিশেষ কোন আগ্রহ আছে?’

‘আছে বৈকি। আমি কোলকাতার একটা দৈনিক পত্রিকার রিপোর্টার।’ ফাদারের দিকে একটা প্রেস কার্ড বাড়িয়ে ধরল রানা। ‘প্লেনটা সম্পর্কে একটা রিপোর্ট তৈরি করতে এসেছি।’

কার্ড দেখে ফেরত দিলেন ফাদার বেঞ্জামিন। ‘যতটুকু জানি বলতে আমার আপত্তি নেই। আপনি কি লিখবেন?’

‘ধন্যবাদ, ফাদার। না, লিখতে হবে না, আমার মনে থাকবে। শুনেছি প্লেনটা নাকি অ্যান্ড্রিডেন্টালি আলোর মুখ দেখে-সত্যি নাকি?’

‘অনেকেই ব্যাপারটাকে মিরাকল বলবে,’ হাসিমুখে বললেন ফাদার। ‘এখান থেকে বেশ ক'মাইল দূরে ছোট্ট একটা লেক আছে। ভূমিকম্পে সেই লেকের তলায় একটা ফাটল তৈরি হয়। ওই ফাটল দিয়ে সমস্ত পানি বেরিয়ে গেলে তলায় পড়ে থাকতে দেখা যায় প্লেনটাকে।’

‘প্লেনটা এখন কোথায়?’

‘আমার জানামতে ওখানেই পড়ে আছে-লেকের শুকনো তলায়।’

‘প্লেন থেকে কোন লগবুক, রেকর্ড বা ব্যক্তিগত জিনিস-পত্র উদ্ধার করা হয়েছে?’

‘হ্যাঁ, কিছু কিছু জিনিস তো বের করা হয়েছেই।’

‘সেগুলো এখন কোথায়?’

‘সরকারী এক ভদ্রলোক উদ্ধার করে নিয়ে গেছেন। তিনিই বলতে পারবেন কোথায় আছে।’

‘সরকারী লোক মানে কি ব্যুরো অভ-অ্যারোনটিব্র-এর ইন্সপেক্টর গাইয়ো সান?’

‘না,’ মাথা নেড়ে বললেন যাজক। ‘অন্য এক ভদ্রলোক নিয়ে গেছেন। নামটা জিভে আছে, ঠোঁটে আসছে না। একটু পর হয়তো মনে পড়বে।’

জানালা দিয়ে বাইরে তাকাল রানা।

‘ইয়ে!’ হঠাৎ গলা চড়ালেন ফাদার। ‘মনে পড়েছে। ইয়ে আউং। ভদ্রলোকের নাম...’

‘মেজর আউং?’ রানা হাসল। ‘তিনি তো পুতাপাইয়ে আবার ফিরে এসেছেন।’

‘তিনিই তো ইনভেস্টিগেশন শুরু করেছিলেন। হয়তো আলগা সুতোগুলো জোড়া লাগাবার জন্যে ফিরে এসেছেন।’

‘হয়তো।’

‘তার কাজে আমি খুব আন্তরিকতা লক্ষ করেছি। হাসিখুশি অমায়িক ভদ্রলোক।’

‘হ্যাঁ। লাশগুলোর কি হলো, ফাদার?’

‘সারকামসাইজ করা লাশ, কাজেই হিন্দু বা বৌদ্ধ হতে পারে না। হয় মুসলমান, নাহয় খ্রিস্টান—এদিকে ইহুদি তো একেবারেই নেই। তারপর কে যেন বলল একজনের নাম জানা গেছে—পিটার। এ-কথা শুনে এলাকার মসজিদের ইমাম সাহেব বললেন, তাহলে দ্বিতীয় লাশটাও খ্রিস্টানেরই হবে। কাজেই লোক পাঠিয়ে লাশ দুটো এখানে আনিয়ে আমাদের কবরস্থানে মর্যাদার সঙ্গে মাটি দেয়া হলো। কেউ যখন ক্রেইম করেনি, কি আর করা!’

‘আপনি দু’জনের কথা বলছেন, ফাদার।’

‘হ্যাঁ।’

‘দু’জন?’

‘কবর দুটো আপনি দেখতে চান?’ জিজ্ঞেস করলেন ফাদার। ‘চার্চের পিছনেই আমাদের কবরস্থান।’

ফাদারের পিছু নিয়ে কবরস্থানে চলে এল রানা। গেট দিয়ে ঢুকবে, হঠাৎ লক্ষ করল, এক লোক ওদের দিকে এগিয়ে আসছে।

লোকটা কোথেকে এল বলা মুশকিল। চার্চ, স্কুল ও কবরস্থান একই কমপাউন্ডের ভেতর, চার্চ ও স্কুলের মাঝখানে শুধু নিচু একটা পাঁচিল আছে। রাস্তা থেকে চার্চে ঢোকার একটাই গেট, তবে সেটা বন্ধ।

আগন্তুক কাছে আসতে রানার চিন্তাধারা বদলে গেল। লোক নয়, ভদ্রলোক মনে করা উচিত তাঁকে। সাধারণ প্যান্ট-শার্ট পরে আছেন, কিন্তু চেহারায় দরবেশ বা দার্শনিক সুলভ একটা ভাব। মুখে চাপ দাড়ি, প্রায় সবই সাদা।

তাঁকে দেখে ফাদারের মুখ উজ্জ্বল হয়ে উঠল।

আগন্তুক বললেন, ‘আপনি স্কুলে আসছেন না দেখে আমিই চলে এলাম, ফাদার বেঞ্জামিন। সকালের কফিটা অন্তত একসঙ্গে বসে না খেলে কি করে হয়!’

হাসছেন তিনি। তারপর রানার দিকে ফিরে বললেন, ‘এনাকে তো চিনলাম না!’

একটু অবাকই হলো রানা। আগন্তুক বা ফাদার কেউই শ্বেতাজ্জ নন, এবং পরিষ্কার বোঝা যায় দু’জনেই তাঁরা স্থানীয়। অথচ আগন্তুক কথাগুলো ইংরেজিতে বললেন।

‘আসুন, পরিচয় করিয়ে দিই,’ বললেন ফাদার। ‘মি. সুব্রত, ইনি আমাদের মিশনারি স্কুলের হেডমাস্টার, মি. গুডফেলো।’ মি. গুডফেলো, ইনি একটি ভারতীয় দৈনিকের রিপোর্টার, মি. সুব্রত।’

হেডমাস্টারের সঙ্গে করমর্দন করল রানা।

ফাদার বললেন, ‘যেতে পারিনি বলে দুঃখিত, মি. গুডফেলো। আজ সকালে আমাকে মাফ করতে হবে, কথা দিলাম বিকেলের কফিটা মিস করব না।’

‘যাননি দেখে ভাবলাম আপনার বাতের ব্যথাটা আবার বাড়ল কিনা। ঠিক আছে, আমার আবার ক্লাস নিতে হবে—বিকেলে কিন্তু আসছেনই, কেমন?’

কবরস্থানের গেট থেকেই বিদায় নিয়ে চলে গেলেন হেডমাস্টার গুডফেলো।

রানাকে ভুরু কুঁচকে থাকতে দেখে ফাদার বেঞ্জামিন জিজ্ঞেস করলেন, ‘কি ব্যাপার, মি. সুব্রত? আপনাকে ইঠাৎ চিন্তিত মনে হচ্ছে?’

‘না...মানে, আমার কেন যেন মনে হচ্ছে আপনাদের হেডমাস্টারকে আগে কোথাও দেখেছি। কিন্তু মনে করতে পারছি না ঠিক কোথায়।’

‘আপনি নিশ্চয়ই ভুল করছেন, মি. সুব্রত। আমি এখানে অনেক বছর ধরে আছি, মি. গুডফেলোকে পুতাপাই ছেড়ে কখনও কোথাও যেতে দেখিনি। আমি এখানে যাজক হয়ে আসার অনেক আগে থেকে এই মিশনারি স্কুলের হেডমাস্টারি করছেন উনি। অত্যন্ত পণ্ডিত ব্যক্তি, ছাত্র-ছাত্রীরা তো বটেই, শিক্ষকরাও তাঁকে গুরুজ্ঞানে সম্মান করেন। ভদ্রলোক চিরকুমার, এই স্কুল তাঁর ধ্যান ও জ্ঞান। ঈশ্বর তাঁর মঙ্গল করুন।’

‘বলা হয় ঈশ্বরের মঙ্গল বড় বিচিত্র পথে আসে, ফাদার।’

‘সত্যি তাই। আসুন, কবর দুটো আপনাকে দেখাই।’

ফাদারের পিছু নিয়ে কবরস্থানে ঢুকল রানা, এখনও অন্যমনস্ক। চিন্তাটা মাথা থেকে সরাতে পারছে না।

কবর দুটো গোরস্তানের এক প্রান্তে। আঙুল তুলে দেখালেন ফাদার, বললেন, ‘কেউ যেহেতু সনাক্ত করেনি, তাই এপিটাফে কিছু লেখাও যায়নি।’

‘ধন্যবাদ, ফাদার।’

‘আপনার কৌতূহল মিটেছে, মি. সুব্রত?’

‘জী, মিটেছে। আপনি আমার অনেক বড় একটা উপকার করলেন।’

ফাদারকে সম্ভ্রষ্ট দেখাল। ‘চলুন, আপনাকে আমি চৌরাস্তা পর্যন্ত পৌঁছে দিই—হাঁটাইটি করলে বাতের ব্যথাটা কমবে।’

‘আপনার সঙ্গ পেলে খুশি হই, ফাদার।’

কবরস্থান থেকে চার্চের সামনেটা হয়ে গেট দিয়ে চৌরাস্তায় বেরবে ওরা। চার্চের সামনে আসার পর হেডমাস্টার গুডফেলোকে আবার দেখতে পেল রানা,

চার্চ ও স্কুলের মাঝখানে নিচু পাঁচিলটার কাছে দাঁড়িয়ে দু'জন সিস্টারের সঙ্গে আলাপ করছেন। ও বুঝতে পারল, ওই নিচু পাঁচিল উপকেই স্কুল থেকে এদিকে এসেছিলেন ভদ্রলোক।

গেট খুলে রাস্তায় বেরিয়েই থমকে দাঁড়ালেন ফাদার বেঞ্জামিন, পাকা ভুরু দুটো কুঁচকে উঠেছে। 'ওই গাড়ির মতলবটা কি?'

ছেড়ে দেয়া তীরের বেগে শহরে ঢুকছে একটা গাড়ি। ওটার পথ থেকে ছিটকে সরে যাচ্ছে লোকজন। বাচ্চাকে ছোঁ দিয়ে তুলে নিয়ে ছুটল এক মা, মাত্র কয়েক ইঞ্চির জন্যে অ্যাক্সিডেন্টটা হলো না। চারচাকার এঞ্জিনবিহীন একটা ভ্যানগাড়ি, ওপরে মুরগিভর্তি খাঁচা, রাস্তার একেবারে মাঝখানে দাঁড়িয়ে আছে। ড্রাইভার ভ্যান ও মুরগির মায়া ত্যাগ করে পালাতে চেষ্টা করল। কালো মার্সিডিজ তাকে নয়, ধাক্কা দিয়ে ফেলে দিল খাঁচাসহ ভ্যানটাকে, ওগুলোর নিচে চাপা পড়ল ড্রাইভার।

'ড্রাইভার নির্ঘাত পাগল হয়ে গেছে!' অবাধ বিস্ময়ে তাকিয়ে আছেন ফাদার।

মার্সিডিজ সগর্জনে চৌরাস্তায় পৌছাল। এঞ্জিনের আওয়াজ আশপাশের দালানে লেগে প্রতিধ্বনি তুলছে। ফাদার আঁতকে উঠলেন। গাড়িটা সোজা চার্চের দিকে ছুটে আসছে।

'দৌড়ান!' ফাদারের হাত ধরে টান দিল রানা, চার্চের সামনের ধাপে তুলে আনল।

'কিন্তু কি...কে?'

'ওরা খুনী, ফাদার!'

বাকি তিনটে ধাপ উপকে চার্চের উঠানে ঢুকে পড়লেন ফাদার। বিশ গজ সামনে আরও কয়েকটা ধাপ, তারপর মূল চার্চে ঢোকার দরজা। সেদিকে ফাদার ও রানাকে দৌড়াতে দেখে নিচু পাঁচিলের কাছ থেকে হেডমাস্টার গুডফেলোও ছুটে এলেন।

'কি ব্যাপার? কি হলো?'

দরজা খুলে দালানে ঢুকলেন ফাদার, তাঁর পিছনে রানা ও হেডমাস্টার।

'কোন কথা নয়,' রুদ্ধশ্বাসে বলল রানা। 'আপনারা চার্চের পিছন দিয়ে বেরিয়ে যান। আমি ওদেরকে ঠেকিয়ে রাখব। যান!'

রাস্তার সঙ্গে চাকা ঘষে চার্চের সামনে দাঁড়িয়ে পড়ল মার্সিডিজ। দু'দিকের দরজা খুলে লাফ দিয়ে নিচে নামল দু'জন খুনী। বাকি চারজন উঠানে ঢুকল। আগেই নেমে পড়া দু'জন চার্চের পিছন দিকে চলে গেল।

উঠানে একটা গাছের পিছনে কাভার নিল হিনান ফো। পাঁজরের পাশে মেশিন গান বাগিয়ে ধরে গুলি শুরু করল সে।

ডাইভ দিয়ে মেঝেতে পড়ল রানা, শরীরটা গড়িয়ে দিল। চার্চের পাথুরে দেয়ালে সারি সারি গর্ত তৈরি করছে ইস্পাতের জ্যাকেট পরানো .৪৫ ক্যালিবরের বুলেট।

আরেক গাছের পিছনে কাভার নিয়েছে বাঁমপন্থী কমিউনিস্ট কবি মায়াতকা

থুয়ে, হাতে হাইপাওয়ার্ড রাইফেল। ওই রাইফেলের বুলেট একটা খেপা হাটিকেও থামিয়ে দিতে পারবে।

মোটােসোটা আরেক লোকের হাতে শটগান। চারজনের মধ্যে একজন কিশোর, মাথায় লাল পট্টি, দু'হাতে একটা করে পিস্তল। গাছের আড়াল থেকে সবাই তারা চার্চ লক্ষ্য করে গুলি করছে।

কাঠের দরজা টুকরো টুকরো হয়ে অস্তিত্ব হারাল। দালানের সামনেটা ধুলো আর ধোঁয়ায় ঢাকা পড়ে যাচ্ছে।

চার্চের যথেষ্ট ক্ষতি হলেও, রানার গায়ে একটা আঁচড়ও লাগেনি। পাথরের একটা স্তম্ভের পিছনে দাঁড়িয়ে সুযোগের অপেক্ষায় আছে ও।

ফাদার বেঞ্জামিন বড়ো মানুষ, গুডফেলো তাঁর হাত ধরে দৌড়াচ্ছেন। দরজা খুলে চার্চের পিছন দিকে বেরিয়ে এলেন ওরা।

বাঁক ঘুরল আয়ে মোয়ে, ফাদার আর হেডমাস্টারকে দেখতে পেয়ে ব্যারেল কাটা শটগানটা তুলল।

ফাদারের কলারের পিছনটা খামচে ধরে টান দিলেন গুডফেলো, পিছিয়ে দালানের ভেতর ঢুকে দরজাটা বন্ধ করে দিলেন।

শটগানের গুলি লেগে দরজা ঝাঁঝরা হয়ে গেল। কাঠের ছিটকে আসা টুকরো গায়ে লাগলেও গুডফেলো আহত হননি। ফাদারকে তিনি দরজার পাশের দেয়াল ঘেষে বসিয়ে দিয়েছেন। এদিক ওদিক তাকিয়ে একটা খালি টেবিল ছাড়া কিছুই তিনি দেখতে পেলেন না। অবশ্য দেরাজের ভেতর একটা হাতুড়ি, একটা টর্চ, আর বড় একটা ছেনি রয়েছে।

শটগানের দ্বিতীয় গুলি কবাটের গায়ে বড় একটা ফাঁক তৈরি করল, ফাঁকটা দিয়ে দিনের আলো ঢুকছে ভেতরে।

ডাবল ব্যারেলড অস্ত্রটা ভাঁজ করল আয়ে মোয়ে, খরচ হওয়া কার্তুজ লাফিয়ে বেরিয়ে যেতেই সে জায়গায় নতুন কার্তুজ ভরল। এই ফাঁকে তার সঙ্গী দরজার কবাটে ছ'টা গুলি করল রাইফেল দিয়ে। তাতেও দরজা ভেঙে পড়ছে না দেখে ছুটে এল সে, রাইফেলটা উল্টো করে ধরে কবাটে পরপর বাড়ি মারল কয়েকটা। একটা ফাঁক তৈরি হতে ভেতরে হাত ঢুকিয়ে বোল্ট খুঁজছে।

সেই হাতে ছেনির কিনারা দিয়ে প্রচণ্ড বাড়ি মারলেন গুডফেলো। সরাসরি আঙুলে লাগায় দু'তিনটে সফল হাড় প্রায় গুঁড়ো হয়ে গেল। 'বাপরে!' বলে সঙ্গে সঙ্গে জ্ঞান হারাল সে।

'ফাদার, টাওয়ারে!' বৃদ্ধের হাত ধরে আইল-এর মাঝখান দিয়ে ছুটলেন গুডফেলো। বেল টাওয়ার একশো ফুট লম্বা। কাঠের সিঁড়ি চৌকো শ্যাফট ধরে উঠে গেছে। টাওয়ারের মাথায় বেল থেকে ঝুলছে মোটা একটা রশি।

সিঁড়ি বেয়ে টাওয়ারে উঠে এলেন ওরা, আর ঠিক তখনই দরজা ভেঙে চার্চের ভেতর ঢুকে পড়ল আয়ে মোয়ে।

দূর থেকে গুলি করে কোন লাভ নেই, বুঝতে পেরে বীরত্ব দেখাবার একটা ঝোঁক সিক্রেট এজেন্ট

চাপল মাথায় লাল পট্টি বাঁধা কিশোর কমিউনিস্ট ক্যাডারের। চার্চের সামনের ধাপ লক্ষ্য করে ছুটল সে, দুটো পিস্তল থেকেই গুলি করছে।

রানা তাকে দালানের ভেতর ঢুকতে দিল। মাত্র একটা গুলিতেই কাজ হলো। মুখ খুবড়ে পড়ার পর ছেলেটা আর নড়ছে না।

হঠাৎ নিস্তব্ধ হয়ে গেছে পরিবেশটা। হিনান ফ্লোর মেশিন গান আওয়াজ করছে না।

বাইরে এখনও গাছের আড়ালে দাঁড়িয়ে রয়েছে মায়াককা থুয়ে। এখন পর্যন্ত একটা গুলিও করেনি সে। মোটা লোকটার দিকে ঘাড় ফিরিয়ে জিজ্ঞেস করল, 'সংসেজে দাঁড়িয়ে আছ যে? যাও, ভেতরে ঢুকে লোকটাকে মারো।'

'একা?'

'পিছনের ওরা কি করছে দেখতে গেছে ফো। তোমরা চারজন মিলে একটা লোককে খতম করতে পারবে না!'

'আমি টার্গেট দেখতে পাওয়ার অপেক্ষায় আছি।'

'ও-সব খুনপুন ছাড়ো!' বলে মোটা লোকটার দিকে রাইফেল তুলল থুয়ে। 'এখনি তোমাকে চার্চের ভেতর ঢুকতে হবে।'

একটা ঢোক গিলে গাছের আড়াল থেকে বেরুল লোকটা। ফাঁকা জায়গাটা পেরিয়ে এসে দালানের দেয়াল ঘেষে দরজার দিকে এগোচ্ছে।

মুখে হাত চাপা দিয়ে একটু হাসল থুয়ে, তারপর লোকটার পায়ের কাছে এক রাউন্ড গুলি করল। 'মুভ! মুভ!'

থুয়ের ভয়েই অস্থির হয়ে গুলি করতে করতে দালানের ভেতর ঢুকে পড়ল লোকটা। ছুটছিল, লাশের গায়ে পা লাগায় আছাড় খেলো। পরমুহূর্তে লাফ দিয়ে সিঁধে হলো, হাতের অস্ত্র ঘুরিয়ে টার্গেট খুঁজছে।

দৃষ্টিসীমার ভেতর রানাকে দেখা যাচ্ছে না।

লম্বা চার্চের শেষ প্রান্তে ঝাপসা একটা নড়াচড়া লক্ষ্য করল লোকটা। ট্রিগার টানতে গিয়েও সামলে নিল নিজেকে। পিছনের দরজা দিয়ে ভেতরে ঢুকল হিনান ফো।

বেল টাওয়ারের দিকে ছুটল যেন।

শার্চের আস্তিন দিয়ে চোখে নেমে আসা ঘাম মুছল মোটা লোকটা। উঁচু বেদির কাছে একটা শব্দ হতে প্রায় লাফিয়ে উঠল সে। কেউ কোথাও নেই। তাড়াতাড়ি, একটা দেয়ালের পিছনে চলে এল। উঁকি দিয়ে সারি সারি আসন, বেদি, ক্রস ইত্যাদির ওপর 'সতর্ক দৃষ্টি বোলাচ্ছে। রানাকে সে দেখতে না পেলেও, কনফেশনাল-এর বন্ধ দ্বিতীয় দরজার তলা থেকে ধূসর রঙের সামান্য একটু কাপড় বেরিয়ে থাকতে দেখে হাসি ফুটল মুখে।'

লোকটা দেখেছে, ওদের টার্গেট ধূসর রঙের ট্রাউজার পরে আছে।

দম আটকে রেখে কনফেশনালের দিকে এগোল সে। দরজার সামনে দাঁড়িয়ে রায়ট গান তুলে গুলি করল একের পর এক।

কাঠের দরজা বিস্ফোরিত হলো। ছোট্ট বুদটা খালি, ভেতরে কেউ নেই।

কে যেন শিস দিল।

মোট লোকটা দিশেহারার মত চোখ ঘোরাচ্ছে। এক সারি আসনের পিছন থেকে সিধে হয়ে তার মাথায় গুলি করল রানা।

টাওয়ারের মাথার কাছাকাছি পৌঁছে দম নেয়ার জন্যে থামল আয়ে মোয়ে। বেশি সিগারেট খেলে যা হয়, সিঁড়ি বেয়ে খানিকটা উঠলেই হাঁপাতে থাকে। আওয়াজ শুনে নিচে তাকাল সে, দেখল ফো-ও উঠে আসছে।

তবে খর্বকায় ফো এখনও অনেক নিচে, সে উঠে আসার আগেই আয়ে মোয়ে ঝামেলা চুকিয়ে ফেলবে। রেইলে হেলান দিল সে, দম ফিরে পেতে সময় লাগায় রেগে উঠছে নিজের ওপর। হাঁ করে বাতাস টানছিল, আরেকটু ঝুঁকে নিচে তাকাতো নতুন একটা উপদ্রব শুরু হলো—মাথাটা ঘুরছে। মনেই ছিল না যে তার ভার্টিগো আছে—ওপর থেকে নিচে তাকালেই অসুস্থবোধ করে।

আয়ে মোয়ে চোখ বন্ধ করল।

নিঃশব্দ পায়ে পিছনে এসে ভারী ছেনিটা সজোরে তার মাথায় নামিয়ে আনলেন গুডফেলো। দ্বিতীয় আঘাতটা আরও জোরাল হলো, তারপরই আয়ে মোয়ের পিঠে প্রচণ্ড এক ধাক্কা দিলেন। কাঠের রেইল ভেঙে গেল, শ্যাফটের ওপর থেকে আয়ে মোয়ের পতন শুরু হলো।

মাত্র আধ সেকেন্ডের জন্যে থমকাল ফো, আয়ে মোয়ের পতনটা দেখল, তারপর আবার আগের মতই ধাপ বেয়ে উঠতে লাগল।

গুডফেলো পিছিয়ে টাওয়ারের ভেতর দিকে সরে এলেন। লোহা-লক্কড়, কাঠ, রশি, হার্ডবোর্ডের বাস্ক ইত্যাদি জিনিসে ভেতরটা ঠাসা।

তরতর করে সিঁড়ি বেয়ে আয়ে মোয়ে যে ভুল করেছিল, ফো তা করতে রাজি নয়। ছোটখাট শরীর নিয়ে ধীরেসুস্থে উঠছে সে।

সিঁড়ির মাথায়, ল্যান্ডিংয়ে থামল ফো।

টাওয়ারের মাথা চারদিক খোলা। ওপরে অনেকগুলো কাঠের বীম আড়াআড়িভাবে ঝুলছে। প্রকাণ্ড ব্রোঞ্জের ঘণ্টাটা ঝুলছে সবচেয়ে মোটা বীম থেকে।

বাতাসে একটা দুর্গন্ধ। বাসা ছেড়ে শূন্য ডানা মেলল এক ঝাঁক পাখি। ওগুলোকে লক্ষ্য করে এক পশলা গুলি করল ফো।

ছিন্নভিন্ন পাখির একরাশ রক্তাক্ত পালক শ্যাফট বেয়ে নিচে নামছে।

ঝাপসা কি যেন একটা ছুটে এল তার দিকে। বিদ্যুৎবেগে মাথাটা সরিয়ে নিল ফো। লোহার ছেনিটা তার মাথায় লাগাতে পারলেন না গুডফেলো। ওটা তার আসলে ছোঁড়াই উচিত হয়নি। দেয়ালে বাড়ি খেলো ছেনি, শ্যাফটের নিচে নেমে গেল।

মদু হাসি ফোর ঠোঁটে।

রশি আর কাঠের স্তূপের ওদিকে গুঁড়ি মেরে বসে রয়েছেন ফাদার ও হেডমাস্টার। ওদেরকে ঝাঁঝ করা ফোর জন্যে কোন সমস্যাই নয়। তবে তার

আগে শিকারী বিড়ালের মত একটু মজা করতে ইচ্ছে হচ্ছে তার।

প্ল্যাটফর্ম ত্যাগ করল ফো, শ্যাফটের ওপর সেতুর মত লম্বা হয়ে থাকা একটা ক্যাটওয়াকে দৃঢ় পায়ে হাঁটছে। মাঝখানে পৌঁছে একবার থামল, পিঠে ঘষা খাচ্ছে ঠাণ্ডা ব্রোঞ্জের ঘন্টা। ফাদার আর হেডমাস্টারের লুকিয়ে থাকা কোন কাজে এলো না, এখান থেকে ওদেরকে পরিষ্কার দেখতে পাচ্ছে সে, গুলি করলে সরাসরি লাগবে।

বেল টাওয়ারের নিচে পৌঁছে মুখ তুলে ওপরে তাকাল রানা। দেখতে পেল ফোকে। মার্কসম্যান হিসেবে প্রথম সারির হলেও, ওর মনে হলো এখান থেকে গুলি করা ঠিক হবে না। করলে খুব বাজে একটা জায়গায় গিয়ে ঢুকবে বুলেট। আর কি বিকল্প আছে খুঁজতে গিয়ে চোখে পড়ল চার্চ-বেলের দড়িটা।

প্রৌঢ় হেডমাস্টার গুডফেলো বৃদ্ধ ফাদার বেঞ্জামিনকে নিজের শরীর দিয়ে আড়াল করার চেষ্টা করছেন।

পরিস্থিতির নির্মম বাস্তবতা উপভোগ করছে ফো। ‘ছি, ছি! তুমি যাজক হয়ে, ঈশ্বরের পেয়ারা বান্দা হয়ে মৃত্যুভয়ে কাঁপছ ঠকঠক করে! আরে ব্যাটা বুডা, এত লম্বা জীবনে চুপিচুপি কিছু পাপ তো করেছিসই, ঈশ্বরের কাছে তাড়াতাড়ি মাফ চেয়ে নে।’

‘ঈশ্বর তোমার মঙ্গল করুন! ঈশ্বর তোমাকে ক্ষমা করবেন!’ বিড়ি বিড়ি করলেন ফাদার।

‘তোমার ঈশ্বরের এই ঘরে আমি আগুন দেব, পাদ্রি ব্যাটা।’

বেল টাওয়ারের নিচে, মেঝে থেকে ওপর দিকে লাফ দিল রানা। ঝুলন্ত মোটা রশিটা দু’হাতের ভেতর চলে এল। শরীরের সব শক্তি এক করে টান দিল তাতে।

অকস্মাৎ সচল হলো প্রকাণ্ড বেল।

ওটার দোল খাওয়ার পথে দাঁড়িয়ে রয়েছে ফো। এক ধাক্কায় ক্যাটওয়াক থেকে খসিয়ে দিল তাকে চার্চের ঘন্টা।

শ্যাফটের মধ্য দিয়ে নিচে টেনে নিচ্ছে এবার মাধ্যাকর্ষণ।

গোলাগুলি থেমে যাওয়ায় পরিবেশটা নিস্তব্ধ হয়ে পড়েছিল।

ফোর রোমহর্ষক আর্তনাদ আর পতনের শব্দ সেই নিস্তব্ধতাকে ভেঙে দিল।

চার্চের কোণ ঘুরে কে যেন টলতে টলতে আসছে। নিজের দলের লোক, চিনতে পেরে ট্রিগারের আঙুলটায় টিল দিল মায়াতকা খুয়ে।

ওর নাম পুয়ে, রাইফেলম্যান; ছেনি দিয়ে যার হাতটা গুঁড়িয়ে দিয়েছেন গুডফেলো। গোঙাচ্ছে, চোখে পানি, কোন রকমে নিজেকে টেনে আনছে গেটের দিকে। ‘চলুন! পালাই!’

‘আর সবাই?’

‘নেই! কেউ নেই! এখনও সময় আছে, চলুন। এই, তোমরা কি চাও এখানে?’

পুয়ের আতঙ্কিত দৃষ্টি অনুসরণ করে ঘাড় ফেরাল থুয়ে। গেট দিয়ে পিলপিল করে ভেতরে ঢুকছে শহরের মানুষ। সব মিলিয়ে একশোর কম হবে না। থুয়ে আর পুয়ের বিস্ময়ের ধাক্কা কাটল না, লোকগুলো ঘিরে ধরল তাদেরকে।

লোকগুলো উত্তেজিত নয়। অন্তত তাদের চেহারা য় রাগ বা আক্রোশের কোন প্রকাশ নেই। চোখে মুখে দৃঢ় একটা ভাবই শুধু লক্ষ করা গেল।

রাইফেল; পিস্তল কোন কাজেই এল না। থুয়েকে চ্যাংদোলা করে তুলে নিল জনতা। আরেক দল লোক পুয়ের পা ধরে টেনে নিয়ে যাচ্ছে।

শহরের উপকণ্ঠে পাশাপাশি অনেকগুলো কুয়া আছে। চোর-ডাকাতদের ধরতে পারলে এলাকার লোকজন তাদেরকে এই কুয়ায় ফেলে। প্রতিটি কুয়ার ভেতর বিষাক্ত সাপ আছে।

বামপন্থী কবি মায়াতকা থুয়ে আর তার শিষ্য হাপুস নয়নে কান্নাকাটি করলেও জনতার হৃদয়ে এতটুকু করুণার উদ্বেক হলো না। ডাকাতদের বেলায় যা করা হয় না, অতিরিক্ত সাবধানতা-হিসেবে এদের দু'জনের বেলায় তা করা হলো। কুয়ায় ফেলার আগে দু'জনের হাত ও পা এক করে রশি দিয়ে বেঁধে নিল তারা।

দালান থেকে বেরিয়ে এসে চার্চের ধাপের ওপর দাঁড়িয়ে আছে রানা। জনতার মিছিল থুয়ে আর পুয়েকে কি রকম জামাই আদরের সঙ্গে তুলে নিয়ে গেল দেখেছে ও। ওদেরকে নিয়ে কি করা হবে ওর জানা নেই, তবে এ ব্যাপারে মনে কোন সন্দেহ নেই যে জনতার বিচার নির্মম হলেও অযৌক্তিক হবার সম্ভাবনা খুব কম।

খরচ হওয়া ক্লিপ ফেলে দিয়ে ল্যাগারে নতুন একটা ভরতে যাচ্ছে, কিন্তু সুযোগ পেল না।

‘ওটা এখন আর আপনার দরকার নেই, সুব্রত বাবু।’

ধীরে ধীরে ঘুরল রানা, একহাতে ল্যাগার, অপরহাতে ক্লিপ।

চার্চের ভেতর দাঁড়িয়ে রয়েছে মেজর আউং, হাতের অস্ত্র রানার দিকে তাক করা। ‘আমারটা লোড করা।’

‘আপনার সুহৃদরাজ্যটা লেজেন্ডেগোবরে করে ফেলেছে, মেজর আউং।’

‘ক্রেটি-বিচ্যুতি সব আমি শুধরে নেব। না, ওদেরকে আমার বন্ধু বলবেন না, প্রীজ। ওরা দুশ্কৃতকারী-গুপ্ত-বদমাশ-খুনী ও কমিউনিস্ট। ওদের বাঁচার কোন অধিকার নেই।’

‘তবু ভাল যে অন্তত একটি বিষয়ে আমরা একমত হতে পারছি।’

‘আমার জানা ছিল ওরা আপনার হাতে নিশ্চিহ্ন হবে। সেজন্যেই ওদেরকে জানিয়ে দিই কোথায় আপনাকে পাওয়া যাবে। সত্যি কথা বলতে কি, আপনি আমার খুব উপকারী হাতিয়ার হিসেবে ভূমিকা রেখেছেন। কি জানেন, আন্তরিকভাবে কারও প্রশংসা করার ভান করা যায় না। যে কথাটা বলতে চাই—মাসুদ রানা নিজের সুনামের প্রতি অবিচার করেনি। আপনি আমাদেরকে ঋণী করে রাখলেন।’

‘আমাদেরকে?’

‘সরকারী, প্রশাসনিক, বাণিজ্যিক আর কূটনৈতিক মহলে অত্যন্ত প্রভাবশালী ও ক্ষমতাবান এক দল মানুষ, যাদের নাম আপনার কাছে অর্থহীন। তারা কোন অবস্থাতেই চান না পুরনো ক্ষত খোঁচানো হোক।’

‘আরও চায় না দেশের মানুষ জানুক মাটি খুঁড়ে পাওয়া প্রাচীন আর্টিফ্যাক্ট বিক্রি করে কোটি কোটি ডলার ওরা নিজেদের পকেটে ভরেছে, আর সেই গোপন তথ্য গোপন রাখার জন্যে একের পর এক মানুষ খুন করতেও তাদের বাধেনি।’

‘হ্যাঁ, আমি তাঁদের কথাই বলছি।’ মাথা ঝাঁকাল মেজর আউং। ‘তাঁরা আপনার মৃত্যুদণ্ড ঘোষণা করেছেন, মি. মাসুদ রানা। এক অর্থে দুঃখজনক অপচয়, স্বীকার করছি; এসপিওনাজ জগতে আরেকজন মাসুদ রানা আবার কবে জন্মাবে, আদৌ জন্মাবে কিনা, কে জানে! আবার আরেক অর্থে, নেসেসারি; তা না হলে তাঁদের নিরাপত্তা নিশ্চিত হয় না।’

‘আপনার কৌতুক আপনি একা উপভোগ না করে রস আশ্বাদনের সুযোগ আমাকেও একটু দিন না, মেজর।’

‘গোটা ব্যাপারটার মধ্যে শুধু কৌতুক নয়, খানিকটা প্রহসনও আছে, মি. রানা। দশ বছর পর আপনি এখানে এসেছেন ড. মুহিত হায়দার নামক ধাধার সমাধান করতে। হয়তো আজ থেকে দশ বছর পর অন্য কেউ একজন আসবে মাসুদ রানার অন্তর্ধান রহস্য মীমাংসা করার জন্যে।’

‘ধাঁধাটা এখন আর ধাঁধা নেই, মেজর আউং,’ বলল রানা। ‘আমি তাঁর সমাধান পেয়ে গেছি।’

‘আমি জানতাম আপনি পাবেন।’

‘সমাধানটা আপনিও আন্দাজ করতে পেরেছেন। সেজন্যেই আবার ফিরে এসেছেন পুতাপাইয়ে।’

‘ব্যাপারটা বুঝতে সময় লেগেছে আমার। দুটো কবর, এর কোন তাৎপর্য প্রথমে আমার কাছে ধরা পড়েনি। তাঁরপর রেকর্ড চেক করতে গিয়ে দেখি প্লেনে মানুষ ছিল দু’জন নয়, তিনজন। তিনজন মানুষ—পাইলট, কো-পাইলট, এবং ড. মুহিত হায়দার। এবং এখন আমি জানি কবর দুটোয় শুয়ে আছে পাইলট আর কো-পাইলট।’

‘তাহলে আপনি এ-ও জানেন যে ড. মুহিত হায়দারের কঁপালে কি ঘটেছে।’

‘হ্যাঁ, জানি। তাঁকে আবার হারিয়ে যেতে হবে। তাঁর সঙ্গে আপনিও হারিয়ে যাবেন।’

চার্চের ভেতর থেকে কাদের যেন গলা ভেসে এল। ঝাট করে ঘাড় ফিরিয়ে দরজার দিকে তাকাল মেজর আউং। তারপর রানার দিকে ফিরে বলল, ‘ওঁরা আসছেন না, নড়বেন না! আর মাত্র এক মিনিট আয়ু আছে আপনার। বোকার মত কিছু করে সেটাকে আরও কমাবেন না।’

‘চাইলেও কি আমার কিছু করার আছে? আমার অস্ত্র যে খালি সে তো আপনি জানেনই।’

‘ইউনিক—আপনার এই লুগার। আমার ট্রফি কেসে অত্যন্ত মর্যাদার আসন

দেয়া হবে ওটাকে।

‘এটা এখন আর আমার কোন কাজে আসছে না,’ বলে ল্যাগার ও ক্লিপ ফেলে দিল রানা। ছুঁড়ল না, স্বেচ্ছা ছেড়ে দিল।

কাজটায় কোন হুমকি নেই, কাজেই গুলি করল না আউং। তবে তার মনোযোগ বিচ্যুত হয়েছে।

যেই মাত্র তার দৃষ্টি ল্যাগারের দিকে ছুটে গেল, অমনি কজি ঝাঁকিয়ে স্প্রিং লাগানো খাপ থেকে ছুরিটা হাতে নিল রানা। হাতে আধ সেকেন্ডও থাকল না ওটা, ছুটে গেল আউঙের দিকে।

আউঙের ভুরু বিস্ময়ে একজোড়া ধনুক হয়ে গেল। চোখ নামিয়ে তাকাতে দেখতে পেল, ঠিক হৃৎপিণ্ড বরাবর বুক থেকে একটা ছুরির হাতল বেরিয়ে আছে। যেন ব্যাপারটা বুঝতে পেরেই দড়াম করে পড়ল সে মেঝেতে। তারপর বার কয়েক হাত-পা ছুড়ে স্থির হয়ে গেল।

মায়া মালহারকে দেয়া প্রতিশ্রুতি রক্ষা করল রানা। ফালাম আর্কিওলজিকাল প্রজেক্ট থেকে লাভবান দুর্নীতিপরায়ণ সরকারী কর্মকর্তাদের সম্ভাব্য বিপদ-আপদ থেকে রক্ষা করার দায়িত্ব পালন করছিল ডিটেকটিভ ব্রাঞ্চের পুলিশ অফিসার মেজর ইয়ে আউং।

ধাপের ওপর ঢলে পড়ছে আউং, এই সময় দালান থেকে বেরিয়ে এলেন ফাদার বেঞ্জামিন ও হেডমাস্টার গুডফেলো।

রানা এখন বুঝতে পারছে হেডমাস্টার ভদ্রলোককে এর আগে কোথায় দেখেছে। পাকা দাড়ি, লম্বা চুল ও দশটা বছর বিয়োগ করে তাঁর অবয়ব কল্পনা করতেই লভনে ঋণীর দেখানো ফটোর সঙ্গে মিল খুঁজে পাওয়া গেল।

ফাদার বেঞ্জামিন থরথর করে কাঁপছেন আতঙ্কে। বেসুরো কণ্ঠে জানতে চাইলেন তিনি, ‘কে আপনি? আমাদের কাছে কি চান?’

‘আমি ড. মুহিত হায়দারকে নিতে এসেছি,’ বলল রানা।

ফাদার বিমূঢ় ও দিশেহারা। রোদের মধ্যে দাঁড়িয়ে বার কয়েক চোখ মিটমিট করলেন হেডমাস্টার। তারপর তিনি ম্লান একটু হাসলেন।

আঠারো

মিনহাজ চৌধুরী ফুঁসছেন আর তারিক মোস্তফা ফুলছেন।

‘আপনাদের ক্যারিয়ার শেষ!’ চিৎকার করছেন মিনহাজ। ‘নিজেদের পায়ে কুড়ল মেরেছেন! জেল খাটতে না হলে মনে করতে হবে নেহাতই আপনাদের ভাগ্যের জোর!’

‘এ স্বেচ্ছ পাগলামি! চরম দায়িত্বজ্ঞানহীনতা। গ্রহণযোগ্য একটাই ব্যাখ্যা আমি অফার করতে পারি—দু’জনেই আপনারা বন্ধ উন্মাদ হয়ে গেছেন,’ রাষ্ট্রদূত

তারিক মোস্তফা বললেন।

‘শাট আপ,’ বৃষ্টির গলা শান্ত।

তার কণ্ঠস্বরে এমন কিছু একটা আছে, দু’জনেই ওরা চুপ করে গেলেন।

ডিবির অ্যাসিস্ট্যান্ট কমিশনার ও রাষ্ট্রদূতকে ইয়ানগনের বাংলাদেশ দূতাবাসের ছোট একটা কামরায়-অন্তরীণ করা হয়েছে। মিলিটারি অ্যাটাশেই-এর দু’জন সশস্ত্র সহকারী দরজার বাইরে পাহারায় দাঁড়িয়ে আছে। মিলিটারি অ্যাটাশেইকে দেখা না গেলেও, আশপাশেই কোথাও আছেন তিনি-ঢাকার পররাষ্ট্র মন্ত্রণালয় থেকে বিশেষ নির্দেশ পাবার পর তাঁর অন্তত এই মুহূর্তে দূতাবাস ছেড়ে কোথাও যাবার কথা নয়।

‘আপনাদের কারণেই আমার দু’জন লোককে কফিনে ভরে ঢাকায় ফেরত পাঠাতে হলো,’ ঠাণ্ডা সুরে বলল বৃষ্টি। ‘ব্যাপারটা যদি আমার ওপর নির্ভর করত, আপনাদেরকে আমি ফাসিতে ঝোলাতাম। দুর্ভাগ্যই বলতে হবে, আপনাদেরকে বাঁচিয়ে রাখতেই দেশের লাভ। তবে ভাগ্যের ওপর খুব একটা ভরসা রাখতে নিষেধ করি আমি।’

রাষ্ট্রদূত তার দিকে অপলক তাকিয়ে থাকলেন, রক্তশূন্য ফ্যাকাসে দেখাচ্ছে তাঁকে। ‘বৃষ্টি, কার সঙ্গে কথা বলছেন আপনি জানেন?’

‘জানি বৈকি। দু’জন বেঙ্গমানের সঙ্গে। যারা গত দশ বছর ধরে দেশের গোপন তথ্য শত্রুরাষ্ট্রে পাচার করছে।’

‘আর কোন কথাই বলবেন না,’ রাষ্ট্রদূতকে বললেন ডিবির অ্যাসিস্ট্যান্ট কমিশনার। ‘ওদেরকে নিজেদের কবর খুঁড়তে দিন। আমি দেখতে চাই, চড় খেয়ে হুঁশ ফেরার আগে কত বাড় বাড় ওরা।’

রানা হেসে উঠল। ‘আমি ভাবছি পাঁচ মিনিট পর কেমন দেখাবে আপনাদের।’

‘ও, তাই?’ চোখ গরম করে তাকালেন মিনহাজ। ‘পাঁচ মিনিট পর কি ঘটবে?’

‘ধরুন আপনাদের মাথায় আকাশ ভেঙে পড়বে।’

‘রাবিশ!’

‘আপনি শুধু আবর্জনা নন, চৌধুরী, আপনি আসলে দূষিত বর্জ্য। আইন, পুলিশ ও পররাষ্ট্র মন্ত্রণালয়-তিন তিনটে বিভাগে ঢোকান সুযোগ করে নিয়ে যেখানে যত গোপন তথ্য আছে সব আপনি দশ বছর ধরে পাকিস্তানে পাচার করেছেন। তবে এবার আপনার ভাগ্য বৈকে বসেছে।’

‘সময় থাকতে হেসে নিন, রানা। আপনার শেষ তো আমি দেখবই।’

‘মরা মানুষ কিন্তু সব সময় কবরে থাকে না, চৌধুরী।’

‘আপনার এ-কথার মানে কি, রানা?’ ককশ গলায় জানতে চাইলেন তারিক মোস্তফা।

‘চলুন, দশ বছর অতীতে ফিরে যাই,’ শুরু করল রানা। ‘ফালাম আর্কিওলজিকাল প্রজেক্ট থেকে পাওয়া গেল প্রায় দুই বিলিয়ন মার্কিন ডলার মূল্যের

প্রাচীন আর্টিফ্যাক্ট। সেগুলো মেরে দিয়ে একদল সরকারী কর্মচারী ধনকুবের বনে গেল। তাদের নাম ও পরিচয় এখানে গুরুত্বপূর্ণ নয়। এ-দেশে সামরিক কর্মকর্তারা দেশ চালাচ্ছে, তারাও নব্বই ভাগ অসৎ, কাজেই ওই ধনকুবেররা অংশান সুকি বা বিরোধী রাজনৈতিক দলগুলোর মাথাব্যথা। গুরুত্বপূর্ণ হলো, প্রাচীন ওই আর্টিফ্যাক্ট কারও সাহায্য ছাড়া তারা লুট করতে পারত না। প্রথম বাধা হয়ে দেখা দেন ড. মুহিত হায়দার। লুটের ভাগ নিয়ে মায়ানমারের জনগণের সঙ্গে বেসম্মানী করতে তাঁকে রাজি করা যাচ্ছিল না। সমস্যা আরও ছিল। তারা লুট করতে চাইল কোন প্রমাণ না রেখে।

‘তাদেরকে সাহায্য করল ফালাম ড্যাম প্রজেক্টের পাকিস্তানী এঞ্জিনিয়ার এবং রোহিঙ্গা গেরিলা বাহিনীর ট্রেনার ও উপদেষ্টা আইএসআই এজেন্টরা। পাকিস্তানী ও রোহিঙ্গাদের রাজনৈতিক স্বার্থ তো ছিলই, উপরি হিসেবে লুটেরও ভাগ পাবার ব্যবস্থা হয়ে গেল।

‘টাকার গন্ধ পেয়ে এবার আমাদের তরফের লোকজনও হাজির হলো ফালামে। ইচ্ছে করলে, সরকারী গ্রুপ, রোহিঙ্গা গেরিলা আর আইএসআইকে লুটপাট করতে বাধা দিতে পারত তারা, কিন্তু বাধা দেয়া তো দূরের কথা, তারা সাহায্য করার বিনিময়ে লুটের ভাগ চেয়ে বসল।’ সেই সঙ্গে হুমকি দিল, ভাগ না পেলে সব তারা ফাঁস করে দেবে।

‘দুটো শর্ত দিয়ে আমাদের লোকের প্রস্তাবে রাজি হয়ে গেল আইএসআই। প্রথম শর্ত, প্রথম বাধা অপসারণ অর্থাৎ ড. মুহিত হায়দারের একটা ব্যবস্থা করতে হবে। দ্বিতীয় শর্ত, বাংলাদেশ পররাষ্ট্র মন্ত্রণালয়ে আইএসআই-এর দু’জন চর ঢোকাতে হবে। আমাদের, বাংলাদেশ দূতাবাসের প্রতিনিধিরা মেনে নিল তাদের শর্ত।

‘আমাদের লোকেরা এরপর উঠে পড়ে লাগল আইএসআইকে সাহায্য করতে। থিরি হটাইক নামে দুর্ধর্ষ এক ডাকাত সদীরকে ভাড়া করল তারা ড. হায়দারের প্রেমিকা মায়া মায়া মালহারকে কিডন্যাপ করার জন্যে। মায়া মালহার খুন হয়ে যাবে, এটা বোঝানো গেলে ড. হায়দার লুটের সময় চোখ বুজে থাকতে রাজি হবেন। তাদের সময় দরকার ছিল মাত্র দু’একটা দিন। আইএসআই নির্দেশ দিতে যা দেরি, রোহিঙ্গা গেরিলারা ডিনামাইট ফাটিয়ে উড়িয়ে দেবে ড্যামটা। ঘটনাটা ঘটলেই বলার সুযোগ পাওয়া যাবে—যদি কোন আর্টিফ্যাক্ট আবিষ্কৃত হয়েও থাকে, বাঁধ ভাঙা পানির তোড়ে সব ভেসে গেছে। লুটপাটের কাজটা তো আগে নির্বিঘ্নে শেষ হোক, তারপর ড. হায়দার আর মায়া মালহারের স্থায়ী ব্যবস্থা করা যাবে।

‘প্রেমিকার প্রাণ বাঁচানোর জন্যে লুটেরাদের সামনে বসে মিথ্যে একটা রিপোর্ট লিখলেন ড. হায়দার। রিপোর্টে তিনি স্বীকার করলেন, যদিও আলামত দেখে তাঁর মনে হয়েছিল ফালাম থেকে প্রাচীন মং সাম্রাজ্য ও প্রাচীন বৌদ্ধ সভ্যতার বিপুল আর্টিফ্যাক্ট পাওয়া যাবে, কিন্তু বাস্তবে কিছুই তিনি আবিষ্কার করতে পারেননি। লুটেরারা তাঁকে এই রিপোর্ট ইয়ানগনের সরকারী দফতরে পৌঁছে দেয়ার নির্দেশ

দেয়।

‘এখানেই ভাগ্য তাদের অনুকূলে চলে আসে। এরপর এঁমন একটা ঘটনা ঘটল, যা তাদের প্রাণে ছিল না। মিথ্যে রিপোর্টটা ইয়ানগনে নিয়ে যাবার সময় ড. মুহিত হায়দারের প্লেন ক্র্যাশ করল।

‘মায়া মালহারের প্রয়োজন ফুরাল, কাজেই তাকে আর কাঁচিয়ে রাখার কোন মানে হয় না। তাকে খুন করার জন্যে নির্দেশ দেয়া হলো থিরি হাটাইককে। সে আর ড. হায়দার পথ থেকে সরে যেতে বাকি থাকল রোহিঙ্গা গেরিলাদের ফাঁকি দেয়ার কাজ। পাঁচ ট্রাক ভর্তি আর্টিফ্যাক্ট দেয়া হলো তাদের, বলা হলো ট্রাক নিজেদের আস্তানায় নিয়ে গিয়ে কাঠের বাস্ক নামাবে তারা, এবং তার আগে ডিনামাইট ফাটিয়ে ড্যামটা উড়িয়ে দিতে হবে।

গেরিলারা যথাসময়েই উড়িয়ে দিল ড্যাম। তার আগে লুটেরারা সমস্ত আর্টিফ্যাক্ট সরিয়ে এনে নিজেদের মধ্যে ভাগ করে নিয়েছে। ড্যাম উড়িয়ে দেয়ার পর গেরিলারা দেখল ট্রাকের মাত্র দু’চারটে বাস্কে সামান্য কিছু আর্টিফ্যাক্ট আছে, বাকি সব বাস্কে পাথর ভরা। ‘বেশ কিছু দিন ধরেই আইএসআই-এর সঙ্গে স্থানীয় কিছু গেরিলা নেতার বিরোধ চলছিল, তারা অভিযোগ করল ওই নেতারা চোরের ওপর বাটপাড়ি করেছে। রাগে অন্ধ গেরিলারা তাদের কয়েকজন নেতাকে গণপিটুনি দিয়ে মেরেই ফেলল। এই হত্যাকাণ্ডে নেতৃত্ব দিল গেরিলাদের মধ্যে কমিউনিস্ট বলে পরিচিত মায়াকতা থুয়ে ও আয়ে মোয়ে।’

কফির কাপে চুমুক দেয়ার জন্যে থামল রানা। ঠাণ্ডা হয়ে গেছে, তবু গলা ভেজাবার কাজে লাগল।

রাষ্ট্রদূতকে মনে হচ্ছে একঘেয়েমির শিকার। মিনহাজ চৌধুরী চেহারায়ে স্তম্ভিত একটা ভাব নিয়ে বসে আছেন, যেন এরকম অদ্ভুত ও অবিশ্বাস্য কাহিনী জীবনে আগে কখনও শোনেননি তিনি।

‘আমার কাহিনী প্রায় শেষ,’ আবার বলল রানা। ‘উপসংহার টানার আগে দুঃখ ও ক্ষোভের সঙ্গে বলতে হচ্ছে, আইএসআই বাংলাদেশ পররাষ্ট্র মন্ত্রণালয় ও ডিবিতে নিজেদের দু’জন লোক ঢোকানোর পর অপূরণীয় ক্ষতি হয়ে গেছে আমাদের। বৈদেশিক নীতি, সিদ্ধান্ত ও তথ্য, সবই দশ বছর ধরে নিয়মিত পাচার হয়ে গেছে। আরও ফাঁস হয়েছে দেশের আইনশৃংখলা সম্পর্কে পুলিশ বিভাগের পরিকল্পনা, টপটেরদের গোপন তালিকা ইত্যাদি।’

‘ওদের নাম বলুন, মাসুদ ভাই,’ তাগাদা দিল বৃষ্টি। ‘আইএসআই এজেন্ট কারা?’

‘তারিক মোস্তফা আর মিনহাজ চৌধুরী।’

দু’জনেই ওঁরা একযোগে বিস্ফোরিত হলেন, প্রতিবাদ আর অস্বীকারের ঝড় বইয়ে দিচ্ছেন।

এক পা পিছিয়ে এসে বুকে হাত বেঁধে দাঁড়িয়ে থাকল রানা। কয়েক মিনিট ওঁদেরকে প্রলাপ বকার সুযোগ দিল ও, তারপর বৃষ্টিকে জিজ্ঞেস করল, ‘ওদের মুখ থেকে আর কিছু শুনতে বাকি আছে তোমার?’

‘প্রয়োজনের চেয়ে বেশি শোনা হয়ে গেছে,’ জবাব দিল বৃষ্টি।

‘তাহলে আমাদের সারপ্রাইজ গেস্টদের ভেতরে আনো, প্লীজ।’

‘স্রেফ ভিত্তিহীন, উদ্দেশ্যপ্রণোদিত, মিথ্যে অভিযোগ!’ তারিক মোস্তফা এখনও বলে চলেছেন। ‘আমার নিষ্কলুষ চরিত্রে কালিমা লেপনের নোংরা একটা ষড়যন্ত্র মাত্র। স্বার্থান্বেষী মহল...’

মিনহাজ চৌধুরীও চালিয়ে যাচ্ছেন, ‘এর জন্যে তোমাকে চড়া মূল্য দিতে হবে, রানা। খোদার কসম বলছি, তোমার আমি বারোটা বাজিয়ে ছাড়ব!’

বৃষ্টি কামরা থেকে বেরিয়ে গিয়েছিল, এখন সে ফিরে আসছে। তবে একা নয়। তার পিছু নিয়ে অপরূপ সুন্দরী এক ভদ্রমহিলা ঘরে ঢুকলেন। তাঁর পরনে কালো ড্রেস।

কেউ যেন বোতাম টিপে দু’জনের চিৎকার-চেষ্টামেচি থামিয়ে দিল। দু’জনেই তারা হাঁ করে জ্যাক্ত হয়ে ওঠা মৃত অতীতের দিকে তাকিয়ে আছেন।

‘বোঝা গেল আপনারা দু’জন মায়া মায়া মালহারকে ভুলে যাননি,’ বৃষ্টির গলা একটু তীক্ষ্ণ শোনাল।

‘না-না। এ অসম্ভব! তুমি মারা গেছো!’ মিনহাজ হাঁপাচ্ছেন।

ঝট করে তার দিকে ফিরে গর্জে উঠলেন তারিক মোস্তফা, ‘শাট আপ, ইউ ফুল!’

ঘরে আরেকজন ঢুকল।

তিনি পুতাপাই মিশনারি স্কুলের হেডমাস্টার গুডফেলো। তাঁর লম্বা চুল কেটে ছোট করা হয়েছে। দাড়ি নেই, নিখুঁত ভাবে কামানো গাল। টাই ও সুট পরে আছেন।

‘ড. হায়দার!’ কুকড়ে চেয়ারের পিছন দিকে সরে গেলেন তারিক মোস্তফা, যেন অকস্মাৎ ম্যাসিভ হার্ট অ্যাটাক হয়েছে। ‘অসম্ভব! এ সত্যি নয়। এ সত্যি নয়!’

মায়া মালহার ও ড. হায়দারকে দেখার জন্যে ওই বেঙ্গলমানকে মাত্র এক মিনিট সময় দিল রানা।

বৃষ্টির উদ্দেশ্যে মাথা ঝাঁকাল ও। মায়া মালহার আর ড. হায়দারকে নিয়ে কামরা থেকে বেরিয়ে গেল সে। মায়া মালহার বা ড. হায়দার, কেউ কোন কথা বললেন না।

সশস্ত্র প্রহরীরা মিনহাজ চৌধুরী আর তারিক মোস্তফাকে দুটো আলাদা কামরায় নিয়ে গেল, সামরিক অ্যাটাশেই আর তার সহকারীরা ওদেরকে ইন্টারোগেট করবেন।

দুই বেঙ্গলমান নিজেদের সমস্ত অপরাধ স্বীকার করে জবানবন্দী দিতে রাজি হলো। তাদের স্বীকারোক্তি শেষ হতে রাত প্রায় কাবার হয়ে যাবে।

বৃষ্টি আর থুইন গাড়ি করে রানাকে এয়ারপোর্টে পৌঁছে দিচ্ছে।

‘মজার ব্যাপার হলো,’ বলল রানা, ‘নিজেদের দাবিতে শেষ পর্যন্ত অটল

থাকতে পারলে মিনহাজ ও মোস্তফাকে কাঠগড়ায় তোলা সম্ভব হত না। মায়া মালহার দু'জনের বিরুদ্ধে অভিযোগ এনেছেন ঠিকই, কিন্তু তিনি ছাড়া তাঁর পক্ষে কোন সাক্ষী নেই। ডিবি'র একজন জাঁদরেল কর্মকর্তা আর মর্যাদাবান একজন রাষ্ট্রদূতের বিরুদ্ধে এক ডাকাত সর্দারের স্ত্রীর কথা কে বিশ্বাস করত।

‘তা ঠিক, কিন্তু ড. হায়দার?’ জিজ্ঞেস করল বৃষ্টি। ‘মায়া মালহারের প্রতিটি অভিযোগ সত্য বলে সাক্ষ্য দিতে পারতেন তিনি।’

রানা প্রশ্ন করল, ‘ড. হায়দারের মত একজন আন্তর্জাতিক খ্যাতিসম্পন্ন ব্যক্তি বিদেশের অখ্যাত এক মিশনারি স্কুলে দশ বছর ধরে মাস্টারি করছেন কেন?’

‘এটা আমার কাছে বিরাট একটা রহস্য!’

‘কারণ হলো, নিজের পরিচয়ই তিনি জানেন না। প্লেন ক্র্যাশে শারীরিকভাবে বেঁচে গেলেও, মানসিক দিক থেকে ভদ্রলোক মারাত্মকভাবে ক্ষতিগ্রস্ত হয়েছেন। দুর্ঘটনার সময় মাথায় আঘাত পেয়েছিলেন, সেই থেকে অ্যামনেসিয়ায় ভুগছেন। অতীতের কোন ঘটনাই তাঁর মনে নেই, নিজের পরিচয় যদিও জানেন না, লেখাপড়া মোটেও ভোলেননি। স্থানীয় বার্মিজরা তাঁকে বন-জঙ্গলে উদ্দেশ্যহীন ঘুরে বেড়াতে দেখে ধরে এনে পাদ্রীর হাতে তুলে দেয়। পুতাপাই চার্চে সে-সময় পাদ্রী ছিলেন একজন শ্বেতাঙ্গ। তিনিই নাম রাখেন গুডফেলো। অস্বাভাবিক ধারাল ব্রেন, অল্প দিনেই বার্মিজ ভাষা শিখে ফেললেন ড. হায়দার। ইংরেজি সাহিত্য, ভূগোল, ইতিহাস ইত্যাদি সাবজেক্টে রীতিমত পণ্ডিত মনে হলো তাঁকে। পাদ্রী তাঁকে স্কুলে পড়াবার দায়িত্ব দিলেন। অত্যন্ত যোগ্যতার সঙ্গে দায়িত্ব পালন করলেন তিনি। দু'বছরের মাথায় ওই স্কুলের হেডমাস্টার করা হলো তাঁকে।’

‘অবিশ্বাস্য!’ বলল বৃষ্টি। ‘কিন্তু আপনি তাঁর আসল পরিচয় উদ্ধার করলেন কিভাবে?’

‘কাজটা সহজ হয়নি।’ হাসল রানা। ‘হেডমাস্টারকে প্রথমবার দেখে আমার মনে হলো, ভদ্রলোককে আগে যেন কোথাও দেখেছি। কিন্তু মনে করতে পারিনি। প্রথম সূত্র পেলাম চার্চের কবরস্থান থেকে। প্লেনে লোক ছিল তিনজন, কিন্তু কবর মাত্র দুটো। ঠিক, সনাক্ত ও পোস্টমর্টেম ছাড়া কবর দেয়ায় কোন দু'জনকে কবর দেয়া হয়েছে তা বোঝার উপায় নেই, তবে একজন যে বেঁচে গেছে এটা তো ঠিক। ভাবতে শুরু করলাম, ‘কে সে? এই একই প্রশ্নের উত্তর পাওয়ার জন্যে মেজর আউংকেও আবার পুতাপাইয়ে আসতে হলো।’

‘কিন্তু আপনি তাঁকে চিনতে পারলেন কিভাবে?’

‘গুডফেলো নামে ওই ব্যক্তির সাবেক জীবন সম্পর্কে সচেতন কোন স্মৃতি ছিল না। কিন্তু অবচেতন? সেটা সম্পূর্ণ আলাদা ব্যাপার। ওরা যখন চার্চে হামলা চালাল, নিজের এবং ফাদার বেঞ্জামিনের প্রাণ বাঁচাবার জন্যে কোথেকে জানি না ড. হায়দার একটা ছেনি যোগাড় করলেন। অস্ত্র হিসেবে ছেনি খুব একটা কাজের জিনিস নয়, তাহলে ওটাই কেন বেছে নিলেন তিনি? আমরা সবাই জানি, একজন আর্কিওলজিস্টকে সাইটে ছেনি হাতেই কাজ করতে হয়। আসলে পুরনো অভ্যাসটা তাঁর অবচেতন মন ভোলেনি, দেখামাত্র ওই ছেনিটাই তাঁকে দিয়ে

তুলিয়েছে। তাঁর হাতে ছেনি দেখেই আরও খুঁটিয়ে তাকাই আমি। তখনই চিনে ফেলি। ড. হায়দারের মেয়ে ঋণী বাবার ফটো দেখিয়েছিল আমাকে, চেনার পর সেই ফটোর সঙ্গে মিল খুঁজে পেতে কোন অসুবিধে হলো না।

‘শেষ একটা প্রশ্ন, মাসুদ ভাই,’ বলল বৃষ্টি। ‘প্লেনটা তো স্যাবোটাজ করা হয়েছিল, তাই না? যেই করে থাকুক, তার উদ্দেশ্য ছিল ড. হায়দারকে খুন করা। নাকি ব্যাপারটা স্রেফ দুর্ঘটনাই ছিল?’

‘না, হত্যা প্রচেষ্টাই ছিল ওটা। এই রহস্যের সমাধান অনেক আগেই করেছিলেন মায়া মালহার।’

‘কে? কে ড. হায়দারকে খুন করতে চেয়েছিল?’

‘রায়হান সিদ্দিকী।’ বলল রানা। ‘ড. হায়দারের অতি বিশ্বস্ত ও অনুগত সহকারী।’

* ‘রায়হান সিদ্দিকী...কিন্তু, মাসুদ ভাই, তা কি করে হয়! রায়হান সিদ্দিকী ড. হায়দারকে অত্যন্ত শ্রদ্ধা করত, সে তাঁর ছাত্র ছিল...’

‘রায়হান চায়নি তার শিক্ষক অন্যায়ের কাছে নতি স্বীকার করুন। তার ধারণা ছিল সে ড. হায়দারের উপকার করেছে। খুন হয়ে গেলে তো আর তিনি অন্যায়ের সঙ্গে আপস করতে পারবেন না। রায়হান সবই জানত। মায়া মালহারকে বাঁচাবার জন্যে ড. হায়দার মিথ্যে রিপোর্ট লিখে ইয়ানগনে নিয়ে যাচ্ছিলেন আইএসআই যে শেষ পর্যন্ত ড. হায়দার ও মায়া মালহারকে খুন করবে, তা-ও সে আন্দাজ করতে পেরেছিল। সংক্ষেপে, সে দেখতে চায়নি তার আদর্শ শিক্ষক একটা মেয়ের জন্যে এত বড় অপরাধ করে বসেন।’

‘রায়হানই তাহলে এয়ারস্ট্রিপে মেকানিককে প্লেন স্যাবোটাজ করার জন্যে ভাড়া করেছিল?’

‘হ্যাঁ। নিজের জন্যে ভালই একটা অ্যালিভাই তৈরি করেছিল রায়হান। এয়ারস্ট্রিপের কাছাকাছি এক গুঁড়ির দোকানে গিয়ে মদ খেয়ে মাতলামি শুরু করে সে, সবাই যাতে বিশেষভাবে লক্ষ করে তাকে। বাড়াবাড়ি করায় পুলিশ তাকে গ্রেফতার করে। পরদিন হাজত থেকে ছাড়া পেয়েই ও মেকানিক লোকটাকে খুন করে।’

‘ওহ্, গড!’

‘যা বললাম তার বেশির ভাগই আন্দাজ করে বলা। এ-সব সত্যি বা মিথ্যে বলে প্রমাণ করা সম্ভব নয়। তবে মায়া মালহার নিশ্চিত। তিনি আমাকে যা বলেছেন আমি তা ভুলি কি করে। বলেছেন, ইচ্ছে করলেই নিজের লোকজনকে দিয়ে রায়হানকে খুন করাতে পারতেন, কিন্তু অপরাধবোধ নিয়ে বেঁচে থাকতে দেয়াটাই তার উপযুক্ত শাস্তি বলে মনে করেন তিনি।’

‘রায়হান এখন কোথায়, মাসুদ ভাই?’

‘ওই মদই তাকে শেষ করেছে। শেষ দিকে ভাত, পানি কিছুই ছুঁতো না, সারাক্ষণ মদ খেত। দেশেও কোনদিন ফেরেনি। লিভার সিরোসিসে দু’বছর হলো মারা গেছে।’

অনেকক্ষণ আর কোন কথা হলো না। দু'জনেই যে যার ব্যক্তিগত চিন্তায় ডুবে থাকল।

অনেকক্ষণ পর নিস্তব্ধতা ভেঙে রানা বলল, 'একটা কাজের কথা ভুলে যাব। সেই মেয়েটাকে, রুজকে, বলবে সময়ের অভাবে আমি তার সঙ্গে দেখা করতে পারলাম না। বলবে, যারা তার জন্যে হুমকি হয়ে দাঁড়াতে পারত তারা কেউ বেঁচে নেই। এখন সে সেফ হাউস থেকে নিজের ফ্ল্যাটে ফিরে যেতে পারে।'

'ঠিক আছে, বলব।' মাথা বাঁকাল বৃষ্টি। 'আপনি কিন্তু লন্ডনে পৌঁছেই রিপ্রেসেন্টেঁর ব্যবস্থা করবেন। আমি একা সব দিক সামলাতে পারব না।'

'হ্যাঁ, অবশ্যই।' হঠাৎ হাসল রানা। 'আরেকটা কথা, বৃষ্টি। এবার যাদেরকে পাঠাব তারা তোমার বয়স, রুচি, শিক্ষা ও যোগ্যতার সঙ্গে বেমানান হবে না। আমি বলতে চাইছি, তাদেরকে অন্তত একটা সুযোগ দিয়ে দেখো। কে জানে, একজনকে হয়তো তোমার মনে ধরবে।'

'ধন্যবাদ, মাসুদ ভাই।' হেসে উঠল বৃষ্টি। সেটা জোর করে কিনা বলা মুশকিল। 'এড়িয়ে যাবার আপনার এই কৌশলটা শিখে রাখলাম, ভবিষ্যতে কাজে লাগতে পারে।'

রানা কিছু বলতে গিয়েও বলল না। ওর আসলে কিছু বলার নেইও।
